

**PRUDENTIA EXIMIJ
ASCETAE,
VENERABILIS PATRIS
LUDOVICI DE PONTE, È
SOCIETATE JESU, IN...**

Johannes Tanner, Vincenzo Marini




7	NAZIONALE	7
11	8	
400		
11		
2	ROMA	2

BIBLIOTHECA CENTRALE V. E. II

Ex Bibliotheca
majori Coll. Rom.
Societ. Jesu

76/13226

F 10
f



8.40.0.11

11.27.2.24

578.22

26.2.1904

11.27.2.24



3

—

PRUDENTIA
EXIMII ASCETÆ,
VENERABILIS PATRIS
LUDOVICI

DE
PONTE,
SOCIETATE JESU,
IN EXAMINANDIS, ac approbandis
VENERABILIS VIRGINIS
MARINÆ DE ESCOBAR
Divinis Revelationibus

RELUCENS,

Et

VINDICATA,

Per

R. P. JOANNEM TANNER,
Ejusdem Societatis Theologum.



PRAGÆ,

Typis Universitatis Carolo-Ferdinandæ, in Collegio Soci-
etatis JESU ad S. Clementem. 1698.



PROTESTATIO AUTHORIS.

CUm S. D. N. Urbanus Papa VIII. die 13. Martij 1625. Decretum ediderit, idémque confirmárit die 5. Julij 1634. quo inhibuit imprimi libros, hominum qui sanctitatis seu martyrij famâ celebre sè vitamigraverint, gesta, miracula, vel revelationes, seu quæcunque beneficia tanquam eorum intercessionibus à DE O accepta continentes, sinè recognitione atque approbatione Ordinarij; & quæ hæctenus sinè ea impressa sunt, nullo modo vult censeri approbata.

Idem autem Sanctissimus die 5. Junij 1641. ita explicuerit, ut nimirum non admittantur elogia Sancti vel Beati absolutè, & quæ cadunt super personam, bene tamen ea, quæ cadunt super mores & opinionem, cum protestatione, quòd nulla eis adsit autoritas ab Ecclesia Romana, sed fides tantùm sit penes authorem.


Huic decreto ejúsque confirmationi & declarationi, observantiâ ac reverentiâ, quâ par est, insistendo, profiteor me haud alio sensu, quidquid in hoc libro refero, accipere, & accipi ab ullo velle, quàm quò ea solent, quæ humanâ ~~duntaxat~~ auctoritate, non autem divinâ Catho-

licæ Romanæ Ecclesiæ, aut S. Sedis Apostolicæ ni-

tuntur: ijs tantummodo exceptis, quos eadē

S. Sedes Sanctorum, Beatorum, aut Martyrum Catalogo adscripsit.





INDEX

Tractatum & Caputum in hoc Opere Contentorum.

Ingressus in Librum & occasio scribendi pag. 1.

*Tractatus I. Modus examinandi Revelationes &
Documenta, quæ ad discretionem spirituum
pertinent.* pag. 44.

*Caput I. Dantur in Ecclesia DEI Re-
gula Discretionis Spirituum & re-
velationum.* pag. 44.

*Caput II. Fides, quæ talibus Revela-
tionibus creditur, non est ea Fides
Theologica principalis, quæ est fun-
damentum Virtutum supernaturalium:
ad eam tamen reducitur.* pag. 46.

*Caput III. Regula discernendarum
Revelationum, Extasum, Visionum,
Raptuum collecta ab Alphonso Epi-
scopo Giennensi.* 49.

*Caput IV. ~~Super~~ signa visionis à bo-
no Spiritu proficiscens, ab eodem
Episcopo Alphonso annotata.* 53.

*Caput V. Doctrina calitus S. Brigit-
ta revelata circa Spirituum Di-
scretionem.* 55.

Caput VI. Regula discernendarum

*Revelationum tradita à Cardinali
Joanne de Turrecremata.* 59.

*Caput VII. Joannis Lanbergij Car-
thusiani Sensus de Revelationibus
Sanctarum Mulierum.* 61.

*Caput VIII. Documenta Venerabilis
P. Ludovici de Ponte, circa discre-
tionem spirituum.* 68.

*Caput IX. Sex magis particulares
Regula ad spiritus discernendos,
data à Ven. P. Ludovico de Ponte.* 73.

*Caput X. Sensus multorum aliorum
prater Ven. P. Ludovicum de Pon-
te, Virorum præstantium de Vita &
Revelationibus Ven. Virginis Mari-
na de Escobar.* 78.

*Caput XI. In Cælestibus Revelationi-
bus credendumne est soli unicæ Per-
sonæ asserenti.* 83.

*Tractatus II. De Vita, Virtutibus, Prudentia & Scien-
tia Ascetica, Vener. Patris Ludovici de Ponte.* 87.

Caput I.

INDEX.

Caput I. Ortus ejus, & Ingressus in Societatem, ac Obitus ejus. 88.

Caput II. Quadam de Virtutibus Ven: P. Ludovici, ex processu pro ejus Canonizatione. 91.

Caput III. Fides, Spes, & Charitas Venerabilis Patris Ludovici de Ponte. 94.

Caput IV. Studium Perfectionis, & Religiositas. 97.

Caput V. Humilitas, & Patientia Vener: Patris Ludovici. 100.

Caput VI. Orationis studium. 103.

Caput VII. Quadam de Ven: P. Lu-

dovico celitus revelata eo vivente, 106.

Caput VIII. Aliqua min circa Ven: P. Ludovicum de Ponte. 109.

Caput IX. Estimatio gravissimorum Hominum de Venerabili Patre Ludovico de Ponte. 112.

Caput X. De Venerabilis Patris Ludovici statu post mortem aliqua Revelationes. 117.

Caput XI. De Translatione Corporis Venerab: Patris Ludovici de Ponte. 123.

Pars II. Prudentia, Discretio spirituum, & alia ad Magisterium spiritus spectantia Venerabilis P. Ludovici de Ponte. 126.

Caput I. Prudentia Venerabilis Patris Ludovici de Ponte. 127.

Caput II. Rerum caelestium infusa contemplatio. 129.

Caput III. Donum Prophetia, & cognitio secretorum cordium. 131.

Caput IV. Revelationes Ven: Patris Ludovici. 135.

Caput V. Magisterium spiritus in Venerabili P. Ludovico. 140.

Caput VI. Libri à Venerabili P. Ludovico de Ponte pleni Scientiâ mysticâ conscripti. 146.

Caput VII. Venerab: P. Ludovicus de Ponte datus à DEO Magister Orationis & Spiritus. 149.

Caput VIII. Quomodo Venerabilis

P. Ludovicus de Ponte approbavit Vitam, & Revelationes Venerabilis Virginis Marina de Escobar. 153.

Caput IX. De eximia Scientiâ mystica Ven: Virg: Marina de Escobar, cognita Venerabili Patri Ludovico. 156.

Caput X. Introductio Ven: P. Ludovici de Ponte Soc: JESU ad primâ Partem Vita Venerabilis Marina de Escobar. De Praestantia, Utilitate, & Certitudine illius Historia 160.

Caput XI. Revelatio specialis de Excellentia Venerabilis Patris Ludovici in Magisterio spiritus. 174.

Tracta-

INDEX.

Tractatus III. De Sanctitate Vitæ, nec non de altissima Scientia Ascetica, ac Spirituum Discretione Ven: Virg: Marine de Escobar. 177.

Pars I. Vita, Sanctitas Vener: Virginis Marine de Escobar. 179.

Caput I. Ortus ejus, & Ætas prior. 179.

Caput II. Ætas ejus posterior. 185.

Caput III. Humilitas Ven: Virginis Marine. 189.

Caput IV. Mortificatio & Patientia Venerabilis Virginis Marine de Escobar. 195.

Caput V. Rabies Daemonis. 205.

Caput VI. Paupertas Venerabilis Virginis Marine. 209.

Caput VII. Castitas Venerabilis Virginis Marine de Escobar. 214.

Caput VIII. Obedientia Venerabilis Marine de Escobar. 218.

Caput IX. Virtutes Theologicae ac Cardinales Ven: Marinae. 223.

Caput X. Caritas erga Proximum 227.

Caput XI. Quadam à Venerabili Marina prædicta Hispania. 232.

Pars II. Præsentia Magisterium Spiritus, & Scientia mystica Venerab: Virg: Marine De Escobar. 197.

Caput I. Rara Ven: Virginis Marine in omnibus Prudentia. 297.

Caput II. Spiritus Prophetia Vener: Virginis Marine. 303.

Caput III. Instructiones circa viam spirituales, præsertim pro incipientibus. 310.

Caput XII. Venerabilis Marina, Gustavum Adolphum Regem Sueciae Hæreticum prostravit. 237.

Caput XIII. Revelationes prævia de morte Ven: Marinae. 243.

Caput XIV. Mors Venerabilis Marine de Escobar. 251.

Caput XV. Funus Venerabilis Marine de Escobar. 259.

Caput XVI. Exequia Venerabilis Marine. 265.

Caput XVII. Speciale Compendium Vitæ Ven: Marinae. 270.

Caput XVIII. Miracula Venerabilis Marine. 277.

Caput XIX. Testimonia de Sanctitate Venerabilis Marine. 282.

Caput XX. Interrogatorium circa facta egregia Dominae Marine de Escobar, quæ, ferè jam undecies sunt comprobata. 285.

Caput IV. Sanctus hujus Virginis Timor, & Propensio ad viam ordinariam. 315.

Caput V. De discernendo bono spiritu, à spiritu proprio. 321.

Caput VI. De illusionibus & fallaciis in via mystica. 325.

Caput

INDEX

Caput VII. *Quomodo demon non sci-
at simulare omnia opera DEI.* 333.

Caput VIII. *Signa pro discernendis
spiritibus.* 336.

Caput IX. *Quomodo Anima cogno-
scat DEUM per viam divina inter-
na Communicationis ex Allocutio-
ne, Visione, & Operatione.* 339.

Caput X. *De vera atque perfecta vir-
tute, itémque de falsa & fucata.*
343.

Caput XI. *Quenā Virtus ac Disposi-
tio requiratur in Anima, cui Divi-
ne fiant Revelationes.* 347.

Caput XII. *Quomodo oporteat esse
dispositam Animam, ut DEUS se
illi communicet loquatúrque inter-
nè: & de varijs gradibus, per quos
ipsam ducit.* 350.

Caput XIII. *De varijs modis, quibus
se DEUS supernaturaliter commu-
nicat Animabus, & quibus ipse il-
lum in ista communicatione cogno-
scunt.* 355.

Caput XIV. *De modo, quo se DEUS*

*Tractatus IV. Quantum ex mirabili Vita Venerabilis
Virginis Marine de Escobar confirmationis accipiat
Sancta Fides Catholica.* 401.

*Pars I. Quæ ad libros Sacre Scripturæ confirmandos per-
tinent.* 403.

Caput I. *Loci & textus in Libris
Moyſis, qui ex Revelationibus Ve-
nerab: Marine de Escobar confir-
mantur, vel inſtruuntur.* 403.

Caput II. *Textus, qui ex Libris hi-
ſtoricis Veteris Teſtamenti in Vita*

*communicat parti superiori Anima
ſine imaginibus aut figuris, inferi-
ori autem per has figuras & ima-
gines; & qualiter illas diabolus
poſſit imitari.* 357.

Caput XV. *Qualē oporteat eſſe Con-
feſſarium ac Ducem ſpiritus Anima
habentis celeſtes Revelationes.*
361.

Caput XVI. *Documenta pro Direc-
toribus animarum ſanctarum.* 364.

Caput XVII. *Quales debeant eſſe ſu-
periores Religioſorum.* 370.

Caput XVIII. *Venerabilis P. Ludo-
vicus prudenter fidem habuit reve-
lationibus Venerabilis Virginis Do-
mina Marine de Escobar.* 372.

Caput XIX. *ſenſus Ven: P. Ludovi-
ci de Ponte de myſtica & experi-
mentalī Scientiā ſpiritus Venerabi-
lis Marine de Escobar.* 377.

Caput XX. *Hiſtoria mortis Domini
Roderici Calderon Marchionis Se-
ptem Eccleſiarum.* 381.

Ven: Marine confirmantur. 413.

Caput III. *Textus Librorum Prophe-
ticorum S. Scripturæ illuſtrati.*
419.

Caput IV. *Sanctos Evangelistas de-
ſcribit Ven: Marina.* 425.

Caput

INDEX.

Caput V. *Loci quidam Sancti Evan- gelij declarati.* 426. Caput VI. *Textus ex Epistola S. Ju- dae Thadai.* 434.

Pars II. Complectens ea, quae de Divinitate, & Divina Trinitate ad Sanctam nostram Catholicam Fidem spe- Etantia in mirabili Vita Venerabilis Marina adbiben- tur. 435.

Caput I. *De DEO.* 435.

Caput II. *De Attributis Divinis.* 440.

Caput III. *De Providentia DEI, & praedestinatione.* 445.

Caput IV. *De Sanctissima TRINI- TATE.* 460.

Caput V. *De Divinis Personis in par- ticulari.* 464.

Caput VI. *De Spiritu Sancto.* 467

Caput VII. *De septem donis Spiritus Sancti.* 470.

Caput VIII. *De Pentecoste.* 475.

Pars III. De Creatione Mundi & Angelis 481.

Caput I. *De Creatione Mundi.* 481.

Caput II. *De Angelis.* 483.

Caput III. *De Angelis Custodibus.* 490.

Caput IV. *De SS. Archangelis Mi- chaele & Gabriele.* 500.

Caput V. *De Diabolis.* 507.

Pars IV. Vita Christi Domini & Beatissima Virginis. 516.

Caput I. *De Incarnat: Filij DEI.* 517.

Caput II. *De SS. Progenitoribus Christi Domini.* 528.

Caput III. *De Immaculata Conce- ptione Beatissima Virginis.* 540.

Caput IV. *De Nativitate Beatissi- ma Virginis DElpara.* 564.

Caput V. *De Resurrex- Depon- satione ac Vita Beatiss: Virg:.* 567.

privata Beatissima Virginis. 567.

Caput VI. *De Annuntiatione Bea- tissima MARIE Virginis.* 569.

Caput VII. *De Visitatione Elisabethe & S. Joannis Baptiste.* 576.

Caput VIII. *De Passione Domini.* 580.

Caput IX. *Mysteria gloriosa Vita Christi D.* 581.

Pars V. Complectens ea, quae ad Fructus ex Incarnatio- ne Filij consecutos pertinent. 583.

Caput I. *De Ecclesia.* 584.

Caput II. *De Ecclesia militante.* 585.

Caput III. *De Ecclesia Triumphan- te.* 587.

Caput IV. *Articulus Decimus. Re- missionem peccatorum.* 589.

Caput V. *Articulus Duodecimus. Vitam aeternam.* 592.

Tracta-

**Traëtatus V. Documenta Moralia ex Revelationibus
Venerabilis Marinae de Escobar in S. Ecclesiae commo-
dum redundantia. 593.**

Caput I. De statu peccatorum, de
Miserijs hujus Vita, ac de Pœni-
tentia. 594.

Caput II. De Humilitate, Paupertate,
Castitate, Obedientia & Pati-
entia. 595.

Caput III. De Oratione, & Revela-
tionibus. 597.

Caput IV. Conformitas cum Divi-
na Voluntate, Amor DEI & Pro-
ximi ac suprema Perfectio. 599.

Caput V. Documenta Venerabilis
Marinae, ut & ab ea data. 600.

Caput VI. Quaedam de statu publi-
co. 601.

**Traëtatus VI. De nimio Amore DEI erga homines, per
nimiam erga Sanctos familiaritatem, & blanditias
nimias declarato. 602.**

Caput I. Cur necesse sit, praesertim in
novo Testamento tantas blanditias
Sanctis à DEO exhiberi. 602.

Caput II. Cur DEUS nulli alteri san-
cta Persona tantos blandi Amoris
Favores, quàm Ven. Marina exhi-
buerit. 605.


Caput III. FAVOR & Blanditia Divi-
na erga S. Gertrudem Abbatissam
Elpidianam ex Prologis, & Libro
primo ac secundo Revelationum col-
lecti. 610.

Caput IV. Favores Divini ex Libro 3.
Revelationum Sanctae Gertrudis.
616.

Caput V. Blanditia Caelestes ex Libro
4. Revelationum Sanctae Gertrudis
selecta. 627.

Caput VI. Ex Revelationibus Sanctae
Mechtildis. 634.

Caput VII. Exempla variarum cale-
stium blanditiarum diversis San-
ctis exhibitarum. 640.



2

—

INGRESSUS IN LIBRUM SEQUENTEM, & OCCASIO SCRIBENDI.

Pater Rodericus de Arriaga Hispanus Lucroniensis, SS. Theologiæ Doctor, à Libris Theologicis Orbi notus, Anno 1623, Pragam venit, ubi post prælectam Theologiam, Cancellarium egit Academiæ Ferdinandæ, ac dein post unionem utriusque Academiæ Pragensis, quando officium Cancellarij Universitatis Carolo-Ferdinandæ est consignatum in perpetuum Celsissimo Principi Archi-Episcopo Pragensi, ipse in eadem Universitate ad obitum usque officium Decani Theologiæ sustinuit, scholisque Societatis IESU, præfuit Generalis Præfectus Studiorum.

Is in familiaribus Pragensi in Collegio colloquijs plurima solebat narrare de admirabili Vita & Virtutibus Virginis Marinx de Escobar, tunc adhuc Vallisoleti superstitis, tantâ æstimationis & pietatis significatione, ut oculos identidem elevarret in cælum, & tanto ardore, ut quasi sui, omniumque aliorum, quæ præ manibus tunc habebat, oblitus, totus in narrationem

A

nem

nem illam indefatigabilis abriperetur unice, ut appareret, cum sibi in admirandis à DEO Venerabili illi Virgini concessis donis deprædicandis, satisfacere planè non posse. Vehementer exultabat eam quondam sibi felicitatem obtigisse, quòd intra cubiculum proximum, ad quod ipsa per apertum parietem è lectulo suo perspicere poterat, Sacrum Missæ Sacrificium ipsi audienti sæpiùs celebraverit, Sacro-Sanctam Communionem porrexerit, atque ad ejusdem alloquium sit quandoque admisus, ità ut etiam An. 1622, à sancta Obedientia in Bohemiam destinatus, abiturus ei valedixerit; quæ promiserit, se iter ejus CHRISTO Domino in primo, quo eam dignatus fuerit visitare, congressu commendaturam. Narrabat de horrendis ejus à morbis, atque à Dæmone cruciatibus, deque stupenda ejus, & tam diurna tunc ultra 30. annos, postea adhuc ulteriùs protracta Patientia.

Et quia Pater Ludovicus de Ponte Societatis JESU, Virginis illius erat Confessarius, & Ductor Spiritualis, eadem occasione attingebat Sanctitatem, & Virtutes hujus Servi DEI, quem ipse suum etiam dum Philosophiam doceret, Studiorum Præfectum, familiariter noverat, cujus quoque apud DEUM merita, ipse testis oculatus tanti faciebat, ut ejus paulò antè eodem Anno 1623. mortui, iconem haberet, in sui cubicelli privato altariolo, cujus etiam cœleste patrociniū, magna cum reverentia invocabat, mihi que (utpote præ alijs familiariori) sæpius specialibus pietatis signis declarabat, ~~quantam~~ de ejus Sanctitate æstimationem haberet. Quæ quidem cum ego toties non tantum jam in Societate (quam An. 1641. ætatis 18. absoluto ingressus sum) verum etiam sæcularis adhuc studiosus, præsertim Poëta privatim in octiduanis mense Octobri Sacris (quæ tunc eo Directore & quotidiano non obiter Visitatore, quin & alioquin ordinario Confessario peregi) Exercitijs, ipsissimo post Bohemiam maximâ parte à bustuarijs Svecis

cis Duce Panirio incineratam, Anno millesimo sexcentesimo quadagesimo Societatis JESU sæculari audivissem; fieri non potuit, quin exardescerem in piam erga Ven. Virg. Marinam de Escobar inclinationem, omnisque de illa narratio esset mihi piè dulcis. Unde etiam, quidquid de illa rescire potui, tanquam gemmas pretiosas statim in adversaria mea referebam.

Quia autem eodem tempore libri Ascetici P. Ludovici de Ponte hic Pragæ à P. Melchiore Trevinnio Societatis JESU, ex Hispanico in Latinum circa Annum Domini 1610. translati, & Colonia Agripinæ An. 1612. typis vulgari cæpti terebantur manibus omnium, ita ut ego puer Grammatista in hoc, cui nunc præsum, Convictu S. Bartholomæi Pragæ, jussu mei in Congregatione Beatissimæ Virginis Instructoris cujusdam piissimi Alumni Ecclesiastici Pontificij, debuerim Tiro pro pio meo usu describere quædam de Examine Conscientiæ, ex ejusdem P. Ludovici Tomis de Perfectione (quos quidem devotus ille Alumnus diu nocturne versare videbatur) ideo mirum non est, quòd nos omnes, qui R. P. Rodericum de Arriaga audiebamus, magno etiam devotionis sensu erga Venerabilem P. Ludovicum de Ponte accenderemur: prout & Compendiolum quoddam vitæ ejus inter nos Juniores volitabat, cujus exemplar & ego mihi tunc descripsi. Omnes autem latè Provinciæ adjacentes erant per annos hos in certa spe, & expectatione ejus Canonizationis.

Interposita dein tot annorum intercadine, ecce ad Annum 1671. improvisò manibus meis, tunc munus Cancellarij Academiæ Olomucensis in Moravia sustinentis, affertur manu scriptus Latinus grandis Tomus Mirabilis Vitæ Venerabilis Virginis Marinæ, compositus à Venerabili P. Ludovico de Ponte. Involavi præ gaudio, statimque aviditate maximâ legendo, librum totum, ut sic loquar, devoravi. Et quidem auctoritas P. Ludovici, ac summa Sanctitatis ejus, & sacræ Scien-

riæ, totâ jam Christianitate vulgatæ æstimatio, omnia ità per-
ruperat, ut nullibi hæsitarem, omnia sancta, omnia præstantia,
omnia securissima ratus, quæ tantus in Ecclesia Vir probavisset.
Relegi secundo ac iterum iterumque plurima, inter quæ
etiam bene advertēbam, esse multa, quæ considerationem pro-
vocarent, nisi tantâ Viri tam incomparabilis autoritate fulci-
rentur, ut satis manifestum esset, Virum illum Divino sanè con-
silio fuisse Venerabili illi Virgini Marinæ à confessionibus da-
tum, ut Revelationes hæc fidem invenirent. Interea vidi non
deesse viros, qui adversus Revelationes has commoverentur,
adeò, ut vitam hanc, non eo, quem Author tantis titulis, tam
eximius merebatur, habendam loco, putarent, ità ut Latinum
Interpretem, tum ibi præsentem Patrem Melchiorem Hanel
operæ suæ pœnitere, atque à labore ulteriori abhorrere vi-
derem.

Quare pro meo erga Venerabilem P. Ludovicum, ut &
erga Venerabilem Marinam reverentissimo affectu, judicavi
meorum esse partium, ut & P. Melchioris Hanel animos usque
ad opus typis absolvendum confirmarem, & opus ipsum, quan-
tum per tenuitatem valerem, fide esse dignum declararem.
Quapropter arrepto calamo eam elaboravi Epistolam, quæ ty-
po præfixa fuit operi Pragæ An. 1672. edito, & Augustissimo
Imperatori LEOPOLDO I. dicato, cujus quidem eum fructum
extitisse gaudeo, quòd, & aliorum narratione, & propriâ non-
nullorum Virorum Religiosorum confessione intellexerim
Epistolam illam, tanti apud eos fuisse, ut Vitam illam ac Re-
velationes, à quibus alioquin abhorruerant, inciperent vene-
rari. Eam igitur necessariò hic proponendam
judicavi.

IN

Et occasio scribendi.

IN MIRABILEM VITAM
VENERABILIS
VIRGINIS
MARINÆ
DE ESCOBAR,

à REVERENDO PATRE
LUDOVICO DE PONTE
SOCIÉTATIS JESU

Sex Libris Hispanicè comprehensam,
DISSERTATIO PARÆNETICO-
APOLOGETICA,

Scripta

Ad Reverendum Patrem MELCHIOREM
HANEL Societatis JESU, ejusdem Vitæ
Latinum Interpretem,

à Reverendo Patre JOANNE TANNER,
ejusdem Societatis Theologiæ Doctore.

Ingressus in Librum sequentem,
Reverende in CHRISTO Pater.

I.

Quemadmodum liquidissimo perfusus sum gaudio, quamprimum à tot jam annis expectatam non minùs à sanctissimarum virtutum exemplis, quàm coelestium Revelationum luce verè mirabilem Venerabilis Marinæ de Escobar, Vallisoletanæ Virginis, Sanctimonialium Ordinis S. Brigittæ in Hispania Fundatricis, Vitam latinè jam conscriptam, & typis destinatam vidi, totàmque accuratissimè iterum iterùmque perlegi: ità profectò posteaquam Reverentiam Vestram (cujus diligenti, ac pio studio Opus hoc Romanâ donatum civitate habemus) intellexi nonnullorum obloquijs, quin & irrisionibus adeo commotam, ut laboris prope pœniteret, ac de ejus porrò ad plenam usque lucem promovendi cura abjicienda deliberaret, graviter sanè indolui, & mox de Reverentia Vestra in tam Sancto Opere confirmanda cæpi cogitare, nè thesaurus iste planè incomparabilis, publico bono subtraheretur. Et hoc quidem non putavi me facturum aptius, quàm si brevitate, quantâ per materiæ amplitudinem fieri posset maximâ, discussum quempiam Theologico-Asceticum conscriberem, in quo non solum solatium Reverentia Vestra inveniret, verùm & promptu haberet, quæ adversus ejusmodi cavillos opponere, & quibus ea, quæ objiciuntur retundere valeret: cum nimis clarum sit non paucis Catholicis etiam doctis ac Religiosis Viris, multa circa Revelationes in novo Testamento à DEO varijs hominibus, præsertim mulieribus concessas, nec libris Sacræ Scripturæ insertas, difficilia videri: adeò ut nec desint, qui eousque eas vilipendant, ut nec legere ipsi velint, nec ab alijs audire sustineant. Hoc autem fieri non potest sinè detrimento Animarum & Gloriæ DEI manifesto: dum enim Animæ devotæ & ad viam spiritûs unitivam utcunque dispositæ,

vi-

vident quempiam ejusmodi gravem virum, ad omnia, quæ in talibus Revelationibus proponuntur, stupentem, & quasi nihil horum sibi persvadeat, attonitum, quin & modesta quadam, subsannatione tanquam ridicula explodentem; fieri vix potest, quin & ipsæ ab his avertantur. Cum autem mirabilis Vita Venerabilis Virginis Marinæ de Escobar, sit præ alijs obnoxia, ejusmodi difficultatibus, ut quæ plenissima est talibus, quæ hominibus illis maxime displicent: quid mirum est, si apud aliquos vilipendatur? Neque dubito me Divinæ Majestati in hoc aliquod facturum obsequiolum, cum iste sit etiam scopus studij Theologici, ut ea quæ ad Sanctitatem Christiani populi conducunt, declaret, protegat, confirmet. Quæ ipsa de re memorabile est illud, quod ipsius hujus Vitæ lib. 2. cap. 12. §. 1. habetur, quomodo videlicet CHRISTUS Dominus postquam Venerabili Virgini Marinæ in specie pueri duodennis apparuisset, eique narrasset, quomodo in ea ætate cæperit coram Scribis & Legisperitis Sapiientiam suam in templo manifestare: & Messia adventum annunciare, subjecerit verba sequentia: *Et ecce quàm parum id ipsis profuit! vellem non ita etiamnum contineret, sed ut veritates & mysteria, quæ ego manifesto, ac declaro, Patribus Spiritualibus, & Ministris, quorum officium est illa explicare, ydem stabilirent, & credibilia redderent, quantum possunt, pro mea gloria & honore, ac bono Animarum, neque ea occultarent, & silendo infirmarent.* Sufficere equidem potuisset, & debuisset omnibus hanc Vitam lectoris sola auctoritas Ven. P. Ludovici de Ponte, tantæ sanctitatis, tantæ doctrinæ, tantæque prudentiæ Viri, à quo hæc, quæ sex prioribus libris continentur, sunt conscripta, præsertim cum præfixa introductione fundamenta certitudinis horum explicuerit: sed volunt aliqui dubitationibus suis pressò pede responderi: id quod quidem aggrediar, non tamen eâ spe, ut neminem amplius vel protervum superfuturum arbitrer, qui adhuc cœlestes has Revelationes infectetur,

etetur, cum sciam veritatem tanti non esse roboris, ut omnibus, etiam sine ulla ratione reclamare volentibus, os occludere, aut eos ad confessionem convictæ suæ falsitatis & proterviæ, invitos cogere possit: nam & in hoc ipso aliqui suam laudem reponunt.

§. I. *An in novo Testamento dentur aliquæ fide dignæ Revelationes Divinæ extra Sacram Scripturam.*

II.

SI in veteri Testamento inter signa credibilitatis non postremum fuit donum Prophetiæ, & Divinarum Revelationum: quantò magis debet in novo Testamento signum hoc veræ fidei eminere: prout reliqua omnia signa credibilitatis eminent, adeò, ut uni decadi Martyrum antiqui Testamenti, respondeant milliones Martyrum in novo Testamento; unusque Sanctus Christianus plura miracula fecerit, quàm in tota veteri Lege reperiantur. Jam ergo, quemadmodum non defecerunt homines spiritu prophetico ac dono revelationum præditi, quàm diu Lex vetus duravit; ità multò minùs debent deficere in Lege Gratiæ, usq; ad diem extremum. Bene Theophilus Raynaudus in Heterol. spirit. sect. 2. pun. 5. n. 26. Dubium, inquit, esse non potest, quin sint in omni ætate ac sæculo revelationes in Ecclesia DEI. Alioqui, ut sapienter admonuit Gerson, Tract. de Discretionem revelationum, revocari possent in dubium revelationes antiquæ, quæ æquè paterentur calumnijs, ac illæ quæ posterioribus temporibus, & ijs ipsis, in quibus vivimus, accidere comperiuntur. Ac proinde Gerson ingenia, quædam libera, quæ ad nomen revelationis, subito altè tollunt cachinnos, valdè insectatur in prædicto opusculo sub initium. Nec ijs parcat sub finem, qui ex eo, quòd unum aliquem delusum in revelationibus audierint, diffundunt ejus deceptionem ad omnes revelationibus donatos. Et verò nonne vel obiter rem inspi-

inspicienti statim apparet, debere etiam in hoc apparere excessum Gratiæ præ veteri Testamento, ut plurimi non minus frequenter ac familiariter DEO colloquantur, quàm collocutus sit Moyse, aut ullus Prophetarum veterum?

III. Nequetamen Libris Canonicis Sacræ Scripturæ sunt inferendæ omnes particulares Revelationes: nam & in veteri Lege dubium non est, multò plura fuisse Sanctis revelata, quàm in Sacram Scripturam fuerit insertum, cum etiam nominentur aliquot utriusque sexus Prophetæ, ex quorum prophetiis nec littera in sacris paginis legitur. Sic quoque in primitiva statim Ecclesia habemus ex Actis Apostolorum, fuisse Prophetas & Prophetissas, quorum revelationes non sunt annotatæ. Et verò quis credat DEUM nulli Sanctorum fuisse locutum, nisi qui in Sacra Scriptura referuntur? Immò potius cuius facillè occurreret, nullum futurum fuisse finem augendi libros Canonicos, si omne verbum DEI, cuicunque revelatum, eis fuisset adjiciendum.

IV. Sed tamen dicet adhuc aliquis: cur ergo Ecclesia saltem non determinat, quænam certæ vel incertæ sint fidei? Planè ac si quærerem: cur Ecclesia non determinet semper, quisnam verus sit Martyr, dum quispiam videtur pro virtute occidi? quodnam semper sit verum miraculum? quibus Doctorum libris sit, quibus non sit acquiescendum? nempe copia eam obruit. Ità profusa est erga eam Sponsi ejus CHRISTI Domini liberalitas. Qui enim sufficiat his omnibus, tantâ, quantâ opus est, diligentia examinandis? Unius Sancti Canonizatio quot annorum studia fatigat? ad unius libri suspecti condignam trutinam Concilia congregantur. Quid ergo si singulas in novo Testamento, tam copiosas revelationes simili studio excutere vellet? sufficit ergo quemadmodum in alijs libris præstantissimis, quòd viri in Theologia tam mystica, quàm speculativa & morali præclarè versati, nihil in eis inveniant dissonum & dis-

crepans ab eis, quæ Ecclesia tanto adhibito apparatu, vera esse pronuntiavit, utpote ad quæ, tanquam ad Lydium lapidem, reliqua quæ subinde nova emergunt, sunt examinanda: prout factum est cum multis lucubrationibus in Tomos SS. Patrum insertis, quibus tamen alia ab Ecclesiæ calculo autoritas non accessit.

V. Quanquam etiam Revelationes hujusmodi aliquas sumpsit sibi Ecclesia quandoque solenniter examinandas, ac approbandas, prout contigit Revelationibus S. Brigittæ Vi-duæ à Concilijs Constantiensi & Basileensi, nec non ab Urbano VI. Bonifacio IX. & Martino V. Romanis Pontificibus collaudatis, & commendatis: id quod videre quisque potest in ipso vestibulo harum revelationum, ubi hæ approbationes, unâ cum magnorum aliorum Virorum doctorum elogijs solent apponi.

VI. Nec majori opus erat approbatione ad eum, quem Divina Majestas in eis spectat, finem: nempe ut nobis auxilio essent ad salutem æternam: prout ad eandem nobis inserviunt scripta ac dicta à SS. PP. sapientiæ ac sanctitatis plenissima: ut & variæ historiæ fide planè dignæ, etsi non tantâ quantâ libri Regum, aut Apostolorum. Planè enim inepti esset hominis, nihil penitus, præsertim si rarum & admirabile appareat, velle pro vero agnoscere, nisi necessitas Divinæ Fidei ei imponatur. Ridemus sic delirantes hæreticos, qui dum per nimiam cautelam nihil, quod Sacrà Scripturâ non contineatur, volunt recipere: ipsammet Sacram Scripturam sibi eripiunt: imò sic nec sciunt se ritè baptizari, cum nullibi in Sacra Scriptura exstet, hanc, quæ eis superfunditur, esse veram aquam &c.

VII. Quanta autem etiam apud quosdam Catholicos sit hoc in genere morositas, patet: quia nec approbatio Ecclesiæ eis sufficit, siquidem & Revelationes S. Brigittæ aliqui nauseant: id quod etiam provenire potest ab aspera indole, aut prava

va

va consuetudine, vel denique etiam ex poena DEI, cujus justo iudicio non datur eis gratia, ut tantos thesauros possint ac sciant in occasiones coelestium meritorum adhibere: planè prout videmus fieri cum Indulgentijs, quas quidem aliquas in Ecclesia dari non dubitant, sed in particulari de singulis Indulgentijs sunt, qui dubitent: nunc quidem: an Pontifex sufficientem causam habuerit? nunc, an sufficiant opera præscripta? nunc alia, & alia examinando, semperque certitudinem majorem requiringdo, donec vita elabatur, & ipsi nullius Indulgentiæ fiant compotes.

VIII. Longè aliter ipsimet Summi Pontifices: apud quos quanta fuerit autoritas Revelationum S. Brigittæ, & S. Catharinæ Senensis, etiamnum in carne viventium, patebit legere volenti historiam Ecclesiasticam, ubi inveniet, earum præcipuè intuitu Sedem Apostolicam Avenione Romam rediisse. Inveniet etiam inter reliquas rationes, quibus Urbanus Romæ residens, verus fuisse Pontifex, adversarius verò ejus Clemens, schismaticus, probatur adferri à maximis Viris eam, quòd Sancta Catharina Senensis ità constanter asseruisset.

§. II. *Quænam sint in Ecclesia illæ Revelationes:
& an in his etiam Mirabilis Vita Venerabilis
Virginis Marine de Escobar.*

IX.

ET si Revelationes à DEO privatim hominibus sanctis in novo Testamento factæ sint innumerabiles, cum pauculi sint ex celebrioribus Sanctis, quibus non legatur Divina Majestas fuisse locuta: quædam tamen sunt prolixius annotatæ, quin & in speciales libros redactæ: de quibus ut generatim feratur iudicium, cæ solæ videntur admittendæ, quæ à doctissimis, sapientissimisque simul ac sanctissimis Viris diu probatæ,

multum excussæ, demum plurimum collaudatæ: ab Episcopis permissæ, ab Ascetis admissæ, ab Ecclesia DEI non reprobata sunt.

X. Antiquissimus ejusmodi Libellus est in Bibliotheca Sanctorum Patrum, cui titulus: *Hortus Pastorum*, continens Revelationes factas cuidam sancto Viro, nomine Hermeti, cujus libelli tanta jam olim fuit in Ecclesia æstimatio, ut ejus auctoritate ad tempus Paschati celebrando statuendum uteretur. Existat & Libellus Revelationum cujusdam Fratris Raimundi, aliorumque Virorum: sed longè celebriores, quia ad sanctitatem, & tencerrimam erga DEUM pietatem inflammandam longè opportuniore sunt, Revelationes Sanctarum Mulierum, quas inter autoritate eminet, grande volumen Sanctæ Brigittæ. Has videntur proximè sequi Dialogi cum DEO S. Catharinæ Senensis. Celeberrimæ præterea, atque à Ludovico Blosio, Joanne Lanspergio, aliisque sanctis æquè ac eruditissimis Viris laudatissimæ sunt Revelationes Beatarum Gertrudis atque Mechtildis, quas etiam Pater Ludovicus de Ponte unâ cum prædictis, ac cum Revelationibus S. Theresiæ, tanquam primarias, & notissimas, ac indubitatas, in sua Introductione commemorat. His accedunt Revelationes S. Elisabeth; præterea Vita B. Angelæ de Fulginio, Viduæ: Vita S. Magdalenæ de Pazzis: Vita B. Margaritæ de Orlona: Vita S. Franciscæ Romanæ, Viduæ: nec non B. Mariæ Oegniacensis itidem Viduæ: ac Vitæ Sanctarum Virginum Ludgardis & Lidwinæ: aliæque apud Bollandum.

XI. Post has omnes voluit Divina Majestas Sponsæ suæ Ecclesiæ veluti pro novo cimelio in ornatum mittere & has, de quibus agimus, admirabiles Revelationes Venerabilis Virginis Marinæ de Escobar, idque ob eas, quas P. Ludovicus de Ponte in sua Introductione refert, rationes: quæ etsi nondum ab Ecclesia eam certitudinem, quam Sanctæ Brigittæ, aut Sanctæ Catharinæ Senensis, vel Sanctæ Theresiæ acceperint, ob quas-

dam

dam tamen circumstantias peculiares, majorem etiam præ multis alijs merentur fidem.

XII. Et imprimis ob peculiarem Divinæ Providentiæ dispositionem, quòd tales ac tantos huic suæ famulæ dederit spiritus Directores, ac Revelationum harum Examinatores ac Conscriptores, idque ex duobus doctrinæ laude in Ecclesia, præcipuis Ordinibus, nempe Prædicatorum, & Societatis JESU, ex qua post quatuor pios & graves Viros, fuit quintus ejus Confessarius P. Petrus de Leon, Vir doctissimus & piissimus: qui non contentus omnem adhibere diligentiam in Revelationibus, quæ tunc huic Venerabili Virgini accidebant, excutientis: insuper consulebat alios Patres in domo Professorum Societatis JESU Vallisoleti, eisque ad plures dies trutinanda dabat, quæ jussu ejus ipsamet Venerabilis Virgo conscripserat: huic successit incomparabilis ille Vir à sanctitate, & doctrinæ Asceticæ excellentia Orbi notus, P. Ludovicus de Ponte, Theologiæ Doctör, ejusdemque per aliquot annos Professor, ac deinde supremus Vallisoleti Studiorum Præses, qui ob suos libros tenerrimâ pietate simul, ac exquisitâ Theologiæ Mysticæ, cognitione plenos, sæculi sui Bernardus à Viris præclaris appellatur. Hic ergo Vir à Spiritu Sancto tam illustratus, totos ferè 30. annos Vener. huic Virgini à Confessionibus, ac ultra 30. annos ejusdem Director, & in spiritu Magister, toto eo tempore in examen eorum, quæ divinitus tunc cum illa fiebant, intentus! non solum ea tanquam verissima, & nulli illusioni aut fraudi permixta agnovit, nec solum ea magno labore conscripsit, ac digessit: verum etiam egregiam partem futuræ suæ in cœlis gloriæ ob hunc librum speravit, adeò ut cum divinitus horam mortis suæ præscivisset, perrexerit usque ad pauculas ante mortem horas, nempe ad ipsum quodammodo lethalem agonem, ac ultimarum virium defectum, hæc ipsa Venerabilis Virginis Marinæ, tunc adhuc viventis, gesta, ac narrata ordinare, & an-

notare: quasi nullam aliam putaret se posse pro felici morte ob-
eunda præparationem DEO acceptiorem adhibere. Et verò
quàm vir ille fuerit sibi ipse de sufficienti quoad hæc dignoscen-
da peritia conscius, patet ex admirabili illo casu, quem ipsemet
refert in Vita Ven. Virg. Marinæ, L. 1. c. 19. §. 2. Quòd cum
existente Aulâ Regis Hispaniarum Vallisoleri, fuissent Vene-
rabilem Virginem aliqui Angeli allocuti, ut quandam Perso-
nam faceret ad quoddam publicum officium promoveri, eò
quòd id esset è gloria Divina futurum: ipsaque id P. Ludovico
Confessario suo exposuisset: noluerit ipse consentire ob certas
& graves rationes. Cùmque iterum iisdem Angeli apud Virgi-
nem pro eodem negotio instarent, asserentes nihil eorum, quæ
P. Ludovicus metueret, eventurum, nihilominus ipse in senten-
tia persistit, asserens, *se juxta regulas Christianas non posse assen-
tiri, nisi DEUS declararet id sibi placere, eò quòd diversa consue-
verint esse Angelorum Custodum sententia.* Et tamen hic tantus
Vir, quantopere suspexerit Venerabilem Virginem Marinam,
patere potest ex lib. 2. c. 25. ubi sic loquitur: *Revelationes ac
visiones recenscebimus de modo, quo re ipsa & verè CHRISTUS Do-
minus existit in Sacramento, quas mihi enarravit, deditque scri-
ptas, dum docerem Theologiam An. 1595. in nostro Collegio Valliso-
letano. Docebam autem tunc materiam de Eucharistia, atque hoc
punctum de transubstantiatione. Referebat mihi id talibus verbis,
& cordis affectibus, ut obstupefescens conferendo meas tenebras cum
tanta luce, dicerem: Confiteor tibi, Pater, Domine cæli & terra,
quia abscondisti hæc à sapientibus, & revelasti ea parvulis. Ità
Pater quoniam sic placitum fuit ante te.*

XIII. Hujus tanti viri vices quandoque Frater ejus ger-
manus P. Andreas de Ponte Ordinis Prædicatorum, Vir iti-
dem virtutis ac doctrinæ eximæ, supplebat, in Confessionibi-
bus ac Revelationibus excipiendis: qui & ipse maximi has re-
velationes faciebat, prout de eo narrat P. Ludovicus; ac de-

inde

inde pluribus refertur in Parte II. à P. Andrea Pinto Ramirez. Sed & alijs quibusdam præclaris ex S. Dominici familia Viris nonnunquam confitebarur, ac cœlestia hæc secreta manifestabat, prout videre est Lib. I. c. 32.

Alterum argumentum certissimæ harum Revelationum veritatis est Vita ipsa Ven. Virginis Marinæ sanctitate, & omnis generis virtutibus heroicis fulgentissima: de quo cum P. Ludovicus de Ponte in sua Introductione præclare differat, non est, cur hic amplius exaggeretur.

XIV. Tertium argumentum itidem à P. Ludovico inductum, est ipsa excellentia harum Revelationum undique Divinum quid spirantium. Tanta profectò tamque sublimia in eis traduntur ad virtutes altissimas, ad discretionem spirituum, ad gubernationem animarum pertinentia lumina, & documenta, ut omnes mundi Doctores, sine speciali ac extraordinariè sublimi Spiritûs Sancti illuminatione, nullo modo, solo lumine naturali scientiarum, tale quid excogitare, multoque minùs omnes hæretici aut quicunque impostores, quocunque etiam malignorum spirituum auxilio confingere possint. Videatur vel solus liber 5. à cap. 22. ubi ex professo tractat doctrinam altissimarum virtutum, & gubernationis Animarum.

XV. Quartum Argumentum est à valde specialibus circumstantijs, temporis & loci, aliisque, in quibus hæ Revelationes acciderunt. Sciendum namque est Virginem hanc in ea, tempora incidisse, in quibus universa Hispania fuit gravissimè adversùs mulierum Revelationes exulcerata, eò quòd paulò antè non modò populus, verùm & Viri ex omni statu summi, ipsique scientiarum, & Academiarum, quin & Ecclesiæ pariter ac Aulæ Regiæ togâ sagòque Principes, à muliercula quadam dæmoni devota Ulyssipone, pudendam planè passi fuissent imposturam, tam acerbo sensu doloris, ut is etiam putetur Viro cuidam Magno vitam extorsisse, qui tam propudiosæ suæ illusionis

nis verecundiam non potuerit sustinere. Cùm ergo ad ea ipsa tempora Ven. Virg. Marinae Revelationes cœperint propalari, necesse est omnem odiorum & acerbissimarum lingvarum procellam in eam fuisse conversam, ut omnia ejus gesta dictave, ac omnes visiones essent omnibus suspectissimæ, atque in earum omnium reprobationem, quin & detestationem, propenderent universi. Et tamen postquam & in conspectu tribunalium & Inquisitionis, & in præsentia ipsorummet sapientissimorum Regum, totiusque Aulæ Regalis, & in oculis Universitatum: verbo, in luce totius Hispaniæ Revelationes hæ fuissent facile 40. annis, continuatæ, multum divulgatæ, trutinatæ, atque haud dubiè exagitatæ, uno quodammodo ore omnium tam sæcularium quàm Religiosorum Doctorum, Inquisitorum, Episcoporum, Universitatum, sunt pro sanctis & cœlestibus agnitæ, collaudatæ, proclamatæ: adeò ut in quadam post ejus mortem Concione nonnemo Ecclesiastes, vel hinc eam verè sanctam, verè à DEO Divinis Revelationibus honoratam, cum plausu Auditorum probaverit, *eò quòd in hoc asserendo specialibus convenerint affectibus Patres Dominicani, & Patres Societatis JESU, cùm, etiamsi in alijs, adeò sint differentes eorum sententia, non tamen discrepaverint, imò summè fuerint uniti, & concordēs in perhibendo vero Testimonio, quòd fuerit Spiritus DEI, qui in illa tam admiranda est operatus.*

XVI. Quintum argumentum est ab ingenti hujus etiamnum viventis Virginis apud summos Viros æstimatione & auctoritate. Societatis nostræ Præpositus Generalis P. Claudius Aquaviva, Vir inter suæ ætatis sapientissimos meritò recensendus, ejus apud DEUM precibus statum Societatis universæ commendavit. Patres Hispaniæ Visitatores ex eadem Societate in rebus difficilibus ad ejus apud DEUM opem, quin & ad ejus consilia, & divinitus reddenda responsa recurrebant. Ipsa Regi Hispaniarum Philippo III. binas DEI jussu misit epistolas,
de

de negotio Immaculatæ Conceptionis Beatissimæ Virginis DEIPARÆ: ut & ad P. Dominicum Pimentellum Provincialem Hispaniæ Ordinis Prædicatorum. Quin ex eodem Divino jussu scripsit hæc de re ad ipsummet Reverendissimum ejus Ordinis Generalem, bono, prout ipsa divinitus intellexit, successu. Ejus præcipuè intuitu imposita est Concionatoribus per Hispanias Lex, nè sermonem ad populum incipiant, nisi prius laudem Immaculatæ Conceptionis Beatissimæ Virginis **MARIÆ** pronuntient. Ipsa instruebat suos proprios Confessarios, ipsumque P. Ludovicum de Ponte, quomodo regendæ essent Animæ, & spiritus discernendi. Instruebat etiam Præsides & Superiores Religiosorum de modo suos subditos ad DEI beneplacitum gubernandi, prout videre est Lib. 5. ac specialiter in Epistola ad Provincialem Hispaniæ Ordinis Prædicatorum Anno 1599. ibidem cap. 31. relata. Denique apud ipsum Supremum Ecclesiæ Caput, operâ ejus effectum est, ut in Ecclesiasticos factos referretur sollemnis memoria S. Joachimi Patris Sanctissimæ Virginis: ob quam ab ea navatam operam S. Anna gratias ei coràm spectabilis retulit, & in universam Ecclesiam ingentia pacis bona sunt consecuta divinitus prout habetur l. 4. c. 8.

XVII. Non erit etiam superfluum apponere sensum P. Roderici de Arriaga, Viri à Theologicis suis Tomis per Orbem clari, quem sæpius ipsemet audiui magnificè de Venerabili Virgine Marina ità loquentem, ut Prageni in Collegio nostro passim diceretur, quamprimum fieret mentio Venerabilis Marinæ, mox P. Arriagam fieri tam eloquentem, ut nullum finem eam laudandi inveniret. Dicebat ipse inter cætera se coram illa Sacrum sæpius celebrâsse in ejus cubiculo, eique Venerabile Sacramentum porrexisse, quo sumpto ipsa singulis vicibus per dimidiam horam formosissimæ puellæ vultu apparuisset, tametsi alioquin reliquo tempore esset rugosa jam vetula. In illo etiam cubiculo, tametsi omnes fenestræ essent occlusæ &

obmuratæ (eò quòd ob oculorum vitium lucem non posset sustinere) adeoque valde tenebricoso, semper tamen aiebat auram fuisse similem illi, quæ in vere sentiri solet in quopiam amœno prato.

XVIII. Sextum argumentum est ab eximijs fructibus, quos hæc Venerabilis Virgo ad Gloriam DEI protulit, quos quidem infrà seorsim recensebo, unicum nunc commemorare contentus, quòd ipsa sit Fundatrix Ordinis Virginum S. Briggittæ, quem in Regna Hispaniæ induxit, novásque ei regulas, DEI monitu, nationi Hispanicæ accomodatas præscripsit, prout legere est lib. 5. c. 20. id quod fieri non poterat sine ingenti ipsius æstimatione apud Regem Catholicum, aliósque Monasteriorum novorum Fundatores.

§. III. *Quare DEUS in his Revelationibus utatur tantis erga suos blanditijs.*

XIX.

Quemadmodum reliqua sua omnia Attributa vult Divina Majestas suis creaturis innotescere, ita vult quoque eis innotescere, sui Amoris omni in genere perfectionem infinitam. Cum ergo ea, quæ in Amore Gubernatoris erga suos Subditos, in Amore Parentis erga Filios, in Amore Pastoris erga suas Oves, in Amore Fratris erga suum Fratrem, in Amore Magistri erga suos Discipulos, in Amore Domini erga suos Servos, quin & in Amore Filij erga suum Patrem & Matrem; cum, inquam, omnem eam, quæ in his Amoribus relucet Perfectionem, in vario suo erga creaturas Amore, longè eminentissimo modo contineri, diversis ac multis jam ab Orbe condito modis manifestasset, necesse etiam erat, ut aliquando ostenderet Bonum illud, quod in Amore blando, qualis præcipuè est inter Matrem ac proles parvulas, inter Gerulam vel
Nu-

Nutricem ac ejus lactentem, inter Sponsam & Sponsam invenitur, Amori suo non deesse: cum ipse re verâ non solum noster Dominus sit & Magister, sed etiam Pater & Mater, & Nutrix, & Gerula, & Sponsus Animarum nostrarum, nec in Attributione Amoris blandi minor, quam in ullo alio Attributione.


XX. Manifestum est ergo debuisse in mundo non exstare minora, nec minus omnem nostrum captum excedentia miracula blanditiarum DEI erga Creaturas, quam exstent miracula Sapientiæ, Omnipotentiae, Justitiæ, Misericordiæ. Manifestum præterea est, longè magis novo, quam veteri Testamento has blanditias convenire, utpotè cum vetus Lex timoris fuerit & severitatis, nova verò sit Lex gratiæ. Imò verò hæ tantæ à DEO blanditiæ sunt unum ex præcipuis signis veræ Ecclesiæ longè superveterem Synagogam elevatæ, adeò, ut nisi cœlestes hæ blanditiæ nunc invenirentur, videretur DEUS Prophetas suos fefellisse, per quos pridem prædixerat, & specialissimè in Libro Canticorum explicuerat, quantis erga Sponsam suam, Ecclesiam esset quondam blanditijs usus, quas quidem qui ibi legit, non potest quin obstupefeat illum excessum, qualem in nullo terreno Sponso ulla unquam ætas vidit: quia videlicet DEUS, prout in omni genere Entis, ita & in ratione blandi Amoris omnem possibilem creaturam in infinitum excedit. Indè est quòd in illo Divino Epithalamio tam exoticæ ac planè obstupefcentiæ inveniantur similitudines & comparationes: ad eummodum, quo nimis ardentibus amasijs, dum in suo æstu amoris hærent, nulla metaphora, nulla hyperbole satis est, ad declarandum suum erga dilectam tenerrimum Amorem. Cum ergo harum omnium in veteri Testamento prænunciatarum, blanditiarum copia debeat in Ecclesia DEI apparere, juxta illud Eisaia 66. v. 12. *Ad ubera portabimini, & super genua blandientur vobis, quomodo si cui Mater blandiatur, ita ego consolabor vos; planè necesse est, ut eas aliquibus in novo Testamento exhiberi pa-*

lām innotescat. Quod profectò quisquis consideraverit, mirari desinet quascunque in Revelationibus Sanctarum legerit cœlestes blanditias, cum & omnes non excedant eas, quæ in Canticis sunt prædictæ. Quodsi quibus blanditiæ hæc adhuc displicent, quantò magis displiceret, si legerent D. DEUM ità Virginem quampiã Sanctam adamavisse, ità ei blanditum esse, ut diceret: *O quàm pulchra es Amica mea! tota pulchra es! oculi tuï sicut piscina in Hesebon, nasus tuus sicut turris Libani, guttur tuum sicut vinum optimum,* & his similia, quibus se Sponsus cœlestis quodammodo defatigat, ut blandissimum suum erga animas nostras affectum satis declaret. Nimirum hæc sunt, de quibus diceret S. Augustinus: *Da amantem, & intelliget quid dico*; quia quæ ex corde frigidò prolata, essent inepta, ea suum habent decus, quando ex corde affectibus inflammato procedunt. Neque enim ille magnopere amat, qui adhuc vulgaria & consveta loquitur, ità ut appareat eum omnia verba præmeditari: in tali enim necdum affectus dominatur: at qui amore totus incenditur, ille ea loquitur, quæ non debent ad rigorem ordinarium, prudentiæ, & ad libellam omnia cautissimè perpendentis rationis examinari: alioquin nunquam dixisset S. Augustinus (quod passim dixisse fertur) *O DEUS! si ego essem DEUS, & tu esses Augustinus, mallet ego esse Augustinus, ut tu esses DEUS!* nunquam Sancti se dæmonibus omnibus peiores reputarent: nunquam ad tam mira obsequia cæcæ obedientiæ intellectum submitterent: quæ quisquis frigidus ipse consideraverit, aut solum Intelectum, non verò Affectum respexerit, nunquam ut approbet inducetur. Sapiens est illud effatum: Amorem ad ea quæ facere non potest aspirare: Amorem excessibus vivere: Amorem esse cæcum: ut nolit ab oculis Intelectûs terminos sibi statui, sed eò evolat, quò Intelectus sibi relictus non præiret: ità ut extra imperum Amoris facta, notam imprudentiæ non evaderent, quæ tamen in æstu decori ac honesti Amoris facta, decent ac plac-

cent:

cent: imò nisi fierent, Amor non esset vehemens, nec dilecto innotesceret. Huc pertinuit illud Agefilai Regis cum suis Filiolis in arundine equitantis, responsum: *Nescitis, quid sit esse Patrem.* Quin & hinc ortum habuit ipsa CHRISTI Domini pro nobis Mors & Passio, verè Excessus Amoris. Unde Beatus Jacoponus cum ei sese amore CHRISTI Domini in cloaca voluntanti CHRISTUS Dominus conspicuus, utrum stultizaret exprobrasset, opportunè respondit: Tu potiùs, ô Domine, tu magis stultizasti, quando Amore mei, tam miseri hominis, patibulum inter duos latrones ascendisti. Et propterea ipsemet CHRISTUS Dominus Ven. Virgini Marinæ ad tantos favores attonitæ Anno 1617. 20. Maji prout scribitur Lib. 2. c. 21. §. 4. dixit: *Noli obstupescere, me hoc facere, propter unicam Animam.* Scis enim, ac fide credis majora, qua pro omnium salute feci: *Et si opus esset, facerem pro una earum.* Aliàs, prout habetur Lib. 1. c. 3. §. 3. dicenti, quòd tanta vix legantur contigisse Sanctis, respondit: *Ergone mea Potentia est alligata solum ad id, quod feci?* Iterum aliàs objicienti: *Domine quis unquam credet tantas ac tam mirabiles gratias?* reposuit: *Quare non crederentur? nonne fuit magis mirum, quòd sim factus homo propter homines, Et tantum illorum causâ passus, quòdque vobiscum manserim in Sacramento Altaris?* Item cum eam in lecto decumbentem vellet proprijs manibus sublevare, ipsaque huic dignationi valde reluctaretur, dixit: *Adverte, quid est plus, an quòd hoc tibi faciam, quòd me juvante confurgas, an verò quòd maneam in Sanctissimo Sacramento, ut me sumant ij, quos ego amo, propter quos etiam sumor à tot malis Sacerdotibus Et secularibus?*

XXI. Et re verà si Evangelium perpendamus, & in eo CHRISTUM Dominum ad pedes Judæ prostratum, à dæmone ad montem deportatum, à Judæis consputum, colaphizatum, denudatum, irrisum, flagellatum, in patibulo suspensum consideremus: evanescet omnis illa nostra opinio, quæ digna-



tiones Sanctis in Ecclesia exhibitas, DEUM dedecere arbitramur, aut ne pariant contemptum, veremur. Cessabit & illa nimia admiratio, quod in his Sancti se reciprocè erga DEUM tam blande gerunt, & tam mira mutuæ confidentiæ exhibeant specimina: neque enim sine his satisfaceret blandi Amoris perfectioni. Quanquam etiam extra similes Revelationes, multi Sancti blandissime cum DEO egerunt, ut patet in meditationibus SS. Augustini & Anselmi, in júbilo S. Bernardi, & vel maxime in illis cantilenis ac ritibus quos Ecclesia in Festis Natalitijs erga CHRISTUM Dominum adhibet, ubi CHRISTUM Dominum in cunis agitari, Angelos ad infantilia quædam obsequia damnari planè non ferrent, aut cachinnis exciperent illi, quibus blanditiæ illæ in Revelationibus Sanctarum tam vicinæ fabulis anilibus, aut comœdijs videntur.

XXII. Specimina nimirum quædam & præludia hæc sunt futuræ quondam in coelis cum DEO familiaritatis, ubi CHRISTUS Dominus *transiens ministrabit* suis, cujus etiamnum *deliciae sunt esse cum filiis hominum*. Qui si amore nostri victus, nostra non est dedignatus allumere tædia, & tristitias, cur & nostras blanditias dedignaretur? qui nos redemit sanguine, dedignabitur suas electas Animas sibi annulis desponsare, torquibus, floribus, monilibus exornare, varijs vestimentis condecorare? Satis id profectò testantur ea, quæ in Breviario Romano S. Agnes ab hoc suo cœlesti Sponso deliciosè sibi, haud dubiè in aliqua visione contigisse enarrat: *Mel & lac ex ejus ore suscepit, & sanguis ejus ornavit genas meas. Dextram meam & collum meum cinxit lapidibus pretiosis. Tradidit auribus meis inestimabiles margaritas, circumdedit me vernantibus atque coruscantibus gemmis. Ejus mihi organa modulatis vocibus cantant. Annulo fidei subarrhavit me: Induit me cyclade auro textâ, & tanquam Sponsam decoravit me coronâ. Ostendit mihi thesauros incomparabiles, quos mihi se daturum repromisit.* Quibus quidem simillima in-

Vi-

Vita Venerabilis Virginis Marinæ passim reperiuntur.

XXIII. Denique si dæmon ipse tam promptus quandoq; suis adest, eisque se exhibet familiarem, dubitarine potest, quin infinities propensior sit, ac paratior ad omnem DEUS nobiscū familiaritatem? Neque enim dæmon idipsum ullo nostri Amore, sed solum quādam affectatione imitationis DEI facere putandus est, prout in rebus omnibus simiam Divinitatis agere affectat.

§. IV. *Quare ejusmodi Revelationes Mulieribus potius præstentur quàm Viris.*

XXIV.

NEgo imprimis certò constare plurāne DEUS Mulieribus quàm Viris revelet, præsertim cū Revelationes non sint unius generis, prout habemus ex Divo Thoma 2.2. q. 174. a. 2. & 3. ubi docet excellentissimum modum prophetiæ ac revelationum, quique à solo DEO (q. 172. a. 3. ad 2.) non verò à dæmone præstari possit, esse eum per quem aliqua supernaturalis veritas conspicitur secundum intellectualem veritatem, non per similitudinem corporalium rerum secundum imaginariam visionem, adeoque non per phantasiam: atqui ea quæ nullo modo subsunt phantasiæ, non sunt enarrabilia, aut certè non possunt proprijs verbis explicari: sed solum per quādam planè ineptas, impropportionatas, & insufficientes similitudines: prout videre est in Revelationibus B. Angelæ de Fulgino lib. 1. ubi frustra laborat, quin & ejus Confessarius, in explicando debitè quidnam viderit, quando quādam vice certo quodam modo DEUM se vidisse narrat. Pater hoc in Apocalypsi S. Joannis, ubi plurima sunt ideo obscurissima, quia per similitudines imaginarias, seu tales, quales phantasia nostra potest capere, explicantur, & indicantur profunda mysteria, non ima-

imaginabilia, sed solum intelligibilia. Ità in vita Ven. Virginis Marinæ L. 3. c. 1. §. 1. valde est admirabilis visio, ubi post alia dicit Ven. Virgo: *Quale sit hoc secretum admirabile, nec suppetunt verba, neque reperitur ullus creatus Intellectus, qui possit sufficienter declarare. DEUS det cui voluerit, ut id experiatur, & agnoscat ità esse.* Cum autem sæpiùs ibi Ven. Virgo utatur similitudine maris & littoris, subdit: *Voco autem littus, egressum ex hac immensitate: non quòd ibi viderim mare vel littus, aut aliam speciem corpoream.* Deinde §. 4. iussit eam DEUS conscribere, quomodo Anima in Divinam caliginem absorpta se habeat, & quòd tunc loquatur eà phrasi, ac sensu, quo illic agitur. Ex quibus apparet, quòd illa non sint nobis satis exprimibilia. Et propterea tales ità ad solum Intellectum pertinentes Revelationes, sunt alijs hominibus, præter eos, quibus fiunt, ferè inutiles, eò quòd non possint enarrari, ita ut etiamsi in libros referantur, vix ab ullo intelligantur. Sunt tamen eatenus utiles, quatenus videndo tanta & tam imperceptibilia dona à DEO Sanctis præstari, excitemur ad sincerum ejus Majestati præstandum obsequium. Insuper Sanctus ille, qui Revelationibus illis Intellectum habet tam illuminatum, redditur valde aptus ad præclarissima tradenda documenta, quibus in sanctitate, & omni spiritali necessitate diriguntur. Cum ergo Viri sancti præ sanctis Mulieribus excelluerint in gubernanda Ecclesia, atque in omnigena dirigendi spiritus doctrina, faciliè credi potest, eos quàm plurimas merè intellectuales habuisse Revelationes, quas tamen ideo literis non tradiderint, quia nec satis exprimere potuerunt, nec sperarunt se satis ab alijs intellectum iri.

XXV. Sed quod Revelationes phantasiæ operà peractas attinet, videntur sanctis Mulieribus frequentiores accidisse, cum longè plures sint conscriptæ. Quod quidem mirum non est, cum Philosophi nòrint, fœminas in imaginatrice vi præcellere. Sciunt autem Theologi, quòd Gratia Divina naturæ se,

acco-

accomodet, ità ut in Angelis operetur ad quandam correspondentiam, quasi proportionem naturæ Angelicæ : in hominibus verò accomodet se naturæ humanæ. Deinde in Viris sit modo quodam virili, in foeminis foemineo : sicut in Amos Propheta pastoritium quid apparet : quando è contrario Danielis prophetia undique Aulam & quiddam regale spirat. Hinc foeminis non datur Spiritus Apostolicus ad percurrendas Gentium provincias, nec ad concionandum, aut hierarchiam Ecclesiæ gubernandam : ut proinde mirum non sit, quòd vicissim detur eis, præ Viris, abundantia spiritûs precum, & orationis, ac tenerrimæ devotionis.

XXVI. Jam ergo clara est ratio, cur erga sanctas Mulieres tantis Divina Majestas dignetur uti blanditijs, quia videlicet, cum juxta sanctissimam voluntatem (quod in Canticis Canticorum prænuntiare dignatus est) statuerit omnino Ecclesiæ manifestare infinitatem sui tenerrimi Amoris, & Attributi Divinarum blanditiarum, ubi, quæso, aptius blanditias exeret, quàm erga sexum planè ad blanditias natum? aut erga quem aptius assumet personam Sponsi, quàm erga sanctas Virgines? Ipsamet hoc agnoscit Ecclesia, dum Sanctimoniales specialiter ornat titulo Sponsarum CHRISTI.

XXVII. Et verò in hac vita satisfaciendum est etiam phantasiæ, cui nunquam persvadebitur, blanditias inter duos graves Viros, aptè adhiberi, ità ut alter alterum compellet : *Columba mea : aurora mea : ecce tu pulchra es.* Cum ergo sciamus CHRISTUM Dominum esse Virum, DEUM verò ipsum semper etiam sub sexu virili, imò sub figura Viri grandævi concipiamus, planè phantasiæ nostræ non satisfaceret, si inter eum & Virum quempiam sanctum tenerrimas illas Canticorum blanditias mutuò in quapiam visione intercessisse audiremus : siquidem hos verba potius gravitatis plena & auctoritatem spirantia decere arbitramur. Non diffitemur tamen posse à Viro quo-

D

cun-

cunque etiam gravissimo blanditias & verba teneritudinem redolentia non ineptè adhiberi erga suam Sponsam, aut etiam erga tenerum quempiam suum Filiolum, vel quemvis alium puel-
lum.

XXVIII. Et propterea ut nobis se Divina Majestas etiam in hoc accomodet, si quando ejusmodi blanditijs vult sanctos Viros dignari, tunc eis se CHRISTUS Dominus in specie Infantis aut pueruli exhibet, ut detur reciprocae teneritudini locus. Quin & illud animadversum est, quòd ipsa Sanctissima Deipara potius soleat coelitus cum Viris conversari, eò quòd sic in persona vel Matris, vel Sponsæ, possit cum eis agere, blandissimè. Hinc quoque ortum est, ut CHRISTUS Dominus nunquam legatur sibi annulo desponsasse in sponsum vel sponsam ullum sanctum Virum; sed bene permultas Virgines: quando è contra Sanctissima Virgo Mater DEI, nullam sibi desponsavit Sanctam, sed Sanctos, ut S. Edmundum. Quod si quando DEUS velit sibi Virum desponsare, assumit personam foemineam Misericordiae, vel Sapientiae &c. prout factum est erga S. Joannem Eleemosynarium, B. Laurentium Justinianum, Henricum Amandum Susonem, &c. aut personam infantis vel pueri, ut erga S. Antonium de Padua, B. Hermannum Joseph, &c.

XXIX. His sic stabilitis nihilominus ipsamet Divina Majestas adhuc aliam causam assignare dignata est, dum S. Theresiæ, cur sibi miserculae foeminae, & non potius primarijs Academicarum Doctoribus, tam familiariter colloqueretur, interroganti, respondit: Doctoribus non vacare, propter tot quos perlegendos assumunt libros. Ex quo Divino responso profectò apparet ipsosmet Viros sibi obstare, utpote alijs nimis intentos: quando interea sexus foemineus præcipuâ curâ soli DEO attendit. Accedit quòd ex Divinis habeamus literis, cum simplicibus esse DEI sermocinationem. Mirum ergo non est, quòd
non

non solum mulieribus præ Viris, sed etiam idiotis præ eruditis talia mysteria innotescant: adeo ut etiam voluerit DEUS quandoque per foeminas innotescere quædam, quæ universam Ecclesiam concernebant, quale fuit & illud, quod per S. Luciam Virginem Martyrem Syracusanam revelaverit, finem imminere immanissimæ illius à Diocletiano excitatæ persecutionis. Sic S. Franciscus Xaverius ex studijs, quibus in Parisiensi Academia vacabat, fuisset avocatus, & consequenter Indiæ hoc Apostolo caruissent, nisi forori ejus, quantus esset in vinea Domini operarius futurus, fuisset divinitus indicatum. Sic Societas JESU per S. Ignatium tanto fructu in Ecclesia DEI erigenda, fuit prius ab aliquot sanctis Mulieribus prævisâ, & ab eis prænunciata.

§. V. Quomodo fiant cælestes hæ Revelationes?

XXX.

TRiplex est à S. Thoma 2.2. q. 173. a. 3. modus descriptus. Primus quando ipsis sensibus exterioribus aliquid percipitur: prout Danieli apparuit manus scribens in pariete, & sæpius voces variæ sunt auditæ. Secundus, quando sola imaginatione aliquid percipitur: prout fit per somnia, & prout sunt pleræque omnes, quas descriptas habemus Revelationes, plenæ corporeis, quas phantasia percipit, similitudinibus. Tertius, quando per solas species intelligibiles soli Menti & Intellectui aliquid imprimitur, prout factum est Salomoni & Apostolis, de quo jam diximus §. præcedenti. Primus autem modus est facilis & cognitioni obvijs. Medius ille habet difficultatem. Fit ergo ille, prout docet S. Thomas 2.2. q. 172. a. 2. vel per novas species imaginarias phantasiæ impressas (prout fieret, si alicui cæco nato, divinitus imprimerentur in imaginatione species colorum) vel per hoc, quod species jam antea per sensus acceptæ divinitus ordinentur, & transmutentur diversis-

modè in ordine ad id , quod est ab Anima illa intelligendum. Sicut enim ex diversa ordinatione earundem litterarum , accipiuntur diversi intellectus ; ità etiam secundùm diversam dispositionem phantasmarum resultant diversæ species intelligibiles. Hoc autem potest utrumque fieri tam in vigilia , quàm in somno.

XXXI. Hinc jam facilè solvitur, ea , quam quidam obijciunt , difficultas quòd videlicet hæ Sanctorum Revelationes videantur somnijs simillimæ , atque ideo appareant ridiculæ : nam re ipsâ verè aliquando fiunt in somno, prout contigit Sanctis Patriarchis Jacobo , & Josepho : & aliàs semper modo somnijs non dissimili , prout loco citato insinuat Princeps Theologorum. Unde etiam iste modus est obnoxius illusionibus dæmonum , potestque etiam ex morbis contingere : adeoque indiget accurato examine , ut Spiritus Divinus à spurio discernatur.

XXXII. Est tamen modus iste in hoc præ alijs utilis, quòd talis Revelatio possit facilè per modum historię litteris tradi , prout in seipsa gesta est : tametsi sæpe lateant profundiora mysteria , prout patet in Apocalypsi S. Joannis , quæ quidem videtur magna parte facta in imaginatione , & modo quodam somnijs non planè absimili.

XXXIII. Neque tamen dubitandum est , quin sæpe interveniat modus ille primus , quo re verâ sensibus externis ea , ex quibus constat Revelatio , percipiuntur : prout cum Ven. Virgine Marina sæpius contigisse certum est.

XXXIV. Sed præcipua restat difficultas , nùm Sancti re ipsâ verè corpore adsint ibi, ubi aliqua percipiunt : ut quando Ven. Marina toties narrat se fuisse in cœlo , atque in diversis terrarum Provincijs, aut Templis , vel domicilijs , &c. Habet hanc difficultatem S. Doctor 2. 2. q. 175. a. 6. ubi tractat locum S. Pauli 2. ad Cor. 12. *Sive in corpore , sive extra corpus , nescio,*

nescio, DEUS scit. Et respondet non posse hanc quæstionem satis determinari, cum ipsemet S. Paulus hæc ignoraverit. Unde meritò nec à me, nec ab ullo in carne, peti debet, ut quæstionem hanc planè decidamus.

XXXV. Quod tamen Ven. Virginem Marinam specialiter attinet, fuit ipsa sæpissimè unà cum corpore ad diversa loca translata, cum ipsamet id expressè sæpius asserat: & intra ipsum cubiculum ordinariè, etiam spectantibus hominibus, solita sit Angelorum ministerio levare ex lecto, prout ejus necessitas corporalis exigebat. Sed an etiam in cœlum fuerit aliquando cum corpore translata, nec ipsa satis exprimere mihi videtur, nec aliunde colligere potui, cum nullibi declaretur an corpus ejus tunc, & quidem quandoque per plures dies, à lecto abesse fuerit animadversum.

XXXVI. Qui plura de modo Revelationum & Raptuum scire volet, legat S. Thomam 2. 2. q. 171. usque ad 175. inclusive.

XXXVII. Neque tamen dissimulare volo in hac Venerabilis Virginis Marinæ Vita esse quid hoc in puncto præ alijs Revelationibus admirabile, prout præter loca alia, habetur etiam L. 3. c. 13. & 14. ubi CHRISTUS Dominus Animam ejus ex Cœlo ad eam detulit, tanquam quid ab ea distinctum, dixitque eam esse partem superiorem Animæ. Sed planè stupendum est, quod habetur c. 14. §. 3. quomodo superior pars Animæ habitans in cœlis, salutaverit advenientem ad cœlum partem inferiorem ejusdem Animæ. Et §. 4. cum pars inferior rediret in terras, pars superior remansit in cœlo. Deinde §. 5. putat ipsamet Ven. Marina fuisse in cœlis conjunctas, suam Animam, & suam Naturam, seu suam partem superiorem & inferiorem. Quæ omnia puto esse emblematicè intelligenda, ut exprimatur, quomodo cogitationibus & corde possimus per Divinam Potentiam ità DEO inhærere, ut tamen his inferioribus naturæ

operationibus tunc etiam adhuc sufficiamus: sed tamen facile admiserim me non esse sufficientem ad tantas DEI gratias explanandas, cum hæc sit Gloria DEI, ut omnem nostram capacitatem opera ejus excedant.

§. VI. *Qui sint apti ad legendum cum fructu
tales Revelationes.*

XXXVIII.

UT sius his cœlestibus Revelationibus fructus constet, advertendum est eas non pro omnibus vulgari, cum non desint quidam ita dispositi, ut noxiæ potius eis essent futuræ, quàm salutare: prout nec Sacræ Scripturæ promiscua lectio omnibus expedit, adeò ut nec in Religiosorum triclinijs super mensam omnia, quæ in ea continentur, prælegantur.

XXXIX. Inprimis ergo non porrigendæ hæ Revelationes hæreticis, juxta Divinum CHRISTI Domini monitum: *Nolite Sanctum dare canibus.* Ipsi enim hæc pretiosissima Catholicæ Ecclesiæ cimelia foedissimè discerperent, conculcarent, & scurrilibus suis diæterijs ac sannis (prout à Patriarcha suo Martino exemplum acceperunt) defœdarent, cum nec ipsi Sacræ Scripturæ, ac inprimis sacratissimo illi cœlestis Sponsæ in Canticis epithalamio parcant: sed illud in profanis suis nuptijs carnalibus suis delicijs adaptent, ac pro incitamento suæ libidinis adhibeant. Nihil eis occurrere potest quàm caro, quàm cœnum, quàm foetor; quem in colloquijs, in picturis, in ~~libris~~ exhalant. Lutheri fuit spiritus omnia negare: ut hodièque Lutheranismus præcipuè funderur super hanc maximam: *Plus potest unus stultus negare, quàm centum sapientes probare.* Et propterea Lutherani post quantamcunque demum disputationem, evidentem probationem, & clarissimam demonstrationem, semper adhuc obstinatè, planè quasi ad tantam lucem cæci, clamant & ingeminant, sibi denique non videri. Mirabile autem est

est, quòd cùm eò sint imprudentiæ progressi, ut in rebus ad salutem æternam spectantibus eis persuadendis, nulla eis testimonia, nulla signa credibilitatis sufficiant, adeò ut pro libidine, sua quem volunt librum pro Canonico suscipiant, quem nolunt repudient, & ex Sacra Scriptura expungant: fabulis tamen & anilibus nugis facillimè credant, prout & Kalendaria eorum perpetuò sunt plena futilibus quibusdam narrationibus, de novis prodigijs & portentis, quæ etiam, quasi ad terrorem populi, per compita decantant, typis evulgant, nec de his sine nota imprudentiæ putant licitum dubitare, justo DEI supplicio in eos, qui sui Martini sordes ausi sunt Ecclesiæ & omnibus SS. Patribus anteferre.

XL. Sed dicet quis: potius ergo tales Revelationes non essent typis vulgandæ, nè in scurriles hæreticorum manus incidant. At, sic etiam omnes Monachorum Ordines, eorumq; vestes, omnes item cæremoniæ ac libri rituales, plurimorum, item Sanctorum Vitæ, aliæque innumera essent abroganda, quia hæretici suæ sibi inde faciunt materiam scurrilitatis.

XLI. Secundò non sunt ad harum Revelationum lectionem admittendi homines sceleribus, præsertim carnalibus, penitus immersi, nè *margaritæ projiciantur ante porcos*. Siquidem & his non minùs, quàm Lutheranis, mox se ingerit caro, & omnia hæc coelestium blanditiarum specimina eis obnubilat exhalatio libidinosa.

XLII. Tertiò nec sunt Revelationes hæc lectu utiles hominibus penitus idiotis, aut quibus nihil penitus de via Perfectionis innotuit: hi enim ad omnia hæc planè hærerent attoniti, nec adverterent sub corporalibus his symbolis latere mysteria coelestia, adeoque ex omnibus nimis ruditer acceptis, tanquam DEO indignis, non nisi offensionem & confusionem referrent. Hinc etiam non expedit in quavis lingua vernacula eas edi.

XLIII. Quartò non sunt etiam his Revelationibus legendis

disapti, quorum aut indoles, aut prava consuetudo est omnibus contradicere, semper aliena carpere, nec quidquam admittere, quod ipsimet experti non sunt. Multoque minùs illi qui à spiritualibus abhorrent, ità ut nonnisi profana eos delectent, & nova militaria, historiæque non sacræ. Huc etiam pertinere possunt illi, qui ad primum nomen foemineæ revelationis commoventur, & mox, ut ità dicam, aures obturant. Ad quos respexerit Blosius, dum in fine Appendicis ad monile spirituale, postquam locutus est, de Revelationibus factis S. Brigittæ, S. Catharinæ Senensi, S. Mechtildi, & S. Gertrudi, hæc verba subiungit: *Liquet, quàm longè adhuc à Spiritu DEI sint, qui prædictas Revelationes tanquam somnia muliercularum rejiciunt, & irrident. DEUS illis ignoscat.*

XLIV. Quintò non proficient etiam ex his revelationibus, quicunque etiam docti, ac Religiosis Ordinibus adscripti, qui nihil antea de sublimi ac delicata vita unitivi cum DEO Amoris in Libris Asceticis, aut Vitis extraordinariorum Sanctorum legerunt. Hinc non in quovis cœnobio expedit eas publicè legere, cùm pronum sit invenire aliquos, qui quidquid non intelligunt, contemnant, quorum autoritate permoti alij, etiam ipsi ab eis avertantur, eas vilipendant, ac planè explodant. Sic quoque non sunt proponendæ o foribus omnis teneræ devotionis, solitis se appellare solidos, id est exsuccos, nihil nisi essentialia æstimantibus. Ex quibus omnibus patet, nec pro concionibus temerè quidlibet ex eis esse populo proponendū, sed cum delectu, ac promissâ ferè declaratione ac explicatione, ad mentem Auditorum præmuniendam, nè pro sperato fructu risus vel offensio sequatur. Quòd autem contingat etiam in Doctoribus quandoque hæc non intelligi, mirum non est, cùm non omnes Doctores Theologiæ intelligant etiam Theologiam mysticam, aut ecstases & raptus, quin quandoque nec ordinarium modum contemplationis. Huc pertinet illud, quod

Ven.

Veri. Virgini Marinæ contigisse refertur L. 1. c. 23. ubi Sancto Dominico agente iussa est ex sua solitudine egredi ad monasterium Prædicatorum pro ipsorum aliquo spirituali auxilio: quod tandem fecit successu felici, de quo ipsa §. 2. sic subdit: *Aliquot diebus continuabam, quod mihi DEUS inspirabat, eratque ut exponerem Religiosis, quibus cum agebam, quædam puncta rerum spiritualium: siquidem hoc magni Theologi non bene intelligunt, nisi eorum habeant usum, sintque DEO familiares. Dicebam illis exempli causâ, quid sit unio Anima cum DEO, & quos in eâ motus & affectus operetur hoc tantum bonum: aliâs autem quid sit cognitio sui ipsius, quando illam DEUS per speciale lumen infundit Animæ, non absque vehementia, & efficacia, & quos adeo admirandos ac utiles producat effectus, in Anima: aliâs quid sit spiritus, quid agere & conversari cum DEO, qualisve modus, quo Divina Majestas aperat Anima, cui se eâ ratione communicat, suam voluntatem non rebus duntaxat ordinarijs, verum etiam in extraordinarijs.*

XLV. Aptissimæ ergo ad hæc tam singulares gratias legendas sunt illæ Animæ, quæ puritate conscientiæ, & virtutum studio enituntur per orationis mentalis viam ad familiaritatem cum DEO, & ad quasdam pietatis teneritudines. Denique omnes quicumque magni faciunt eos cœlestes gustus, quos Divina Misericordia suis dilectis communicare, quosque magis ordinariè ferventes Religiosorum Novitij solent experiri.

XLVI. Legendæ etiam à Patribus spiritualibus, seu aliorum in viâ spirituali Ducibus, ut variorum DEI ductuum acquirant notitiam, & intelligant, quàm mirabilis sit DEUS in Sanctis suis, & quàm non sint Animæ omnes ad eandem viam spiritalis adstringendæ.

XLVII. Denique legendæ etiam sunt à Theologis, ut videant, quomodo hæc sint armis Theologicis protegenda, & quomodo aut rudibus, aut malevolis respondendum, occurrendum, & satisfaciendum: atque ut mysticæ Theologiæ cum scho-

lasticæ cognitione conjunctâ, sciant & possint tantò magis & melius Ecclesiæ quacunque in occasione inservire, nòrintque aptum & prudens de talibus ferre judicium, ubi opus est, nè forte in occasionibus oblati appareant talium penitus ignari cum exiguo Ecclesiæ Catholicæ & Academiarum honore.

§. VII. *Quanti fructus ex Sanctarum Mulierum Revelationibus in Ecclesiam redundant.*

XLVIII.

UNica S. Theresia sufficeret ad ostendendum, quanta hinc enascantur emolumenta, quando ab illa unica cœlestibus visionibus illustrata, tot & tanta sunt in universam Ecclesiam bona consecuta. Verùm fructus aliquos ex innumeris enumeremus. Primus sit, quem adducit P. Ludovicus de Ponte in Vita Ven. Virginis Marinæ, L. 2. c. 13. dicens: *Donum orationis est fructus gloriosissimus, qui colligitur ex hujusmodi visionibus.* Nempe per has Anima, quasi manuducitur ad intimam cum DEO familiaritatem. Et imprimis ex eis facillimè hauritur modus ille contemplandi, qui à S. P. N. IGNATIO vocatur Applicatio sensuum. Item Instructio, qui circa quodlibet mysterium affectus sint eliciendi. Præterea magnum hinc accipitur adjumentum ad Sacro-sanctam Communionem quam piissimè obeundam.

XLIX. Secundus est, egregium signum Credibilitatis Ecclesiæ Catholicæ ex tanta abundantia spiritus devotionis & doctrinæ Asceticæ, atque ex tam sublimi, etiam in sexu fragili sanctitate & cum DEO familiaritate: quando nostri temporis hæretici, non dico Sanctas Virgines, sed vix habent Virgines: siquidem, ut ajunt, mandata DEI ac Virginitas servatu ipsi sunt impossibilia. Doctrinæ verò Asceticæ nec vestigium apud eos existat, ut ipsum etiam nomen ignoretur, totâque teneræ devotionis

tionis substantia demum in quibusdam exquisitis constet epithetis, quibus, exempli gratia, CHRISTI Domini vulnera appellant rubino-rosea, aut purpureo-rubicunda. Et verò quàm grandis est iste honor Ecclesiæ, quòd in unius Catholicæ mulieris libello plus exstet sublimis & excellentis doctrinæ sacræ, quàm in toto Alcorano, in toto Thalmud, in omnibus Græcorum, Ægyptiorum, Arabum, Sinarum, & reliquarum gentium profanis Philosophis, in omnibus hæreticorum & prædicantium Tomis.

L. Tertius est, quòd Ecclesia DEI hinc habeat pro eis, qui in gradu eminentiori DEO serviunt, etiam quædam eminentiora lumina, incitamenta, documenta, præsertim pro contemplativis. Neque enim decorum fuisset, si homines magis devotioni addicti, nihil speciale præ alijs quibuscunque justis habuissent. Et verò quidnam potest esse efficacius ad extorquendum à corde nostro erga DEUM amorem, quàm si nos ab eo tantopere amari videamus? quin etiam hinc desumitur robustum in omnibus hujus vitæ difficultatibus solatium, dum videmus tanta nobis à DEO in coelis præparari.

LI. Quartus Fructus est, Discretio spirituum, & Prudentia pro agnoscendis DEI ductibus, & varijs unionis gradibus necessaria. Certè à S. Theresia didicere Viri doctissimi, totaque Religio Carmeli. Magnus ille spiritus Magister in Societate nostra P. Achilles Gagliardi, sapientissimum illum suum libellum ornavit eis, quæ à B. Aloysio Gonzaga adolescente intellexit. Ità Ludovicus Blosius multus est in allegandis pro librorum suorum firmamento Sanctarum Mulierum visionibus & doctrinis: id quod etiam videre est in Tomis P. Nicolai Lancicij Societatis nostræ.

LII. Quintus Fructus est, quòd per eas plurimorum Fidei nostræ Mysteriorum plenior accipiamus cognitionem, præsertim eorum, quæ circa CHRISTUM Dominum nostrum à

Sanctis Evangelistis sunt prætermissa. Sic Lib. 2. c. 25. §. 1. CHRISTUS Dominus in Ven. Virgini Marinæ miranti, cui sibi tanta de Venerabili Sacramento ostenderet, dixit: *Ego volo, ut mei Amici hic aliquantùm degustent & cognoscant mysteria, quæ pro illis & pro ipsorum bono, ac remedio sum operatus in mundo.* Plurima etiam nobis innotescunt de statu vitæ futuræ tam in Cælo, quàm in Inferno, atque ut sciamus nos in cœlesti Patria non futuros instar immobilium truncorum, nihilque operaturos. Certè in Revelationibus Vener. Marinæ quasi specimen quoddam cœlestis Vitæ voluit DEUS exstare. Quanquam & pleraque veteris Testamenti mysteria mirabiliter in ea renovavit; ut scalam Jacob & luctam cum DEO, L. 3. c. 4. §. 2. & 3. Moysem, qui vidit posteriora DEI, L. 3. c. 1. §. 1. : Et Raptum S. Pauli, L. 3. c. 2. §. 4. : Abraham, qui tres vidit, & unum adoravit, L. 3. c. 8. §. 1. : Rubum ardentem, L. 3. c. 4. §. 1. : Eliam, cui DEUS in sibilo venti apparuit. Illud Davidis: *Si ascendero in Cælum, tu illic es*, L. 2. c. 16. §. 7. : Serpentem æneum, L. 2. c. 16. §. 7. : *Sub umbra ejus, quem desideraveram, sedi*, L. 2. c. 6. §. 5. : Miphiboseth in mensa Davidis, L. 2. c. 18. §. 4. : Currum Ezechielis, L. 2. c. 20. §. 2. : Manna, L. 2. c. 21. §. 2. Mysteria item plurima novi Testamenti, qualia sunt: Incarnatio, L. 2. c. 3. prout in Indice invenitur. Item, quomodo S. Dionysius dixerit se crediturum fuisse, Sanctissimam Virginem esse DEAM, Quomodo CHRISTUS Dominus Magdalenam coram Martha excusaverit, L. 2. c. 7. §. 4. : S. Magdalena ad sepulchrum, L. 2. c. 16. §. 6. : *Noli me tangere*, L. 2. c. 18. §. 2. : Quomodo CHRISTUS Dominus sit in Venerabili Sacramento, L. 2. c. 8. §. 3. Plurima item ei aperta sunt de Divinis Attributis, de dignitate Angelorum, aliisque prout Lector abunde inveniet. Quod si quando movemur ad pietatem spectaculo quoque in theatro comico de Vita CHRISTI Domini, aut Sanctorum exhibito: quantò magis id sperandum est, dum mysteria illa ita reno-

renovari legimus, ut quodammodo eis interessè videamur? Æstimamus piorum Virorum contemplativorum de gestis CHRISTI Domini probabiles conjecturas, cur ergo cœlestia de his responsa, repudiamus, aut dum ipsemet CHRISTUS Dominus ea iterum exhibet, legere & spectare dedignamur? certè quantopere ei hæc repræsentationes placeant, patet vel ex eo, quòd per eas voluerit totam Missam celebrari.

LIII. Sextus Fructus Revelationum Ven. Virginis Marinæ peculiaris est, Exemplum, quàm cautè sit in talibus extraordinarijs divinis favoribus procedendum: siquidem Vener. Virgo Marina tantas hoc in genere adhibuit cautelas, ut P. Ludovicus de Ponte non dubitaverit asserere, sicut S. Franciscum Seraphicum in paupertatis Evangelicæ, aliòsque Sanctos in virtutum aliarum; ita in exemplum cautelæ & circumspèctionis esse à DEO Ecclesiæ datam. Unde & CHRISTUS Dominus L. 2. c. 26. §. 4. ad eam dixit: *Marina magnopere times; verùm ita perge, & esto certa, quòd si taliter timerent Anima, non circumventur tot illusionibus, uti fit.*

LIV. His addi possunt peculiare illi Fructus, qui ex Ven. Virginis Marinæ visionibus in totum mundum, ac in Hispaniam præsertim, provenerant, prout sparsim in ejus Vita inveniuntur: quos inter est ille ad immaculatam Sanctissimæ Virginis Deiparæ Conceptionem, initio concionis collaudandam pertinens, de qua dictum suprà. Item quòd festum S. Joachimi in Breviarium Romanum à Summo Pontifice imponi procuraverit. Quòd Ordinem Monialium S. Brigittæ in Hispaniam induxerit. Quòd Canonizationem S. IGNATII de Lojola à DEO tempore vitæ suæ impetraverit, & pridem prædixerit. Quòd plurimis hominibus subsidijs temporalibus & spiritualibus succurrerit, directà Divinis his Revelationibus. Deniq; quòd plura adhuc futuris temporibus ventura à DEO exoraverit, inter quæ est futura conversio Angliæ, & alia quæ lecturi in ejus Vita prehendent.

LV. Denique tanta, ut sic loquar, Divinæ Majestatis sollicitudo, ut hæ Revelationes conscriberentur, & tanta P. Ludovico de Ponte in cœlis pro labore eas combinandi promissa præmia, manifestant, quanta DEUS bona lectoribus pijs & sinceris communicare disponat. Sic jussit DEUS Sanctam Brigitam sua conscribere ad movenda corda, quæ lectione Sacræ Scripturæ tunc temporis non movebantur. Sic lectoris revelationes S. Gertrudis grandes cœlestes favores pollicitus est.

LVI. Roganda est ergo Divina Majestas, ut nobis & affectum ad eas diligenter ac piè volvendas, & lumen ad debitè intelligendas elargiatur, ut sic defectum, qui sæpe in nostris orationibus mentalibus contingit, compensemus.

§. VIII. *Objectiones quædam diluuntur.*

. LVII.

IN primis adverti graves etiam Viros à fide Revelationibus ejusmodi præstanda retineri, eò quòd videantur sibi contradicere: id quod præcipuè notatur circa vulnera CHRISTI Domini, quorum non tot millia computantur in Revelatione una, quot in altera: ut proinde necessario alterutra Revelatio falsa, & consequenter fictitia, aut illusoria sit habenda. Quod si jam semel deprehendantur falsæ, nullam amplius in toto fidei merentur. Sed ad quæstionis hujus solutionem advertendum est, rebus divinis & prophetis frequens esse, ut sint profundæ & obscuræ. Grandis certè Sanctos Patres habuit labor, ut Evangeliorum concordiam demonstrarent. Quantum Sanctus Augustinus circa totam Sacram Scripturam hoc in genere defudavit, apparet ex ejus de Civitate DEI libris. Et quidem quod vulnera CHRISTI Domini attinet, poterat ipse ea, diversis vicibus diverso modo computare, nunc vulnera seorsim sine ictibus & vibicibus, nunc ictus simul & vibices & vulnera, nunc vulnera solius flagellationis, nunc totius corporis: nunc sola
pau-

paulò majora, nunc omnia etiam minutissima: nunc quædam ob vicinitatem, aut quia eodem ictu inflicta, conjungendo, nunc singula minutim separando. Ut taceam, quòd in numeris ac cifris facilis sit lapsus typi & descriptoris: qui etsi quandoq; irrepsisset, ità ut demum manifestus error deprehenderetur, nunquid propterea Revelationes omnes abjiciendæ? planè sicut si omnes Indulgentias, omnesque sanctas Reliquias, omnes item Sanctorum Patrum libros abjiciamus, quia & in his non, solum errores, sed & fraudes & imposturæ contigerunt. Corrigenda ergo benevolè sunt, quæ clarum errorem habent: quæ verò nimis obscura, ea tantisper relinquenda, ac interim alijs clarioribus ad salutem Animarum nostrarum utendum est.

LVIII. Adde quod & à Sanctis, quandoque Revelationibus interspersæ narrentur eorum piæ Contemplationes, ad quod si minùs attentus Lector non advertat, perplexus redditur. Sic L. 2. c. 2. §. 1. Ven. Marina refert, quomodo contemplata sit Sanctos Parentes Deiparæ Virginis, in die ejusdem Præsentationis: nec tamen dicit sic sibi esse revelatum. Deinde contingit, ut narrent quædam se sic in Revelatione vidisse, nec tamen asserant sibi revelatum, sic reipsà quondam contigisse. Sic Ven. Marina L. 2. c. 6. narrat se parvulum CHRISTUM Dominum natum vidisse pendentem in aëre, & non vidisse attigerit terram: nec tamen dicit eum terram non attigisse, multoque minùs asserit sibi revelatum, quòd revera tempore suæ nativitatis non attigerit terram: ut propterea nihil hinc habeamus determinatum.

LIX. Dicunt alij multas foeminas esse deceptas, adeoque se nihil velle negotij habere cum foeminis. Dico ego: multi Religiosi apostatarunt, diruamus ergo omnia monasteria. Sensus iste est hominum primos statim impetus sequi assuetorum. At vir sapiens videt, solummodo sequi, quòd necessaria sit diligens cautela, etiam circa pias Mulieres; qualem profectò & ego supra

præ svasi, nec nisi eas Revelationes, quas commune doctissimorum sapientissimorumque simul ac Sanctorum Virorum iudicium comprobavit, dixi securè & sinè ulteriore cura admittendas. Decepit foemina Tertullianum: at abstulit & reprobavit Summus Pontifex; obstitere tunc statim & reclamavere magno numero Viri sapientes. Neque verò mulieres imposturam, aut facientes, aut patientes, unquam ea possunt tradere sublimissima spiritualia lumina, & documenta, qualia in Revelationibus suprà §. 2. relatis admiramur: sed substantia gloriæ earum solet consistere in quibusdam miraculi speciem præferentibus, ut quòd vulneribus CHRISTI Domini putentur insignitæ, quòd sublimes à terra in flammis pendeant, quòd multum jejurent. Alia profectò sunt argumenta veritatis Revelationum à sæculis celebrium sanctarum foeminarum: prout inter alias fuisse certum est in sancta illa Ancilla Christiana, quæ totam Iberorum Gentem in Asia ad fidem CHRISTI Domini convertit, prout annotatur in Martyrologio Romano ad 15. Decembris.

LX. Quod si hoc solum, quòd sit foemina, quòd sit vetula; quòd sit puella, sufficit, ut extra dubitationem, & attonitam quandam admirationem eluctari non possimus, miremur ergo similiter, quinam fieri potuerit, ut unam puellam Judæam DEUS super omnes Sanctos & Angelos evexerit, in supremam coelorum Reginam.

LXI. Objiciunt alij: Revelationes has etiam à Viris doctis irrideri, aut saltèm non commendari. His jam suprà respondi. Hanc nempe DEUS à suis creaturis inter cæteras patitur etiam calumniam, ut pretiosissima & rariora ejus dona contemnantur: consæta sola laudentur. Incarnatio & Passio Judæis erat scandalum, Gentibus stultitia. Valde dolendum est, quòd quandoque propter ejusmodi non exiguæ autoritatis Viros, multi etiam sæculares & Magnates fructum harum Revelationum perdant, qui si eas viderent ab eis commendari, ad earum

lectio-

lectionem excitarentur, ad vitam sanctam aspirarent. Multi etiam hinc doctrinam Asceticam, & discretionem spirituum, haurirent, necessariam pro aliorum in via spirituali directione. Nunc autem quandoque verum hic illud est CHRISTI Domini: *Tulerunt clavem scientiarum, ipsi non introierunt, nec alios introire permiserunt.* Luc. c. 11. v. 52. Si quem ejusmodi irrisorem DEUS Ven. Marinæ in Confessarium dedisset, quantum is sanctam illam Animam impedivisset & excruciasset.

LXII. Præterea mirantur aliqui, quod Sanctæ illæ tempore harum visionum tam mirabilia, & quasi ridicula faciant: immemores quàm mirabilia legamus in Apocalypsi, quin & de S. Petro in monte Thabor. Nōne & in quovis alio gaudij excessu videmus accidere, ut planè faciamus ea, quæ alioquin inepta judicemus? & propterea non opus est, ut omnia imitatione exprimamus, cum quædam Sanctorum gesta sint solummodo admiranda.

LX. Adhuc opponunt alij, se denique ad tales Revelationes non habere piam affectionem. At respondeo, fortè nec eam cupiunt, nec à DEO unquam postulârunt. Nōne & vitam Sanctorum, & statum Religiosorum, & perfectionem, multi nauscant? propterea dixi suprà, non omnibus has Revelationes prodesse.

LXIV. Sed tamen dicunt in his non consistere substantiam vitæ Christianæ aut Religiosæ. Omnino, nec in aromatibus consistit substantia ciborum: repudiemus ergo omnia condimenta. Solida & præcisè necessaria vestis, est quodpiam linteam & pellis, quibus obvolvamur, ergo sartores, elegantiae & commoditatis sectatores amandemus.

LXV. Reponunt nihilominus malle se talia legere in Viris contemplativis. At re verà vix fidem invenient. Nam qui orationem mentalem verè adamant, solent magnopere desiderare, ut subsidia sanctarum cogitationum undeunde accipiant, quali-

F bus

bus profectò Revelationes Sanctarum planè abundant, ità ut etsi non veræ Revelationes, sed meræ essent piæ Contemplationes, valde adhuc prodesse. Quin & longè securius leguntur, quàm Rusbrochius, Thaulerus, Sufo, Harphius, aliiq; Contemplationis Magistri, quorum scripta per se intellectu ardua, & imitatu censentur esse periculosa, præterquam quod quibusdam in locis à rudibus sciolis sint corrupta.

EPILOGUS.

LXVI. Habet Reverentia Vestra pro mea tenuitate, expositum, quod pro commendatione & auxilio sancti hujus Operis mihi occurrit. Non quidem, prout initio monueram, quod hæc omnibus sint ità satisfactura, ut nemo amplius reclamet, sed tamen ità, ut cordatis hominibus sint sufficiens præbitura fundamentum, nè mirabilem hanc Vitam Venerabilis Virginis Marinæ mordeant, nisi prius aliquod admodum grave & certum adversus eam momentumprehendant. Ceterum Reverentiæ Vestræ ex animo gratulor, quam Deus elegit ad opus tantæ suæ gloriæ: nec possum quin ominer, specialem quandam Reverentiæ Vestræ in cœlis coronam parari, siquidem & R. P. Ludovico de Ponte ob hanc vitam prima vice digestam, & Hispanicè conscriptam, Divina Majestas magnum in cœlis præmium promisit, prout ipsemet P. Ludovicus refert Lib. 6. c. 21. §. 6.

DEUS Optimus Maximus faxit, ut Animæ quàm plurimæ ex hoc Reverentiæ Vestræ labore, ad quam maximam sanctitatem proficiant, ejusque Majestati sincerè, ex toto corde, serviant, ad quàm maximum ejus beneplacitum, cujus ineffabilis & omnia merita ac demerita vincens Bonitas, precibus & meritis Sanctorum suorum faciat nos quoque ex Sanctis.


Hactenus Epistola.

Post-

Postquam Epistola hæc typis cum Prima Parte vitæ Venerabilis Virginis Marinæ vulgata est, & P. Melchior Hanel, Latinus Interpres Celsissimi Principis Caroli Episcopi Olomucensis Confessarius, Secundam jam Partem Vitæ ejusdē Latinitate dōaret (quā eidē Celsissimo Principi dicatā, typis postea edidit An. 1688.) rumor certus Romā Pragā allatus est, Partē hujus Vitæ primā à Vēerabili Patre Ludovico de Pōte editā apud multos & doctos in tātas difficultates incidisse, ut opinio de sãctitate Patris. Ludovici plurimū imminueretur.

Quantum me tanto affectu utrique Venerabili Personæ nempe & P. Ludovico & Virg. Marinæ addictum, rumor ille pupugerit, facilē est conjicere: proinde statim imploratā Divinā Ope, me Operi sãcto accinxi, ut ea quæ intricata apparerent, enodarem, & quibusquibus demum difficultatibus, pro mea tenuitate cum gratia DEI, & ope Sanctissimæ Virginis Matris ad Gloriam DEI, & Animarum salutem facerem satis: id quod sequentibus Tractatibus præstare conabor.





TRACTATUS PRIMUS.

Modus examinandi Revelatio-
nes, & Documenta alia, quæ ad
Discretionem Spirituum pertinent.

CAPUT I.

*Dantur in Ecclesia DEl Regulæ Discretionis spiri-
tuum & Revelationum.*

I.

Vitio vertitur Venerabili Patri Ludovico de Ponte, quod Revelationes, Apparitiones, Visiones omnes Venerabilis Virginis Marinæ Escobar, quas ipse Tomo uno complexus est, universaliter approbaverit: qua de re, cum judicium certum ferri non possit, nisi inspiciantur Regulæ, quas in Ecclesia Catholica habemus, de Discretionem Spirituum, & modo examinandi, ac deprehendendi, quænam sint Revelationes cœlestes, veræ ac genuinæ, quæ subreptitiæ, suppositiæ, illusivæ, diabolicæ, aut ex propria phantasia, vel perturbato cerebro, vehementi apprehensione, vel somnijs subortæ, ideo
Re-

Regulæ illæ sunt necessariò ante omnia hîc adducendæ, ut manifestum fiat, P. Ludovicum nil egisse temerè, sed habuisse fundamentum solidum ac sufficiens Revelationes illas omnes prudenter agnoscendi pro veris, verè cœlestibus, ac omnino genuinis.

II. Tales Regulas, talèmq; Doctrinam de Discretionem Spirituum in Ecclesia Sancta exstare, certum ac de fide est, ex Epistolæ primæ ad Corinth: c. 12. ubi S. Paulus inter divisiones Gratiarum enumerat etiam *Discretionem Spirituum*, datam per Spiritum Sanctum Christianis: adeoque necesse est, ut in Ecclesia Catholica existent præscripta à Viris gratiâ Discretionis Spirituum præditis, ac Sanctis Patribus Documenta certa de explorandis Spiritibus, nè in errorem inducamur: alioquin frustra nos hortaretur S. Joannes Apostolus in Epistola sua prima cap. 1. *Charissimi, nolite omni spiritui credere, sed probate spiritus, si ex DEO sint.* Certum præterea necessariò est dari in Ecclesia Sancta Viros tantæ sanctitatis, tantæque eruditionis, & scientiæ spiritualis, qui Regulas & doctrinam illam de Discretionem spirituum, nobis à Spiritu Sancto relictas intelligant, noverintque applicare ad usum, & praxim, ità ut Documenta & Regulas illas cautè, sincerè, constanter, fideliter coram DEO, accuratè sequendo nullo modo possint incurrere notam imprudentiæ, aut temeritatis, nullumque mereantur vituperium; quin potiùs omnino prudens, certum, & *quantum hujus vite constitutio patitur*, infallibile humanum judicium, de Spiritibus & Revelationibus ferant quocunq; inter Christianos casu occurrente.

III. Tales autem Viros necesse est à CHRISTO Domino Ecclesiæ suæ usibus, & necessitatibus esse provisos tot, ut in omnibus Provinciis possibile sit eos reperire, qui pro directione Fidelium, ante & extra decisionem de Fide (quæ ad Sedem Apostolicam pertinet) in similibus casibus sufficiant, nè alioquin Spiritus Sancti Gratia *Discretionis spirituum* sit inutilis, &

videatur Ecclesiæ de necessarijs , contra insidias & laqueos Dæmonum , non satis provisum.

CAPUT II.

Fides , quâ talibus Revelationibus creditur , non est ea Fides Theologica principalis , quæ est Fundamentum Virtutum supernaturalium : ad eam tamen reducitur.

I.

Sed jam Quæstio oritur , si juxta gratiam Discretionis spirituum , Vir & Doctor quispiam sanctus , omni exceptione major , ferat tale prudens , certum , atque , ut dictum est , humano modo , & *quantum conditio , & constitutio nostra hujus vite patitur* , infallibile judicium , de quapiam Revelatione , declarando , & determinando eam esse à DEO , adeoque ea verba esse verba DEI ; nunquid postea , si Revelationem illam admit- tam , & agnoscam esse loquelam DEI , eique credam , nunquid , inquam , credam DEO loquenti ? adeoque nōne tunc Revelationi illi credam Fide Divinâ Theologicâ , & actus ille erit actus fidei supernaturalis ? præsertim si etiam accedat consensus , & approbatio talis per Summum Pontificem vel Concilium , qualis habetur pro Revelationibus S. Brigittæ.

II. Ad hoc responderetur negativè. Cujus ratio est , quia talis actus fidei sequitur , qualis præcessit actus prudentiæ & judicij de credibilitate. Si ergo Revelatio quæpiam ab ullo homine , aut etiam ab ipsa Ecclesia proponatur , non tanquam certissimè (juxta ea signa credibilitatis , quæ ad actum fidei requiruntur) infallibiliter Divina , & à DEO data , sed proponatur solum tanquam piè & probabiliter sinè periculo Devotionis ; Virtutis , ac Fidei Christianæ prudenter credibilis , & acceptabilis , etiamsi absolutè nondum habeat hanc firmitatem , & eviden-

dentiam, quâ obligantur fideles ad ea acceptanda, & credenda, quæ sunt Fidei Catholicæ; tunc Judicium credibilitatis solum dictat eam Revelationem, prudenter, & sinè periculo temeritatis posse eâ firmitate acceptari, quam meretur autoritas tantorum Virorum, qui suâ humanâ prudentiâ, & non per specialem Spiritûs Sancti assistentiam directâ infallibilitate judicant, esse dignum, prudens ac honestum, ut eis Revelationibus, tanquam utilibus, atque ad augmentum pietatis Christianæ, quin & ad dilucidationem, vel explicationem & ornamentum Fidei facientibus, & magnis argumentis Veritatis suffultis, ab omnibus fidelibus credatur.

III. Sic quoque nec S. Brigittæ Revelationes sunt fidelibus propositæ, tanquam omnino Fide Theologicâ acceptandæ pro Verbis DEI, quibus sub æternæ damnationis reatu credere obligemur: sed solum commendatæ sunt, ut humano prudentissimo judicio fide itâ dignæ, ut qui eas repudiaret, videretur incurere notam proterviæ, temeritatis, ac imprudentiæ, cùm tantopere faciant ad omnigenum incrementum Christianæ Devotionis, ad ingentem profectum salutis Animarum, adeò, ut suspectus de fide censeri quodammodo posset, qui eas pertinaciter reprobareret.

IV. Quòd autem non omnia, quæ Ecclesia approbat, semper eo sensu approbet, ut ea velit esse de Fide, patet vel ex sola quæstione de Immaculata Sanctissimæ Virginis Deiparæ Conceptione, cujus partem affirmativam Ecclesia eousque approbat, ut etiam Festo publico honoret, nec tamen statuit esse de Fide. Verba Bonifacij IX. Pontificis Maximi in Bulla Canonizationis S. Brigittæ sunt: *Hac generosa Vidua, per gratiam Spiritûs Sancti promeruit multis, eorum cogitationes, & affectiones intimas, & gesta secretissima propalare, & Visiones, ac Revelationes varias videre ac audire: ac Spiritu Prophetico multa prædicere, quorum nonnulla effectû completa fuere, prout hæc & alia*
in

in ejus Revelationum volumine plenissime describuntur. Hanc autem Bullam, quoad omnia, Martinus V. confirmavit. Creditur ergo ibi DEO, ac verbis DEI fide humanâ, in quantum scilicet illa verba esse DEI pervadetur autoritate fide dignâ humanâ; ut actus ille, in quantum credit DEO, accedat ad actum Theologicum, sed in quantum præsupponit solum judicium, credibilitatis non firmum, deficiat à fide Theologica, quia solum inducitur credibilitatis absolute fallibilis assensu.

V. Pertinet quidem actus ille etiam ad Virtutem Fidei principalis, quæ est Fundamentum omnium Virtutum supernaturalium, sed solummodo reductivè: quia reverâ per illum actum credimus DEO loquenti, etiamsi non satis firmiter, cum ipsam Revelationem, seu ipsam loquelam DEI, non firmissimè, sed solum probabiliter ita admittamus, ut tamen absolute posse esse aliter non negemus, prout articulum de Immaculata DEIPARÆ Conceptione, etiam sub voto & juramento tenemus, sed tamen cum reservatione *nisi aliter à Sancta Ecclesia fuerit definitum*; & sic eatenus hi actus fidei, à natura Fidei Christianæ deficiunt. Meritorij tamen sunt, & supernaturales, quia diriguntur prudentiâ supernaturali, & ad ultimum finem supernaturalem, hoc dictamine: *Honestum est has Revelationes pias, utiles, tantâ autoritate propositas, in ordine ad facilius obtinendam Vitam æternam admittere, etiamsi absolute loquendo, essent falsæ*: sicut Misericordia supernaturalis dicit: *honestum est huic mihi prudenter apparenti pauperi dare, in ordine ad regnum cæleste, elemosynam etiamsi forte in re ipsa non sit pauper.*

VI. Qui autem tantam autoritatem, etiamsi solum humanam contemneret, esset imprudens, superbus, ac præsumptuosus, aliisque vituperijs dignus. Cæterum Prophetæ, & omnes illi, quibus DEUS immediatè loquitur, possunt habere actum Fidei Theologicæ privatæ (non Catholicæ, seu Universalis, & propositæ ab Ecclesia) quia ibi Dominus DEUS suâ luce supplet

Pro-

Propositionem Ecclesiæ, & ipsemet immediatè Revelationem tam evidenter proponit, ac ingerit, ut impossibile sit Prophetæ dubitare de veritate ipsius Revelationis, quin sit re verà locutio DEI. Unde ibi adest omnis certitudo, & firmitas, quæ alioquin per piam affectionem adhæsivè habetur.

C A P U T III.

Regulæ discernendarum Revelationum, Extasum, Visionum, Raptuum collectæ ab Alphonso

Episcopo Giennensi.

I.

Quia nimis longum esset colligere ex Sanctorum Patrum voluminibus, aliorumque summorum Virorum scriptis, quæ de discernendis spiritibus, ac Revelationibus sparsim, aut solummodo sæpe carptim de his annotata reliquerunt; ideò, ut compendium laboris facerem, selegi Authores exceptione omni majores, apud quos regulas istas, pro quibuscunque, quantumvis extraordinarijs casibus in unum collectas habemus.

Cùm autem Revelationes S. Brigittæ sint in Ecclesia notæ præcipuæ, ac præ omnibus alijs solennitate majori approbatæ, adeò, ut etiam in Sanctissimo Missæ Sacrificio earum mentionem Ecclesia die ejusdem Sanctæ faciat: Ideo necesse est Viros, quorum Examini eæ fuere publicâ Authoritate subjectæ, fuisse accuratissimos, illuminatissimos, & rerum hujusmodi peritissimos; ut propterea dubitare prudenter non possimus, quin dictamina, & regulæ, quas isti secuti, nobis etiam sequendas, & observandas tradiderunt, sint solidæ, & optimè fundatæ, ac numeris omnibus absolutæ, ut ad quodcunque de Revelationibus instituendum Examen, ferendumque Judicium sufficiant.

II. Talis Vir inprimis occurrit Alphonsus Episcopus Gienensis postea (ut loquitur Codex Revelationum S. Brigittæ) *Eremita probatissimus*, qui S. Brigittam familiariter ipse diu noverat: cui ipsa inter cæteros Theologos, & Viros spirituales suas Revelationes examinandas exponerebat: cui ipsemet Summus Pontifex, Gregorius XI, post mortem S. Brigittæ, tanquam *circumspectissimo* (prout loquitur Cardinalis de Turrecremata in prologi sui capitulo primo) & *peritissimo Viro*: ac dein iterum Urbanus VI, *tanquam uni ex valentissimis Viris*, & *mundi luminaribus*, easdem Revelationes examinandas commiserunt.

Hic ergo Vir tantus, ante octavum Librum Revelationum S. Brigittæ, præfixit prolixam ad omnes Christianos Reges Epistolam, capitibus octo distinctam, in qua valde exactè agit de Revelationibus veris discernendis à falsis.

III. Capite 1. describit, qualem oporteat esse Virum, cui Examen hoc, & Judicium deferri possit, his verbis.

Primò: Dico, quòd qui species Visionum seu Revelationum justè, & discretè examinare, & discutere, ac discernere, & justè judicare vult, oportet ut habeat duo: scilicet Theoricam scientiæ Sacræ Scripturæ in materia Visionum, quam Sancti Patres, & Doctores, subtiliter & lucidè descripserunt: & Practicam, Experientiæ vitæ spiritualis, & sentimentorum, consolationum, & visionum mentalium spiritualiter, ac intellectualiter sibi divinitus *infusorum*.

IV. Capite 2. tradit modum Examinis de ipsa Persona, cui fiunt Visiones.

Secundò. An Persona illa sit spiritualis, an mundana & secularis?

An vivat sub disciplina, & obedientia speciali, continua, spirituali, alicujus Senioris discreti, virtuosì, maturi, Catholici, & experti Patris spiritualis; an in proprio arbitrio, & voluntate?

An

An tentationes suas, & illas tales Visiones, quas habet, statim supposuerit examini, & iudicio sui Patris spiritualis, vel aliorum discretorum Seniorum Patrum spiritualium, cum humilitate, timens illudi; vel an eas occultaverit, nulliusque examini vel iudicio eas supposuerit, aut ex illis de se præsumperit, & iactaverit, vel se reputando alios despexerit?

Item examinari debet, an ab ista Persona vidente Visiones, resultent veri actus, & virtutes Obedientiæ, Humilitatis, Charitatis, & intentæ Orationis, vel an procedant ab ea actus reputationis, iactantiæ, aut superbiæ, seu ostentationis, & elationis, vel appetitûs laudis humanæ, aut negligentia orationis, siue ambitio honoris vel dignitatis?

An ista Persona apud Viros spirituales reputetur verè Catholica, & fidelis, & obediens Prælati, & Rectoribus Ecclesiæ; vel an sit suspecta de fide, vel de obedientia Prælatorum, & Rectorum Ecclesiæ?

An in Vita spirituali virtuosè, & in Pœnitentia, & in habendo frequentes Visiones, humiliter, & diu perseveraverit, vel an in hoc sit recens & novitia?

An ista Persona Visiones videns habeat bonum intellectum naturalem, & spiritualement, & verum, ac discretum iudicium rationis, & spiritus; vel an sit levis intellectu, vel subita, aut phantastica? Dicit enim Gregorius in Dialogis, quòd Sancti Viri inter illusiones, atque Revelationes, ipsas Visionum voces, aut imagines, quodam intimo sapore discernunt, ut sciant, vel quid à bono spiritu percipiant, vel quid ab illulore patiantur?

An ista Persona fuerit aliàs examinata de materia, & modo Visionum per Viros litteratos, & spirituales; & approbata; vel an non?

V. Post hoc tradit Alphonsus regulas examinandi ipsum modum, quo Revelationes illæ & Visiones fiunt.

Tertiò. An eas videat vigilando, an dormiendo, & somnando?

An in Visione corporali, an in Visione imaginaria, & spirituali? An fortè in Visione intellectuali supernaturali? An in illo raptu mentali, qui Extasis vocatur, scilicet quando talia videns senserit aliquam veritatem supernaturalem dulcedinem Divini Amoris; vel an non?

An tunc videat, & audiat aliquem sibi aliqua mysteria loquentem, aut divinas doctrinas & spirituales demonstrantem: vel an non?

In qua specie tales Personas videat?

An tunc sentiat illuminationem, seu quandam illustrationem supernaturalis luminis, intelligentiæ, manifestationis, veritatis divinæ, illius materiæ, illorum visorum, vel an non?

VI. His subjungit Alphonsus Regulas, & Modum examinandi Qualitatem, & Materiam Visionum hoc modo:

Quartò. An Visiones illæ concordent cum Divina Scriptura, vel an discrepent ab ea?

An Visio illa sit ad humanorum actuum virtuosam directionem, & salutem Animarum, vel an inducat in errorem Catholicæ Fidei; vel an inducat aliquid monstrosus & novum, vel aliquid, quod à ratione discordet, aut à bonis, virtuosis, & humilibus moribus nos avertat?

An istæ Visiones semper sint veræ, an aliquando mendaces & falsæ, scilicet quod illa, quæ prædicunt, aliquando sint vera, & aliquando non?

An prædicant nobis futuros honores, aut divitias, aut laudes humanas; an humilitatem in omnibus?

An inducant nos ut extollamur, præsumamus, & confidamus de aliquibus virtutibus nostris: an ut humiliemur:

An nos moveant ad obediendum, etiam puris ac simplicibus virtuosis Personis spiritualibus, & Præpositis nostris; an ad contrarium? In reliquo remittit Lectores ad ea, quæ

S. Brigittæ de his sunt coelitus revelata.

CAPUT

CAPUT IV.

*Septem signa Visionis à bono Spiritu proficiscentis,
ab eodem Episcopo Alphonso annotata.*

I.

Post has regulas adducit idem Vir præstantissimus Alphonsus, capite 6. signa septem, quibus Visio à bono Spiritu profecta discernatur ab illusione diabolica; & sunt sequentia, quasi quoddam compendium reliquarum Regularum.

Primum Signum certissimum est, quòd Visio sit divina, quando scilicet illa Persona Visiones videns, est realiter humilis, & vivit sub obedientia, & disciplina continua, alicujus Patris spiritualis discreti, senioris, virtuosì, & experti in vita spirituali: & quando non præsumit de se ista Persona videns, nec extollitur, nec se jaëtat, nec appetit laudes humanas, nec occultat Visiones; sed cum humilitate vera vivens, omnes Visiones & tentationes suas statim detegit, & exponit humiliter examini & judicio sui Patris spiritualis, aut aliorum seniorum Patrum spiritualium; & tunc ut approbatum recipit, quod ille, vel illi approbant: & ut reprobata, repudiat illa, quæ illi reprobanda definiunt. Talis Anima, dico, quòd non possit illudi.

II. Secundum Signum est, quando Anima, tempore, quo videt Visiones, sentit se totam tunc repleri, & quodammodo dulciter inebriari, & inflammari igne infusionis, dulcedinis Charitatis Divinæ, & quodam sapore internæ dulcedinis, amoris DEI. Dico: quod istam internam charitatem, & dulcedinem Amoris Divini, quam diabolus non habet, nullo modo potest illam infundere in Animam alicujus, quia nullus dat, quod non habet. Et ideo concluditur, quòd, qui talia operatur in Anima, est DEUS: præsertim si tunc illa Anima tota roboratur,

54 *Tract. I. Modus examinandi Revelationes,*

tur, & repletur illuminatione quadam firmæ credulitatis, & obedientiæ, & reverentiæ Fidei Catholicæ, & Sanctæ Matris Ecclesiæ.

III. Tertium signum est, quando Anima existens in Visione, sive corporali, sive imaginaria, & spiritali sentit influxum intellectualis, supernaturalis luminis intelligibilis veritatis, & comprehendit tunc significationes veras illorum visorum, & verborum: & aperitur clarè tunc Intellectus ejus, ac ostenditur, seu manifestatur ei veritas illius materiæ. Iste enim influxus intellectualis supernaturalis luminis seu visionis, sive præcedat visio corporalis, aut imaginaria, sive non, nunquam à diabolo potest infundi in animam, sed solùm à DEO, ut ait Thomas de Aquino 2. 2. titulo de Prophetia.

IV. Quartum Signum, quando ille Propheta, seu videns, semper vera prædicit, & Catholica mysteria & documenta loquitur, & honestos ac virtuosos mores indicat. Et hæc sunt signa, quòd talia à DEO sint, quia Diabolus in illusionibus suis interdum dicit vera, ut decipiat, & aliquando falsa; sed Spiritus Sanctus semper vera, & nunquam falsa prædicit.

V. Quintum Signum est fructus ille, & opera, quæ procedunt ab illis Visionibus, seu Revelationibus, quia secundum Evangelium, *non potest arbor mala fructus bonos ferre, à fructibus enim eorum cognoscetis eos.* Et ideo quando videmus, quòd ex talibus Visionibus, seu verbis revelatis, mens illuminatur, intellectus & conscientia videntis illustratur, vita ejus corrigitur, & emendatur, convertuntur homines vitiosi ad virtuosam, & religiosam vitam, & de guerra & odio ad pacem, de superbia ad humilitatem & obedientiam, & de malo ad bonum; & hoc in multis personis, & diu perseverat; tunc certissimum signum est, quòd tales Visiones & Revelationes, quæ talem fructum germinaverunt, & produxerunt, non à Diabolo, sed à Spiritu Sancto potius processere; quæ facere Diabolo impossibile est, imò

imò totum contrarium pròcedit, à visionibus, seu potiùs illusionibus suis.

VI. Sextum Signum est mors, seu finis laudabilis & virtuosus Personæ videntis visiones.

Septimum Signum est clarificatio miraculorum post mortem videntis visiones. Haëtenus Venerabilis Vir Alphonsus Episcopus, qui capite 2. Documenta sua clauferat his verbis:

Causâ brevitatis finaliter dico: quod ad perfectam examinationem faciendam in ista materia, tam de qualitate Personæ videntis visiones, quàm de qualitate & modo videndi, quàm etiam de qualitate materia visionum, & de modo discernendi spiritûs, qui illas ostendunt, infundunt, seu ministrant, utrum boni spiritus, an mali sint, vide plenissimè in libris cœlestium Revelationum ad Beatam Brigittam de Svecia.

Quapropter ad pleniorē negotij hujus cognitionem, doctrinæque integritatem, videtur pertinere, ut etiam ea, quæ apud S. Brigittam habentur inspiciamus, & huc adducamus.

C A P U T V.

Doctrinæ cœlitus S. Brigittæ revelatæ circa Spirituum Discretionem.

I.

Libro 1. Revelationum capite 4. hæc habentur. Ego sum Creator tuus, Redemptor: quare timuisti de verbis meis? & cur cogitasti, de quo spiritu essent, de bono, an de malo? Dic mihi, quid invenisti in verbis meis, quod conscientia tua non dictabat tibi faciendum? aut nunquid aliquid præcepi tibi contra rationem? Ad quæ Sponsa respondit: Nequaquam, sed omnia illa sunt vera, & ego malè erravi. Respondit Spiritus seu Sponsus: Ego præcepi tibi tria, ex quibus tu posses cognos-

gnoſcere ſpiritum bonum. Præcepi tibi honorare DEUM tuum, qui te fecit, & omnia, quæ habes, dedit tibi. Hoc tibi dicit ratio tua eum honorare præ omnibus. Ego præcepi tibi fidem tenere rectam, credere ſcilicet ſine DEO nihil eſſe factum, ſine DEO nihil poſſe fieri. Præcepi etiam tibi diligere continentiam rationabilem omnium rerum; quia mundus propter hominem factus eſt, ut homo eo ad neceſſitatem uteretur.

Sic etiam per tria iſtis contraria potes cognoscere ſpiritum immundum. Ipſe ſvadet tibi laudem propriam quærere, & de datis tibi ſuperbire. Ipſe ſvadet etiam tibi perfidiam. Ipſe ſvadet etiam tibi incontinentiam omnium membrorum, & omnium rerum, & adhæc inflammat cor. Ipſe quoque quandoque decipit ſub ſpecie boni. Propterea præcepi tibi ſemper diſcutere conſcientiam tuam, & Sapientibus ſpiritualibus aperire eam. Propterea non dubites tunc ſpiritum DEI bonum eſſe tecum, cum nihil aliud deſideraveris niſi DEUM, & de eo tota inflammariſ. Hoc ego ſolus poſſum facere, & impoſſibile eſt Diabolo appropinquare tibi.

II. Et capite 54. Angelus loquebatur ad Sponſam dicens: Duo Spiritus ſunt, unus increatus, alter creatus. Increatus habet tria: primò eſt calidus, ſecundò dulcis, tertio mundus. Primò *calefacit*, non de aliquibus rebus creatis, ſed à ſeipſo, quia ipſe cum Patre & Filio eſt omnium Creator, & omnia potens; calefacit autem, quando Anima tota ardet ad amorem DEI. Secundò eſt *dulcis* quando Animæ nihil placet, nihil dulceſcit, niſi DEUS, & recordatio operum ejus. Tertio eſt *mundus*, ut nullum peccatum in eo inveniri poſſit, nihil deforme, nihil corruptibile, & mutabile. *Calefacit* autem, non ſicut ignis materialis, nec ſicut Sol viſibilis, aliquid liquefaciens, ſed calor ejus, internus Animæ amor eſt, & deſiderium, replens, & abſorbens Animam in DEUM. *Dulceſcit* etiam Animæ, non ſicut vinum deſiderabile, aut voluptas, vel aliquid aliud mundanum; ſed
dul-

dulcedo illa Spiritus, incomparabilis est omnibus dulcoribus temporalibus, & inexcogitabilis non sapientibus illam. Tertiò est Spiritus ille tam *mundus*, quemadmodum radij Solis, in quibus nulla macula inveniri potest.

III. Secundus spiritus qui est creatus, similiter habet tria: Est enim *ardens*, est *amarus*, est *immundus*. Primò est *ardens* & consumens, quasi ignis, quia Animam, quam possidet, totam incendit luxuriæ igne, & pravi cupiditatis, ut Anima præter ejus expletionem, nihil aliud cogitare, nihil desiderare possit, in tantum, quòd quandoque per illam amittitur vita temporalis, & omnis honor & consolatio. Secundò est *amarus*, quasi fel, quia animam sic suâ delectatione inflamat, quòd gaudia futura videntur ei esse nulla, & bona æterna fatuitas. Omnia quoque, quæ à DEO sunt, & quæ tenetur ei facere, amarescunt ei, & abominabilia sunt ei, quasi vomitus, & quasi fel: Tertiò est *immundus*, quia Animam sic vilem facit, & pronam ad peccatum, ut de nullo peccato erubesceret, & à nullo peccato desisteret, si non plùs hominum timeret verecundiam, quàm DEI. Ideo est spiritus ille *ardens* quasi ignis, quia ipse ardet ad iniquitatem, & alios secum accendit. Ideò verò *amarus*, quia omne bonum est amarum ei, & alijs secum amarescere vult. Ideò autem est *immundus*, quia ipse delectatur in immunditia, & alios secum similes quærit habere.

Nullus est, qui in conscientia sua non intelligat, utrùm suggestio diaboli ducat ad deformitatem peccati, an ad bonum, si diligenter cogitare & examinare voluerit. Ideò tu Sponsa Domini mei non habes dubitare de Spiritu cogitationum tuarum, utrùm bonus sit an malus: conscientia enim tua dicit tibi, quæ omittenda sint, quæ eligenda.

IV. Libro 3. c. 10. loquitur Mater (DEI): Nè timeas ea, quæ nunc videbis, à spiritu malo esse existimans, quemadmodum enim, cum solis appropinquatione duo veniunt, lux

videlicet, & calor, qui caliginosam umbram non sequuntur: sic cum Spiritus Sancti adventu in corde tuo veniunt, ardor scilicet Divinæ Charitatis, & Fidei sanctæ perfecta illuminatio. Hæc autem duo nunc sentis; hæc quoque duo diabolus, qui caliginosæ umbræ comparatur, non sequuntur.

V. Libro 4. c. 23. Beatissima Virgo sic ad S. Brigittam est locuta: Filia ex septem poteris cognoscere Spiritum Sanctum, & spiritum immundum. Primò enim Spiritus DEI facit vilescere homini Mundum, cujus honor reputatur in corde, quasi aër. Secundò facit DEUM charum Animæ, & omnis delectatio carnis refrigerat. Tertiò inspirat patientiam, & in DEO solo gloriationem. Quartò incitat mentem ad proximi dilectionem & compassionem, imò etiam inimicorum. Quintò inspirat ad castitatem omnimodam, imò etiam rerum licitarum. Sextò facit confidere in DEO in omnibus tribulationibus, & in eis gloriari. Septimò donat desiderium velle dissolvi, & esse, cum CHRISTO magis, quàm in mundo prosperari, & inquinari.

Ita è contra spiritus malus facit alia septem: Primò facit Mundum esse suavem, & cœlestia fastidire. Secundò facit appetere honores, & sui ipsius oblivisci. Tertiò excitat in corde odium & impatientiam. Quartò facit contra DEUM audacem, & in conceptibus animi sui pertinacem. Quintò facit levigare peccata sua, & ea excusare. Sextò inspirat levitatem animi, omnemque carnis impuritatem. Septimò inspirat spem diu vivendi, verecundiàmque confitendi. Ideò sollicita esto circa cogitationes tuas, nè a spiritu isto decipiaris.

VI. Libro 4. capite 110. CHRISTUS Dominus loquitur: Quomodo intelligendus est Spiritus meus, cum duo sint Spiritus, bonus scilicet & malus? Ego dicam tibi, Spiritus meus est calidus, & facit duo bona. Primò facit nihil desiderare nisi DEUM; secundò dat summam humilitatem & Mundi contemptum.

Spiritus verò malus, est frigidus & calidus. Frigidus, quia
omnia,

omnia, quæ Dei sunt, facit amara. Calidus ideò est, quia hominem ad carnis inclinat voluptatem, & ad Mundi superbiam, & ad laudem propriam instigat affectum; ipse quippe blandus venit, quasi amicus, sed est quasi canis mordens; venit quoque quasi dulcis consolator, sed est pessimus illaqueator. Ideò cum venerit dicito ei: *Nolo te, quia finis tuus est malus*; cum verò Spiritus bonus venerit, dicito: *Veni Domine, quasi ignis & incende cor meum*, nam licet ego indigna sim habere te, tamen ego ex mea parte indigeo te, quia tu non eris melior propter me, nec indiges mei, sed ego ero melior per te, & sine te sum nihil.

CAPUT VI.

*Regulæ discernendarum Revelationum traditæ
à Cardinali Joanne de Turrecremata.*

I.

Iste est alter Vir incomparabilis, ex sapientissimo, doctissimoque Prædicatorum Ordine, quondam Sacræ Theologiæ Professor, Sacri Palatii Apostolici Magister, ad Revelationes S. Brigittæ lustrandas, examinandasque à Concilio Basileensi selectus, postea S. Romanæ Ecclesiæ Cardinalis Joannes de Turrecremata. Is in eo, quem Revelationibus S. Brigittæ præfixit Prologo, quinque dicit esse Notanda, quibus arguatur, & verisimiliter ostendatur, Revelationes illas à Spiritu Sancto promanasse: *Per quæ, tanquam per signa, cognosci & discerni solita sint Revelationes, quæ Spiritu Veritatis inspirantur, & divino superfunduntur lumine, à Revelationibus, quæ à spiritu mendaci, & diabolica illusione administrantur & suggeruntur.*

II. Primum signum est: quando graves & experti sapientes Viri ita judicant.

Secundum signum est ex parte effectus, qui ex Revelationi-

bus in animo ejus Personæ, cui fit revelatio, relinquitur, quando scilicet in ea devotionis & humilitatis præcipue & Gloriæ DEI, ex hujusmodi Revelationibus profectus augetur, quia Revelatio Divina hominem efficit humilem, flexibilem, & disciplinatum; spiritus verò diabolicus superbum reddit animum, tumidum, præsumptuosum, & pertinacem.

Tertium signum est ex parte materiæ, quando in omnibus ejus dictis invenitur veritas.

Quartum signum est ex parte formæ, est conformitas ad Sacram Scripturam.

Quintum signum est ex parte Personæ visiones habentis, quando est approbata ejus Sanctitas.

III. Hæc sunt documenta Cardinalis Turrecremata, de quorum primo signo tractavi in mea Epistola Apologetica, §. 2. in argumento primo. Huc pertinent, quæ habentur vitæ Venerabilis Virginis Marinæ, Part. 2. lib. 3. cap. 2. 3. 4. & cap. 16. ac 17.

De secundo signo egi in eadem Epistola, §. 2. argum. 2. ex Introductione Ven. P. Ludovici §. 1., atque ex vita Ven. Marinæ, Part. 1. c. 5. 6. 7. 8. 9. 10. 11. & 15. Agitur etiam plurimum in Parte 2. prout suo loco diductius ostendetur.

Te tertio signo egi in eadem Epistola §. 2. & 8. habeturque etiam in 2. Part. Vitæ lib. 3. c. 1. 10. 11. Quanquam hoc signum, processu temporis, quoad ea, quæ in futurum prædicuntur, indiget, ut adverti possit, utrum omnia verè sic, prout prædicta fuerant, evenerint. Sed tamen hoc ipsum signum exactius ostendam infra Ven. Virgini Marinæ quoque quadrare. Interim sufficere posset, quòd hæctenus nihil inventum sit falsum, in omnibus illis, quæ ab ea dicta, & à P. Ludovico literis sunt consignata.

IV. Quartum signum proposui in Epistola mea, §. 2. quod tamen ex ipso opere per totum ubique apparet: appare-
bit-

bitque luculentiùs, quando objectionibus omnibus particulis satisfiet.

Quintum signum ostenditur in Epistola mea §. 2. & in Introductione P. Ludovici de Ponte §. 1. per septem heroicas hujus magnæ Servæ DEI Virtutes: itémque in 1. part. lib. 1. Vitæ illius, præsertim primis 14. capitibus; & lib. 6. ferè per totum. Item in 2. part. lib. 3. c. 5. 6. 7. 8. 9. sed & inferiùs ex parte ostendetur.

Hæ Cardinalis de Turrecremata Regulæ semper fuere in magna æstimatione, in ordine ad Revelationes discernendas; pro ut etiam adhibitæ sunt ad approbandas Visiones S. Franciscæ Romanæ, &c.

CAPUT VII.

Joannis Lanspergij Carthusiani Sensus de Revelationibus Sanctarum Mulierum.

I.

PRæfixit Vir iste spiritu & religiosâ eruditione clarus, præclarum quendam prologum super Revelationes Sanctæ Gertrudis, in quo specialiter zelum & Prudentiam suam, exerit circa Revelationes, quas Divina Bonitas Sanctis dignatur Mulieribus præstare; in quo, cum non pauca quoque sint ad negotium, quod circa Revelationes Vener. Marinæ tractamus, egregiè facientia, ea videntur hic ad uberiorem tractatûs hujus lucem opportunè, proponenda. Scripsisse autem se statim in Vestibulo hujus Proloquij ostendit post Martini Lutheri apostasiam, quando ab Hæreticis aliud audire non erat, nisi Scripturam, Scripturam; omnémque aliam Revelationem contemni. Sic ergo habet:

H 3

II. Joan-

II. *Joannes Lanspergius Carthusia Colonienſis Alumnus, pio Lecto-
ri Gratiam & Pacem in CHRISTO JESU.*

Nemo miretur, quòd hiſce temporibus nos, quando paſſim ab omnibus Sacra Scriptura (licet haud pari animo) quaeritur, in lucem producimus librum Divinarum Revelationum. Quod certè genus eruditionis non debueramus ignoràſſe haud admodum gratum, ijs præſertim, qui mundano, humanòve ſpiritu tument, quique litterà magis docti ſunt, quàm ſpiritu. Adeò enim illis quævis ejusmodi ſunt frigida, atque infana videntur, ut non ſolùm ad ea naufcà quàdam moveantur, verùm etiam hujusmodi libris, ubi poſſunt, detrahunt: & quæcunque non intelligunt, carpunt: parùm interea conſiderantes, quòd totum ferè verus Teſtamentum, Revelationes eſſe fateri cogantur. Unde meritò Revelationis nomen non adeò nobis inſuetum, nec adeò (ſi non prorsus deſiperemus) deberet eſſe novum, niſi in eorum maluerimus numero haberi, quibus CHRISTUS Patri confitetur ſecreta ſua abſcondita, utpote ſapientibus & prudentibus ſæculi: quàm parvulorum Albo adſcribi, quibus idem revelaverit. Deus non ſolùm varios Scriptores Eccleſiaſticos, verùm etiam multiformem docendi modum, alia item & alia eruditionis genera, phraſim quoque ac dictionem multiplicem in Eccleſia conſtituit: idque in utròque ſexu, quo nemini deeſſet, vel (ut ità dicam) juxta ſuum genium, unde erudiri, unde illuminari, unde trahi, unde ædificari poſſet.

III. Quid igitur jam mirum, ſi hominibus mollioris cordis, ut qui beneficijs, blanditijs, aut amore trahuntur, magis quàm præceptorum auſteritate (id quod in ſexu foemineo, DEO devoto præcipuum eſt) Deus loquatur per Revelationes, atque ad ſuæ bonitatis agnitionem, amorèmq; & eos quibus loquitur, & eos qui loquutum fuiſſe legunt, quando quidem pariter habeant corda mollia, faciliterque illectiva, alliciat, & trahat; idque ut dixi, exuberantiâ beneficiorum, atque commonſtratione

tionē suæ dulcedinis ac bonitatis? Verūm objicient fortasse hic alij, quòd mulier fuerit, cui hæ Revelationes factæ sint: fœmineum sexum prorsus omnem, aut spernentes, aut generatim habentes suspectum, quasi quidquid egerit, dixeritque Virgo, aut fœmina, quamlibet Sancta, fœmineum (hoc est futile, molle, instabile) nihilque habens virile (id est perfectum) esse necesse sit. Quasi verò in sanctis fœminis non constantior sæpe numero animus ad virtutem, ad Martyrij agonem, ad tuendam castitatem, ad compassionem, ad deprecandam DEI iram, quàm in viris multis inventus sit: quæ certè non futilia & imperfecta, sed præstantiora nonnunquam, quàm viri nobis virtutum reliquere exempla. Quare potius earum contemplatione nos Viri confutemur oportet, atque universum propterea sexum earum nobis censebimus venerandum.

IV. Certè non inficior eundem sexum, id est pias aliquot Virgines, aut Mulieres DEO devotas, ubi sibi ipsis relictæ fuerant, nec singulari ope divinitus adjunctæ, nequaquam suspitione caruisse: quòd vel Gloriæ amor, qui fœminis potissimè insidiatur, vel sui ipsius complacentia vana, illis imposuerit, quò aut crederent, quòd prorsus erat humanum, sibi cœlitus contingere; aut gloriâ plausûque hominum oblectatæ, fingerent, jactarentque de se, quàm in veritate res erat, præstantiora. Verūm tamen, quæcunque fuerunt, sũntque hujusmodi, facillè deprehenduntur. Neque enim diu latere fictio potest præsertim fœminea: siquidem ubicunque profundissimæ humilitatis non fuerit fundamentum, citò, quidquid super illo fuerit ædificatum, non absque ignominia ruit. At ubi sincera enituerit humilitas, ut in his solet inveniri, maximèque in omnibus necessaria est, qui DEO soli, puro, nudo, castissimòque (ut ità dicam) affectu inhærent, in quocunque sexu etiam inveniantur; neque decipiuntur, neque decipere volunt.

V. Nam etsi insolitum quid sentiunt, recipiuntque à DEO, per-

perturbantur animo , vehementerque addubitant , quomodo hoc ex DEO esse possit, quòd sibi hæc contingant , utpote infirmis, vilibus, & ijs , qui nihil sunt , quos etiam DEUS huiusmodi noverit.

Quare singulari dono se reliquis præferri , aut præ alijs sibi adeò quidquam fieri omnino absurdum putant. Hoc enim modo & benedicta præ omnibus Virgo MARIA , ad salutationem Angeli turbata est , stupens pro virginei cordis sui humilitate , tantam sibi offerri salutationis præeminentiam , cuius sibi neque conscia, utpote humilis neque digna videbatur.

Atque ideò huiusmodi foeminæ sanctæ , nisi per Virum sanctum aliquem eruditum & expertum , cuius sese iudicio submiserint, fuerint compulsæ ; non audebant huiusmodi , licet divinis, vel revelationibus, vel consolationibus, vel (ut ità dicam) sentimentis acquiescere. Tantum abest ut vel alijs manifestare, vel inde gloriari audeant.

VI. Accedit quod vita innocentissima , animi simplicitas humilitasque, de qua diximus (licet ipsæ nesciant) ejusmodi commendent , ut omnibus videatur juxta spiritum sapientibus , nihil esse mirum , quòd singularibus donis suis illas dignetur DEUS. Certè qui ejusmodi sunt, ab inimici laqueis tutiores sunt, sive Viri sint, sive Mulieres, sive Græci, sive Barbari ; quandoquidem non est personarum acceptor DEUS , nec sexum à sexu (quem utrumque fecit) discernit, nisi quòd infirmiori plerumque , ubi humilitas & devotio id meretur, potiora dat dona , ut confundat fortia, sapientesque in suo sensu confutet, quòd dona sua sibi (hoc est DEO) adscribenda cognoscantur soli : quandoquidem illiterati & simplices minùs habent, quàm ut ea, quæ Scripturæ Sacræ ad unguem sunt consentanea, licet difficilia, plerumque scribant & ardua, effingere possint. Per quoscunque vult loquitur DEUS. Hæc aspernari propterea , quòd per Mulierem DEO revelante insinuentur, nōne tumidi cordis, insolent-

solentissimæque foret superbiæ? præsertim cum per se ipsum in Scripturis Sacris eadem (quod dixi) Deus ipse quoque nobis revelaverit: licet pro temporum, hominumque conditione, hic aliquantò lucidiùs, uberiùsque eorum explanatio fiat.

VII. Atqui pro devoto fœmineo sexu, si nobis contendendum esset, num putas Lector deforet nobis, unde, velex Scripturis probari possit, quandoque uni, aut regendæ, aut erudiendæ genti fœminam prælatam? Demum si fœmineus est contemnendus sexus, propterea solùm, quòd sexus illaudabilis sit: jam non sexus, sed Creator, qui hunc sic condidit, accusaretur. Et tamen etiam cum qui condidit, non invenimus aspernatum fuisse: sed misericordem fœmineo sexui, familiaremque sæpe numero sese exhibuisse. Quid enim est, quòd Mulieri ad puteum Samaritanæ loquitur, manifestatq; secreta sua CHRISTUS; nisi quòd eligens fragilia & contemptibilia, contemnebat fortia? Cui enim Pharisæorum aut Scribarum, antè tam manifestè dixerat se Messiam, quomodo huic dixit Mulieri: *Messias venit, & is qui loquitur tecum, ipse est.* Itaque si sexus est contemnendus, cur præterea Jesus piissimis reliquis quibusdam Mulieribus, potissimùm autem Mariæ Magdalenæ, adeò se familiarem exhibuit? profectò propter sexum neque magis neque minùs se familiarem exhibuit. Nullius est enim sexus apud eum discretio: sed quia in hoc sexu amantiora, fideliora, puriora, suavioraque corda viris, fortasse etiam Apostolicis aliquando anteferenda, invenit: ideo benigniorem, quod reor, se illis interdum exhibuit.

VIII. Porro si jam sub novo Testamento, ac tempore, Gratiæ, Sanctarum vellem recensere gesta fortia Mulierum, tempus me deficeret. Neque enim mihi est animus Mulierum hic laudes scribere, nec recensere illustriores, sed calumniam, duntaxat hanc ab eis depellere, quæ à quibusdam generatim sequi inuritur, ut quidquid actum, dictumve sit, quamlibet Sanctum,

Etum, si Mulier fuerit, licet cœlitus hoc instructa dixerit, jam contemnendum, exhibilandumque putent. Quare sanctarum Virginum prætereo triumphos, martyrij constantiam, inter pœnarum denique agones animum non certè fœmineum; hoc est, ut ipsi volunt, mollem aut tumidum, sed invictissimum, atque viris interdum constantiorem. Taceo quoque, quòd fœxus fœmineus multò est Viris (generatim loquendo) devotior, amorique & contemplationi aprior. Unde fit etiam, quòd nolim tamen ad cujuscunque reprehensionem à me dictum accipi, ut Viris alioqui doctissimis, qui ambulant in mirabilibus supra se, occupantes magis animum suum curiosis quæstionibus (penè dixeram superstitiosis) quàm necessarijs, aut secretis, quæ scire non oportet, investigandis, aut mundanis litteris ediscendis, non tantà se familiaritatis gratià manifestet Deus, quantà ad eorundem potiùs confutationem fœminis, illitteratisque viris DEO devotis illabatur; illis videlicet, qui ipsum solum puro, simplici corde, occupationibus animi alijs omnibus exclusis, ferventer quærent: nimirum ostendere volens, se non indigere humanæ sapientiæ verbis, nec ingenij profunditate humani, quin potiùs per eadem sæpenumero impediri etiam ad manifestanda suarum operationum, judiciorumque secreta.

IX. Mentior, si non hodie quoque plures fœminæ, Virginesque DEO devotæ, quæ in DEI timore, juxta ac amore, inter varia tentationum bella, atque è diverso quoque inter consolationum divinarum varia genera consenuerunt, inveniantur, quæ in spiritali via DEI, in secretis, scrupulis ac nodis conscientiarum discutiendis, resolvendisque (quatenus res attinet ea, quæ versantur circa sentimenta & eventus occurrentes Animabus contemplativis, quas Deus ad se trahit: & quæ solà experientià, non litterà discuntur) peritiores sint, magisque idonea adhibeant consilia ijs, qui eandem ambulare viam percipiunt, utpote Spiritu Sancto illuminatæ, & experientià doctæ,
quàm

quàm litterati præstantesq; Doctores inveniantur multi: quamvis eadem hujusmodi devotæ (quod congruum est) nihilominus interea pro humilitate, Virorum doctorum directioni semetipsas subjiciant. Nemo enim, maximè in via DEI, præsertim novus Viator, sui ipsius debet esse Rector, Ductor, aut Consul.

X. Atque ideò tantâ hujusmodi sibi devotas animas gratiâ dignatur Spiritus Sanctus, quòd cum adeò jam sint spiritu perfectæ in aliorum judicio, ut jam in via DEI tanquam Magistræ consulantur, in suis tamen adeò nihil sunt oculis, ut nec minimum quid auderent insolitum, absque consilio sui Patris spiritalis, aut Viri boni (quem consulendum duxerint) timentis DEUM. Ex quarum interrogationibus, ex quarum humilitate illuminata, non parum (scio) proficiunt sæpenumero Patres, aut Confessores earum bonæ voluntatis, dum vel illarum puritatem, perspicacitatēq; limpidissimam conscientiarum advertunt, aut dum ad dubia illarum (licet non plenè intelligant, quod quæritur, Spiritu Sancto pro humilitate interrogantium adjuti) respondere coguntur: in hoc planè multâ laude digniores (utpote viri bonæ voluntatis) tumidis quibusdam sciolis aut litteratis, qui si interrogentur, præsumentes de se, aut laudanda, damnant, aut commendant vituperanda, hoc solo clari, quòd sexum infirmiorē, hoc est, quòd sexus infirmioris devotionem, ridēt, nihili pendunt, & quandoque earum spiritum impediunt.

XI. Indè est, quòd quia Sacerdotes sunt ipsi, & Viri utunque graves, & (quod multum ad hoc hortatur) in hominum opinione magni, non permittunt flagrantia desideria scæminei sexus, aliorumve quorumcunque devotissimorum, consolari, confortarique pro eorundem desiderio, & juxta tractum spiritus, Sacro-sanctâ Eucharistiâ: ex qua sæpenumero maximam videmus gratiam etiam in noviter converſis, auxiliūque divi-

num ac fortitudinem, ad sæculi contemptum, ad expugnanda vitia, ad divini quoque amoris radicationem scaturire: sed ipsi esurientibus ijs animabus, confortationeque egentibus, cibum salutarum interdicunt, statuentes post quindenam duntaxat (ut vocant) devotis quibuslibet, non Sacerdotibus, hunc præbendum. In hoc Spiritui Sancto haud dubium, sanctisque huiusmodi Animabus, quæ singulari modo ab eodem trahuntur, & legem & vim inferentes. Verùm hæc dicta sint in eos, qui devotum foemineum sexum vilipendunt, vel quod illiteratæ sunt, & decipi possint, aliæque id genus futilia.

CAPUT VIII.

*Documenta Venerabilis P. Ludovici de Ponte,
circa discretionem spirituum.*

I.

ET si in omnibus libris à Viro isto & Servo DEI conscriptis appareat ingens illius Lumen cœlestē ad Animarum Directionem rerumque Theologiæ mysticæ discretionem, magis tamen ad nostrum propositum facit, ubi materiam discernendorum spirituum tractat ex intentione, nempe in Introductione, ad Meditationes cap. 11. In 3. parte Meditationum, medit. 19. punct. 3. In 5. parte medit. 6. punct. 1. In Vita P. Balthasari Alvarez c. 3. & 14. ac 41. & 42.

Sed quia nucleum & substantiam huius totius doctrinæ habet in Duce spirituali, ubi observanda circa Revelaciones, aliasque extraordinarias DEI in Animabus operationes dignoscendas aut examinandas præscripsit; ideo puto sufficere, si ea hic adducam; patebit enim quantam vir iste à Deo illuminatus habuerit scientiam discretionis spirituum, ubi non solum omnia, quæ hætenus adducta sunt, observavit, verùm etiam plures obser-
vatio-

vationes, & adversiones ipsemet addidit : ut vel hinc clarum fiat quantam cautelam & prudentiam adhibuerit in examinandis & approbandis Revelationibus Ven. Virginis Mariæ.

II. Igitur in Duce spirituali, tract. 1. cap. 2. proponit, & compendiosè unà cum suis adjunctis & effectibus explicat tres modos Revelationum.

Primum per verba & sensus externos, ut factum est S. Paulo: *Saule, Saule quid me persequeris*; & Beatissimæ Virgini in Annunciatione, quando Angelus visibilis eam allocutus est.

Secundum, qui magis est ordinarius per verba interiora & in phantasia seu imaginatione, aut sensibus internis. Et propterea non solum in vigilia, verum etiam in somnis tales Revelationes accidunt, prout factum est Jacobo, dum ei scala usque ad cœlum porrecta apparuit.

III. *Tertium*, immediatè per intellectum, qui modus Revelationum nulli est illusioni obnoxius, quia non potest fieri nisi à DEO solo, qui solus tanquam Creator, & Dominus, potest immediatè illabi in duas illas supremas Animæ potentias, nempe Intellectum & Voluntatem: Diabolus autem solum se, potest occupare circa imaginationem. Sed quæ per hunc modum à DEO revelantur, innotescunt quidem homini illi, cui fit hæc Revelatio, eumque illuminant; sed non possunt, nisi per ambages, propter suam altitudinem, ulli alteri referri, cum superent phantasiam, & sint altiora omni imaginatione: narratio verò nostra subiaceat phantasie, & ei proportionari debeat, & ad eam verba nostra omnia, ut & omnia signa alia tendant, quibus manifestamus ea, quæ scimus & intelligimus; nec est nobis possibile aliter. Unde universaliter etiam in naturalibus omnia illa, quæ non sunt imaginabilia, & quæ phantasiam excedunt, debentque per solum intellectum capi, ita ut phantasia illuc non pertingat, sunt captu difficillima, ut propterea Aristoteles sæpius conqueratur multos Philosophos non potuisse capere ve-

ram Philosophiam, quia non poterant transcendere phantasiā, hæseruntque in eis, quæ sunt imaginaria, & Philosophiam imaginationi conformarunt. Sic S. Paulus in raptu audivit arcana verba nempe per intellectum, & non per phantasiā, ac propterea non licebat ac naturaliter impossibile erat ea loqui.

IV. Porro Revelationes, quas Vener. Virgo Marina de Escobar Patri Ludovico enarravit, quasque ipse P. Ludovicus parte 1. Vitæ ejus descripsit, omnes sunt primi vel secundi generis per imaginationem, adeoque necessario habent similitudinem cum somnijs, hæc enim etiam fiunt in imaginatione: nam ipsa de tertij generis Revelationibus semper asserit sibi verba & modum pro eis exponendis deesse.

V. Cap. 23. exponit Ven. P. Ludovicus magnam necessitatem scientiæ discretionis spirituum, & explicat pericula gravissima promanantia ex illusionibus Dæmonis, carnis, ac imbecillitatis nostræ. Ac deinde (ex S. Gregorio, Gersono, S. Bernardo, Cassiano, Richardo, S. Bonaventura, S. Augustino, S. Thoma, S. Ambrosio, S. Diadocho Episcopo Photicensi, S. Basilio, S. Vincentio Fererio) incipit planè magistraliter explanare, & deducere totam doctrinam de spiritibus discernendis non solum conformiter ad omnia, quæ ex Alphonso Episcopo ac Cardinali de Turrecremata supra vidimus, verum etiam longè exactius, ac copiosius deducendo omnia ex fundamentis, indicando omnes circumstantias, examinando omnes effectus, conferendo omnia, etiam externa indicia, indicando modos & media, quibus examen hoc finè periculo erroris sit instituendum, ita ut numeris omnibus videatur doctrinam hanc absolvisse.

VI. Et quidem statim §. 1. sic loquitur: Primum igitur est fundamentum, amplecti consilium S. Joannis 1. Ep. c. 4. v. 1. dicentis: *Nolite omni spiritui credere, sed probate spiritus, si ex DEO sunt*; si enim te absque hoc examine projicias, ut credas, quod

quodcunque spiritus internè tibi dicit: graves illusiones ac deceptiones patieris, vel quia fidem adhibebis falsò spiritui, credens esse verum; aut non adhibebis vero, credens esse falsum, & admittes Angelum Sathanæ, credens esse Angelum lucis, aut rejicies Angelum lucis, existimans esse Angelum Sathanæ: cum utrumque sit valde perniciosum: neque enim minùs nocet portam cordis DEO pulsanti claudere, credendo esse Dæmonem, quàm pulsanti Dæmoni aperire, si credas esse DEUM. Et æquè perniciosum est, spiritum bonum, ut Apostolus ait ad Thess. 5. x. 19. extingvere, sanctasque ejus inspirationes: atque est fovere malum, & execrandas ejus suggestiones. Necessè ergo est omnes spiritus probare, ut eos amplectamur & sequamur, qui sunt DEI: repellamus verò eidem contrarios.

VII. In §. 2. assignat duas fundamentales regulas, quibus reliquæ innituntur: quarum

Prima est: Spiritus Sanctus nihil potest inspirare, quod contradicat ijs, quæ sunt in Sacra Scriptura revelata, à Concilijs declarata, & in tota Ecclesia recepta: quia DEUS non potest sibi ipsi esse contrarius.

Secunda: Spiritus Sanctus est Spiritus CHRISTI Domini, adeoque id quod præcipuè inspirat, sunt veritates, quas CHRISTUS docuit, & virtutes quas ipse exercuit. Nunquam itaque inspirat res inutiles, nec impertinentes novitates, nec vitæ rationem alienam à vitæ CHRISTI.

VIII. Ex his inferendo notat Venerabilis P. Ludovicus: *Primò*, Omnia interna sensa, quæ non mensurantur hac regulâ, esse à malo spiritu; quia Dæmon spiritus mendacij & malitiæ in omnibus suis suggestionibus tendit ad falsitatem & vitia, idque varijs modis, quos ibi Ven. P. Ludovicus explicat.

Notat secundo. Dæmonem quandoque multa bona per tempus aliquod suggerere, ut sic securum faciat cum, cum quo agit, quod sit spiritus bonus, sed postea aliquid addit, quod ipsius est

est proprium, persuadens aliquem errorem vel peccatum. Quomodo autem in tali genere se oporteat gerere, ibidem explicatur.

IX. *Notat tertio.* Etiam si non sit amplius credendum spiritui, qui vel semel instigat aut revelat aliquid falsum vel malum etiam minimum; non tamen propterea existimandum esse, omnes reliquas inspirationes aut revelationes, quas homo ille, habet, esse à maligno spiritu: qua de re pulcherrima ibi traduntur documenta.

Dein §. 4. dicit conjungendos his omnibus esse duos oculos, nempe bonam rectam gloriæ DEI & obsequij divini intentionem, adeoque purum & sincerum finem bonum. Deinde discretionem, quâ in omnibus adhibeatur ordo, & recta dispositio; non cupiendo statim ad culmen pervenire sinè transitu per infimum, magisque necessarium, &c. Spiritus enim bonus, eum sit discretus & moderatus, ordinariè non movet, nisi ad res ordinarias cujusque viribus sinè miraculo proportionatas, &c.

X. Quando autem Deus extraordinariè ducit ad res non ordinarias, prout Abrahamo præcepit sacrificare suum proprium filium; tunc Ven. P. Ludovicus primò explicat, quo instinctu, quo lumine, quâ Spiritûs Sancti vehementiâ talia non imitanda fiant. Deinde cautelas in talibus adhibendas exponit adversus fraudes Dæmonis, nempe ut inspiciantur fines, ad quos inspirationes tales diriguntur: ut consideretur sanctitas personæ, cui fiunt; eò quòd talia nunquam à DEO fiant hominibus imperfectis, &c.

XI. Denique perquam eleganter docet, quomodo non sint oculi conjiciendi in sola generalia virtutum desideria, sed diligentissimè attendendum, nè in applicatione eorum ad particularia decipiamur. Et sic doctrinam hanc totam Ven. P. Ludovicus redegit ad sex puncta observanda.

Primò.

Primò. Nihil oportere esse contra Sacram Scripturam, Concilia, Ecclesiam.

2. Præcipuè solere inspirari veritates, quas docuit CHRISTUS Dominus & virtutes, quas exercuit.

3. Oportere ad esse bonam rectam intentionem.

4. Oportere ad esse discretam moderationem.

5. In inspirationibus extraordinarijs, quid advertendum.

6. Quid circa inspirationes ad virtutes generatim.

CAPUT IX.

Sex magis particulares Regulæ ad spiritus discernendos, datæ à Ven. P. Ludovico de Ponte.

I.

Capite 24. in Duce Spirituali, tract. 1. discurret Venerabilis P. Ludovicus de indicijs boni spiritûs magis particularibus, & ait pro fundamento ponendum, quod est.

Regula prima. Nempe quòd solus DEUS possit immediate uti superioribus potentijs Animæ, id est Intellectu & Voluntate: Dæmonis verò potestas sit limitata ad partem Animæ inferiorem, nempe Imaginativam, & Appetitum.

Hinc sequitur illas consolationes, quæ in similibus inspirationibus ac Revelationibus incipiunt à superiori parte Animæ, & indè descendunt ad inferiorem, semper esse à DEO. Quæ verò incipiunt à carne & à parte inferiori, possunt esse à spiritu bono, & à spiritu malo, adeoque indigent examine, maximè in hominibus naturâ melancholicis; itémque in ijs, qui nimis sunt affectuosi, ac magno impetu in suas actiones feruntur, & tenerè facileque fundunt lachrymas.

II. *Regula secunda* (quam Venerabilis Pater dicit subtilem & paucis cognitam) est, quòd Inspirationes, Revelationes, &

K

Allo-

Alloquia DEI afferre soleant secum spirituales quendam saporē, quem soli Viri valde spirituales, & in familiaritate interna cum DEO valde exercitati percipiunt, & dignoscunt: sicut singulæ personæ dignoscuntur ex figura, facie, voce, & quisque cibis ex sapore. Sic DEUS servat talem modum loquendi, cum adeò divino vocis tono, communicando talem modum saporis spiritualis, ut per eum agnosci se faciat à suis familiaribus. Sic Apostoli CHRISTUM Dominum noverant, cum eis diceret: *Ego sum.* Nullus tamen, quis sit ille sapor, agnoscat, qui non eum delibaverit, & postquam delibaverit, deerunt ei verba, quibus eum alteri manifestet.

III. *Regula tertia est*, quòd ex spiritu bono sequatur veræ humilitatis sapor, cujus effectus octo ibi adducit, & sunt:

Primus non desiderare res extraordinarias, non Revelationes, non Raptus, non Exercitia virtutis singularia, & inusitata, quæ videntes in admirationem rapiant: quin potius totum hoc fugiat, contrarium desiderans.

Secundus. Indignum se judicare DEI donis, nec sibi ea tribuere, sed misericordiæ DEI Largitoris, admirando, quod tam vili vermiculo se communicet.

Tertius. Ad imminentes aliquos DEI favores, se ipsum contrahere, recusare, timere, se indignum agnoscere, & dicere DEO, malle se hic pati, quàm gaudere.

IV. *Quartus.* Non præsumere propter hos favores, quasi sit Sanctus, quin potius timere, tanquam magis obligatus DEO, qui ob ingratitudinem mereatur deseri.

Quintus. Non se meliorem alijs putare, nec cogitare se solum esse talem, quin potius credere DEUM sibi, tanquam debiliori magis indulgere.

Sextus. Occultare DEI dona, & æquè libenter aperire culpas, ac virtutes.

Septimus. Optare se ab hominibus despici, gaudendo, quòd habeatur imperfectus.

Octa-

Octavus. Cognoscere suum nihilum, & indignitatem, cum pudore ob sua peccata: qui pudor excludit omnino vanam gloriam, vanamque complacentiam.

V. Sic Dominus DEUS dixit S. Angelæ de Fulgineo dubitanti de suis Revelationibus: *In hoc agnosce me esse, qui te alloquor, quòd pro eo tempore nec diverti poteris ad aliquod aliud cogitandum, etiamsi velis; nec inani gloriâ affici, ob id, quod accipis. Et aliâ vice: Externa signa, quæ à me petis, quòd ego sim, qui te alloquor, incerta sunt & fraudi subjecta: sed nunc dabo tibi signum adeò certum, ut non possit demon, imitari: & illud est, desiderium quoddam adeò accensum, & vehemens mei causâ sustinendi labores, & contemptus, ut aequè libenter videas te contemni, atque alij vident se honorari.*

VI. Regulariter ergo loquendo Dominus DEUS non revelat res extraordinarias ei, qui non sit bene in profunda humilitate fundatus, sed de talibus præsumere oportet, quod ad res similes ducantur à spiritu vano, aut malo, juxta omnia signa hætenus enumerata, &c. Ad consolationem tamen infirmorum opus est advertere, non esse indicium mali spiritûs, quòd misceantur interdum tentationes aliquæ vanitatis & superbiæ, si viriliter eis resistatur. Nec mirandum est, si aliquid interdum tironibus adhærescat.

VII. *Regula quarta*, quòd ex prædicta Humilitate oriatur Obedientia & Relinquitio proprii Judicii, propriæque Voluntatis, quæ fit imprimis DEI Voluntati, deinde etiam eorum, qui DEI locò nos gubernant. In qua re adeò erant exercitati antiqui illi Eremitæ Patres, ut quando audiverunt singularem & stupendam vitæ rationem, quam ducebat Simeon ille in columna, ad cognoscendum spiritum, à quo ad eam movebatur, significârint illi per quendam Eremitam, ut è columna descendens ad ipsos veniret, redditurus rationem vitæ, quam ducebat; monueruntque ipsum Eremitam, ut si statim atque ipse suum nun-

cium retulisset, Simeon sese resignaret, & ex columna descendere vellet, ipse adjungeret, ut maneret: humilis enim illa resignatio, & ad nutum obedientia, certum illis erat indicium boni spiritus, illum ad vitæ adeo stupendæ rationem inducentis. Quod si protervè responderet, se nolle descendere, eum è vestigio ex columna dejiceret, eò quòd procul omni dubio, illusus esset, ac deceptus à dæmone. Eventus autem aperuit Spiritum Sanctum esse, qui virum illum gubernaret. Nam statim atque Patrum mandatum audivit, pedem, cui innitebatur, elevavit, ut descenderet, ac obediret.

VIII. *Regula quinta* est, quòd ex boni spiritus visitationibus sequatur integra & perfecta mortificatio passionum, sensuum, & furentium carnis insultuum. Sed quoniam mortificatio externa non est certum indicium boni spiritus, ad quam etiam malignus solet inclinare, ob hypocrisim, & vanitatem; oportet oculos conjicere in fructum & finem ejus, & in radices, unde illa oritur; quod totum terminatur in corporis & animæ puritate, quærendo scilicet asperitatibus & mortificationibus istis conscientiam à culpa expurgare. Nam instar lucis cœlestis, quò magis crescit, eò magis manifestat culpas etiam minimas, magisque eos exaggerat. Quare meritò sunt suspecti motus illi sensusque cordis, qui secum afferunt fædos motus & voluptates carnis, ut melius sit, prout ait S. Bonaventura, talibus floribus carere, quàm eos ex tali cæno extrahere cum periculo conspurcationis. Cum enim Deus sit ipsa puritas, nihil horum potest à re, quæ ejus sit, provenire,

IX. *Regula sexta* est, Pax & Quies, quam spiritus bonus Animæ relinquit, quia cum ingreditur Animas nostras, dicit: *Pax vobis*. Et quoniam dicere ejus est efficax, ideò quod dicit, etiam facit, perturbationes cordis componendo, carnem cum spiritu conciliando, passionum insultus sedando, & nimium timorem, qui à nostra infirmitate oritur removendo. Et
quam-

quamvis in ipso initio timorem aliquem & pavorem afferre soleat, ut excitet ad reverentiam & attentionem, mox tamen affert quietem, timore illo remoto, ut bene expendit D. Thomas p. 3. q. 30. a. 3. ad 3. allegans sententiam S. Antonij Abbatis, qui dixit: non est difficile in his casibus, discernere inter bonum & malum spiritum: Si enim post timorem, gaudium & exultatio succedat, signum est à Deo esse auxilium, quod sentimus: Securitas enim Animæ testimonio est præsentiae Divinae Majestatis. Si autem timor, qui nos invadit, permanet, signum est hostis in domum nostram ingressi. Verum quidem est, ut ibidem Cajetanus advertit, posse dæmonem transfigurantem se in Angelum lucis, etiam hoc ejus indicium imitari, gaudium aliquod post timorem afferendo: sed quoniam re ipsa est spiritus nostri hostis, non satis assequitur, quomodo illum tranquillet, præcipue cum ille est humilis.

X. Hoc, quod jam diximus, intelligendum est locum habere, quando spiritus bonus visitat homines justos: nam si quando visitat peccatores, qui cum carne sua & vitij pactum habent & pacem; aut tepidos, qui in sua tepiditate quietem habent, solet intrare (sicut adnotavit S. Pater noster IGNATIUS) timorem incutiendo, ac terrendo, ut malam illam pacem dirumpat, salutarem afferens pugnam illi contrariam. CHRISTUS enim Dominus noster (ut ipsemet dixit) *non venit in mundum pacem mittere*, ac proinde nec venit ad visitandas Animas, ut eas in ficta hac pace relinquat, sed gladium, quo scilicet pax illa destruat. Qui gladius & pugna non est minus certum indicium spiritus boni, quam sancta illa pax, quæ inde resultat, quando postea Deus nos leni voce alloquitur, reddendo pacem turbato cordi, tristiquelætitiam. Remotâ enim culpâ, quæ tristitiam nobis afferebat, planctum nostrum convertit in gaudium, veramque lætitiam, quod certum est boni spiritus indicium, quoniam est ipsamet lætitia, & cum illa facit omnia opera sua,

eam suis inspirationibus infundit, ut illi serviamus lætitiâ modestâ, gravi, tranquillâ, & conjunctâ timori casto, qui eam reddat securiorem & jucundiorem.

XI. Hinc est, quod lætitiâ boni spiritûs degustata fructus statim proferat, qui illam prodant, abhorrendo scilicet ab omni lætitiâ immodesta, sensuali & mundana, Nam ut D. Gregorius ait: *Sua vitate spiritûs degustatâ desipit omnis caro.* Et qui centuplum accipit gaudij spiritualis, facillè contemnit carnale, magnôque conatu veros fontes desiderat hujus gaudij, Regnum scilicet DEI & Justiciam ejus, virtutesque, quibuscum spiritus noster unitur, & cum divino conjungitur, ut nihil quod creatum est, divisionem inter utrumque faciat.

C A P U T X.

Sensus multorum aliorum præter Ven. P. Ludovicum de Ponte, Virorum præstantium de Vita & Revelationibus Ven. Virginis Marinæ de Escobar.

I.

Opportunum haud dubiè hoc loco fuisset etiam ex Venerabilis Marinæ scriptis adducere documenta de spiritibus discernendis Divinâ Revelatione ac Illuminatione ei à DEO tradita, prout supra adduxi documenta ex Revelationibus S. Brigitæ: atque ita omnino mecum statueram etiam eâ spe, quòd sic ex vicino statim apparitura esset admirabilis altitudo sapientiæ illius mysticæ, & exquisitissima prudentia in discretione cœlestium Revelationum: verum, quia adverti ingentem esse horum copiam, eamque ita intèr se implexam & coherentem, ut ea quæ sunt solummodo de discretione spirituum, non possint commodè à reliquis præstantissimè affecticis doctrinis segregari, cum doctrina una porrigat lumen alteri: ideo cen-

censui melius fore, si omnem istam coelestium illius Instructio-
num non discerptam multitudinem, simul eodem loco darem,
id quod fiet in Tractatûs tertij Parte secunda, quam, rogo, be-
nevolus Lector, dignetur pensiculatè perlegere, ut advertatur
tanta, tam mirabilis, & tam rara Venerabilis hujus Virginis in
rebus mysticæ Theologiæ cognitio, & experimentalis eruditio:
quæ ipsa tanta sapientia meritò censeri debet magnum & con-
dignissimum motivum credibilitatis Revelationum ipsius, quo
haud dubiè etiam inter reliqua motus Vener. P. Ludovicus de
Ponte non potest censeri ullam sinistram notam incurrisse, in
ea Revelationum istarum sua æstimatione.

II. Videatur ad hoc, Caput 8. & præcipuè 9. Partis 2. Tra-
ctatûs 3. & sequentia, ubi Ven. P. Ludovicus ipsemet narrat,
quantum habuerit motivum ad has Revelationes prudenter ha-
bendas pro veris, ex ea, quam in Venerabili hac Virgine per
tam diuturnum, tot annorum spatium perpetuâ experientiâ ipse
coràm deprehendebat, scientia rerum divinarum.

III. Nunc ergo subjungamus judicia Virorum gravium;
quia non solus Venerabilis P. Ludovicus de Ponte, verum eti-
am alij plurimi, & quidem tot Viri amplissimi Revelationes ac
Visiones hujus admirandæ Servæ Dei mirè suspexerunt, ac al-
tissimè æstimaverunt, ut, quantum ex Historijs Ecclesiasticis
constat, nullius adhuc in hac Vita degentis Sancti aut Sanctæ,
similes Raptus, Visiones, & Revelationes examinatæ videan-
tur fuisse strictius & approbatæ magis. Videatur Epistola mea
apologetica §. 2. argum. 1. & 4. ac 5. ubi narravi, quanti fuerit
habita, præcipuè à Viris Religiosis Ordinis Prædicatorum, ac
nominatim à P. Dominico Pimentello Provinciali Hispaniæ,
atque ab ipsomet Reverendissimo totius illius sanctissimi ac sa-
pientissimi Ordinis Generali; tum etiam à Viris præclaris ex
Societate Jesu, ut à Patribus Visitatoribus ejusdem Societatis
in Hispania, quin & ab Adm. Rever. Patre Nostro Generali
Clau-

Claudio Aquaviva, imò & à Catholicis Regibus Hispaniæ, eorūque Aula & Tribunalibus, & Universitatibus, ac ipso Tribunali Sanctæ Inquisitionis, nec non Doctoribus, ac Episcopis, tota demum Hispania, ac denique à Summo visibili Capite Ecclesiæ Pontifice Maximo.

IV. His positis excutiendum est hoc ipsum punctum paulò accuratiùs. Ante P. Ludovicum de Ponte (multòque magis post illum) Viri ex diversis Religionibus magnæ æstimationis, ut & tota Domus Professorum Societatis Jesu Vallisoleti causam Ven. hujus Virginis examinavère, & pro legitima & in DEO fundata pronunciavère. Quin & totum Vallisoletum debet censeri approbasse tot annis gesta & visa illius, præsertim, per triumphales illas exequias, quas in funere hujus Venerabilis Virginis exhibuit, prout prolixè est videre Parte 2. Vitæ illius lib. 3. c. 2. & 3. ubi profectò ingens fuit approbatio Ordinum Religiosorum per novem continuos dies laudes Venerabilis Virginis hujus e publica cathedra ad populum declamantium, quorum primi primà die fuerunt ex Sacra Religione Prædicatorum, prout etiam aliàs ipsi, præ reliquis, cum Societate Jesu habuerunt speciale spirituale cum admiranda hac Virgine commercium, prout videre est in 1. Parte Vitæ illius multis locis. Quin & P. Andreas de Ponte ejusdem Ordinis Religiosus, P. Ludovici frater, Vir ab opinione sanctitatis, Vallisoleti totaque Hispania ac imprimis in sacra sua Religione clarus, familiariter per triginta sex annos cum Ven. Virgine Marina agebat, confessiones ejus in absentia & morbis P. Ludovici excipiebat, similibusque occasionibus Secretarium ejus agebat scribendo, quas ipsa ei dictabat, suas Revelationes.

V. Denique tanto studio sanctitatem hujus Virginis, Viri ex sacro hoc Ordine deprædicabant, ut P. Didacus Bæza Societ. Jesu in Collegij Vallisoletani sub titulo S. Ambrosij templo (in quo & sepultus jacet P. Ludovicus de Ponte) pro con-

cione

cione publica dixerit : indicium infallibile sanctitatis & verarum laudum Dominae Marinae , ut nè in controversiam vocari possit, adesse, ex eo, quòd in ea asserenda Patres Dominicani, & Patres Societatis, aliàs sibi contradicere soliti, convenerint.

VI. Secundà die laudes admirandae hujus Virginis in ejus funere ad populum copiosissimum è cathedra declamavere ex Seraphico Ordine S. Francisci.

Tertià, ex Religione S. Augustini.

Quartà, Patres Carmelitae Discalceati.

Quintà, Ordinis Sanctissimae Trinitatis.

Sextà, Ordo Beatissimae Virginis MARIAE de Mercede.

Septimà, Collegium PP. Clericorum Minorum; omnes ad constipatum prae multitudine Auditorium, propè nemine toto longissimo durante Sermone, excreante, nemine propè caput, prae ter morem, pileo operiente.

Octavà die, Domus Professa Societatis JESU ad indicibilem hominum multitudinem, & ad Concilium Regiae Cancellariae Vallisoletanae.

Nonà, Illustrissimum Capitulum S. Ecclesiae ac Magistratus Nobilissimae illius Urbis.

VII. Neque his contenti, iterum post dies aliquot resumpsere Solennitatem Exequiarum & Encomiorum illius, in Collegio S. Ambrosij Patres Societatis JESU. Die verò sequenti Nobilitas Urbis illius. Tunc die tertià specialis Devotio multorum Illustrium Civium, Panegyricum dicente Concionatore ex Sacro Ordine de Mercede. Demum Conventus S. Pauli, Ordinis S. Dominici non contentus obsequio, quod primà die Exequiarum illius in Domo Professorum Societatis JESU, eidem magnificè exhibuit; voluit quoque domi suae iteratò solennem exhibere gratitudinem erga hanc sanctitate plenam Virginem, Sacrae illi Religioni specialiter dum viveret, addictam. Adornarunt ei tumulum elegantissimum floribus & coronis.

L

splen-

splendidum, in quo Effigiem ejusdem collocaverunt.

Concionatus est Pater Magister Navarrete per universum orbem, propter sua scripta clarissimus, qui ad id usque temporis, à præcedentibus Concionatoribus, dicta confirmavit, & specialissima quædam supperaddidit. His omnibus adfuit, præfuit, ac cooperatus est ipsemet etiã ordinarius loci Episcopus, adeoque & ille censendus est omnia approbasse.

VIII. Sancta Mater Theresia Ven. Virginem Marinam juvenem cupientem sub suam disciplinam recipi allocuta, respondit: Vade filia, non debes fieri Monialis, quia Deus magna per te vult agere in angulo tuæ domûs.

Summus Pontifex Constitutiones ac Regulas ab illa Monialibus Ordinis S. Brigittæ in Hispania præscriptas, A. 1629. adhuc eâ vivente confirmavit; eaque interveniente Festum S. Joachimi Romano Calendario, & Breviario inseruit; ac eidem viventi favores diversos concessit.

IX. Quid de tota Hispania dicendum? Certè Venerabilis Marina, tot annis in tanta tamque excellenti sanctitatis opinione, suarumque Revelationum æstimatione, judicari potest totam quantam Hispaniam habuisse divinarum suarum gratiarum approbatricem.

Videatur Epistola de obitu & laudibus Ven. hujus Virginis à P. Michaële de Orenia, Rectore Collegij Societatis Jesu, ad Excellentissimum Comitem, Ducem de Olivares, Gasparem de Guzman primum Ministrum Regis Catholici typis postea excusa, & in universa Hispania, aliisque regnis publicata, quæ habetur in 2. Parte Vitæ Ven. Virg. Marinæ, l. 3. c. 2. p. 405. Item alia ibidem cap. 3. Epistola itidem postea typis mandata, & mundum pervagata, Domini Francisci de Vinivela, ad

Dominum Ludovicum de Castilia Allessorem

Consilij Granatensis, Gubernatoris

Guipuzcoæ.

CAPUT

CAPUT XI.

*In Cælestibus Revelationibus credendumne est soli
unice Personæ asserenti.*

I.

ET si jam attulerim Regulas & Observationes ac cautelas plurimas in Causa Revelationum Divinarum adhibendas, remanet tamen nodus, quòd in his examinibus tractetur negotium, quodammodo loquendo, cæcum, nulli, nisi illi soli, qui examinatur, cognitum, qui videatur asserere posse securè, quidquid volet, & fingere responsa ad interrogatoria pro libitu, certus se falsitatis convinci non posse, cum materia illa testes nullos admittat, intrà solam Animam & Conscientiam asserentis conclusa. Hinc ergo videntur frustraneæ esse regulæ omnes de discernendis his Visionibus, nec materiam esse capacem infallibilis decisionis, si persona illa, quæ visiones se habere dicit, sit astutissima, circumspecta, sagax, versuta, rerum similium & documentorum, ac Regularum huc pertinentium bene perita, ut effugere ex retibus Examinis noverit, & aliud pro alio substituere, ac eludere, præsertim si à dæmone adjuvetur.

II. Impossibile ergo videtur, ut prudens iudicium, & sententia ferri possit super unius solius personæ, præsertim foemineæ, asserta, cum in ore saltè duorum, vel trium stare debeat omne, etiam de re terrena, quantò magis de rebus divinis, verbum, non verò uni soli sinè ullis testibus credendum.

Ut difficultati huic satisfiat, advertendum est, quòd nodus iste quodammodo se ipsum solvat; dum, ut in scholis loquimur, nimis multum probat. Sic enim nec Moyse, nec ulli Prophetarum esset credendum; & sic tota Sacra Scriptura ex manibus Fidelium excuteretur.

L 2

III. Ex

III. Ex quo apparet objectionem hanc esse hominum imbecillis ingenij, qui (prout Aristoteles monet) non sciunt quamlibet materiam, juxta suam naturam, esse tractandam, & alias rationes esse exigendas ab hac, alias ab alia, nempe demonstrationes intellectum immediate convincentes esse quærendas circa materiam, talium demonstrationum capacem; demonstrationes verò, sic loquendo, prudentiales, voluntatem solum immediate convincentes, & per voluntatem mediate postea evidenter prudenter Intellectum cogentes, itidem esse quærendas, circa materiam talium, & non aliarum demonstrationum capacem: & sic consequenter testes exigere, apud materiam testium capacem; testes verò non requirere, sed alios modos veritatem deprehendendi circumspicere, apud materiam testium incapacem.

IV. Est in hoc maximum peccatum & ruditas Calvinistarum, qui putant se punctum valde ingeniosum reperisse, dum negant homini liberum arbitrium, voluntque sibi illud probari: aut dum movent quædam circa Prædestinationem Divinam, voluntque à Catholicis immediate, evidenter convinci, & Christiana circa hoc punctum dogmata probari, talibus rationibus, qualium materiæ hæ sunt incapaces. Aristoteles eos vocaret Ingenij imbecillis, quos idiotæ suspiciunt, & vocant ingeniosos. Jam ergo certum omnino est, credendum esse uni soli Personæ asserenti in causa cœlestium Revelationum: quomodo enim aliter sciremus, quæ S. Brigitta habet, nisi quòd illa ipsa sola hæc asseruerit, hæc conscripserit, hæc manifestaverit? Nec mirum: nam in omnibus, quæ secreta aperiuntur, ac denunciuntur, cum sint secreta, & nulli alteri nota, necessario sic procedendum est, & illi, qui solus illa secreta novit, est credendum; frustra enim quæritur testimonium à pluribus, quando non plures hæc sciunt.

V. Pulchrè loquitur Tomus secundus Speculi Carmelitici
in

in Vita S. Theresiæ, num. 2467. *Cum ex natura rei (quoad Revelationes & Visiones cuiuslibet factas) alij testes dari non possint, nec ab alio, quam ab ipsomet, quem DEUS similibus favoribus prosequi dignatus est, probari possint; materia subjecta facit, ut eisdem Beatis, quibus contigerunt, & eorum Confessarijs, de auditu ab ipsis standum sit, ut in terminis fuit declaratum, in Revelatione Sanctæ Francisca (Parte 2. artic. 12. de Visionibus & Revelationibus) & conducunt plurimum declarata in Relatione S. Raymundi (Parte 2. art. 8. versu: Nos tamen.*

VI. Nihilominus, etsi illi soli Personæ, cui fiunt Revelationes hoc modo sine testibus, sit credendum, argumenta tamen sunt adjuncta sufficientissima, & conjecturæ infallibiles, de quibus supra egimus; quæ si adhibeantur, & omnia cautè & accuratè circumspiciantur, subesse falsum non poterit. Ac imprimis ante omnia est vita sancta, ac virtutes heroicæ, Personæ illius, præsertim Obedientia & Humilitas. Tum si divina etiam adsint miracula. Videantur observationes & combinationes illæ, quas supra capite 3.4.5.6. attuli, per quas infallibiliter fraus, si adest, detegetur.

Conclusio Tractatûs.

EX hæcenus dictis apparet Examen Revelationum reduci ad quatuor puncta, prout reduxit Alphonsus Episcopus Giennensis.

Primum, ut examinetur, & consideretur Persona Ducis, seu Directoris, & Judicis ac Patris Spiritualis, qui Revelationes illas examinare, dijudicare, ac approbare debeat. Quò etiam pertinet signum primum à Cardinale de Turrecremata propositum. Quapropter de hoc agam mox toto Tractatu secundo.

Secundum punctum est: ut consideretur & examinetur

Persona, Revelationes, & Visiones habens. Quo etiam pertinent signum secundum & quintum Cardinalis Turrecremata. De quibus agam Tractatu tertio.

Tertium punctum est, ut consideretur modus, quo Visiones istæ contigerunt: & de hoc jam actum est in ipsa Dissertatione Apologetica, superius initio posita.

Quartum punctum est, ut consideretur ipsa Materia & Qualitas Revelationum: & de hoc, in quantum concernit mysteria Fidei, agam Tractatu quarto. In quantum verò concernit doctrinam moralem, & Virtutes ac Documenta Vitæ, sanctè instituendæ, agam in Tractatu quinto. Quod etiam pertinent signa, tertium ac quartum, Cardinalis de Turrecremata. In

Tractatu sexto ostendam breviter, quantis blanditijs amorem suum erga homines testatus sit Deus.



TRA-

TRACTATUS SECUNDUS.

De Vita, Virtutibus, Prudentia
& Scientia Ascetica, Venerabilis
Patris LUDOVICI DE PONTE.

Cum primo statim loco (ut vidimus Tra-
ctatu I.) qui Regulas discernendi Revelationes
tradiderunt, exigant, ut videatur qualis quan-
tusque fuerit Confessarius & Ductor Spiritua-
lis Personæ, quæ Visiones ac Revelationes ha-
buisse dicitur; Venerabilis verò P. Ludovicus
de Ponte fuerit Venerabilis Virginis Mariæ de Escobar Pater
& Dux spiritualis ultra annos triginta, necessariò inspicendum,
quantæ Virtutis & Sanctitatis, ac maximè quantæ Prudentiæ,
Scientiæ, ac in rebus asceticis Experimentiæ is fuerit, adeoque
quantam potuerit in Revelationes istas suâ approbatione deri-
vare auctoritatem.

Dividemus autem Tractatum istum in Partes duas, qua-
rum prima Vitam & Virtutes, ac Sanctitatem ejus; Secunda,
Scientiam, & Experimentiam Asceticam, ejusque Prudentiam
amplectetur.

PARS

PARS PRIMA.

Sanctitas Venerabilis Patris

LUDOVICI DE PONTE.

CAPUT I.

Ortus ejus, & Ingressus in Societatem, ac Obitus ejus.

I.

Natus est Venerabilis P. Ludovicus de Ponte Vallisoleti in Castilia, Anno Domini 1554. die 11. Novembris, horâ 4. matutinâ: & anno ætatis suæ vigesimo in Societatem Jesu à DEO prope invitatus tractus & 2. Decembris 1574. ingressus est, cum ipse magis ferretur in Ordinem RR. PP. Prædicatorum, in quorum gremio ferè adoleverat. Accidit illi, ut in quadam Disputatione sui argumentorū siverit se abduci à pia sententia de Immaculata Conceptione Beatissimæ Virginis & Matris DEI: statimque senserit inusitatam mentis ariditatem & tædium, ex quo necesse per SS. Sacramentorum sumptionem liberari potuit, donec Voto se obstringeret tenendi sententiam piam. Cùmque post hoc nihilominus quasi Exercitij gratiâ thesura Doctoribus suis propositam pararet defendere, repente memoriam omnium pro ea argumentorum ei Deipara exemit, donec provolutus ante aram Sanctissimæ Virginis pollicitus se nunquam imposterum, nec exercitij gratiâ contra Immaculatam ejus Conceptionem quidquam acturum, impetrâisset, ut adhuc hac vice ei condonaretur, & memoria rerum rediret, nè putaretur voluisse suis Doctoribus illudere. Fuit postea tam confirmatus in ea sententia, ut in eandem, utrumque Fratrem suum, Dominicanos perduxerit: quod in Ordine illo palàm omnibus fuit.

II. Me-

II. Methimnæ Campi probationis domum subivit, ubi tunc ardebant omnia eo igne, quem P. Balthasar Alvarez (cujus sanctissimam Vitam ipse P. Ludovicus postea conscripsit) paulò antè ibidem Magister Novitiorum accenderat; ità ut Pater Ludovicus consignatum reliquerit sibi visum esse, quod si vel octo annos vitæ haberet, & eo modo, quem ibi apud tiro-nes videbat, viveret, magnus Sanctus evaderet. Quantus ergo evasit quinquaginta annis, quibus supervixit! testati enim sunt P. Franciscus de Prado, & P. Jacobus de Sosa, Provinciæ Castellanae Provinciales, cum nè ad momentum quidem temporis cessasse, quin semper magis magisque in perfectione, procederet, nihilque in eo potuisse reperiri, quod non deceret Virum perfectum, fuisseque ab omnibus etiam alijs Religiosis, Principibus, & Magnatibus habitum pro homine sanctissimo.

III. In probatione tertia Instructorem habuit sibi desideratissimum illum P. Balthasarem Alvarez. Sacerdotio initiatus An. 1580. die 19. Martij, in festo S. Josephi. Primum Sacrum fecit Vallisoleti in festo Beatissimæ Virginis Annuntiatae. Philosophiam Legionis An. 1581. docere cepit, in qua Auditorem habuit celebrem illum Martinum D. io. Theologiam Salmanticae An. 1584. uno anno, dein post septem aut octo annos iterum Vallisoleti docuit; postea multis annis Studiorum Præfectus. Rector Vallisoleti & Villagarciae, ubi etiam Magisterium Novitiorum bis & Medinae Campi semel obivit, Patresque in tertia probatione instruxit. An. 1599. Villagarciae peste laborantibus inservivit.

IV. Miram habuit vim dicendi in Concionibus, multòque commovit ad obeunda Sacra Exercitia, in quibus tradendis insignem habuit dexteritatem, ut Religiosi Societatis ex alijs domicilijs peterent eorum gratià ad eum proficisci; ut & aliorum ordinum magnæ authoritatis Viri reversi ad suos ma-

M

gnam

gnam cænobijs suis intulerint lucem, omnibus ad imitationem accensis. Princeps Antonius Pimentel Comes de Luna in Exercitijs non nisi flexis genibus eum solitus audire, Nostri in triclinio singularis demissionis exemplo ministrare est dignatus. Cùm Fratribus laicis argumenta meditationis in diem sequentem Vallisoleti proponeret, conveniebant ad eum audiendum Viri in Collegio gravissimi, ac Theologiæ Doctores, quos inter & magnus ille Pater Franciscus Suarez non dedignatus illum habere Magistrum spiritûs, quem in Theologia habuerat Discipulum. Ægrorum tantam curam gessit, ut unum septies intra duas horas, alium uno die decies novies, alium sæpius inviserit.

V. Auditus est dixisse, se si ullum vitæ modum perfectiorem, Deoque gratiorem novisset, quàm sit Societas Jesu, protinus ad illam concessurum. Quomodo ipse totâ vitâ suâ affectus vixerit, patet vel ex dicto ejus unico, quod illi quâdam vice dum nostros domesticos exhortaretur, cum lachrymis excidit; se nimirum, si quando erravit, nullum tamen unquam fædus iniisse cùm ullo etiam levissimo vitio. Nam licet humanum sit labi, resurgere, luctari, nunquam tamen ullum peccatum esse, admittendum in morem & consuetudinem: illâ enim re nihil esse perniciosius homini, qui debet ad absolutionem perfectionemque Virtutum contendere.

VI. Processit ætate usque ad annum septuagesimum, tam exhaustis viribus, ut Medici testati sint eum miraculo vivere in corpore ita consumpto, ut sceleto similis appareret, plenus acerbissimis doloribus, præter caput ad discurrendum, & manum ad scribendum. Timorem judicij multis modis ostendit, diffluens lachrymis ad pedes Crucifixi, & sæpius ingeminans: *Dómine cùm veneris judicare, noli me condemnare.* Horæ mortis suæ fuit præsciis, antè quam per duas circiter horas in raptu jacebat, donec horâ decimâ petijt candelam ardentem, quales in

Mon-

Monte Serrato benedici solent, & conversus ad Crucem submisit repetijt: *Domine cum veneris judicare, noli me condemnare.* Tum; *In manus tuas Domine commendo spiritum meum.* Ac demum sine ulla membrorum convulsione placidissime felicem animam reddidit Conditori die 16. Februarij, dimidia post decimam hora, An. 1624. ætatis 70. aditæ Societatis 50. emissæ quatuor Votorum professionis 21. facie tam serenâ, ut elegantior appareret, quàm fuerit viventi, cum tamen, præter pellem & ossa, quasi nullâ præterea parte corporis constitisset.

VII. Sepultus est eo modo, quem Societas in Sanctorum Virorum funeribus consuevit adhibere. Ingens ad Exequias confluxus, sacrum corpus osculantium, & certatim aliqua pro Reliquijs postulantium. Septimâ à sepultura die Patres Dominicani honorifice illi iuxta in templo Societatis, celebrante P. Priore, fecerunt: postea Nobilitas: Civitas Vallisoletana: funebrem orationem prædicante P. Andrea de Ponte Dominicano, Defuncti Fratre.

C A P U T II.

Quædam de Virtutibus Ven. P. Ludovici, ex Processu pro ejus Canonizatione.

I.

OMnia quidem, quæ sequentur, erunt excerpta ex Processibus pro ejus Canonizatione & authenticis Informationibus, scriptisq; publicis, nihilominus visum est specialiter hic referre, quæ statim triennio post ejus mortem fuere Summo Pontifici Urbano VIII. An. 1627. ab Episcopo Vallisoletano præsentata, his verbis:

Invenimus hunc Virum insignem multum processisse in omni genere virtutum, & tam ardentem fuisse in Amore erga

DEUM, ut inflammatus affectus cum perduxerint ad terminos amittendi vitam naturalem. Salutis alienæ tam studiosum, ut plusquam 40. annis nemo illum viderit otiosum, sed agentem semper cum DEO, aut laborantem in bonum animarum; docendo, concionando, confessiones excipiendo, consilia dando, ad dubia respondendo, visitando, consolando infirmos, assistendo peste correptis, aliisque pietatis operibus se occupando.

II. In devotione & familiaritate cum DEO tam fuit eximius, ut Vir Religiosus, gravis, doctus, boni exempli, cum præteriens cellam ejus audito magno fragore, quasi trabes tecti rumperentur, eam aperuisset, viderit hunc Ven. Patrem (qui tunc incipiebat orare) splendore quodam divino ad modum globi, medio corpore opertum, capite & pectore specialiter illustrato. Tam fuit humilis, ut totâ vitâ suâ celaverit revelationes, illustrationes, & favores, quos ei DEUS inter sua sancta exercitia exhibuit.

III. Nemo meminit eum unquam lamentatum esse in acutis doloribus guttæ articularis, & alijs morbis, quorum erant morfus acerrimi. Propositum non manifestandi ea, quæ pateretur, tam rigidè servavit, ut oculi unius usum amiserit potius, quàm illud transgrederetur. Illud autem fuit mirabile, quòd in medijs doloribus, maximâque debilitate, manu suâ conscripserit in lucem undecim volumina, tam sublimia, tam spiritualia, prout notorium est: præter alios Tractatus, quos scriptos reliquit.

IV. Puritas animi & corporis fuit Angelica ita ut nunquam peccaverit mortaliter: sed nec veniale admiserit è talibus, quæ in suo genere habentur pro gravibus. Imò viginti ante mortem annis edidit, & exactè servavit votum, non admittendi advertenter & deliberatè ullum veniale. Constitutiones ac Regulas sui Ordinis nunquam visus est transgredi, nec quidquam

quam eorum, quæ Superiores ordinaverant : sed nec repugnantiam unquam ostendit in obediendo : imò promptè & accuratè uni ex subditis, cui cum tunc Rectorem Pater Provincialis, quoad asperitates corporis, nè modum excederet, subjecerat, obediit.

V. In tanta debilitate nihil ab ullo donorum, nec per modum medicamenti acceptavit, nec bellaria, aliâque refocillamenta, contentus pauxillo carnis concisæ, quam ipsam tamen post horas paucas rejicere cogebatur, tanto tormento, ut fateatur se, si per conscientiam liceret, præelecturum potius fame mori. Noctu corpus in nudum asserem abiciebat. Cilicijs utebatur quasi continuis; flagellabat se atrociter quotidie: patiebatur ardentem continuam sitim, neque eam sedare voluit, nisi in mensa commuai, ubi tamen potus ejus fuit paucarum, unciarum: rarò admisit aquam ad eluendas fauces siccitate arefcentes.

VI. Providentiæ Dei penitus acquiescebat, hortabaturque omnes, ut Animæ suæ quietem in ea quærent, resignando se in paternum ejus amorem: unde pro remedio afflictionum, suadebat memoriæ; cordique imprimi sequentia verba: *Fiat Domine in me, de me, per me, circa me, & circa omnia mea tua sanctissima Voluntas, nunc & semper, & in æternum, Amen.* Judicia Dei profundè reverebatur, atq; in officio divino speciali ponderatione exprimebat illa verba Psalmi 65: *Terribilis in consilijs super filios hominum.* Et examinando aliquando suas culpas abreptus eâ apprehensione, fecerat ipsum cubiculum, in quo erat contremiscere.

VII. In Magisterio spirituali ità excelluit, ut videretur penitentium à se consilium corda penetrare: ità dubia, quæ ipsimet satis explicare non poterant, eis declarabat. Propter quam tantam ei à DEO datam Intelligentiam, Sapientiam, & Consilij donum, recurrebatur ad eum tanquam ad oraculum ab omni sorte

hominum, Ecclesiasticorum & sæcularium, Magnatum, Prælatorum, Religiosorum. Habuit etiam gratiam cognoscendi cogitationes hominum, quas & aliquibus pro eorum bono manifestavit: futura prædixit: liberavit suis orationibus aliquos ab infirmitatibus, & tribulationibus: multa sibi à DEO revelata, manu suâ conscripsit, omisso suo nomine, contentus dixisse ea esse cuiusdam à Societate revelata: multos alios favores à DEO & Angelis accepit.

Reliqua, quæ tam in prædicta Relatione Episcopi Vallisole-
tani, quam in alijs Auctorebus habentur, videntur aptius posse digeri in suas classes, ut magis collecta Lectoribus placeant.

C A P U T III.

*Fides, Spes, & Charitas Venerabilis Patris
Ludovici de Ponte.*

I.

Nihil tulit æquo animo dici ab ullo vel doceri, quod vel tantillum recederet à purissima Fidei doctrina. Unde & suos libros cupiebat rigidè censeri, cujuslibet, etiam sui quondam Discipuli judicio se spontè accommodans. Solius veræ Fidei defectui tribuebat cujusunque hominis teporem animi, horrorem crucis. Confitebatur ei quædam studiosa virtutis, at viro aspero nupta, dixeratque se, si liberaretur isto cruciamento Mariti, sperare magnos in amore DEI progressus. Cui ille quasi offensus: credisne tu, inquit, in DEUM? credis eum esse ipsam bonitatem, ipsam sapientiam, ipsam omnipotentiam? Crede ergo etiam illum tanquam bonum, tibi bene velle; tanquam sapientem, dedisse tibi hunc Maritum, ut ejus asperitate polias virtutes; tanquam omnipotentem tibi opem laturum, ut nihil ab æterni boni consecutione te impediat. Aliàs petenti ut
lico-

liceret sibi cubare super cruce armata spinis ferreis, negavit, dicendo: donec tu placidè feras crucem, quam tibi Deus imposuit per mores mariti, non equidem tibi aliam crucem permisero, cum utramque ferre non possis. Quæ admonitio multum conducit malè consultis, qui cum ferre nolint, quod Deus novit eos posse suo auxilio, affectant aliud, cuius ferendi opem à DEO paratam non habent. Ex fide quoque profectum est, ut ad aram factâ consecratione totus contremisceret, ex reverentia præsentis Divinæ Majestatis.

II. Mirificâ præditus erat spe non solum felicitatis æternæ, sed etiam quarumcunque rerum, fiduciâ meritorum CHRISTI, instar Filij tenerè à Patre dilecti. Quare de nullo bono successu sollicitus, nullum malum timebat. Quibus alij dejiciunt animum (ut sunt: humana fragilitas, imbecillitas, peccata &c.) iisdem animabatur ipse ad confidentiam, reflectendo oculos in bonitatem & misericordiam DEI; cui se suâque committebat; ajebâtque se crebrò expertum, nunquam sic agentem spe suâ deludi, & quantò magis diffidat sibi quisque, tantò majori potiri fiduciâ DEI: quam quidem quoties esset occasio, magnâ verborum copiâ suadebat omnibus, & omnes mirificè ad eam excitabat. Et quoties in quocunque incommodo jubebat aliquem bene sperare, semper eveniebat id, quod ipse promiserat, quia dicta illius nitebantur magnâ fiduciâ in DEUM: ex qua etiam oriebatur, ut nullo turbaretur adverso successu, nullo efferreretur secundo.

III. Quantus in eo fuerit Amor DEI, ostendebant actiones illius omnes & sermones, qui nihil nisi honorem & obsequia DEI spirabant, quibus omnes inflammabat, ut appareret non errasse Lucam Carrillum doctrinâ & concionibus clarissimum, quando testatus est, quidquid Sanctus Gregorius, Bernardus, & Bonaventura, alique Doctores, scripserunt de excellentissima charitate, hoc se totum invenisse in Ven. P. Ludovico

vico de Ponte. Quod ipsum & alij testati sunt. Crebrò in ore habebat, DEUM optime scire, quid maximè nobis expediat. Quæ verba tanto spiritu animabat, ut omnem animi perturbationem audientibus in eorum rebus adversis ablueret. Ità suam cum divina voluntatem conformaverat, quasi quodam naturæ consensu novisset, quid esset DEO in quocunque negotio gratissimum: atque in consilijs dandis ità constanter & asseveranter pronunciabat, acsi voluntatem DEI legisset ex tabulis. Plura apparent ex ejus sentimentis seorsim sæpius, & nuper Latine hic Pragæ impressis, in quibus & omnium aliarum virtutum specimina relucet.

IV. Charitas erga proximos apparet ex ejus operibus magno studio ad perfectionem unicuique convenientem omnes perducendi conscriptis. Hinc cuidam suæ Filiae spirituali respondit, tantam se habere curam promovendi omnes qui secum agunt, in spiritu, ut nihil sit in mundo, quod pro quolibet etiam exiguo eorum profectu facere non sit paratus. Unde & morbo pressus, quantacunque cum molestia sua negotijs proximorum satisfaciebat, adeò, ut nec ad momentum videretur velle à labore pro bono animarum cessare; siquidem cum præ infirmitate aliter non posset, è genibus acclinatus sellæ vel lecto, scriberet quos edidit libros, vel consulentibus responderet: prout & cum incredibili molestia in Confessionali hærebat.

V. Sub ultimos vitæ dies perdit jam uno oculo, & altero penè consumpto, tumesciente pectore cum gravissima difficultate spirandi querebatur, quod jam alijs prodesse non posset: ideò dicebat hoc unum sibi restare, ut eos, qui salutem aliorum student, per assiduas orationes DEO commendaret. Quando ipse missionem ad Indos & Japones impetrare non poterat, plurimos saltè suis adhortationibus eò promovit. Peccatis aliorum sic urebatur, sic ea deplorabat, sic in suo castigabat corpore, acsi ipse ea patrasset, vigilijs, jejunijs, flagris, cilicijs, aliisque
sup-

supplicijs minimè clementibus illa vindicando. Quando erat occasio tantâ vi argumentorum, tantâ vocis & omnium nervorum contentione conabatur omnibus persuadere, nè ullius unquam rei causâ DEUM vel levissimè offenderent; ut oculi scintillare, ex ore verba ignita profluere, & ille se ipso robustior fieri videretur.

CAPUT IV.

Studium Perfectionis, & Religiositas.

I.

TAntam in omnibus suis actionibus cautelam adhibebat, ut nec interrogantibus responderet, nisi priùs clausis tantisper oculis lumen à DEO petijisset, & quid, ac quâ mensurâ responderet, considerasset. Ordinem actionum semel propositum constantissimè medios etiam inter dolores tenebat. Fructibus novis, prunis, cerasis, uvis abstinuit semper, nisi imperaretur pro medicamento. Appositum panem primarium, ut audivìt non esse communem reliquis, comedere noluit. Extra tempora nunquam comedit nec bibit. Nunquam animi causâ prodivit ad campum: quodsi incidisset in locum amœnum, ita frænabat oculos, nihil ut ex ejus aspectu caperet voluptatis. Nunquam nisi causâ urgente cubiculo egressus. Nunquam res novas percunctatus aut memorans. Æstate in lecto nunquam se versabat partem frigidiorē quærendo. Plurima id genus notârunt in eo, quibus erat major cum eo consuetudo. Gestavit assiduè indusium cilicinum: quotidianâ flagellatione se excipiebat, ut strepitus plagarum in tota vicinia audiretur, & frustra flagelli dissilirent. Solis ferè herbis vescebatur, & aquâ ad tres uncias admensâ. In cubiculo cùm solus esset, sæpe passis in crucem brachijs manebat, eâ CHRISTI Domini figurâ se oblectans. Quamvis Superiores ei socium apposuerint, qui cum po-

N

testa-

testate contineret illum regionibus debitæ moderationis, semper tamen vigiliarum & quotidianæ flagellationis usum retinuit. His aliisque ita corpus exhaustit, ut qui S. Isidori corpus à tot sæculis incorruptum viderat, non dubitaverit asserere, Ludovici viventis corpus multò aridius esse.

III. Sæpe à Deipara flagitavit, ut impetraret sibi à DEO Paupertatem, quæ CHRISTI comes fuit individua. Hinc ubiq; sectatus est vilissima, delectatus cubiculo malè instructo etiam, dum Superior esset, ligneâ sede, & pro sella contentus humili sedili, in quo tergum acclinare non posset; tametsi pro advenis alias haberet sellas, minimè tamen superbas. Pro picturis erant piæ Imagines cupro impressæ: libri non plures, quàm studiis ejus necessarij, & hi quidem vetustiores. Librariam suppellectilem (tametsi facile suppeditaturis amicis) non auxit, nè quam labem paupertati aspergeret: sed nec in morbis admisit quidquam refocillationis, nisi quod in pauperrimis Collegijs esset consuetum. Vestes ita detritas habuit, ut post mortem ejus nulli amplius essent usui, adeoque facilè dilaceratæ & pro Reliquijs petentibus distributæ.

IV. In excursionibus victum ostiatim commendicare ipsi volupe fuit. Nullas unquam pecunias habuit. Libros suos manu propriâ conscripsit, nisi esset necesse, aut nitidiùs scribendum, aut quod oporteret servari: ut sunt ea, quæ de rebus Ven. Marinx dictavit; idque non alterius scribæ, quàm domestici Novitij vel scholastici, donec rescivisset per eos quædam inter familiares vulgari, quæ ille volebat esse adhuc secreta: tunc enim uti cæpit (prout P. Rodericus Arriaga narrabat) operâ cujuspiam pueri, qui per ætatem necdum intelligeret, quid scriberet. Denique cum Dominus Antonius Pimentel aram ei intra conclave adornaret, nè celebrandi causâ cogeretur duci vel deportari ad sacellum commune, non permisit aram pretiosis sacrarum Reliquiarum thecis adornari; ut & pietati addendæ dona sæpius

pius oblata non acceptavit, versatus in rebus humanis, ac si Geniorum cœlestium unus esset, qui illarum cupiditate nulla tangeretur.

V. Castimoniam nativam, & virginalem totâ vitâ servasse certum est, ut nec cogitatione aut verbo, oculive nictu in eam peccaverit, nullam fœminam, nè Matrem quidem aut sororem intuitus, cautè semper, siccèque, quando opus erat, cum illis agendo, tam nervosè tamen, ut nec plura desiderarent. Apud ægrotas cum esset, voluit semper socium habere in oculis; quorum unus cum eum aliquamdiu reliquisset solum, gravissimè questus est asserendo se, si id præscivisset, pedem domo elaturum non fuisse. Curæ quoque ipsi fuit, ut neque alius eum ulla ex parte, præter os & manus, neque se ipse nudum unquam videret; nam & cum ungues pedum nimium excrecentes resicaret, digitum eundem tectum habebat, cuius unguis erat putandus.

VI. Obedientiæ amore his, quæ Superiores disposuerant, nihil opposuit unquam, nisi mandassent aliquid honorificum, aut esset occultum, quòd eos nōsse oporteret. Sic nihil movit, cum Villagarcia sanitatem nimia occupatione pessumdedisset: nihil cum Salmanticensi aurâ pessimè afficeretur: omnia, cum in propatulo essent, Superiorum prudentiæ relinquendo. Quando verò propositâ simpliciter difficultate Superior perstabat in proposito, simpliciter nihil contra urgendo, id, quod ordinabatur, executus est; licet interim difficultas aucta fuisset. Nec solum sic se erga Superiores gessit, sed etiam erga Janitorem, Cocum, Ædituum, respiciens eos, ut Vicarios DEI.

VII. Modestiae formam à S. Ignatio præscriptam sic in se expressit, ut Leges ejus, si intercidissent ex ipso potuerint restaurari. Linguam sic moderatus, ut & religiosè silentium horis locisque præscriptis servaret, & cum loquebatur, nullum ei verbum, nec in Disputatione scholastica non limatum excideret.

CAPUT V.

Humilitas, & Patientia Ven. Patris Ludovici.

I.

Cùm An. 1586. Villagarcia Novitios formaret, statim ut omnibus prælucet, magno animo se accinxit ad opus: mox in depili veste, qualis Novitiorum esse consuevit, incedere, purgare loca immundiora domûs, lætamen deferre ad sterquilinum, ministrare infirmis, verrere pavimentum, lavare vasa, nulla in re quantumvis molesta eximius esse. Reliquo etiam vitæ tempore, quasi minimus omnium, humillima quæque occupabat, templi pavimentum verrendo, in culina, Coco & ejus socijs, ut & mediaestino sæculari, ac Valerudinario obediendo; in triclinio accumbentium pedes osculando, crebrò suas culpas è genibus deprecando, ultimum ubique locum affectando obtentu suarum infirmitatum. Nullum admisit, unquam socium, qui curaret ejus cubiculum, aut alia præstaret officia ad ipsum spectantia, nisi coactus necessitate; in qua tamen præcerpebat quidquid poterat operæ. Et ideo in debilitate extrema, sic curavit aperiri tunicam & thoracem, ut solus sinè auxilio, tametsi non sinè molestia, posset induere.

II. Nullum unquam verbum ex eo auditum est, quod laudem aut æstimationem propriam oleret: nunquam indagavit, an probarentur ea, quæ dictaverat; nunquam an libri sui vulgarentur, de quibus nihil unquam disposuit; imò optabat illos vilipendi, dummodo prodesse. Si quis in laudem ejus afferret aliquid, videbatur ita sentire, ac si prægrandem contumeliam passus fuisset. Nemo audivit eum, vel se excusantem, vel alios incusantem, multò minùs murmurantem. Nullâ unquam re aliquid in alios authoritatis arrôgare sibi est visus, aut eminentiæ: siquid diceretur, quod saperet ejus contemptum, non poterat vultu diffi-

disimulare lætitiā, quam tacito animo capiebat. In disputationibus ostentationem ingenij ac doctrinæ non necessariam devitabat. Non dedignabatur consilia ab alijs longè inferioribus, etiam Novitijs & alijs, quorum erat Magister, præsertim in rebus ad se spectantibus, petere & sequi.

III. Ut honorata munia posset fugere, varios à DEO morbos impetravit. A Superioribus enixè flagitavit vitam totā traducere in docenda Grammatica. Quando per infirmitatem eos, à quibus expetebatur, adire non poterat, asello contentus pro ridiculo erat pueris, cū senem osseum viderent à socio juxtā incedente teneri, nè decideret. At ipsi eadem irrissio pro delectamento fuit. Unde nec publico declinato, triumphantis more, ad exemplum CHRISTI, per medium forum, & loca frequentia jucundè pergebat; ijs, qui cum prius irriserant, in magnā postea venerationem ejus conversis. Fuit cum Sacri faciendi causā eunti ad Collegium S. Ambrosij soluta esset corrigia calcei, quam cū religare vellet, qui comitabatur juvenis, & postea Religiosus S. Dominici, non permisit hoc ejus modestia: sed paulò post (mirum!) religata apparuit, nemine qui manum admovisset conspecto. De Humilitate tanto sapore loquebatur, ut mentes etiam vanissimas ejus amore aspergeret.

IV. Quotidie ad aram & in alijs cum DEO congressibus sæpius orabat, ut quos CHRISTUS Dominus totius vitæ suæ comites habuit: Paupertatem, Contemptum, Dolorem, sibi quoque dignaretur adjungere. Villagarcia noctu in suo conclavi auditus dicere: *Impone mihi Domine, has plagas: Domine has plagas, & quas plagas!* Cū Franciscum Carvajalium Novitium, qui ista è proximo cubiculò audiverat interrogasset benè noctu dormiret, & ab eo ingenuè accepisset, quod propter has ejus exclamations non posset in illo cubiculo tam bene dormire, ac aliàs, subridens Ludovicus respondit: *Quid vis charissime? nos qui rarò cogitamus de DEO interdū, noctu debemus id facere.*

V. Ibidem cū die sancto Parasceves vehementius exarsisset cupiditate experiendi dolores CHRISTI, DEUS ei articularem morbum immisit, qui totā illum vitā reliquā, in manibus, pedibus, genibus, ac talis, dirum in modum exercuit. Excepit mente serenā coeleste munus, ut non uno tantū nomine dolores illos amaret, quin & optaret intensiores. Et verò multis mensibus baculo attentus non potuit nisi geminis grallis fultus incedere, vix solū pedibus attingendo. Accessit intemperies ventriculi, stomacho quidquid reficiendis viribus immissum accepit, acido sapore corruptum rejiciente, bis quotidie; ut hoc tormentum Ven. Patri Ludovico ipsā morte gravius videretur. Ex his orta amarities oris, cum saliva spissā, quæ etiam dentes sic affecit, ut ijs amissis, exulcerata gingivā, nihil jam posset cibi sumere, præter olusculum, & parum carnis minutim confectæ, & in aqua calida dilutæ cum mica panis absque alio condimento, ad stuporem etiam Medicorum, rem tam insipidam posse ab homine sumi.

VI. In pectore tanta oppressio, ut pænè suffocaretur, & post aliquot passus cogebatur interquiescere, ut animam revocaret. Humeros incessabat acutissimus dolor. Atque hic congestus morborum ultra 35. annos tenuit. Nihil autem admittebat, quod suos ei dolores levaret, nè domesticorum quidem alloquia. Excidit illi aliquando, ut diceret se multis annis desiderasse, ut aqua ei dissiparet, quā nullum svavius in suis ardoribus habuit refrigerium: cujus voti postea damnatus est, quando frigidā magnum illi stomachi tormentum creabat. Quādam die totā in flagrantissima siti nihil ei potionis, per incuriam socij, allatum est, nec tamen potum poposcit: aliàs per similem errorem totis 8. diebus amara quæpiam aqua ei præbebatur in potum; nullo id verbo questus, patientiā admirabili. Semel prolapsum strato duabus horis jacuit supra laterculos: neque tamen permittere voluit, ut aliquis ei foret semper assiduus. Lectus
qui

qui recreare solet, fuit illi cruciamento, quia carebat carne, quæ esset ossibus aridis pro pulvinari.

C A P U T VI.

Orationis Studium.

I.

EA fuit in Ven. Patre Ludovico Divinæ Majestatis reverentia, ut cum cernuus eam adoraret (adorabat autem sæpius) videretur infra terram & fines rerum ad nihilum usque se velle dimittere, præsertim in sacro officio dicendo: *Venite adoremus, & procidamus.* Tanto ardore orabat, ut januam cubiculi ab adventantibus pulsata non perciperet: quod si quem intrasse notaret, signo dato jussit expectare, donec horam unam terminasset. Quando morbus non sinebat eum esse in poplitibus, orabat in humili scabello nusquam inclinatus. Inter recitandum interspirabat, prout Psalmi suggerebant affectum: paulò longiori pausâ ad solennem Psalmorum clausulam, quâ Divinis Personis gloria canitur, singulas velut inter choros cœlestes constitutus, dilaudando. Nec absimili sensu recitabat illud: *Sanctum & terribile Nomen ejus.*

II. Ad Sacrificium longâ oratione, & mortificatione, & præmissâ quotidie confessione se disponebat, permissus demum in facello privatim facere, quia aliquando affluente vi gratiæ divinæ ad tres aut quatuor horas illud producebat: genua debitis intervallis etiam in summo furore podagræ, flectebat profundissime: ardebat facies aliàs pallida, manabant oculi, densabantur suspiria, totus tremebat ex reverentia CHRISTI præsentis; tantâque fuit interdum vehementia, ut qui ministrabant, timerent, nè vitam ante Sacrum absolveret; id quod ipsemet passus est. Primis 40. annis nullo die Sacrificium omittebat, etiam

am

am quando mortuo quàm viventi similior cogeatur decumbere, quia cùm tempus Sacri aderat, erigebat se robustior se ipso, ut adeò nocte natali CHRISTI consecratâ, tria continuò Sacra perageret, Medicis vim ea in re omni naturâ majorem agnoscentibus. Hortanti Fratri Andreæ Dominicano, ut sibi parceret, quòd non posset consistere pedibus: *Potero*, inquit, *mi Frater: DEUS juvabit. Sine me, quia aliam consolationem non habeo.* Cùm ei semel prohiberet Rector, quod nimis quàm infirmus esset, multis exoravit, ut saltèm liceret, si fortè tantæ vires suppeterent. Facile impetravit, quod videretur non futurum ut posset: sed ipse facile à DEO vires obtinuit, potuit, surrexit, fecit.

III. Postquam autem DEO placuit, ut jam omninò non posset; tunc quotidie sub Sacro alterius, quod in ara apud ipsum seorsum excitata fiebat, divino Pane refectus prolixas DEO egit gratias, fassus se tunc non sentire, quos patiebatur dolores. Divinum Sacramentum diu noctûque visitabat, ità ut sinè illo esse non posse videretur, cùmque genua per debilitatem flectere non posset, profundâ capitis inclinatione, iterum iterumque repetitâ, genuflexionem compensabat, etiam posteaquam recesserat, antequam è templo pedes efferret, iteratâ iterum inclinatione, quasi revertendo. Si omnino nec grallarum auxilio è cubiculo prodire posset, saltèm coràm Imagine Sacræ Eucharistiæ suæ pietati indulgit. Monitus à Rectore Didaco de Sofa, nè sumeret sibi laborem tanta cum difficultate eundi ad templū, cùm posset suo desiderio satisfacere in cubiculo, respondit: *Facio, Pater, hos passus, plures etiam factururus, ut ostendam, quanti aestimem gratiam sistendi me coram meo Domino, & agendi cum eo pro impetranda Misericordia, quâ tantopere tunc indigebo, quando me videro coram eo tanquam se vero Iudice.*

IV. Omnis ejus exterior actio, motus, vultus compositio docebant eum quovis tempore sinè intermissione orare. Oculos

los & manus tollebat in Cœlum, amore plenas emittebat voces, repetebat sententias è sacris litteris Potentiam, Sapientiam, ac Bonitatem DEI commendantes, ex obvijs rebus dulces hauriebat sensus: denique velut à se ipso abreptus, incedebat etiam, per vias publicas, ut clarè appareret illum præsentem versari cum DEO semper, offerendo ei tot Sacrificia, quot opera exercebat.

V. Ex hoc oriebatur, ut in Lumine divino omnia faceret magna cum perfectione, assidue memor dicti CHRISTI Domini: *Me oportet operari opera DEI*, Joan. 9. Quidam Prædicatorum dixit illo præsentem: si tantum unus mortalium esset damnandus ad inferos, satis id fore, ut quis maneat in statu religioso, ut hoc modo sit securior, nè forsan ipse sit unus ille damnandus: excepit P. Ludovicus: si omnes essent securi de felicitate æterna, se nihilominus à statu perfectionis, in quo degit, non recessurum: innuens quantâ intentionis sinceritate in obsequijs divinis versaretur. Non mirum ergo fuit, quòd qui curiosius ejus actiones observârunt, jurati affirmaverint, se nihil unquam in illis imperfectum deprehendisse: Imò tales fuisse, ut in illa rerum personarum, loci ac temporis concursione perfectiores esse non possent: quia videlicet fiebant ad exemplum DEI, & eorum, quos imitatio Divinitatis supra cæteros evexit. Uniebat præterea omnia sua opera cum operibus CHRISTI (prout ipse in suis sentimentis enarrat) & experiebatur sibi à DEO per merita CHRISTI tali oblationis actu applicata, concedi peculiare auxilium, & devotionem, quâ sua opera melius faceret, quàm si non præcessisset ista oblatio.



O

CAPUT

CAPUT VII.

*Quædam de Ven. P. Ludovico cœlitus revelata
eo vivente,*

I.

INcesserat illum ultimis vitæ annis cogitatio, se jam nec ad vivendum esse idoneum, nec ad moriendum. Non ad vivendum, quòd in corpore jam destructo non posset munia suæ vocationis exercere eo modo, quo vellet. Nec ad moriendum, quòd non sentiret in se fervorem & effectus puri & absoluti amoris divini, quem habere oporteret. In hac cogitatione recurrit ad Venerabilem Marinam de Escobar supplex, ut hanc suam sollicitudinem etiam atque etiam Divinæ Majestati commendaret; cui illa in hunc sensum rescripsit: nuper non fuisse commodum ei respondere accurate, ad id, quod à se petijt. Interim se egisse cum DEO, & hoc à sua Majestate responsum accepisse. Longè alios esse oculos DEI, quàm hominum: Nobis enim sæpe videri melius purius, & perfectius, quod in suis oculis perspicacissimis tanti non sit. Et contra nobis malum sæpe, ac vitiosum apparere, quod ipsi probatum ac pretiosum sit.

II. Idem jam Ludovico evenire, qui per gratiam DEI, & ad vivendum, & ad moriendum sit bene paratus, licèt ipsi videretur contrarium. Ad vivendum quidem, quia cùm vires corporis consumpserit laborando in vinea Domini, & adoranda sua anima ad percipiendum fructum vitæ æternæ, jam in eo esse, ut patiatur. Quod quidem est maximum donum, quod in hac vita Deus largitur eis, quos valde diligit. Sustineat ergo crucem suæ infirmitatis corporeæ, quâ non potest amplius cooperari desiderijs animæ suæ; quæ quidem crux oppidò gravis est. Ad moriendum autem paratum esse ob eandem causam. Et quia Abraham filium suum jam abstraxerit ab ubere Matris,

Matris, ideo nutrire eum solido pane, quo ad staturam & robur virile educitur: hoc est, cum hæcenus sit dulcedine divinâ, teneroque amore sustentatus, jam ei crustas panis præberi, ut solido cibo crescat in majorem virtutem ac beneplacitum DEI, qualemcumque sentiat ariditatem & teporem. Neque esse cur ex hoc responso DEI respondeat animum, sed potius gaudeat eo se loco haberi à DEO, cui omnia nostra cordi sunt, velut amantissimo Patri.

III. Alio tempore cum jam sibi videretur etiam animo factus languidior, scripsit eidem Virgini, ut & hunc suum dolorem DEO proponeret, qui sic respondit: dic tuo Confessario: posteaquam in vitæ suæ decursu dedit mihi totum, quod ei dederam impendendo in meo servitio vires ac sanitatem, & nunc etiam dat, quod habet cum toto affectu animæ suæ; æquum esse, ut & ego jam ipsi dem totum, quod ego sum & habeo: hoc est me ipsum & meum auxilium: & ut ipsius carnem flaccidam & ossa corrupta aspiciam talibus oculis, ut cum tempus advenerit, sint coram me septuplo splendidiore, quam Sol iste, futura: hoc ei die pro solatio.

IV. Eidem admirabili Virgini (prout ipsa cum juramento deposuit An. 1629. die 20. Julij) CHRISTUS Dominus representavit Patrem Ludovicum quasi mortuum, quem accedentes aliqui Angeli ex cælo, tangendo, fomentando, & calefaciendo ejuspectus, & vultum, fecerunt, ut videretur redire, denuò ad Vitam. Aliàs vidit, Beatos illos Spiritus ungentes, & sanantes ejus genua. Alijs duabus vicibus eum jacentem immobilem in lecto, in magna difficultate respirandi, iidem consperferunt quodam liquore cœlesti, ex quo ei redijt vigor; & liberatus est ab illa agonia. Unde sicut vita ejus fuit miraculosa & cœlestis, ita & remedia miraculosa & cœlestia fuere. Sed & aliàs ipsæmet enarravit se Angelum suum Custodem habuisse aliquando conspicuum.

V. Coram Sacris Judicibus jurato retulit Religioſa Perſona aliquoties in oratione viſum ſibi templum operis admirandi, cum pulcherrimis ex alabaſtro columnis: quo deſignabatur (interprete Angelo) Sancta Eccleſia Catholica, fundata ſuper ſincera noſtra Fide. In hoc multos eſſe Sanctos illuſtres, quos Eccleſia publicis colat honoribus; alios verò minùs notos, quos Deus tantisper habeat in ſacris theſauris ſuæ Providentiæ, donec ſit tempus eos manifeſtandi; quos inter etiam ſit Ven. P. Ludovicus de Ponte, cujus illuſtria merita repræſentabat corona cum ſex ſtellis ita fulgentibus, ut totum ab ijs templum illuſtraretur: quarum una ſignificabatur flagrans Amor erga Deum & homines, cum ſtudio ſuccurrendi illis quantum poſſet in qualibet egeſtate corporis & animæ. Altera ſumma Innocentia vitæ, quæ magis Angelo videretur convenire, quàm homini mortali. Tertiâ Humilitas, ac profunda demiſſio. Quartâ ſtudium ac diligentia in Contemplatione rerum divinarum. Quintâ Devotio ſpirans ac relucens in omnibus ejus actionibus. Sextâ ardens cupiditas amplificandi gloriam DEI. Pendebat verò corona ſublimis in aëre, quo Deus indicabat ſanctitatem hujus viri, quondam in Eccleſia celebrem & conſpicuam fore.

VI. In iſſdem proceſſibus apud Judices, depoſuit quædam Religioſa oſtenſum ſibi inter orandum, hortum, quatuor peſſulis concluſum, in quo redolebant omnis generis fragrantiffimi flores. Intellexit hunc hortum eſſe Societatem Jeſu, quatuor ſolemnibus votis munitam, & hominibus inſignibus florentem. Inter eos vidit Lilium candidiſſimum, cum aureo limbo: quæ erat Patris Ludovici virtutum effigies, virgineam ejus integritatem, gratiâ DEI circumdante. In ſex Lilij folijs cernebantur totidem cruce aureæ, eò quòd ſua omnia cruce conſignâſſet, cum Apoſtolo mortificationem CHRISTI in corpore ſuo circumferendo. Primâ Cruce ſignabantur ejus jejunia. Secundâ vigiliæ. Tertiâ flagellationes, ac cilicia. Quartâ compreſſio cupi-

cupidinum. Quintâ in morbis ac injurijs, suisque rebus omnibus Taciturnitas. Sextâ Patientia & animi ad omne genus morborum præparatio: quæ quidem omnia meritò designata sunt auro.

VII. P. Henricus Lamparter in Vita Ven. P. Ludovici, Lib. 1. c. 9. §. 5. refert Religiosam ex Recollectis S. Augustini scripsisse, sibi inter orandum exhibitam auream scalam novem graduum, quorum tres infimi nigro operti per doctrinam Ludovici piè vivere incipientes ad peccatorum detestationem, confessionem & pænitentiam ducant: tres medij operti cæruleo, proficientes ad meditationem, communionem, & imitationem CHRISTI promoveant: summi tres vario colore strati, jam perfectos elevent ad conjunctionem cum DEO per contemplationem cruciatuum, & gloriæ CHRISTI, & attributorum DEI. In fastigio scalæ libram vidit, cujus una lanx aurea fuit, ex argento altera. Librâ intellexerit significari prudentiam, quâ pondera rerum, omniumque dictorum examinabat aureâ lance Charitatis, & argenteâ purissimæ semper intentionis, homines semper ad puritatem cordis, & amorem DEI ducendi. Alio die vidit eadem inter orandum viam peramplam, quâ incedebant homines diversi fastigij; sed quia nox erat, & offendicula multa, satis periculosam absque laterna, quæ relucens in media via securum iter præstabat. Significabatur autem eâ Liber Ludovici, quem Ducem spirituales inscripsit, aptissimo nomine.

CAPUT VIII.

Aliqua mira circa Ven. P. Ludovicum de Ponte.

I.

IN processu Canonizationis jussu Clementis IX. autoritate Apostolicâ confecto Vallisoleti An. 1672. à tribus Episcopis

pis sic concluditur: *Quamobrem servum suum Ludovicum à Ponte omnibus & singulis virtutibus fuisse exornatum à CHRISTO Domino nostro, & condecoratum ex superius deductis evidentissimè liquet. Cum honor sit comes virtutis, virtutem heroicam, ac perfectissimam hujus servi DEI etiam in vita, in morte, & post obitum, honor, gloria, fama, & opinio Sanctitatis pluribus tum in vita, tum in morte, tum ipsam secuta miraculorum signis comprobata, comitatur. Præter miracula in vita patrata; recensentur ibi viginti octo, quæ ad hujus servi sui invocationem, vel reliquiarum, ejus attractum Deus est operatus.*

II. An. 1628. pestilente ulcere ad extrema deductus Clemens Fermento, Urbis Vallisoletanæ Gubernator, omni Medicorum arte consumptâ, voto se adstrinxit bonam pecuniæ vim conferendi ad sumptus necessarios obtinendo cultui publico Ludovici, cujus sanctitatem plurimi fecerat. Obtentâ à Rectore Collegij effigie ejus, & cerco albo ad sepulchrum ejus accenso, mox cepit melius habere. Et licet Medici eam emendationem mali non fore constantem crederent; nihilominus sanitatem integram pedetentim adeptus, sospitatori suo Patri Ludovico gratulatus est, qui ei in oratione perseveranti visus est vultu gravi & hilari dicere, se impetrâsse illi, quod abs se petijt, & eo amplius. Abhinc Beati Viri effigiem semper ad latus cordis gestavit.

III. Domina Magdalena de Zifneros per altas præcipites scalas fallente vestigio ruens, opem DEI per merita Ludovici invocavit, stetitque ad finem scalarum erecta, sinè omni læsione corporis, & sinè terrore animi: & quidem in crepidis, quæ inter cadendum exciderant, & inter parietes ad quos necessariò caput erat allisura, si absque tutela cœlesti fuisset.

Maria Marchionissa de los Velez, à viginti annorum fluxu, quo ad periculum vitæ processerat, admotâ religiosè particulâ sacræ vestis, in qua Sacrum fecerat Ludovicus, cui se impensè com-

commendabat, in momento sanata est. Idem sæpius Marchioni ejus Marito graviter laboranti evenit. Idem Antonix, Marchionissæ de Villar admotâ cruce, quam gestabat Ludovicus. Idem modis varijs alijs multis sacri & prophani ordinis.

IV. Joanna de JESU MARIA Recollecta S. Augustini Eybare in cœnobio Conceptionis circa 19. ætatis annum religionem ingressa cruciabilem in modum torquebatur scrupulis, ut & se ipsa irrequieta vexaret, & alios Viros graves ac pios, nulli (ut perplexum hoc genus hominum assolet) morem gerendo, nulli habendo fidem. Ea tandem suppliciter cum lachrymis à Ven. P. Ludovico remedium suis malis à DEO impetrari rogavit, multum se ipsam accusando, & deplorando, quod ea non exposuisset viventi. Mox spem sibi divinitus affundi sensit, atque cum consilio Antistitæ suæ Constantiæ à S. Paula, perscripsit Patri Michaëli de S. Romano Præposito Domûs Professæ Societatis Jesu Vallisoleti suas miseras, ei quidquid rescripserit obtemperatura. Et novendiali supplicatione rogavit Ven. P. Ludovicum, ut calamum Præpositi regere velit in salutem suam. Recepit à P. Præposito responsum cum Reliquijs Ven. P. Ludovici: ac simul id legit, ea pace ac serenitate mentis imbuta est, caligine omni detersâ, ut diceret se, si juberetur, octo diebus continuis sacræ mensæ accumbere, sinè prævia confessione peccatorum, id absque difficultate facturam. Quoties autem sentiebat morsuunculam scrupuli; solâ relectione responsi illius eam sedabat. Insuper aucta est majori gratiâ, elevata intra breve tempus ad novum altiorem modum orandi: in quo illusione verita, cum iterum ad Ven. Patrem pro lumine recurrisset, sensit novâ iterum luce se illustrari, animum à sensibus recolligi, consolatione internâ ex dulcedine divina dilatari adeò, ut verbis ea explicare non posset. Unde in anima ejus enati sunt fructus præclararum virtutum, ut à Viris doctis, & experientissimis approbatum sit, hæc à Spiritu DEI fuisse profecta: quam
gra-

gratiam sibi à DEO conciliante Ludovico nulla nova ex parte sua præparatione præmissâ procuratam mirabatur, & grata venerabatur.

CAPUT IX.

*Æstimatio gravissimorum Hominum de Venerabili
Patre Ludovico de Ponte.*

I.

OMittendo ea, quæ in Processibus pro ejus Canonizatione inveniuntur, seligam hîc aliqua speciminis gratiâ. Pater Franciscus Svarez, Theologus ille celeberrimus, cujus opera per omnes Academias pondus habent gravissimū, tanti Ven. P. Ludovicum faciebat, ut ipse jam senex itaverit auditum explicationem punctorum Meditationis, quam vesperi pridie Fratribus Coadjutoribus P. Ludovicus proponebat.

II. Henriquez Pimentel, prius Vallisoletanus, postea Conchensis Episcopus ait, se, cum audisset Ludovicum esse Virum perdoctum, excellentis & heroicæ virtutis, raræ, ac singularis prudentiæ & consilij, multum communicasse cum illo, tam de privatis, quàm de officio pastoralis, & obsequio divino, semperque invenisse in eo consilium, & consolationem, qualem promiserat sibi de illius sanctitate, doctrina, & prudentia. Talem etiam habitum fuisse toto Vallisoletano, & ab omnis generis hominibus consultum, tanquam Virum perfectum, & extraordinariæ virtutis, ac peritiæ Magistrum spiritus.

III. Joannes Hurtadus de Mendoza, Archi-Diaconus de Campo, dixit à se annis 50. cognitum & habitum fuisse Ludovicum, tanquam Virum Apostolicum virtutis perfectæ, & raræ sanctitatis: idemque judicium de illo commune fuisse. Unde etiam ipse magna cum reverentia semper egerit cum eo, nec
arbi-

arbitrari se majorem Magistrum spiritûs extitisse illis temporibus, aut etiam ullum, in quem tanta simul prudentia, humilitas, amor DEI, zelus animarum, & acumen ingenij convenerint; quamvis non deessent, qui aliquo decorum istorum ei non cederent.

IV. Pater Andreas de Ponte Dominicanus testatur eum, tum alibi, tum in Ordine suo, ut Virum sanctum venerationi fuisse: plurimisque Magnates ac Principes sibi gratulatos, quod talem Fratrem germanum haberet.

Bartholomæus de Segura Benedictinus, Concionator Regis Catholici, dixit, se felicem futurum, si mori potuisset illo præfente.

Joannes Requesenius, Marchio de Villar, se inter omnes, quos noverat, suspexisse capacitatem & sanctitatem illius.

Antonius de Campo Rotundo, Præses negotiorum Regis, sibi semper visam esse mirabilem ejus vitam & exemplum.

Joseph Gonzalez è Consilio Regis, eum tanquam Virum, eximiæ sanctitatis, ab omnis conditionis hominibus consultum de sua salute; & hanc de illo opinionem etiam post mortem, fuisse.

V. Mariana de S. Josepho, Recollectarum Fundatrix, scripsit, eum propter continuam attentionem animi sui in DEO, magnam omnibus, qui agebant cum ipso, iniecisse reverentiam, & æstimationem suæ sanctitatis; propter quod etiam non potuerint à consuetudine ejus avelli.

Mencia de Padilla, notissimæ virtutis, professâ est, nullis verbis explicari posse, quàm sublimis fuerit sanctitatis Ludovicus: seque à multis audivisse, nihil unquam in verbis, aut actionibus ejus deprehensum, quod non referret clarissimam virtutem; quia semper omnes ad majorem DEI honorem direxerit.

VI. Omitto elogium Domini Petri de Orozco, quo in laudes Ludovici consumpsit omnia myrothecia eloquentiæ, ni-

mio forsan (ut alicui videri posset) erga Patrem suum spiritua-
lem studio, summis cum Sanctis adæquans.

Robertus Cardinalis Bellarminus, Sapientum & Sanctorum
Antistitum exemplum, assiduo libros Ven. P. Ludovici usu,
cum pietatis gustu, præsertim ultimis annis, versabat.

Ferdinandus II. Imperator, Principum Christianorum reli-
giosissimus, inter summas Romani Imperij curas, ita libros Me-
ditationum ejus triverat, ut auditus sit dicere, se illos tenere
memoriâ.

P. Mutius Vitellescus Societatis Jesu Præpositus Generalis,
librum P. Ludovici Ducem spiritualement, suum Ducem nomina-
bat, quod ipso plurimum uteretur, præsertim in annuo secessu à
negotijs & curis regiminis.

Alexander VII. Summus Pontifex multum legendo ejus *Du-
cem spiritualement*, tam sublimia de spiritu P. Ludovici concepit,
ut si Divinæ Majestati placuisset ei adhuc annum aliquem vitæ
concedere, causa Beatificationis ejus fuisset absoluta.

VII. Et verò libri ab eo scripti ob tam sublimem doctrinam,
quam continent, vel soli sufficiunt ad probandum, quantæ san-
ctitatis necesse sit fuisse authorem. Certè primi duo Tomi Me-
ditationum in sex partes divisi, recepti sunt cum tanta æstima-
tione, ut intra tres annos fuerint quater recusati; postea in omnes
quasi lingvas Europæ translati. Unde & eum multi tanquam
Spiritus Sancti Instrumentum videre desiderabant; adeo, ut
cum Sacer Ordo Seraphicus Capitulum Salmanticæ celebraret,
complures Venerandi Religiosi Vallisoletum ad videndum, &
honorandum tantum Virum diverterint; quos inter Provin-
cialis Lugdunensis in Gallia, multum tam ob longitudinem
viæ, quam ob suam senectutem fatigatus, venerat ad nostram
Domum Professam quieturus: sed cum intellexisset non ibi mo-
rari Patrem Ludovicum, quem unice querebat, nullo à religio-
sâ humanitate obsequio Patrum admissio, statim se proripuit,
asse-

asserens, se non posse quiescere, donec vidisset magnum illum Servum DEI. Interrogatus unde illum nōset, respondit: an forsitan non sufficit, o Patres mei, legisse ejus libros, & vidisse perpetua miracula mutationum vitæ, quæ Deus per illos operatur, atque inde agnoscere illum pro Sancto? Si scripta ejus verba, mortua, tales operantur effectus, quid facient benedicti illius oris dicta viva? Et sinè mora se contulit ad Collegium S. Ambrosij, ubi manebat P. Ludovicus, cujus pedes statim flexis genibus, cum singulari tenera devotione osculari voluit, sed Venerabilis Pater eo non admissō, se quoque projecit ad genua, sanctā humilitate ambo inter se religiosè certantes, ut neuter quidem vicerit, ambo tamen fructum sanctæ victoriæ retulerint. Postea colloquio cum Ven. P. Ludovico religiosè habito recessit plenus solatio adeò, ut testaretur bene impensam esse omnem tam longi itineris fatigationem, quòd invenerit in Venerabili Patre plus etiam virtutis, quàm fama de illo sparserit.

VIII. Anno 1690. die 1. Augusti, Dominus Petrus de Felice Metropolitanæ Ecclesiæ Neapolitanæ Canonicus & Poenitentarius major, in sua super meam Dissertationem Parænetico-Apologeticam de Vita & Revelationibus Ven. Virginis Marinæ de Escobar recusam, Censura ad Eminentissimum Cardinalem Pignatelli Archi-Episcopum Neapolitanum, nunc Summum Pontificem INNOCENTIUM XII. sic habet: Præsens opus principio equidem necessarium non judico; cū *satis mihi esset ad ejus propositum demonstrandum sola Ludovici de Ponte auctoritas*, & testimonium initio præfixum: Viri scilicet apud Hispanos, imò & universum Christianum Orbem notissimæ Sanctitatis, ac speciali uberrimæque DEI luce perfusi, quantum nunquam satis laudata ejus volumina declarant. Censeo deinde opus hoc valde esse utile, &c.

IX. Ibidem Illustrissimus ac Reverendissimus Dominus Frater Joannes Bonilla Soria Carmelitanus de Observantia,

Arianensis Ecclesiæ Episcopus, Regis Catholici Consiliarius, olim in Provincia sui Ordinis Castellana bis Provincialis, ac Regius Concionator sic scribit: Si (ut docet Cardinalis Turrecremata in Prologo Revelationum S. Brigittæ) *ad discernendas veras Revelationes à falsis, approbatio earundem à gravibus, expertis, sapientibus, ac spiritualibus Viris debet fieri: quam (quaso) sunt in Ecclesia in hoc genere Revelationum, quæ majori digniorique approbatione præfulgeant? sufficiat unus pro mille, Venerabilis, non solum mihi: non solum toti Hispania, verum etiam toti terrarum Orbi, Pater Ludovicus à Ponte Societatis JESU, cujus beatificationem, jam (sacra Sede ordinante) in dies incredibili anxietate ultima attenduntur dispositiones. Hic namque tantus Magister, qui non solum regulis mysticæ Theologiæ instructus, sed absque dubio superno etiam lumine illustratus, Venerabilis Marina de Escobar per triginta, & amplius annos, confessiones, revelationes, extases, & raptus matura consideratione, attentaque inspectione direxit, quantum prædictæ Virginis Vitam, & revelationes extulerit, nullus, qui primam partem mirabilis illius vitæ lustraverit, ignorare poterit: Et certè, si hujus dignissimam occupationem attendamus, etsi non equali; armoniosa tamen acclamatione usurpare possemus illud Divi Thomæ circa S. Bonaventuram, vitam Seraphici Francisci scribentem, mirabile procul dubio dictum: sinamus Sanctum pro Sancto laborare. Dum ergo approbationem sapientum spiritualiumque Virorum, tanquam indispensabilem conditionem ad discernendas veras revelationes à falsis requirimus, quis (omisso Doctissimo Societatis catu, qui uno ore sat approbare has revelationes) Ludovicum vitam Marina scribentem inspexerit, aliam requireret approbationem? quasi non sufficeret unum Ludovicum vitæ excellentiâ, & magisterij spiritualis gloriâ præfulgidum, pro tam singulari DEI Ancilla laborasse.*

CAPUT

CAPUT X.

*De Venerabilis Patris Ludovici Statu post mortem
aliquæ Revelationes.*

I.

Venerabilis Domina Marina de Escobar cum juramento deposuit Vallisoleti, quòd ei Ven. P. Ludovicus apparuerit plenus gloriâ, & dixerit se ab illo momento, in quo obiit, gaudere visione DEI: & discooperto pectore ostenderit Sanctissimum Nomen JESU circumdatum splendidissimis radijs, qui fundebantur præcipuè versùs faciem, ac reliquum corpus lucidissimo Soli simile reddebant.

Pulcherrimum autem est audire illam ipsam loquentem; prout describit P. Andreas Pinto de Ramirez, parte 2. Vitæ ejus libro 1. c. 35. Eâ nocte, quæ Patri Ludovico de Ponte, in hac mortali vitâ fuit extrema, postquam mihi ex Collegio S. Ambrosij Societatis Jesu est significatum, sacro ipsum esse oleo unctum, rogavi meos Dominos Angelos hîc præsentés, ut abirent ad ferendum ei auxilium; quod omnes perlibenter fecerunt, & adfuerunt felici illius morti. Reversi sunt, & horâ circiter primâ à media nocte me duxerunt ad ejusdem cubiculum, in quo sanctum corpus exanime jacebat. Totum cubiculum apparebat simile cœlo, propter multos Angelos DEI, circumdantes corpus. Appropinquavi illi, & non potui videre faciem, quæ erat tecta velo, seu panno bombycino, neque mihi fuit discooperta, nescio quam ob causam. Osculata sum ipsius pedes, & manus, statimque sum reducta domum.

II. Manè visitavit Venerabilem Virginem P. Rector Jacobus de Sofa, & reversus in Collegium statim à P. Francisco Cachupin petijt, quomodo fuerit illâ nocte defuncti Patris Ludo-

vici corpus compositum, à quo intellexit unâ horâ ad noctem omnes discessisse ex illo cubiculo, visumque illi esse decens, ut facies ejus tegeretur, ac propterea posuisse supra illam strophium ex calice, in quo Ven. P. Ludovicus solebat celebrare, positisque hinc inde duabus candelis accensis ad latera tumbæ, abuisse. Hinc cum videret omnia correspondere P. Rector, confirmatus est de veritate eorum, quæ à Venerabili Virgine audiverat.

III. Præterea eidem Patri Rectori eadem Venerabilis Virgo Marina eâdem vice retulit sequentia: Optabam rescire statum Animæ Sancti mei Patris, & commendabam illam enixè DEO; atque Divina Majestas quasi dissimulanter mecum agendo, mihi ostendit Purgatorium, ac si diceret: Aspice, an ipsum hîc invenias. Lustravi attentè totum eum locum, & non vidi illum. Postea horâ circiter decimâ matutinâ me Sanctus P. Ludovicus visitavit, alloquendo me, quemadmodum faciebat, dum viveret. Vidi illum valde gloriosum, vultu prorsus vivido, ac tali, ut palàm faceret, se frui DEO. Multum me est solatus, dolentem ob ipsius obitum, dixitque mihi: Quamvis jam non degam in vitâ mortali, nihilominus te non negligam, imò juvabo, instruamque meliùs, cum obtineam statum, in quo non possum errare. Fui vehementer exhilarata, confortata & repleta solatio. Subitò comparuit in ejusdem pectore Sacrum Nomen JESU lucens ac resplendens instar Solis, cujus radij obtexerant faciem, & ob hanc magnam lucem desijt à me videri.

Comparet mihi quotidie, meque invisit, & mei Sancti Angeli ipsum singulariter honorant, ac venerantur. Dum autem ego id mirarer, dixerunt mihi: Nónne scis illum esse Sanctum Sacerdotem, & Ministrum DEI? Quidam Sanctus Angelus DEI mihi dixit, felicem eam Animam, dum egrederetur è corpore, transivisse penes purgatorium, absque ulla poena, imò cum ingenti gaudio, eò quòd agnosceret gratiam sibi præstitam à DEO,

à DEO , quâ ab ipso fuerit præservata à tam gravibus cruciatibus.

IV. Eo die quo peragebantur ipsius Exequiæ , agendo in mea oratione cum DEO ; dum celebrarentur divina officia , vidi Sanctum Patrem in cœlo , indutum nigrâ veste Societatis, cujus tamen stamen erat aureum : gerebat pileum clericalem in capite, & stolam in collo. Sedebat valde gloriosus & splendidus in sella , super tres quatuorve gradus elevata , coram Beatissima Trinitate , magna cum authoritate, & aspectu gravi, verum gloriosissimo. Vidi mox multos venientes Beatos ex ejus Ordine (fuerint verò Sacerdotes) omnes ornatos stolis, & binos : singuli ipsum adibant venerabundi , quasi honoris ergo illi inservientes, & gratulantes gratiam à DEO collatam , quos Sanctus magnâ charitate excipiebat, & brachijs collum circumdando amplectebatur. Peractâ hâc sacrâ cæremoniâ Sanctus Pater Ludovicus , & omnes reliqui se coram Sanctissima Trinitate prostraverunt, & Dominus ipsis est impertitus suam Divinam Benedictionem. Omnes assurrexerunt , & P. Ludovicus est reversus ad suam sedem cæteris stantibus. Venerunt interea sex Angeli , & conscensis gradibus utrinque terni incæperunt dulcissimis personare instrumentis concinendo suavissimâ melodiâ laudes DEI, ob exhibitas illi Sanctæ Animæ gratias. Hâc musicâ finitâ rursus se coram DEO prostraverunt , qui ipsis denuò suam sanctam dedit Benedictionem. Eo momento cæpit Pater Ludovicus usque adeò resplendere , ut eum ampliùs non viderim.

V. Deinde mihi comparuit in meo cubiculo , mansitque apud me ultra unam horam, loquens de rebus spiritualibus. Dum illum interrogarem , an ipsi aliquid accesserit gloriæ ex peractis hodie Exequijs ; respondit mihi : omnino. Sed ita de se est locutus, sicut vivens consueverat dicendo : mei Patres poterant pro Concione referre magnas gratias , quas à meo DEO
acce-

accepi, & dicere me parum ex ijs profecisse: omittere autem meas laudes. Omnia tamen aiebat cedere ad gloriam accidentalem Exequiarum sibi celebratarum in Coelo.

VI. Eadem Venerabilis Virgo Marina postquam ipse ei apparuit die mortis suæ gloriosus, curavit advocari unum Pictorem, qui in parvula lamina eum depingeret, non macilentum prout erat in vivis, sed vividum & succo plena facie in illo statu naturali, prout eum viderat, dirigendo eum pictorem ipsâ prout illum in imaginatione retinuerat. Res successit ad ejus placitum, ut ipsa magna cum veneratione laminam illam de collo suo pendulam portaverit, donec morti jam propinqua, tanquam pretiosissimum cimelium, reliquit uni suæ nepti Mariæ de Sancto Thoma Recollectæ Augustinianæ Vallisoleti. Hæc Domina ex hoc Conventu postea migravit in principatum Asturiæ fundatura ibi novum monasterium, atque inde iterum in terram Gison ad fundandum alterum, ubi mortua est cum fama sanctitatis, tanquam in schola Sanctæ Magistræ Dominae Marinæ educata. Dum autem Religiosa hæc Mater transfiret per Asturiam hanc ipsam laminellam in memoriam donavit alteri suæ amicæ Hieronymæ de Sanctissima Trinitate, quæ postea fuit multis annis Priorissa in illo Conventu, & mortua est in opinione magnæ virtutis.

VII. Quia autem confitebatur Patri Cachupin, tunc Rectori Collegij S. Ambrosij, cujus erga Venerabilem P. Ludovicum devotissimum noverat affectum, ut & laborem in promovenda causa illius beatificationis, An. 1661. quo dictus P. Franciscus Cachupin, ex Provincia Castiliæ electus Romam ad Generalem Congregationem XI. pergebat, in discessu ei donavit hanc parvulam effigiem pro viatico, quam ille postea usque ad mortis suæ annum 1672. de collo pendulam, nunquam, nisi componens se ad somnum, deponebat ad caput suum lecti magna cum veneratione & osculis, quo modo eam manē
ite-

iterum recipiebat. Ultimò vitæ annò paucis ante mortem suam mensibus eandem effigiem Patri Thyrso Gonzalez, nunc Generali Societatis Jesu (multum pridem desideranti & frustra petenti) tandem Salmanticæ tunc in ea Universitate primariam Cathedralam obtinenti donavit, quam prædictus Pater Thyrsus tanquam coeleste munus suscepit; & laminâ argenteâ deauratâ ornavit, in cujus area leguntur sequentia: *In hac similitudine apparuit gloriosus Venerabilis P. Ludovicus de Ponte, eo ipso die, quo est mortuus, Domina Marina de Escobar, qua direxit pictorem, ut depingeret se præsentem hanc imaginem, quam ipsa pendentem de collo noverem, quibus supervixit, annis portavit.*

Hanc Imaginem An. 1687. secum Romam detulit idem R. P. Thyrsus ad Congregationem Generalem XIII. pro Provincia Castiliæ missus Elector, ubi 6. Julij ipse creatus est totius Societatis Jesu Generalis Præpositus, eamque effigiem adhuc cum speciali devotione servat.

VIII. Sed & pari devotione conservat æneum Crucifixum, paulò altiore uno palmo Romano, in cujus pede deaurato inscriptum est: *Cum hoc Crucifixo piè obijt Ven. P. Ludovicus de Ponte, 16. Februarij Anno 1624.* Crucifixum istum tanquam valde pretiosas Reliquias obtinuerat in Collegio S. Ambrosij, ubi Ven. P. Ludovicus fuit mortuus, P. Gabriel de Vega: post cujus in Collegio Avilæ mortem fuit apud P. Petrum Teglio; inde devenit ad manus P. Joannis Babiani, ejus condiscipuli, qui fuit Lector primarius in Universitate Salmanticena, à quo donata est R. P. Thyrso Gonzalez, ejus quondam in Philosophia Scholari, quando is obibat missiones Salmanticæ in Quadragesima An. 1676. qui tanquam donum coeleste secum portavit in omnibus suis missionibus, Tori, Samoræ, Parentiæ, Hispali, Madriti, Vallisoleti, Segoviæ, Civitatis Rodrigo, & alibi donec tandem secum eum detulisset Romam An. 1687. quem hodieque in suo cubiculo cum speciali devotione in memoriam

tanti Viri retinet vénératione cultu privato, tanquam unius magni Cælitis, & unius ex majoribus spiritus Magistris, quos unquam Deus Ecclesiæ suæ concessit.

IX. Audierat Ven. Virgo Marina de Escobar, cum informationes de Ludovico sumerentur, se quoque interrogatum iri, ut ea referret sub religione juramenti, quæ nōrat de illo. Anxia super hac re, quod arcana sua nulli, nisi Confessario detegere soleret, & nunquam cum tremenda Divini Nominis interpositione aliquid edixisset, sæpius à DEO petivit exitum ejus perplexitatis, cum adfuit illi conspicuus S. Franciscus Xaverius cum Ludovico & quatuor SS. Angelis. Stetit Xaverius Ludovico sedente in solio, & intuitus Marinam multa cum significatione amoris, omni dubitatione mentis per claræ lucis infusionem exempta, dixit ei disertis verbis: *In tuo juramento dicas hæc verba: Te omnes Revelationes & Visiones, quas dixisti, pro certo habere; quod tota sint à Domino DEO nostro cum approbatione Confessorum tuorum; & quod quando erat occasio loquendi de hoc Venerabili Viro, semper audieris admirabiles virtutes, & res magna Religionis, Exempli, Spiritus, & Sapientia: ac triginta circiter annis, quibus egisti cum eo de gubernatione anime tuæ, & illi confessa es, idem fueris experta cum valde magna charitate, ac zelo juvandi animas, devotum & sanctum spiritum, admirabilem & sanctam doctrinam.* Ad hæc omnia tacente Ludovico dicebat illa intra se; Sancte Pater Ludovice, cur nihil dicis ad ista, quæ audivisti? cui cogitationi Ludovicus respondit se contra Divinam Veritatem niti non posse. Subintulit S. Xaverius DEUM esse, summam Veritatem, quæ nec fallere potest, nec falli. Admiranti porro cur stante Apostolo Indiarum sederet Ludovicus? dixit Xaverius: *Scias apud Beatos, Magistris Sacre Theologiæ institutis & illustratis à Spiritu Sancto, qualis Pater hic fuit, sua quoque esse insignia & notas Magisterij sui: & quod scripsit hic Sanctus Pater, inspiratum à Spiritu Sancto scripsisse, & sic omnibus Christia-*

stianis tradidisse doctrinam perfectionis. Postea cum docuissent eam, quanto in honore oporteat habere Magistros ac Ministros Doctrinæ cœlestis, & alia quædam privatim ad Marinam spectantia, desiderunt videri.

C A P U T XI.

De Translatione Corporis Venerabilis Patris Ludovici de Ponte.

I.

Dominus Hieronymus de Avelianeda & Mañriche Consiliarius Regis Hispaniarum, & Domina Catharina de Valle ejus Conjux, cupiebant Venerabilis P. Ludovici corpus honorificentius sepeliri, quibus P. Michaël de Oregna, Rector Collegij S. Ambrosij gratificaturus, ut securius procederet, accessit Ven. Virginem Marinam de Escobar, rogando, ut ipsa à DEO impetraret divinum Lumen, & directionem pro negotio hoc opportunè peragendo. Divina Majestas revelavit Venerabili Virgini statum, in quo tunc inveniretur sacrum illud corpus, quæ Patri Rectori sic retulit: hæc nocte portârunt me, sancti mei Angeli ad templum S. Ambrosij, & ostenderunt mihi corpus sancti Patris Ludovici de Ponte, quod ego venerata sum, tanquam corpus unius Sancti. Interrogavit illam Pater Rector, qualiter corpus esset constitutum; cui ipsa respondit, nec esse prorsus integrum, neque omnino corruptum, sed cæpisse corrumpi, ita ut possit dignosci facies, & caput retineat suos crines, & barba suos pilos. Præter hæc alia quoque distinctissima protulit indicia eorum, quæ viderat.

II. His acceptis P. Rector dimissis unâ die post meridiem omnibus Professoribus & Scholasticis recreationis causâ ad hortum, occlusit se cum solis Fratribus Coadiutoribus in tem-

plo, jussitque aperiri terram & tumbam, repertumque est corpus, eam penitus referre speciem, & habere signa, nè unico quidem discrepante, prout Ven. Virgo dixerat. Statim de his certiorum fecit Dominum Hieronymum, qui accurrit veneratus sacrum Depositu, quod nullum causabat horrorem, nec ullum spirabat foetorem, quin potius exhalabat gratum quendam odorem, & afflabat teneram quandam devotionem.

III. Advocati sunt tres nominatiores Medici, ad legitimum testimonium formandum, qui adverterunt quiddam speciale; nempè cum sacrum corpus partim jam esset corruptum, partim corrumpi inciperet, remanserit tamen cerebrum integrum, quasi Deus vellet illam partem capitis esse corruptionis expertem, in qua Venerabilis iste Pater formabat præclariores suos conceptus altæ suæ doctrinæ; quæ etiam inter assiduos gravissimos aliorum morborum dolores, remanebat semper libera & vegeta, ad universale obsequium animarum: sicut conservavit incorruptam linguam S. Antonij de Padua, & dexteram manum S. Stephani Regis Ungariæ, utpotè instrumenta, quibus hi Sancti DEUM glorificaverunt: ille prædicando peccatoribus, iste succurrendo pauperibus.

IV. Cum autem jam Annus integer & septem menses à morte ejus usque ad hanc ejus translationem effluxissent, sepultusque fuerit sine ullo præservativo atque intra tumbam penetraverit multum de terra humida, per quam putrefacta jam fuerant ejus vestimenta sacerdotalia, & tamen nè minimum malum odorem spiraret, testati sunt uniformiter tres illi Medici, hoc vires naturæ superare: in qua foetor inseparabiliter comitatur putrefactionem.


V. Cum autem eodem tempore fierent informationes de ejusdem Venerabilis Patris virtutibus, & miraculis, voluit Dominus Lopez Gallus Episcopus Vallisoletanus (cujus auctoritate incæperat prædicta Informatio) videre proprijs oculis hæc

nova

nova mirabilia. Unde comitatus Ferdinando Bastida Canonico Theologo Ecclesiæ Cathedralis, & Petro de Duero Equite S. Jacobi, venit ad Collegium S. Ambrosij, & præsentibus multis tam Religiosis, quàm Sæcularibus, discooperto sacro corpore intuirus est ea, quæ diximus, Deumque laudavit pro hac Gloria, quâ dignatus est hunc suum fidelissimum Servum exaltare. Voluit præterea, ut hæc omnia, cum omnibus circumstantijs exactè annotarentur fide authenticâ per manus unius Notarij Apostolici: & sic desiderio suo satisfecit, veneratus hunc magnum & sanctum Virum.

VI. Translatum & depositum est corpus in fronte Presbyterij, seu Chori ad latus Evangelij, ubi exhibebantur signa piæ gratitudinis à plurimis testantibus, se per intercessionem hujus Servi DEI Gratias cœlestes acquisivisse: adeoque ibi faciebant novenas, offerebant vota, accendebant cereos, volebantque lampadem perpetuam ad sepulchrum ejus fundare; sed Societas omni modo restitit, nè vel unica publici cultûs demonstratio fieret, nè contraireret Decreto Summi Pontificis Urbani VIII.





PARS SECUNDA.

Prudentia, Discretio spirituum,
& alia ad Magisterium spiritûs
spectantia,

Ven. P. LUDOVICI DE PONTE.

ET si ea, quæ priori Parte hujus Tractatûs allata sunt, ostendant eminentem Venerabilis P. Ludovici sanctitatem; quia tamen non omnes Sancti habere solent in æquali, quoad externos effectus, gradu donâ, omnia Spiritûs Sancti, neque omnes sunt Doctores Ecclesiæ, nec omnes apti gubernare Ecclesias, nec omnes Apostolico Spiritu idonei erudire populos, nec omnes Magisterio ascetico, & Discretione spiritûs illustres; ut propterea non eo ipso, quod Vir quispiam sit sanctissimus, capax sit Summus esse Ecclesiæ Pontifex, aut Animarum Rector, Instructor, Consiliarius, nec qui est sanctior, sit eo ipso etiam prudentior: prout S. Theresia dicebat plus prodesse Confessarium prudentem, quàm minùs prudentem, etsi sanctiorem: ideo oportet ostendere Ven. Patrem Ludovicum non minùs prudentiâ, & scientiâ asceticâ, & Magisterio spiritûs, quàm sanctitate eminuisse: id quod quidem videtur facile, cùm jam per universum Orbem Christianum, Magister spiritûs audiat, & communi judicio ipse asceticæ scientiæ lumen habeatur. Hinc ergo jam patebit, & quantâ ipse prudentiâ Revelationes Ven. Virginis Marinæ approbaverit, & quantam necesse sit apud omnes historiam vitæ hujus magnæ Virginis, ab ejus approbatione habere auctoritatem.

CAPUT

CAPUT I.

Prudentia Venerabilis Patris Ludovici de Ponte.

I.

Virtutum choragus est Prudentia, quam in Ludovico singularem & altiore communi fuisse planè necesse est, quia sinè luce majori, solum juxta ordinariam rationem ac legem, sinè temeritate ea assumere, quæ egit, non potuisset; prout ipsi quandoque Medici confessi sunt, illius vitæ modum artis suæ præcepta transcendere. Sed nihil est novi humanam prudentiam non assequi illa, quæ magni Servi DEI, quandoque DEO inspirante fecere. Atque ita quidem suas actiones instituit. Quando autem Magistratum gerebat, rexit alios mirâ cum tranquillitate, cum temperatione vigoris & lenitatis, vix unquam conspectus extra templum, aut suum cubiculum: ostendens, etiam non anxie cursitando, posse res gubernari.

II. Subditis singulari dexteritate præcludebat omnes aditus dissolutionis, & negligentiae: interdum satis habebat eis indicasse, suos eum defectus non latere. De divinis rebus ita cum eis agebat, ut svari teneritate ferrentur in illas. Reprehensiones melle amoris spargebat: neque tamen abstinere à castigatione publica, quæ non contumeliæ fontibus, sed reliquis disciplinæ foret: interdum dissimulabat, donec productione temporis opportunior, & fructuosior esset. Ità si quid in ægritudine minus religiosè ab aliquo designatum foret, non nisi valetudine restitutâ correxit.

III. Nec minùs prudenter externos ad perfectionem direxit, eos præcipuè ad infimam humilitatem, & solidarum virtutum exercitia cohortando: cum hac admonitione præcipuè, ut ubi, quæ agebantur in cordibus eorum, modestè proposita Moderatori suo fuissent, audito ejus consilio nulli alteri facillè pateface-

facerent : quia multo usu cognoverat, si ea, quæ in templis mentium recondita sunt, deferantur ad diversos Magistros, hostem animarum ansam accipere, vel miserè circumactos torquendi, per diversa diverforum consilia, vel adorandi vanæ choragium gloriæ, vel denique obliquis tramitibus abducendi à recta semita veræ virtutis. Id quod multis testata est sæpe laudata Mariana Fundatrix Recollectarum Augustinianarum, cui dixit Ludovicus : posteaquam sciat, quid agendum sibi sit quocunque suo tempore, sereno, & nubilo, nimirum ut intenta mortificationi & abnegationi propriæ, quærat semper in omnibus voluntatem DEI ; non esse cur multum, aut multos consulat, nisi clarissimè videat, hoc DEO placere, ut faciat. Et expertæ sunt plures, quas DEUS extraordinariâ viâ ducebat, magna sibi allata incommoda, quòd sua apud alios non prefferint silentio : quod ubi de consilio Ludovici fecerunt, pacata illis continuò fuerunt omnia.

IV. Nec intra spiritualium rerum cancellos constitit Ludovici prudentia, sed nonnulli Principes viri, omnia sua negotia gerebant ex ejus consilio : quod etsi nonnunquam videretur minùs appositè datum, optimum tamen fuisse, felix probabat exitus rerum. Certè consultus de nuptijs Serenissimæ Mariæ jam penè confectis cum Principe Carolo postea Rege Angliæ, adduci non potuit, re DEO commendatâ, ut eas probaret, validis argumentis oppugnans, quibus relatis ad consilium Statûs, rescissæ sunt ; & Regina præservata à calamitate Mariti, qui instar malefici, Europâ stupente, securi subjectus est : ac feliciter nupta Imperatori Ferdinando III.

V. Æqui rectique tam erat pertinax, ut nullius unquam personâ sineret ab eo se dimoveri. Quo factum est, ut quondam etiam Rectori obstiterit, qui cuidam juveni alioqui satis egregio, honorem publicæ Disputationis è Philosophia decreverat, præteritis alijs eo dignioribus.

CAPUT

CAPUT II.

Rerum cœlestium infusa contemplatio.

I.

Divina contemplandi duplex est genus; unum fit humanâ institutione & industriâ; alterum excedit omne magisterium, & studium hominis etiam gratiâ divinâ præditi. Ad illud expedit omnes eniti; sed istud nemo præsumere debet, nisi speciatim invitatus à DEO. Quæ de ista sublimi contemplatione ab eo tradita sunt in Duce spirituali, ex proprio ejus usu scripta fuisse censuerunt omnes, qui perspexerant ejus animi penetralia.

II. Certè edixerat se in illo opere minùs, quàm in alijs fuisse fatigatum. Quod cum miraretur, eò quòd liber ille præ reliquis esset in æstimatione, respondit: *Quando librum illum composui, jam sciebam id, quod scripsi.* Nempe jam horum omnium experientiam acquisiverat. Patri Martino Delrio commissa, erat revisio illius libri, & contigit, ut eunti ad villam tres quaterniones, quos secum ad ibi legendum acceperat, exciderint, nec recuperari potuerint, ut necesse habuerit recurrere ad Authorem Patrem Ludovicum, qui sereno vultu ei dixit: *Doleo me non habere aliud originale: nihilominus det mihi Reverentia Vestra reliquos quaterniones, ut perditos reparem.* Post paucos dies restituit illi reparatos integros, quos deprehendit Pater Delrio non solum quoad doctrinam, verum etiam propè quoad ipsa verba esse deperditis penitus conformes: id quod ei miraculi species videbatur.

Duodecimo anno ætatis suæ à DEO ad familiaritatem suam invitatus, quotidie magis magisque in ea progressus, ad ultimum summæ contemplationis culmen pervenit. Multa huc pertinentia habentur manu ejus propriâ descripta in ejus senti-

R

mentis

mentis sæpius typo excusis, ex quibus luculenter apparet; quàm fuerit luce divinâ repletus, ut sinè longo multæ considerationis negotio per simplicem Divinorum intelligentiam, subito liquefceret voluptate cœlesti. Vidit hoc Joannes Hurtadus de Mendoza Archidiaconus Medinæ Campi: is, ut erat percupidus sui profectus, cum interrogasset eum, quomodo essent in Oratione colloquia ferenda cum DEO: ille studio juvandi Discipulum rerum harum capacem, opere ipso ostendit ei, quod petijt. Nam oculis in cœlum elevatis cæpit cum DEO colloqui magnâ cum animi teneritudine; ac non post multa, cum pallidus esset, ac macer, totus inflammatus ac venustus, manare cæpit lacrymis, & ferventissimis verbis, cum significatione profundæ humilitatis; timoris DEI, diffidentię sui, confidentię in DEO (affectibus congruis rei, quâ deegerant) summi sui in DEUM amoris contestationem facere.

III. Tametsi tota ferè vita Ludovici quædam vel ordinaria, vel divinior illa contemplatio fuerit, DEO modò supernaturale lumen coruscum, & breve, modò diuturnum meditationibus ejus interfundente: maximè tamen horis nocturnis in illam incubuit, non rarò totas in ea consumens. Manebat verò immotus, instar statuæ comprimendo suos affectus, suspiria & singultus in pectore: nisi cum alijs dormientibus, sinè arbitris putaret se esse; tunc enim dimissis habenis sinebat eos prorumpere, maxima cum animi dulcedine.

IV. Postremis annis, cum se divino instinctu addixisset scriptioni librorum, tempus contemplationis nocturnæ non nihil contraxit. Nam horâ decimâ decumbens quievit ferè usq; ad duodecimam. Postea tribus horis operi suo datis, reliquas tres quatuorve orando ante Sacrum consumpsit; nisi charitas cogeret eum alicujus necessitati succurrere, tunc enim DEUM DEI causâ relinquendum censebat; memor ejus quod dictum est: *Quamdiu fecistis uni ex his fratribus meis minimis, mihi fecistis.*

stis. Cum autem, ut sæpe contigit, vim interni ardoris non amplius ferret, sine periculo vitæ, conferebat se in secretiorem partem horti; ibi oculis ac manibus elevatis in cœlum, velut emicante illuc animo, cum altis vocibus, quasi dimotus à statu mentis, faciebat gressus incitatos.

V. Sæpe quidem sic abripiébatur, ut quæ circa se fiebant, aut cum quis ad eum ingrediebatur, non animadverteret. Contigit in platea Vallisoleti, ut ob furentis Tauri incursionem à Socio, & à P. Francisco de S. Vincentio, brachijs abriperetur in proximam domum, ac nihilominus & ibi unâ cum Socio in cumulum prosterneretur, donec bestia aliò averteretur ab accurrentibus, qui Patrem Ludovicum quidem viderunt immotum in terra, totum tamen quietum, quasi procul omni periculo fuisset. Mox erectus in pedes iter suum nec dicto verbo prosecutus est. Die sequenti visitatus à Patre de S. Vincentio condolente de hesterno incommodo, respondit ingenuè, se nullius recordari: id quod etiam Socio suo Coadjutori responderat. Ex quo adversum est cum tunc, more solito, itâ fuisse recollectum ad DEUM, ut nec tumultu populi, nec periculo vitæ, nec turbatione suorum Sociorum potuerit abstrahi à sanctis suis cogitationibus.

CAPUT III.

Donum Prophetiæ, & cognitio secretorum cordium.

I.

Hieronymo de Tobar Novitio suo Villagarcia prædixit Ludovicus, eodem in Collegio post multos annos moriturum. Multis post annis in Collegio Montis Regalis tam gravi morbo laboravit, ut à Medicis haberetur pro deposito. Dixit ejusdem sententiæ se futurum, nisi à Ludovico dudum audivisset, Villagarcia se mortem appetiturum. Ergo

R 2

præ-

præter spem convaluit, ac demum Villagarciam missus Anno 1644. ibi est mortuus, vigesimo posteaquam id ei Ludovicus prædixerat.

Procerum quispiam Ludovico narrabat, summo se nuper in periculo vitæ fuisse ab equo: monuit ille, esse quod alterum infortunium ab eo caveat. Non fuit vana monitio, nam alio tempore, dum equum ferventiùs urget, excussus, obtrit, sine remedio mortem occubuit.

II. Offenderat quispiam alium hominem primarium, à cuius ira & insidijs ut se tueretur, ipse cum suis omnibus armatus incessit. Pater ejus, metuens malorum, rogavit Ludovicum, suæ authoritatis, ac precum interpositione, filio securitatem conciliare dignetur. Hic jubet eum ponere metum & arma, quia nihil ab inimico sit oriturum incommodi. Ipse tamen non ignoraret, se quæri ad necem, confusus tamen sanctitati & verbo Ludovici, arma deposuit in ejus præsentia: neque inimicus amplius ei struxit insidias, nullâ etiam injuriæ deprecatione, aut satisfactione petita.

Cùm Ludovicus morti proximus vidisset adstantem Lopez de Angulo, dixit se brevi simul in cælo futuros. Mortuo ipso venenatum vulnus invasit Lopium: quem ut Rector servaret, commendavit precibus Marinæ de Escobar, quæ retulit adfuisse sibi Ven. P. Ludovicum, jubentem abstinere his precibus, quòd ipse animam ægroti DEO sistere debeat: atque hoc brevi futurum, quod etiam factum esse speratur, quandoquidem ille paulò post extinctus est.

III. Didacus Gomez Sandoval Ducis de Lerma filius, cùm ad P. Ludovicum de quibusdam rebus conscientiæ suæ consulturus venisset, antequam earum ullam proponeret, de singulis ei dixit Ludovicus, quid esset agendum, aut non agendum; ac si eas in corde suo scriptas legisset. Idem Duci de Benavente contigit: qui cùm de re magni momenti acturus esset, ad portam Col-

Collegij à Ludovico se præstolante, totius negotij sui resolutionem, cum admiratione accepit, antequam id ei proponeret. Sic & Ludovico de Valdivia venienti ad se, ut quædam sui cordis arcana conferret, nullo dum eorum aperto, omnem dubitationem expedit, excusans quòd ei plus temporis tunc per occupationem dare non posset.

IV. Annæ Mariæ de Incarnatione Recollectæ aperuit tentationem, quæ in ejus corde, dum secum ageret, oborta, & ab ipsa necdum exposita fuerat. Alteri ex eodem Ordine secum agenti svaviter dixit, insignem errorem, quem eo die in officio divino commiserat. Medico Zevallos, & Petro de Duero Equiti S. Jacobi, sæpè distinctè clarèque exposuit, & enucleavit ea, quæ in corde suo perpleximposita non potuerant enunciare. Marinam de Escobar per Epistolam jussit esse securam, quòd electo rectà ad Cælum evolutura sit: quòd, apparens ei Petrus de Leon, primus ejus Confessarius, dixit Ludovicum ex revelatione divina scripsisse: quod quidem nec in dubium revocare sinit, tum Ludovici in asserendo summa circumspectio, cum ipsius Mariæ sanctitas nota & multis testata miraculis.

V. Novitium quendam Villagarcia miserè vexabant scrupulosæ formidines: cui dixit Ludovicus, Diabolum id agere, ut ipsum præcipitet in tædium rerum spiritualium, ac demum in contemptum, ac desperationis voraginem. Postea cum animi causâ cum Jacobo de Miranda (qui tum Grammaticam docebat) circa ædes Novitiorum ambularet Ludovicus, derepente aperto cubiculo illius, vidit eum ex impatientia humi abicere, quidquid habuit librorum spiritualium, & viden?, inquit, hoc agere diabolum per scrupulos, ut te adigat ad impatientiam? & mox iterum clausâ janua spatium perrexit.

VI. Alfonsum Vasquez item Novitium, qui postea magnæ virtutis & doctrinæ Vir fuit, mortuus An. 1649. importuna sollicitudo de rebus, quæ gerebantur in ejus Patria, pæne ad con-

filium poenitendum adduxerat. Obambulanti ante suum cubiculum, occurrit Ludovicus, & nē te discruciet, inquit, charissime, id quod cogitas: omnia jam feliciter peracta sunt: hominando simul, qui & quomodo egerint. Et cum dicto sic absterfa fuit illius menti tota illa vexatio, ut ipse scripto testatum reliquerit, nunquam se amplius illā curā fuisse pulsatum. Alius Novitius ejusdem nominis, Avilæ, postea defunctus An. 1627. cum in summo, nescio cuius, internæ molestiæ conflictu esset, occurrens ei Ludovicus unam, alteramve rationem dixit, quā penitus eversa omnia, quibus affligebatur, pax ac tranquillitas animi plena est reddita; multum admiranti, quomodo patefacta essent Ludovico, quæ intimis animi finibus clausa tenebat.

VII. Alium Novitium Ludovicus jusserat continere se in certo cubiculo, quod cum diabolus itā exagitaret interdum, ut videretur actus in furias. Quādam die cum ex vicino quodam loco domum revenisset, rectā, nondum depositis calcaribus, properavit ad ejus cubiculum, reperitque jam explorantem cultro gulam: & cum diabolo, vetere homicida, pepulit ab eo præsens exitium.

A liberalibus Procurator nescio quid epuli delicatioris sibi missum acceperat, & clām cum aliquibus absumebat. Supervenit ex improvise Ludovicus, & apertā sinē pulsu janua dixit hæc pauca: *Quomodo hæc sunt? & absque venia?* Statimque abiit: agnoscantibus illis, hanc ipsi notitiam esse ab alto, cum id agerent occultissimè, nullo hominum conscio. Ex quo factum est, ut nemo deinceps licenter aliquid faceret, sinē confessione ipsius, quod viderent ei omnia divinitus innotescere.

CAPUT

CAPUT IV.

Revelationes Ven. Patris Ludovici.

I.

Refert ipsemet Pater Ludovicus (etsi nomine tacito) visum ad directionem conscientiarum multum faciens, de homine desidis animi, qui torporem cupiebat excutere, ac DEUM intra se invenire. Hic sibi visus est constitutus in templo, in quo sacellum erat, altum & illustre, cum tribus Altaribus pari distantia sejunctis. In Tholo templi DEUS Pater cernebatur, manibus faciem protegens à pulveribus & molesto fumo, quibus infestabantur altaria. Templum, quàm cerni poterat, auri ditissimum fuit; nam pulveribus ac telis aranearum sic erat obductum, ut videri totum non posset. Altaria ornabat pretiosissima tela, sed rugosa, putida, & quæ à sordibus purgari abnueret. Pallia videbantur alba quondam fuisse; nam corrugata, convoluta, rancido aspectu fuere; supra quæ reptabant, saltabant omne genus animalcula fæda, glires, ranæ, scorpiones, bufones, aranæ, quæ suas ibi faciebant spurcicias, non sinè horrore magno. Pariebant hæc illi magnum dolorem, & optabat purgari templum, ut ibi fieret Sacrum; sed non apparebat, ubi sumendum esset purgandi initium. Tandem statuit pannis detergere pulveres e parietibus, etsi non absque timore, nè suffocaretur in illis. Hactenus visum, quod ei postea declaratum est à DEO, animam templo designari, altaribus memoriam, intellectum, voluntatem: ornatum pretiosum ac malè curatum esse virtutes hominis tepidi, quæ tametsi præstantes, defectibus, langvoribus, noxis venialibus ità fædantur, ut oculos aspicientis avertant, ac DEI nares tetro odore conspurcent. Eum, qui templum purgare conatur, esse hominem torpidum, qui per pia desideria, divinitus inspirata, cupiat veternum excutere,

tere, & abstergere sordes, aspersas à bestiolis vëneniferis, præparantibus ad crimina fontica, & letalia. Prodesse tamen, ut aliquod saltëm conscientię purificatione lustrandi fiat initium.

II. Alio tempore cùm indoleret suę inopię: memor illorum verborum: *Pulsate, & aperietur vobis*; visus est sibi ante, portas magnifici palatij positus in maximo timore, tum propter sævissimam tempestatem, pluvias, grandines, ac tonitrua, ut appareret cœlum ruiturum; cùm propter accurrentes innumeras feras, leones, ursos, uros, qui ipsi oculis designato jam imminerent. Hic ille magnis vocibus à DEO, præ cuius foribus erat, orare misericordiam, ut ingredi posset, antequam periret ab his bestiis, sanctè pollicitus, nunquam se amplius inde recessurum, neque processurum ulterius ad visendos amicos; quia nôrit eorum consortio se dignum non esse. Postea per ostiolum intromissum, vidisse quidem Regiam, peramplam, ac superbam, quò plurimi commeabant: se verò metuentem, nè ab aliquo illorum juberetur, faceßere, statim, firmęque stetisse ad portam. Quo condocfactus est, quantum præsidij sit ad januas divinę misericordię; à quibus non temerè est recedendum, præsumendò majores favores, & aditus ad partes penetrales divini palatij.

III. Metum, à conscientia peccatorum incussum, hoc ei modo ostensum est levare. Videbatur sibi in patente campo, flexis genibus, & junctis manibus, in summo pavore positus ante tribunal DEI: quem innumerabilis multitudo inimicorum hominum, varijs armis instructorum, petebat à iudice sibi tradi ad necem; jamque strictis armis expectabant judicis nutum, cùm ipse ad Judicem: *Jam*, inquit, *video Domine*; quia multarum simul rerum intelligentiam acceperat, omnes hoc verbo complexus. Jam video, scilicet, quę & quanta in te peccaverim: quę & quanta pro illis merear: video causas, cur hi trucidare me velint: video te hoc eis non permittere: te omnia posse
mibi

mihi condonare: te nôsse, quod me admissorum poeniteat, ac firmiter stet mihi te non amplius offendere. Video etiam à te mihi dari hunc dolorem ac propositum: à te in eo confirmari me posse, per infinitam misericordiam tuam: quæ si mihi denegetur, non potero te laudare in æternum. Atque his dictis, toto pectore tremens restitutus est sibi.

IV. Cùm in oratione atrociter dimicâisset cum importunissimis cogitationibus, vanis, ambitiosis, curiosis, inhonestis, & alijs; nihilque profecisset, inflammatus dixit: Quando ergo neque Majestatem Divinam, cujus in obsequio versor; neque minas & supplicia reveremini: agite, adeste quotquot in mundo estis, & unà mecum adorate DEUM, ac Dominum nostrum; dignus est omni honore, cultûque. Ergo venite, procidamus ante eum, & venerabundi laudemus eum psalmis & hymnis, confitendo gloriam, & magnam potentiam ejus: venite, humiliemus nos coram ipso, & cantemus; quoniam ipse est Rex Regum, & Dominus Dominantium; & omnes fines terræ sunt in manu ejus. Quo dicto subito posuerunt omnes hi venti, turbines, & ipse vidit in lato campo multitudinem Maurorum afflictorum humi; & alios quidem capite, alios brachijs truncatos, alios fractis cruribus, alios vinctos catenis. Cernebatur eques quidam in vestibus candidissimis, galeâ apertâ, ore candido & rubicundo coloris veri clarique, collucens cum stricto gladio; quo fecit hanc stragem in Mauris, nec pauciores calcibus equi videbatur obrivisse: ac postea nulla fuit amplius à cogitationibus illis oranti molestia. Id quod omnibus in simili conflictu, documento ac solatio sit. Optima distractiones mentis vincendi ratio, si in materiam laudis divinæ vertantur; ut scorpius contritus in vulnere medicina sit.

V. Ad sequenda CHRISTI vestigia sic est incitatus. Videbatur sibi vocari ad portam: cùmque prospiceret, quis se vocaret, deprehendit esse CHRISTUM. Ergo curriculo descendit, ut
S ape-

aperiret: sed eo non amplius reperto, plorans procurrit in plateas, viditque eum jam ad octoginta passus progressum: prope-
rè secutus est, clamans ut eum posset assequi. Conversus ad eum
CHRISTUS magna cum suavitate oris dixit: Nè te conficias, as-
sequeris me, quia lentè incedo. Animatus hoc dicto incitatus
cucurrit, donec eum affecutus, procidit ad pedes ejus, quos ap-
prehendens dixit: Bonum meum, ac Dominus meus, teneo te,
nec dimittam te: accipe me tecum, quò vadis. Vide, sis: non
poteris mecum ire; quia procul eo, & via valde est aspera. Re-
spondit ille: Domine mi, quæ potest esse difficultas in via, quan-
tumvis aspera, si tecum eam? Atque ità verè sensit in animo:
& mox uno pede dimisso, alterum brachijs decussatis amplexa-
tus est, ut stringeret fortius, ac dixit: Jam Domine vade, quò
lubet: quia si non declines à me, nihil me fatigabit, nec labor,
aut asperitas ulla viæ gravabit. Et mox vidit profundissimas
valles, aquis plenas, & alta, aspera, & petrosa juga, quæ supe-
randa erant. Cùm alia via non esset; quâ cum incederet CHRI-
STUS, cujus vestigia sequi decreverat, ægerrimè pedes sanguine
manantes trahebat: neque tamen deficiebat animo, iter hoc præ
omnibus divitijs & voluptatibus habens, neque cogitans de
reditu, unde exiverat. Quin etiam subinde hortabatur CHRI-
STUM, pergeret modò nec se relinqueret, aut ullam suæ mole-
stia rationem habere vellet; malle enim se lacerari dolore quo-
cunque, licet intolerabili, quàm ipsum dimittere. Atque hoc
dixit ex animi sententia, quia non tantum mali sit in omnibus
simul, quæ in mundo esse possint, ærumnis; quantum boni in
eo, si CHRISTUM habeat secum.

VI. Similis huic fuit altera visio, quâ dum post sacrifici-
um versaretur in ponderatione tanti mysteri, visus est sibi con-
stitutus coram DEO Patre: qui tres haberet apothecas, maxi-
mis bonis refertas, in quarum prima sint omnes divitiæ totius
mundi, in altera bona Beatorum & Angelorum, apud quos re-
sident

videbat ipsa Divina Majestas Patris æterni: tertia apparebat obscura, ac tristis aspectu, cum fenestra clathrata, quasi si carcer esset. In ea CHRISTUS erat veluti captivus, qui detectâ facie, mæstâ, magno cum sensu amoris rogare videbatur, secum ut maneat. Ad quæ ipse subito exardescens, dixit Patri æterno, cum sibi detur optio eligendi ex his bonis, quæ vellet, terrenarum se quidem opum nihil expetere, ut quas jam olim reliquerit atque calcaverit; sed neque cœlestes cupere, nisi ad eas ducatur eodem calle, quo CHRISTUS incessit: sibi certum esse, nec latum ungvem ab illo unquam recedere, quocunque suo dispendio. Atque tunc ei visum est, etiamsi necessarium esset ire per omnes ærumnas mundi, & ipsius orci tormenta id expetendum fore, ut possit jungi & esse cum CHRISTO: qui quidem sensus maximorum semper Sanctorum fuit.

VII. Quàm sint autem perpeffiones, ac mors CHRISTI, in moeroribus nostris & animi abjectione præsens remedium, sequente visu docemur. In gravi quondam afflictione mentis, moerore ac diffidentiâ, per variorum operum benignitatis CHRISTI recordationem, fuerat se conatus erigere: sed nullo fructu, donec voce internâ jussus est se conferre ad litus altissimi maris, è quo innumerabiles amnes misericordiæ copiosissimè promanabat. Oblata est igitur ei primùm semita lata, minimè obscura: ad cujus finem CHRISTUM in cruce etiamnum spirantem conspexit, cui adstabat Virgo Mater cum alijs amicis, viris ac mulieribus. Ad quem cum festinâset cupientissimè crucem circumplexus desideravit sangvinem è sacris pedibus, totoque corpore manantem excipere suo capite: quod etiam flagitavit lamentabili voce, & verbis tenerrimis. Cum jussus est auscultare, quid Magister divinus doceat è suggestu crucis: ac paulò post audivit hæc verba: *Pater ignosce illis, quia nesciunt quid faciunt.* E quibus intellexit misericordiam DEI sibi non claudi, cum CHRISTUS etiam suis carnificibus veniam oret ac

speret. Cæpit ergo respirare non nihil. Tum audivit latroni dici: *Hodie mecum eris in paradiso.* Quo magis erectus est videns aperiri jam fructum passionis CHRISTI, in qua sita sit tota sua felicitas. Secuta est altera vox ad Matrem: *Mulier ecce Filius tuus;* & ad dilectum sibi Discipulum: *Ecce Mater tua;* quo vidit quidquid impetratum velit, per hanc sibi Matrem confiendum. Post illa audivit dicentem: *DEUS meus, ut quid dereliquisti me?* & mox: *Sitio:* quæ in suum favorem dicta cognovit, hoc sensu: Pater æterne, cum pro honore ac reverentia tuæ Majestatis ad hunc articulum rerum mearum devenerim, in quo sum desertus ab omnibus consolare hunc miserum, cujus ego salutem sitienter desidero. Sexto verbo: *Consummatum est;* quasi diceret: peregi, quod mihi mandasti: superest, ut etiam tu mihi largiaris, quod peto pro isto, sublata est ab eo omnis diffidentia. Postremo verbo: *In manus tuas commendo spiritum meum;* didicit, quid sibi deinceps agendum sit: nimirum ut ferat fortiter, & constanter quidquid erit pati, seque manibus DEI commendat, atque concedat. Et subito desijt totum illud spectaculum, ipseque tantis lætitijs repletus est, ut non amplius caperet. Porro ex his, plurimisque alijs, quæ annotata non sunt, videre est, quàm facile potuerit integras noctes in contemplatione cœlestium rerum transigere.

CAPUT V.

Magisterium spiritûs in Venerabili P. Ludovico.

I.

Cùm jam decrepitus, morbisque fractus, non esset par alijs oneribus, exarsit quodam insatiabili desiderio convertendi animas suo calamo. Conversus igitur ad DEUM instantissimè per multos dies cœlestem expetiit lucem, donec quâ-

quâdam vice oranti videbatur totum cubiculum plenum esse purâ ardente flammâ, instar lucidissimæ fornacis, in qua videbat seipsum instar carbonis. Cæpit statim experiri in suo corde effectus misericordiæ divinæ, quibus inflammabatur ejus Anima, & illuminabatur Intellectus, ac replebantur tantâ luce & suavitate omnes potentiae, ut non potuerit torrentem illius dulcedinis corpus sustinere. Unde tanquam extra se raptus consurrexit, atque ad modum S. Francisci Xaverij Indiarum Apostoli clamabat: *Non plus Domine, non plus lucis, non tam multum: sufficit, sufficit.* Durante hoc excessu obambulabat ab una parte cubiculi ad alteram, tanquam fugiens, & recusans, si esset possibile, inundationem purissimæ illius lucis, per quam, nisi fuisset mitigata, vitam dicebat se fuisse amissurum. Ab eo tempore deprehendebat in se quandam clarissimam notitiam Sacræ Scripturæ; quandam profundam intelligentiam mysticæ Theologiæ, unâ cum admirabili discretionem pro directione animarum, & cum facilitate, ac affluentia verborum, similitudinum, conceptuum ad explicanda secreta occulta, & vias spiritûs.

II. His confirmatus & instructus applicuit animum & vires totas ad scribendum cum tanto studio, ut fuerit mirabile videre hominem doloribus suorum morborum absque intervallo oppressum, & instar cadaveris exhaustum, dempto tempore, quod dabat orationi, semper affixum suæ mensulæ scribentem in conspectu Crucifixi lectiones altas, quas illi dictabat divinus Magister, ut vulgarentur, & communicarentur mundo sensa illa valde profunda, quæ à Divina Majestate illi revelabantur. Videbatur nullam aliam habere cogitationem, quàm obedire divinis impulsibus in elaborandis suis libris, ut statim à suo ordinario parcissimo cibo se retulerit ad dilectum sibi munus scribendi vel legendi, vel dictandi materias sublimes pro omnibus Magistris spiritûs competentes.

III. In monasterio Sancti Spiritûs de tribus Monialibus
S 3 dubi-

dubitabatur, qualinam spiritu agerentur, & earum una præcipue suspecta erat, quasi ex ijs foret, quæ ludificatæ à diabolo sese illuminatas existimant. Multi, variorum Ordinum, Viri graves, disquisitis accuratè rebus earum, cum nihil extricarent, Ludovicus, ut omnes ei fuerunt expositæ, respondit; duas recto & securo tramite ingredi, quantumvis aspero & difficili; tertiam verò non delusam, nec illuminatam, sed deliram esse. In quam sententiam Episcopus etiam & sacrum Tribunal concessit.

IV. De alia persona pia dubitabat Didacus de Avendanno, an cum extra se ponebatur (utì solebat) non misceretur ludibrium diaboli. Negavit Ludovicus extases illas, aut à diabolo esse, aut à DEO, sed à natura. Cum enim sit bonæ mentis, nihil habere cum diabolo: & cum tunc cesset ab omni actione interna, extasum non esse à DEO, sed à natura, quæ dum hæret in affectione quapiam tenera, piæque, extra usum sensuum constituta videtur: quòd sic esse, re melius exploratâ, se invenisse testatus est P. Avendanno: qui addit, eam vim verborum Ludovici fuisse, ut qui cum dubio, caligine, tepore animi ad eum accesserant, omnes rerum certos, illustratos, inflammatos à se dimiserit.

V. Mariam Vela, Monialem Cisterciensem omnes pænè Viri docti & graves delusam credebant, quòd diebus Sacræ Communionis nihil alterius escæ sumeret; imò interdum vix ad ipsam Communionem posset os aperire, nisi per vim. At Ludovicus constanter asseveravit, nihil subesse periculi; sed DEUM hoc modo illam exercitam velle: neque recessit unquam ab ea sententia, utcunque alij variarent. Eam autem beatus Virginis obitus confirmavit, ut fusè in ejus vita à Michaële Gonzalez Baquero describitur.

VI. Neque multum absimile fuit, quòd Isabellæ de S. Augustino Recollectæ, contigit. Ea tantas angustias ante sacram Synaxin perpetiebatur, ut animam sibi interprimendam putaret.

ret. Credidit Confessarius alterius Ordinis occupatam malo genio, contra quem sacras jam diras parabat: voluit tamen audire prius Ludovici iudicium. Hic toto statu Virginis perspecto respondit, impræsentiarum non amplius opus esse, quàm ut ad sacram Synaxin accedens DEO dicat, se quidquid jam patitur pati velle pro ipso. Paruit ac statim quidem clementius habita, ac post aliquod tempus ab omni molestia fuit libera. Denique observatum est, quorum spiritum Ludovicus improbavit, utcunque magni ab alijs fierent, evanuisse existimationem eorum; cum illi, quos probaverat, demum opinionem virtutis eminentis reportarint, etiam ab his, quibus fuerat suspecta.

VII. Neque minùs consilio valuit, quò sæpe suos consultores ad ea, quæ horruerant amplexanda, & ea, quæ adama-verant repudianda, perduxit mirâ gratiâ. Erat Vallisoleti Virgo nobilis, unica filia suorum parentum: hæc voto se perpetuæ virginitatis obstrinxerat, quam ut collocaret in tuto, aspiravit ad monasterium. Graviter id accepere parentes & agnati: quorum unus Religiosus parùm religioso consilio svassit, ut haberetur indulgentius, & evanescente sensim proposito, voti relaxatio peteretur. Non difficile fuit puellæ animum ad molliora flectere: quem paulò post nulla subijt amplius monasterij cogitatio: donec mater ad vitæ finès deducta, magno nec inani dolore perculsa, quòd sancta filiæ consilia turbasset, animam exhalavit. Eodem tactus Pater, à Ludovico petit consilium. Is svadet illam mitti ad se. Venit, ut morem gerat Patri, sed non nisi nuptias spirans. At ubi Ludovicum loquentem audivit, mutari animo: tota in ejus arbitrio esse velle. Sed ipse non aliud svadere, quàm ut se totam sincerè dedat in manus DEI, sinè cogitatione statûs ullius. Paret illa, & seriò divinæ voluntati se mancipat: & ecce, distinctam à Venerabili Sacramento vocem audit, *quâ tu fronte adstas coram me, quæ versari cupis*

cupis inter vanitates? Multum exhilarata his verbis, resumpto primo proposito monasterium inijt, optimique exempli fuit.

VIII. Princeps foemina, cum è magna turbatione & afflictione animi se expedire non posset, accepto Ludovici, cui scripserat consilio, confestim animo mutata, se animosè divinæ voluntati permisit, neque deprædicare cessavit consiliarium.

Juvenem quendam DEUS tam manifestè ad Societatem nostram vocaverat, ut videns se non posse resistere, difflexerit lachrymis, quòd amicos & res mundi deberet deserere. Hic posteaquam dies aliquot exegerat in mœrore ac dubio, totum animum suum aperuit Ludovico: qui omnibus inspectis amplexus juvenem, hæc tantum pauca respondit: *Eja fili: DEUS hâc te vult, DEUS hâc te vult*: quibus lachrymas uberes elicuit illi, non mœstitiæ, sed tenerrimi sensûs & gaudij; neque dubitavit is amplius DEO parere vocanti.

IX. Agnes de Incarnatione, cum de sequendo Recollectarum vitæ modo cogitaret, ac gravis personæ homines non modò svaderent ei cogitationes istas deponere, sed etiam grandis piaculi Religionem injicerent, nisi staret ipsorum consilio: voto se obstrinxit faciendi, quod Ludovicus censuerit. Is auditis, quæ agebantur, pronunciavit, velle DEUM, ut Recollecta sit. Clausis igitur oculis ad alia omnia, DEUM sequendum. Quo dicto magna ejus animo pax & lætitia infusa est: obtemperavit & insigni cum sanctitate vitam degens in monasterio, non desijt gratulari DEO, quòd sibi tam bonum consultorem & viæ ducem obtulerit.

Matrona præcipuæ Nobilitatis, in tantum odium venerat sui mariti, ut videretur periclitari de vita: sed consilio Ludovici quantumvis gravi & ancipiti obediens, in majorem viri sui gratiam & æstimationem restituta est, quàm antea fuerat.

Plures è discrimine famæ ac fortunarum, alios ex desperatione, omnibus frustra tentatis, consilio suo liberavit, exemit, erexit.

X. Sed

X. Sed & scrupulorum felix domitor fuit. Multum angebatur quidam scrupulo rerum, quasi malè partarum. Censuit Ludovicus inanem esse dubitationem: cui, uti solent malo scrupulorum correpti, cum ille non acquiesceret, insolito fervore iussit, omni periculo in se recepto, nullam toto vitæ suæ tempore ejus rei mentionem facere, neque cogitationem admittere. Levatus ille hoc dicto quoties recurrebat ea cura, sola illam istius asseverationis recordatione pellebat.

Antonius Vepes lumen sacræ Familiæ S. Benedicti, quoties versabatur inter scrupulosas cotes sui regiminis (versabatur autem non rarò) non solebat, nisi audito judicio Ludovici, quiescere; ut Bartholomæus de Segura Confessarius Antonij, & internuncius ad Ludovicum, testatus est.

Omitto commemorare alios tam intraneos, quam extraneos, quos à funesta rabie scrupulorum admirabili facilitate liberavit. Unde etiam à longè nonnulli, quasi ad Machaonem scrupulorum profecti sunt.

XI. Quòd ergo sub tanto Magistro, eximie profecerint discipuli, mirum non est, quos inter, etsi emineat celebre nomen Venerabilis Virginis Marinæ de Escobar, non ea tamen sola præclaræ sanctitatis nomen ex hujus magni Animarum Ductoris schola retulit. Namque, ut Viros omittamus, hoc spirituali Patre, peculiari DEI mandato (ut videre est in ejus vita c. 15.) usà est per multos annos Virgo Mariana de S. Joseph, Fundatrix Reformati Ordinis Monialium S. Augustini, quæ etiam authenticè in processu facto Madriti An. 1629. de Ven: Patre Ludovico jurata deposuit, illum singulari, & extraordinariâ luce vocatum & illustratum fuisse à DEO ad scribendum, & dirigendum Animas ad supremam in singulis statibus Ecclesiæ perfectionem, per orationem, meditationem, & contemplationem, & virtutum omnium exercitium.

Ex hac quoque schola prodijt Aloysia Carvajalia, cujus cor-
T
pus

pus etiamnum in Regali Cœnobio, cui ab Incarnatione est nomen, incorruptum servatur Matriti, quò deportatum est Londino ex Anglia. Nam ausu plusquam foemineo, divinitus tamen (ut Ludovicus censuit, multis licet improbantibus) acta, ex Hispania Londinum pervenerat, & cum selectis ibi Virginitibus, in conspectu Regis alieni à Religione Catholica, in una simul domo sanctissime vixerat, prout ulterius perhibet ejus vita à Luisio Munnocio descripta.

His annumeres Menciam de Padilla, summis in Societatem, ac pauperes beneficijs multoque magis heroicâ virtute, & sanguine nobilissimo præstantem.

C A P U T VI.

Libri à Venerabili P. Ludovico de Ponte pleni Scientiâ mystica conscripti.

I.

Quæ Venerabilis P. Ludovicus in lucem edidit opera spiritualia, eam in toto Orbe Christiano ei peperere æstimationem, ut passim apud Viros asceticos, magnus Theologiæ mysticæ Magister habeatur. Scripsit autem Meditationes in sex partes distributas, quodammodo de omnibus Fidei nostræ mysterijs, ac præcipuè Vitæ ac Passionis Domini nostri JESU CHRISTI, & Beatissimæ Virginis, Sanctorumque: ut & Evangeliorum per annum occurrentium. Editæ primum fuere An. 1605. intra tres primos annos quater recusæ, ac dein in omnes prope lingvas Europæ translatae.

Secundò: Librum planè admirabilem de Oratione, Meditatione, Contemplatione, Visitationibus divinis, Gratiisque extraordinarijs: de Mortificatione, heroicis Actionibus seu Operibus, quæ tales visitationes divinas comitantur, cui dedit

dit titulum: *Dux Spiritualis*. Editus est primùm Anno Domini 1609.

Tertiò: Tomos quatuor de Christiani Hominis in quocunque statu & genere vitæ Perfectione. Editi sunt primùm Anno 1612.

II. Quartò: Vitam sublimemque Sanctitatem sui in spiritu Magistri P. Balthazaris Alvarez Societatis Jesu, Viri excellentissimæ orationis, ac contemplationis, quo etiam S. Theresia in rebus animæ suæ quandoque utebatur: ubi Ven. P. Ludovicus ostendit se statim quasi à teneris adhuc sub disciplina tanti Magistri, jam Magisterium spiritûs imbibisse. Refert ibidem c. 11. §. 2. revelationem, quam S. Theresia de eodem Viro habuit, his verbis: Erat semel P. Balthasar valde anxius ex quadam tentatione de prædestinatione sua, disputans, & objiciens ac respondens sibi, an esset salvandus necne? id sancta hæc Virgo advertens recurrit ad Dominum nostrum, ut dignaretur illi adesse: qui ei revelavit ipsum fore salvum, ostenditque illi præstantem quendam locum, quem in cœlo esset habiturus; & adjecit, quod ille tunc in terra esset, in adeò excelso perfectionis gradu constitutus, ut eo tempore nullus esset in altiori, & juxta talem gradum reddendos sibi Gloriæ gradus in Cœlo. Acceptâ resolutione dixit illa Patri Balthasari, ut bono esset animo, nam Magistrum (itâ ipsum CHRISTUM Dominum compellabat) sibi dixisse, esse certam ipsius salvationem. A quo momento itâ fuit ipse consolatus, tantumque animum sumpsit, ut adverteretur verè fuisse cœlestem revelationem. Et ipsamet Sancta idem multis Societatis Patribus, & aliquibus suis Monialibus, aliisque personis religiosis retulit, quæ id tanquam certissimum referebant. Ipsemet etiam P. Balthasar habuit similem aliam revelationem. Prodiit hic Liber Latine primùm An. 1616.

III. Quintò: Scripsit Ven. P. Ludovicus duobus Tomis Expositionem moralem, & mysticam, in Cantica Canticorum,

de omnibus Christianæ Religionis mysterijs atque virtutibus; Latinè editam An. 1622.

Sextò: Directorium spirituale ad Confessionem & Communionem, & Sacrificium Missæ, seu de recto Sacramentorum usu: quod videre mihi necdum contigit.

Septimò: Vitam admirabilem lectissimæ & Venerabilis Virginis Marinæ de Escobar, spiritualis suæ filiæ, Tomo uno, usque ad suam mortem, seu annum CHRISTI 1624. Reliquos ejusdem Venerandæ Virginis novem adhuc annos superstitis usque ad annum 1633. 9. Junij, quo ipsa decessit, pertexuit Pater Michaël Orenna, qui Patri Ludovico in gubernanda ejusdem sanctæ Virginis conscientia successerat, quem Tomum posteriori postea digessit, & luci dedit P. Andreas Pinto.

IV. Octavò: Memoriale, seu Sentimenta spiritualia, quæ post mortem ejus inventa, ex ejus meditationum fructibus ab ipsomet annotata, ac collecta, postea digesta, ac luci data sunt, ab Admodum Reverendo Patre Thyrsò Gonzalez, nunc Societatis Jesu Præposito Generali, An. Dom. 1671.

Nonò: Meditationes, quas ipsemet P. Ludovicus pro suo usu combinavit, postea ejusdem Admodum Reverendi Patris Generalis operâ vulgatæ. Anno eodem.

Decimò: Documenta alia, itémque Epistolas spiritu ac luce sancta plenas ad diversos à P. Henrico Lamparter in unum collectas, & vitæ ejus in typo subjunctas, An. 1662.

In his omnibus videre est copiosissimam Spiritus Sancti gratiam, & profundam Christianam sapientiam, ad erudiendum & inflammandum totum mundum.



CAPUT VII.

Venerabilis Pater Ludovicus de Ponte datus à DEO
Magister Orationis & Spiritûs.

I.

Magni nostri Domini ac Creatoris erga suas creaturas, & maxime erga suam Catholicam Ecclesiam perpetuâ sæculorum omnium experienciâ deprehenditur Paterna Providentia, quòd calamitatibus omnibus, & imminenti-
bus malis, malorumque periculis Remedia in tempore oppor-
tuno provideat, & antidota congrua tempestivè opponat. Admirati sunt hæc pridem Viri in Ecclesia eminentes, dum Hæ-
resiarchis omnibus, & singulis viderunt eodem sæculo Viros
sanctos doctrinâ valde eminentes oppositos, qui adversus no-
vas orientes hæreses, nova pharmaca protulerant. Infelix no-
stra ætas vidit nefandam Quietistarum ex orco emergere ten-
tantem hæresim, quæ præcipuum à DEO nobis datum Salutis,
Perfectionis, & Sanctitatis Instrumentum, *Orationem*, toxico
infernali corrumpebat. Quisquis ergo præclarum illud Vene-
rabilis P. Ludovici asceticum Opus, cui titulum dedit: *Dux spi-
ritualis*, vel solum per titulos capitum, nedum etiam paragra-
phorum, percurrendo lustraverit, advertet profectò, quemad-
modum alios alijs temporibus (ut loquitur Breviarium de San-
cto Ignatio) Sanctos Viros, ita Quietistas Venerabilem P. Lu-
dovicum de Ponte tempestivè opposuisse.

II. Et si autem totum opus mera sit Instructio Spiritûs, me-
ra solidissima Doctrina Orationis, & Schola agendi cum DEO,
ut statim appareat, neminem nisi Sanctum & propriâ experien-
tiâ Virum instructum ausurum fuisse opus tale aggredi: nihilo-
minus quæ immediatè Quietistas concernunt, videri possunt
tract. 3. §. 1. ubi ex proposito explicat, quid sit illa *Quies*, aut

Requies spiritualis, de qua Theologi mystici, & cur diversis appellatur nominibus, nunc *Otium sanctum*, nunc *Silentium*, nunc *Solitudo*,; quæ omnia propter suam altitudinem non patiuntur se in compendium contrahi, sed ut probè intelligantur, sunt suo loco fusiori cum explicatione legenda: ut & ea, quæ habet paragraphus 2. de spirituali Animæ *somno* & *sopore* in lecto cordis: qui somnus non est imago mortis, sed imago vitæ excellentissimæ.

III. Deinde exponit quænam contemplatio vocetur *Mors* propter Quietem perfectissimam, ac si contemplans rebus omnibus hujus mundi esset mortuus, ut soli Creatori vivat: cur & quomodo contemplatio etiam sit, & dicatur *sepulchrum*: quomodo *Terra promissionis*, *Manna*, *Lac* & *Mel*; & alia huc pertinentia mirâ & elegantissimâ claritate, præsertim, si reliquus Tractatus perlegatur. Et quidem totum negotium familiaritatis quocunque modo cum DEO ita exactè tractasse invenitur Venerabilis Pater in eo opere, ut nihil omisisse videatur.

IV. Non possum, quin saltèm titulos Tractatum hîc inseram ex Introductione, quam operi præmittit his verbis: Librum partimur in quatuor partes: in quarum

Prima agetur de familiari Animæ cum DEO tractatione per ipsam Orationem, Deique cum Anima per divinas suas inspirationes. In qua parte colligemus quidquid excellentissimum, & defæcatissimum est ipsius spiritûs; id, quod est tanquam flos vitæ contemplativæ, & quod ordinariè illi experiuntur, qui excellæ huic mentalis Orationis exercitationi se dedunt: sive illud respicias, quod ipsi præstant; sive quod à DEO, dum illos visitat, accipiunt.

V. *Secunda* Pars erit de sacrorum, piorumque librorum lectione, & meditatione divinorum mysteriorum, adhibitâ lectione & studio librorum mysticorum hujus scientiæ, qui sunt: propria conscientia; creaturæ spectabiles hujus mundi; vitæ
San-

Sanctorum, & ipsius Sancti Sanctorum: quò perfecta sui ipsius cognitio CHRISTI; Domini ac DEI obtineatur, quatenus ea ex ratiocinatione creaturarum elicatur; & simul ferventes affectus concipiantur, qui ex hisce cognitionibus, cum perfectæ sunt, enascuntur.

VI. *Tertia* Pars erit de perfecta contemplatione, & unionione cum DEO Domino nostro, quæ pertinet ad viam unitivam; ac de arcanis scientiæ mysticæ occultissimis, tam ordinarijs, quàm extraordinarijs, eo modo, ut intelligi possint. Quibus addentur etiam admirandi alij affectus conjunctionis, & amoris erga proximos, qui ipsam mysticam scientiam comitantur. Et quamvis harum rerum nonnullæ positæ fuerint in libro, ante paucos annos edito meditationum, circa sanctæ Fidei nostræ mysteria, & praxis orationis mentalis circa eadem: ibi tamen valde summatim id factum est, quia animus erat, materiam tantum, & argumentum Orationis ac Meditationis, practicamque earum exercitationem proponere, fusiori declaratione virtutum, quæ comitantur orationem, & reliquarum rerum, quæ in actionibus vitæ contemplativæ eveniunt, in hunc librum rejectâ: in quo, DEO bene favente, supplebimus, quidquid in illo altero defuit, theoriam ipsam praxi conjungentes, docentesque orare & agere cum DEO, quòd simul utriusque exercitium conspiciatur. Ideoque singula ferè capita, meditationum locò esse queunt, cum distinctione punctorum, quæ possint in ipsa orationis collectione expendi.

VII. Sed, quoniam perfecta oratio, & contemplatio non potest esse sterilis; *Quartum* his Tractatum addemus, de præcipuis vitæ activæ actionibus in omni genere virtutum: quæ actiones, cum sint, in quodam minùs perfectò gradu, disponunt ad vitam contemplativam; in gradu verò perfectiori, sunt ejusdem fructus. Agemus autem de eisdem in utroque gradu, ut perfectionis cupidi in eo gradu eas inveniant, in quo illas desiderant; simul

simul etiam agemus de ratione Orationis, & Considerationis practicae, quae ipsas virtutes comitantur. De vita item mixta, quae ex contemplatione deducit ea, quae alios doceat, quò huiusmodi fructus non ad solam nostram perfectionem alligantur, sed extendant se ad proximorum quoque perfectionem.

VIII. His autem declaratum & perspicuum manebit, quid quid pertinet ad vitam activam & contemplativam, atque compositam ex utraque, & quam aliqui Theologiam Mysticam appellant, tam contemplativam, quam practicam, cuius excellentias initio tantum insinuavimus, sed eadem fusiùs in huius libri progressu tradentur. Quoniam autem in his materijs adferri interdum solent verba quaedam grandiloqua & nova, quae etsi ea dicentem, altissimum aliquem sensum habere insinuent; rem ipsam tamen non ita declarant, ut omnes possint eam intelligere, operam dabimus, ut rerum altitudini verborum claritatem jungamus, ea adhibentes, quae communi usu (quae maxime vera propriaeque sunt) usurpantur: mysteria enim per se ipsa sunt adeò excelsa, ut ad eorum debitam aestimationem opus non sit, nisi ut declarentur.

IX. Ex his apparet, quantum Deus optimus Ecclesiae suae Virum in Ven. P. Ludovico dederit, ut talis ac tantus non vanè vocatus sit à Viris magnis eximius Magister spiritus, magnus mundi in asceticis Doctor. Et verò planè sapiens est eorum adversio, qui meritò dixerunt omnino necesse fuisse, ut talis ac tantus Vir esset Venerabili Virgini Marinae de Escobar à Confessionibus, ejusdemque Vitae ac Revelationum Censor, & Scriptor, ut tam inusitati, innumeri, incredibiles favores DEI, reliquaque adeò admirabilia, fidem apud homines invenirent, sub autoritate tanti per Orbem Christianum tamque clari Viri, & omni exceptione majoris.

CAPUT

CAPUT VIII.

*Quomodo Venerabilis P. Ludovicus de Ponte appro-
baverit Vitam, & Revelationes Venerabilis
Virginis Marinae de Escobar.*

I.

Vix possibile est, ut Hominum sapientum Catholicorum ullus, qui Vitæ, Virtutum, ac Sapientiæ mysticæ Ven. P. Ludovici sit peritus, ac etiam utramque partem Vitæ Ven. Virginis Marinae pensiculatè perlegerit, non temerè judicet hunc tam grandem Servum DEI, tam illuminatum in spiritu Magistrum, tam exactum in suis actionibus Virum, inconsideratè, temerè, imprudenter, non solidissimè, cautissimè, sufficientissimis cum fundamentis processisse in ijs, quæ Tomo uno de vita ac visionibus Venerabilis Marinae de Escobar, assiduâ *per triginta annos* tractatione, consideratione, experienciâ, & attentissimâ inspectione conscripsit. Vidimus sapientiam ac profundissimam asceticam scientiam magni hujus Viri, audiamus illum ipsum, utrùm scientiam hanc, & ea tam præclara de discretionem spirituum documenta diligenter applicuerit ad examinandas has revelationes, ut posset prudenter sententiam suam de omnibus proferre; & consideremus causas, quas ipsemet exponit se habuisse judicium tam favorabile de omnibus his rebus ferendi; nè ulla remaneat umbra suspicandi, cum temerè processisse.

II. Quin imò ut etiam constet, etiamsi (quod non videtur metuendum) etiamsi, inquam, ipsæ Revelationes non subsisterent, & ab Ecclesia Catholica repudiarentur, aut quâcunque nota sinistrâ afficerentur, vel suspectæ haberentur, aut non approbarentur; nullam nihilominus in ipsum Venerabilem P. Lu-

V

dovi-

dovicum hinc maculam descendere posse, quia nimis imprudens, temerarium, ac Ecclesiæ Catholicæ injurium esset, ab ullo homine, quantumvis sanctissimo, doctissimo, ac præcipuæ etiam in universa Christianitate dignitatis Doctore requirere illam Prærogativam, illudque Privilegium, quod CHRISTUS Dominus soli Sponsæ suæ Ecclesiæ concessit, nempe ab omni in quæstionibus similibus errore, immunitatis.

III. Neque hoc S. Ecclesia ab ullo unquam etiam ex Sanctis Patribus, & suis Doctoribus requirit; quin potius sibi supremum & ultimum super omnes Doctores, eorumque doctrinam & Libros judicium & censuram reservat, & usurpat; neque per hæc ullum Sanctum Patrem abjicit, aut ullum indignum Canonizatione, vel Beatificatione judicat, quòd alicubi judicium protulerit fallibile aut falsum, dummodo cautè, prudenter, fundatè, circumspectè, atque omni eo modo, qui à sapiente & sancto Homine, sed tamen Homine, desiderari possit.

Exemplorum in Historia sacra habemus affatim, ubi Sancti Ecclesiæ Doctores in quibusdam dissidebant, in quibusdam dubitabant, in quibusdam aliter, quàm postea S. Ecclesia determinaverit, sentiebant. Quapropter dummodo certum sit, Ven. P. Ludovicum prudentissimè, ac consideratissimè, atque ex fundamentis solidis processisse, dum Revelationes Ven. Virginis Marinæ pro legitimis agnovit, nihil de reliquo potest ei dari vitio, nihil gloriam & æstimationem ejus imminuere, nihil ei apud Christianos ad Sanctitatis famam publicam obstare.

IV. Quàm autem cautè processerit, etiam ex hoc advertere est, quòd verbis usus sit modestissimis, & circumspectis. Hinc in Introductione operis statim §. I. sic loquitur: *Certus sum, quantum præsentis vite constitutio patitur*; adeoque manifestè ostendit, & quasi protestatur, se procedere solum fide humaná reservando omnia sententiæ S. Ecclesiæ. In quo satis admirabile est, quòd etiamsi tunc temporis necdum emanaverit

Urba-

Urbani VIII. Constitutio de non edendis similibus libris in lucem, nisi appositâ initio & fine protestatione, narrationes illas non excedere fidem humanam, ipse tantò antè Constitutionem hanc prævenerit, eodem haud dubiè spiritu, quo Constitutio illa postea constituta est; nempe quòd statim initio in ipsa Introductione operis apposuerit, se de his non esse certum, nisi *quantum presentis vite constitutio patitur*: & in fine in ultimo capite iterum ultro suos defectus, & ignorantiam humillimè ingesserit, quasi ultro sensum, & ultimum iudicium ab Ecclesia implorans.

V. Deinde nunquam est usus voce: *Approbo*, aut ullo alio vocabulo, quod maiorem saperet auctoritatem, quàm Confessarij aut Magistri spiritus ordinarij, vel librorum Censoris. Et sic non potest argui, nisi velimus, ut nullus Pater spiritualis iudicium suum, de casu ullo, vel statu animæ cujuscumque, etiam post plurium annorum diligentiam adhibitam, audeat edicere, scrupulorum dubia resolvere, eosque in perplexitate reddere securos; illi enim non nisi certitudinem à Confessario exigunt.

Illum ergo ipsum fundamenta sui de Revelationibus Ven: Virginis Marinæ sensus referentem, & modum ac verba ipsa audiamus, ut judicare possimus, utrum ullus alius in toto mundo cautiùs, & accuratius per triginta annos procedere potuisset, nè cogamur fateri, solas has in Christianitate Revelationes effectales, ut nulli Christianorum dederit Spiritus Sanctus sufficientem discretionem spirituum, pro eis prudenter & *quantum presentis vite constitutio patitur*, dijudicandis, etiam si postea ultimum infallibile S. Ecclesiæ Tribunal aliquid, quod presentis vitæ constitutionem excedit, in eis inveniret.

CAPUT IX.

*De eximia Scientia mystica Ven. Virg. Marinæ de
Escobar, cognita Venerabili Patri Ludovico.*

I.

UT tantò evidentius appareat Ven. Patrem Ludovicum habuisse Rationes convincentes ad Revelationes Venerabilis Virginis Marinæ collaudandas, juvat scire, quantum & ipse in magna illa DEI Serva deprehenderit scientiæ sanctæ altitudinem.

Et quidem quod speculativa attinet, elegantissimus est locus Lib. 2. c. 25. his verbis: Post Pentecosten celebrat Ecclesia festum Sanctissimi Sacramenti, cò quòd id non possit facere feriâ quintâ in Coena Domini. Utroque tempore habuit Venerabilis Marina insignes revelationes, ac visiones de hoc Mystério; de modo, quo re ipsâ, & verè CHRISTUS Dominus existit in Sacramento, quas mihi enarravit, deditque scriptas, dum docerem Theologiam, An. 1595. in nostro Collegio Vallisoleitano. Docebam autem tunc materiam de Eucharistia, atq; hoc punctum de Transubstantiatione. Referebat mihi id talibus verbis, & cordis affectibus, ut obstupescens, conferendo meas tenebras cum tanta luce, dicerem DEO: *Confiteor tibi, Pater, Domine cæli & terre, quia abscondisti hac à sapientibus, & revelasti ea parvulis. Ità Pater, quoniam sic placitum fuit ante te.*

II. Sed magis ad rem nostram pertinet scientia mystica practica, de qua L. 6. c. 21. habentur præclarissima, quæ cogebant Venerabilem P. Ludovicum de veritate rerum circa Ven. Virginem Marinam non dubitare. Sic narrantur: Extraordinarijs gratijs, quas DEUS suæ famulæ per decursum longævæ ejus vitæ præstitit, & istud accenseamus, quòd ipsi fuerit unà
cum

cum illis communicata scientia spiritualis, quam communiter vocamus Theologiam mysticam, & Scientiam experimentalem, de qua loquens Divina Sapientia ait, quòd (*Sap. 1. v. 10.*) ostenderit justo Jacob regnum DEI, & dederit illi scientiam Sanctorum; quia ductu divini Luminis est ingressus ad percipienda arcana Regni cœlorum, quæ nimirum sentiebat, & experiebatur in se ipso, quod est proprium Sanctorum. In hoc mirè excellebat ista Famula DEI, cui Divina Majestas sensim communicavit, quinque admirabiles experientias, quæ complectuntur universam scientiam spiritûs.

III. *Prima.* Quia imprimis experta est, ac attigit omnia concernentia Infantiam, Passionem, & Mortem Salvatoris, ac reliqua ipsius sacratissimæ Humanitatis mysteria, quibus interfuit, ac si tunc denuò executioni mandarentur, ità ut sentiret in se dolores, ac tormenta Redemptoris, usque ad participata ejus vulnera pedum, manuum, lateris, & capitis.

IV. *Secunda.* Hinc est progressa ulterius ad cognoscendam & experiendam immensitatem DEI Trini, ac Unius, cum suis attributis, quæ beatos reddit Angelos, ac Sanctos: participando in se ipsa, ac degustando istam beatitudinem, videndo aliquid de eo, quod ipsi vident in suo DEO pro sua capacitate, idque interdum eâ claritate, quamvis momentaneâ, instar relucescentis fulguris, ut possimus dubitare, an non fuerit visio clara, qualem nonnulli per speciale Privilegium concedunt Sancto Paulo.

V. *Tertia.* Tertiò experta est omnes modos familiaritatis & communicationis inter DEUM & animam, per alloquia, per inspirationes, per species & visiones imaginarias, perque visiones intellectuales, per raptus, elevationes, & uniones, mille modis, jam in fundo sui cordis, jam in Cœlo Empyrio, jam comorando ibi, quasi stabiliter secundum spiritum, jam idem percipiendo in suo cubiculo.

VI. *Quarta.* Ad hæc accedit experientia dolorum, cruciatuum, moleſtiarum, ac tormentorum internorum, & externorum, quæ eſt paſſa, partim ex divina diſpoſitione, partim propter perſecutiones dæmonum, DEO permittente; ita ut experiretur dolores eſſe ſcalas ad gaudium; & crucem eſſe viam pro adeunda cœleſti gloria.

VII. *Quinta.* Denique experta eſt, & probavit actus heroicos omnium virtutum; in quo conſiſtit perfectio Evangelica; cum ſumma prudentia, circumſpectione, & cautela in vijs extraordinarijs, quibus ducebatur, ne deciperetur. Unde factum eſt, ut eſſet adeo plena hæc divina ſcientia, ut poſſet eſſe excellens illius Magiſtra; & Anima ipſius, ac modus vivendi, eſſet inſtar Libri vivi, ubi infinita Sapientia DEI deſcripſit atque expreſſit omnia myſteria noſtræ ſanctæ Fidei Catholicæ, admirabili artificio; adjunctis duobus raris privilegijs, quorum unum erat, quod etiamſi Revelationes interdum eſſent admodum diuturnæ, & continerent multas ac minutiffimas circumſtantias; tam fixè tamen illas imprimeret ſuæ memoriæ, ut illarum non obliſceretur: Alterum autem, quod illi DEUS ſuggeſſerit verba convenientia, quibus poſſet declarare, quod viderat, & fuſè referre, etiamſi aliquando eſſet res tam ſublimis, ut illi non ſuppetiſſent verba, pro ea exprimenda.

VIII. Et quia omnes iſtæ experientiæ, ac res, quæ illi accidebant, fiebant arcanè & modo inviſibili, manebantque in ipſius ſpiritu, quaſi in libro clauſo & ſignato; voluit Majeſtas Magni noſtri DEI, ut iſte liber aperiretur, omneſque prodirent in lucem, præcipiendo illi frequentius (ſicut fuſè dictum eſt in Prologo iſtius Hiſtoriæ) ut conſcriberet omnes gratias, quas illi præſtiterat per decurſum ipſius vitæ, cò quod eas ipſi non communicaviſſet pro illa ſola, ſed etiam in commodum multorum.

IX. Hoc fuit primum, quod DEUS præcepit Venerabili Mari-

Marinæ, & comprehendit generatim id, quod Divina Majestas extraordinariè in illa est operata; voluit tamen simul, ut observarentur consuetæ leges Ecclesiæ, utque examen rerum publicandarum, & earundem coordinatio, ac dispositio fieret, secundum judicium, prudentiam, & scientiam Confessarij Magistri ac Directoris, quem habebat ex Societate: eò quòd non omnia, quæ DEUS secretò suis servis revelat, velit publicari: imò non expediret quædam propalare. Propterea cum germanus frater meus Andreas de Ponte ex Ordine S. Dominici conscripsisset ea, quæ Venerabilis Marina ipsi dicebat, vel dictabat, ut illa mihi traderet, ut dictum est in Prologo: retinuisset autem ipsorum apographa, mandavit DEUS, ut illa ab eo peteret, mihi que traderet, & ego ex ipsis demerem, quòd judicarem non convenire, ut publicetur.

X. Interpositis postea quibusdam Venerabilis P. Ludovicus, totum Caput & totam Historiam concludit revelatione, quâdam, in qua interroganti Ven. Marinæ, quid præmij habiturus esset P. Ludovicus pro eo, quòd eam in spiritu direxerit, & librum illum digesserit; Sancti Angeli responderunt: *Isti servo DEI dabit DEUS ingens præmium, quia non solum est Secretarius ipsius mysteriorum, sed etiam Magister & Artifex ejusdem operis, quod DEUS in te peragit. Etiam si enim illi dentur precipui sumptus, & requisita, pro exstruendo adificio, solvaturque & labor; ipse tamen impendit operam & laborem suarum manuum, ac proinde in cælo pro mercede habebit suum meritum, & insigne: sicut dum egregius Magister, & Architectus, exstruit sumptuosum & elegans adificium, etiam si adificij Dominus ipsi solverit, dederitque pro eo necessaria, inscribit tamen illi pro suo honore & insigni: talis me fecit.* Et hoc dicto mihi valedicentes abiverunt.

XI. Subdit & totum opus claudit P. Ludovicus. Hanc revelationem volui referre, ut intelligatur, quantum placeat hoc opus DEO, quod est totum ipsius, demptis defectibus, quos
habet

profectos ex ignorantia Artificis, cujus est operâ usus. Quem-
admodum enim aliquis Princeps desiderans exstruere sumptuo-
sum templum, vel palatium, dat Architecto vel perito Magistro
multa præclara requisita, ligna & lapides pretiosos, ut ipse o-
mnia designet ac elaborer, demendo superflua, ponatque sin-
gula suo loco: ità mihi Princeps cœli, per hanc suam famulam,
dedit abundantiam necessariorum, & rerum mirabilium, quas
illi communicabat: quia tamen mihi tradebantur à fœmina,
erantque omnia dissipata, absque ordine, aut connexionem, ne-
cesse fuit ea limare, ac demere, quæ videbantur superflua, & in
ordinem digerere, singulis suo loco repositis. Omnium por-
rò simul combinatio, juxta ordinem, quo est facta, vocari po-
test *Synopsis Theologia, & Scientia mystica spiritus*, seu scientiæ
experimentalis ac practicæ universarum virtutum, quæ dispo-
nunt ad internam cum DEO familiaritatem, ac ad assequendam
divinæ contemplationis & perfectionis Evangelicæ sublimi-
tatem.

Quia autem facit Ven. P. Ludovicus mentionem sui Pro-
logi, quem operi toti præmisit, in quo explicuit causas, cur Hi-
storiam Vitæ & Revelationum Ven. Virginis Mariæ fide di-
gnissimam judicaverit, planè expedit, ut Prologum, seu Intro-
ductionem illam totam ejus verbis audiamus.

CAPUT X.

INTRODUCTIO

Ven. P. Ludovici de Ponte Soc: Jesu

ad primam Partem Vitæ Venerabilis Virginis
Mariæ De Escobar.

*De Præstantia, Utilitate, & Certitudine
illius Historiæ.*

I. Magnus

I.

Magnus noster DEUS ac Dominus, qualis omnibus fuit ætatibus, ac temporibus, estque etiamnum in Sanctis suis, dignatus est sibi diebus nostris deligere Venerabilem Virginem, nomine Marinam de Escobar, ut in ea immensos infinitæ suæ sapientiæ, charitatis, & misericordiæ thesauros, atque inæstimabiles gratiæ divitias manifestaret, internè cum ipsa conversando, ac omnia illi declarando mysteria, quæ nos Catholica docet Fides, celebratque Ecclesia; modis usqueadeò novis, miris, ac inusitatis, ut exhibiti eidem favores nullatenus cedant illis, quos S. Gertrudi, S. Mechtildi, S. Brigittæ, S. Catharinæ Senensi, S. Theresiæ à Jesu, aliisque consimilibus præstitisse scribitur; quandoquidem non est abbreviata potens manus Domini, neque exhausta ipsius sapientia, vel imminuta charitas, quò minus sciat, possit, ac velit innovare miracula, quæ operatus est in Sanctis antecedentibus, & alia patrare, paria, atque subinde majora per nunc existentes.

II. Sunt etenim tot res eximiæ, quas DEUS de se ipso, deque suis divinis perfectionibus, nec non de ijs, quæ hominis egit causâ, revelare potest: sunt quoque tam varij modi, quibus talia revelare consuevit, ut, postquam illa cuipiam mortalium patefecerit, semper ei superint alia infinita, adeò novis manifestanda modis, ut omnem superent imaginationem: quorum illustrissimum videtur voluisse facere compendium, communicando se Venerabili isti Virgini, quasi omnibus cœlestis, ac Divinæ Communicationis generibus, recensitis in Scriptura Sacra, atque in Vitis Sanctorum.

III. Et quantumvis verum sit, omnia ista, utpote interna, & secretè acta, DEUM inter & Animam, non potuisse sciri, præterquam ab ipsamet Virgine (quæ DEO jubente, illa conscientiæ suæ aperiebat Arbitris, & propter fines, quos mox intelligemus, conscribebat) non tamen propterea minùs creden-

da sunt, & probanda, quàm creditæ & probatæ fuerint res admirandæ, prædictarum quinque Sanctorum, quamvis illæ ipsæ solæ eas manifestaverint; cum sint confirmatæ ijs operibus, ac signis, quæ nos sufficienter convincant, quòd nec ipsæ fallantur, neque nos fallant, ex ignorantia, passione, vel malitia: & quandoque sint ejusmodi, ut quamvis illa voluissent, non tamen scivissent confingere, nisi ab alio altioris ordinis spiritu, ad hoc permotæ fuissent.

§. I.

Fundamenta, quibus innititur Veritas, & Certitudo

IV.

hujus Historia.

Quamvis certum sit, & experienciâ compertum, quòd his temporibus (quæ sunt occulta DEI judicia) se transfigurer Satanas in Angelum lucis, fingendo, & simulando ea, quæ apparent Sancta, ac Divina, tam internè, quàm externè; certus nihilominus sum, *quantum presentis Vita conditio patitur*, spiritum, quo agebatur, Venerabilis Marina, quique cum illa agebat, & ea ipsi manifestabat arcana, ac secreta, quæ referemus, non fuisse malum, sed bonum; non dæmonem, sed verum DEUM, ipsumque Servatorem nostrum subservientibus illi, & ab eo commissâ exoquentibus bonis Angelis, sanctisque Cœlitibus, atque imprimis Sacratissimâ Virgine ipsius Matre. Si quidem rigido admodum, & *solicito plurimum, quàm triginta annorum*, quibus mihi rerum suarum, tum ore tenus, tum scripto reddebat rationem, *examine*, universa, quæ illi eveniebant semper inveni, habere omnia boni spiritûs signa nobis à sacris literis, & sanctis Patribus indicata. Eorum ego, nè sim prolixus, succinctam duntaxat dabo epitomen, quam fusa isthæc comprobabit Historia.

V. Imprimis namque in verbis, operibus, & actionibus, atque rebus omnibus ejus spiritûs, qui ipsi loquebatur; quidam

dam elucebat divinum; eam siquidem sapientiam, & excellen-
siam, eam veritatem, & puritatem, eam gravitatem, & discre-
tionem, eam denique sanctitatem in summo perfectionis præ-
ferebant gradu, ut abundè ostenderent fontem, ex quo pro-
cederent, esse DEUM; cùm in DEO nihil reperiri possit, quod
malum vel falsum, leve, aut imperfectum & indignum sit tanti
Domini Majestate.

VI. Præterea, quemadmodum arbor cognoscitur ex fru-
ctibus, ita se Divinus Spiritus in ista sua Famula manifestabat,
per septem raras illi collatas virtutes, quæ sunt septem certa San-
cti Spiritus, ijs prædito assistentis, indicia.

Prima fuit singularis, quædam Animæ, & corporis puritas,
atque summus cujuscunque, quantumvis levis culpæ, vel nævi
horror, nec non prorsus rarum Castitatis donum, quo fuit à
tentationibus, & motibus illi contrarijs præservata.

VII. Admirabilior erat altera, quòd illam in tam profun-
da sui ipsius cognitione fundaverit, ut inter revelationes, & fa-
vores, usqueadeò prodigiosos, ab omni fuerit superbia, & ina-
ni gloria, atque etiam ejus tentatione immunis.

Tertia, quod ipsi Cor ita pacatum, & præsentia sui DEI in-
hærens dederit, ut in oratione, & contemplatione mentali, nun-
quam, aut rarissimè passa fuerit, vel involuntarias mentis eva-
gationes, quamvis illam ad multas horas produceret.

VIII. Quarta, summus fuit Timor, nè circumveniretur à
diabolo in rebus extraordinarijs, quæ illi accidebant, ideoque
omnem sibi possibilem adhibebat diligentiam, ut eam DEUS ab
hujuscemodi illusionibus liberaret, vel talibus vijs non duceret;
ita ut nemo unquam tam fuerit cupidus similium visitationum,
& gratiarum, quàm illa fuit sollicita, ut resisteret, ac reluctaretur
ijs acceptandis, donec ipsam Deus induxisset ad consensum.

IX. Quinta, fuerunt vehementia desideria, quibus tene-
batur, ut quoslibet toleraret contemptus, & cruciatus pro DEO.

Unde quando illam Divina Majestas postremo vitæ tempore, sustinendis horridissimis molestijs, ac doloribus exercuit, tantopere acquiescebat, ut se desolatam diceret morituram, nisi modicum illud toleravisset, quod ipsi Deus ferendum obtulerat. Hinc etiam inter tam terribiles cruciatus perfectissime suam divinæ conformabat voluntatem, neque ulla ipsi crux erat tam gravis, quàm timor, quomodolibet deflectendi ab ea conformitate.

X. Sexta est ingens zelus salutis animarum, ut mille dedisset vitas, nè vel una damnaretur: tamque tenera commiseratio, quæ proximorum condolebat miserijs, in quarum deveniebat notitiam, ut illis conficeretur, & gravaretur, acsi propriæ ipsius essent. Et hæ sunt virtutes, in quibus Evangelica est sita perfectio, & de quibus in primo agitur libro.

XI. Denique summam habuit propensionem, non tamen impetuosam, neque præcipitem, sed admodum moderatam, & circumspectam, ad reddendam omnium rerum suarum rationem suæ arbitro conscientiæ, à quo dirigebatur, noluitque se ipsam, seu proprio judicio, seu interno spiritûs impetu, regere, nisi accederet approbatio Magistri, ac Ducis visibilis, quem illi dederat Deus, in ijs rebus, quæ ipsius indigebant directione.

XII. Hæ septem heroicæ virtutes, seu affectus Animæ, ita adversantur intentionibus Satanæ, conveniuntque tam propriè Deo, qui desiderat, ac prætendit salutem, atque perfectionem suorum Electorum, ut dum illæ firmiter, ac stabiliter in Anima perseverant (quemadmodum perseveraverunt in Venerabili Marina, quamdiu ego ipsi fui à confessionibus) sint septem indubitata testimonia, septemque certissima indicia ejusdem Dei, qui illam adeò insuetis ducit vijs, reddendo ipsam immunem ab omni diaboli, vel proprii spiritûs illusione ac deceptione. Et propterea illi dedit naturam inde quidem extremè reformidantem ejusmodi dolos, hinc verò vividam perspicacem, ac impigram,

gram, & celerem, in examinandis, & perspiciendis rebus inter-
nis, quæ illi eveniebant; ita ut magnâ hujus sollicitudinis parte,
suos liberaret Confessarios.

XIII. Idcirco, non absque sufficienti fundamento
existimo, quòd sicut DEUS in sua Ecclesia constituit
Sanctum Franciscum ad Paupertatis, & alios San-
ctos, ad aliarum virtutum præbendum exemplum;
ita periculosus his temporibus proposuerit hanc Vir-
ginem, ut timoris, & sollicitudinis, cautelæ, circum-
spectionisq; ac disquisitionis exemplo doceret, quo-
modo Divinæ Revelationes, & inusitatæ gratiæ tutò
sint suscipiendæ.

§. II.

*DEUS jubet Marinam, ob valdè sublimes fines, ea scribe-
re, quæ ipsi eveniebant.*

XIV.

EX dictis sequitur Venerabilem Virginem Marinam de E-
scobar ea, quæ ipsi eveniebant, non ex sua propria volun-
tate, neque ex animi levitate conscripsisse, & propalasse; cum
potius ab hac re summè abhorruerit, usquedum id facere jube-
retur à suo Confessario P. Petro de Leon; ut illa ipse diutius ex-
pendere posset, atque discutere, & exhibere alijs autoritate,
pollentibus, rerumque spiritualium peritis ac doctis viris, qui
suum de ijs judicium dicerent. Cum tamen is paulò post con-
nivens in illius repugnantia, ei dixisset, sufficere id, quod scri-
pserat; ipsemet DEUS, eam denuo jussit cæpta proseguere, mani-
festatis illi admirandis hujus scriptionis finibus, & motivis,
quod ipsa his refert verbis.

X3

XV.

XV. Postquam à DEO multas obtinuissem gratias, & ingentia solatia, fuissémque ab illo multoties visitata, & illuminata, ut cognoscerem sublimissima ipsius mysteria, dicebat mihi aliquot continuis diebus: *Scribe, quod tecum ago.* Ego verò advertens mihi à Divina Majestate iterari ea verba, dixi illi quādam vice: Domine, quare tua Majestas id à me vult scribi? anne forsitan idcirco, ut reddere possim meo Confessario rationem eorum, quæ fiunt in mea anima? Responditque mihi DEUS: Non ideo. Tum ego rursus: Quare igitur mi Domine? Et Dominus mihi dixit: Facit ad meam gloriam, ut hoc scribas. Ideoque subito incepti scribere, quia istud dictum tantopere me ad scriptionem compulit, ut absque magno conscientiae remorsu eā supersedere non possem.

XVI. Verùm etli scriberem, unā id spectabam, conabárque consequi à DEO, ac postulabam quā enixissimè, & ex intimo corde meo, ut me illuminaret, darètque mihi gratiam, nè quidquam fieret adversum sanctissimæ ipsius voluntati: maluissem enim mihi eximere linguam, & amputare manus, quàm vel unum verbum, DEO nolente loqui, aut scribere. Quocirca timens meam malitiam, & astutiam diaboli, continuè dicebam, Domine visne id à me fieri? Et Divina Majestas mihi respondit: Itā; quia ista tibi, non tui solius tantum fiunt gratiā, sed etiam propter alios. Aliàs verò addidit: Noveris hoc sæculo reperiri in mundo homines, qui vehementer falluntur, dum cogitant, ac dicunt, non esse tempus, quale quondam erat; & à me non conferri gratias, neque esse, cui eas possim conferre, quas consueverim alijs præstare temporibus; quasi verò jam non essem idem, qui eram. Juerit ergo eos intelligere, aliter se rem habere. Post hæc nihilominus adhuc metuebam, ideoque illi dixi cum magna verecundia, & confusione: Domine, ergone ego miserabilis esse debeo instar campanæ, quæ alios advocat, ut veniant ad templum, licet ipsa remaneat in Campanili? fac de

de me quod vis, neque enim ego aliud volo. Ad hoc mihi respondit quædam verba consolatoria, indicavitque nonnullas personas, quibus esset profuturum id, quod mecum agebat: Ego verò, reposui, plurimum gaudeo, Domine, quod cum ego tam parùm proficiam ex gratijs, quas mihi præstas, reperiatur, qui ex illis proficiat.

XVII. His animata, perrexit scribere ea, quæ illi contingebant, cum tunc esset provectæ ætatis quadraginta quatuor annorum; sed Deus indulgendo ipsius naturali repugnantia, illi dixit, ut hâc vice scribendo consequenter impleret sexaginta circiter phyliras chartæ; quòdque deinde esset ampliùs aliquid sibi placiturum. Atque ità fecit, consignando quæcunque illi acciderant, & accidebant, usque ad ætatem quinquaginta annorum, aut aliquantùm ultrà; quo tempore cum ipsamet scribere non posset, eò quòd tunc esset vehementer infirma, ac debilis; ego, qui jam eram ipsius Confessarius, mortuo P. Petro de Leon, illi mandavi, ut scribenda dictaret cuidam probatæ virtutis Virgini Adolescentulæ, quæ ipsi convivebat. Id verò illa ægrè tulit, ob ingentem naturæ suæ resistantiam, abhorrentis à talibus cuiquam alteri patefaciendis, quàm Arbitro Conscientiæ.

XVIII. Et cum in hac re esset remissior, vidit à dextris CHRISTUM Dominum, quasi duobus à se distantem passibus, qui valde graviter, & instar redarguentis ipsi dixit: Quæ est hæc tua repugnantia, Marina, cum, tam ex doctrina ordinaria, quàm ex mea illuminatione, scias, me velle, ut obedias tuo Confessario? Nunc verò ego intervenio, præcipiendo, ac mandando, ut id facias, neque ultra repugnes. Nunquid fortè nosti, qualia sint mea judicia, ac intentiones? Et quam ob causam, aut cur, seu propter quem tibi ex mea misericordia has gratias conferam? atq; an hunc in modum tecum forsan agam, quòd id merearis? an potius propter multorum aliorum, atque alicu-

alicujus speciatim, bonum & emolumentum? supercede hæc difficultate, Marina; obtempera tuo Magistro.

XIX. Non multò post incepit dubitare, utrùm non committeret aliquem errorem in scribendis suis rebus, dixitque CHRISTO Domino: Cuperem sanè vehementer, Domine, bonum paucis, & multa significantibus verbis scribendi modum assequi; sicut tu interdum meam animam edoces de tuis mysterijs: quod enim scribo, recensendo misericordias, quas mihi præstas, multorum est verborum, videnturque mihi istæ narrationes fusæ. Audivit me Dominus, & penetravit cor meum, responditque mihi quàm gravissimè, quasi interpositâ aliquâ morâ, quæ indicabat magnam majestatem: Non dicis bene, quâ namque ratione modum, quo te ego instruo, tibi que dicto, qualiter te conscribere oporteat meas veritates, ac mysteria, ac gratias, quas tibi præsto, vocas narrationes fusas? deponere istam ignorantiam, & simplicitatem, ac tace, & obedi.

XX. Ista CHRISTI Domini responsione indicatur id, quod hæc ejus famula aliquoties mihi asseruit, sæpe sibi ab illo inspiratum fuisse, & quasi dictatum, quod scribebat, nè verbo mutato, in rebus majoris momenti, quas suggerebat scribenti; quod si quandoque evenit, ut non meminisset, quid acciderit, dum tamen ordiebatur scriptionem, id ipsi Deus in memoriam exactè revocabat. Quando verò de re quapiam dubitabat, itane se haberet, an secus, interrogabat de ea Dominum, vel aliquem assistentium sibi Angelorum, qui illi eximebant dubium.

XXI. Tanto porrò tenebatur desiderio non aberrandi à verò, ut aliquando dixerit DEO: Si tu velles, libenter dicerem meo Patri spirituali, cui committis mea scripta, ut omnia, quæ in illis reperiuntur, & quæ ipsi non integerrimè satisfaciunt, deleat, laceret, ac destruat. Respondit autem ei Dominus suaviter, & graviter illam corripiens: Dic age, Marina, quis te Dominam

minam constituit rei non tuæ, sed meæ, quam ita velis, jubere destrui, ac aboleri? nunquid forsan plus es, quam miserabile meæ potentis manus instrumentum? tace & relinque ista, quæ ego facio pro meo beneplacito, ac providentia, & obedi, nullo verbo dicto.

XXII. Sic Anima ipsius reprehensa fuit, & convicta, ut faceret, quod illi à DEO præcipiebatur. Hoc audito, incepit dictare, quæ ipsi denuò eveniebant, alicui suarum contubernali-um, vel suis Confessarijs; brevi tamen adeò debilitata decubuit in lecto, ut illam oportuerit esse contentam, rerum suarum mihi rationem reddere oretenus, quas ego conscriberem. Cum autem ego etiam propter meos graves, & continuos morbos illi non possem adesse, paucis vicibus hunc defectum supplevit Pater Frater Andreas de Ponte, meus germanus, ex Ordine Sancti Dominici, Vir magnæ virtutis, zeli & spiritûs, qui magnâ charitate, ac diligentia, per plures annos illam bis intra septimanam adibat, ut exciperet ipsius confessionem, & propter alia, quæ ei committebat: eâque occasione, me volente, illi referebat, quæ ipsi cum Domino acciderant; ille verò omnia fideliter consignabat, ac deinde ipsi exhibebat, ut dispiceret, an aliquid addendum existimaret, vel omittendum; atque ita correctâ mihi tradebat, & ego eadem cum ipsa conferebam, ac iteratò corripiebam.

§. III.

Jubet CHRISTUS Dominus Confessarium è Societate

*JESU hac scripta disponere, ut suo tempore
evulgentur.*

XXIII.

Post hæc intellexi ex revelatione Marinæ, Dei voluntatem esse, ut Societas, atque speciatim ego (donec viverem) utpote ipsius Confessarius, haberem curam earum chartarum, ut redigerentur in ordinem, & suo tempore evulgarentur: at-
T que

que à Sancto Patre Nostro IGNATIO, jussa fuit mihi dicere, ut hoc facerem, tanquam si ad me unice spectaret, quemadmodum spectabat; sciremque esse partum domesticum: quibus ultimis verbis significavit à Domino DEO assumptam fuisse Societatem pro instrumento ad conferendas illi has gratias, atque ut ipsa illam suâ educaret doctrinâ, & institutione.

XXIV. Habitâ hâc monitione coepi dubitare, bonûmne foret, statim hac de re agere, priusquam me è medio mors tolleretur, quæ continuè meis oculis obversabatur: & quia id procrastinabam, Dominus in vigilia Sancti Petri anno 1614. (qui ætatis Marinæ erat sexagesimus) gravi & imperiosâ voce illi dixit: Audisne? jam est tempus, ut redigantur in ordinem, quæ tibi contigerunt, & gratiæ tibi à me præstitæ. Dic tuo Confessario, ut id citò faciat, ac si tibi vel ipsi paulò post esset moriendum: hoc enim statuto tempore eveniet. Isto monito, & judicio gravissimorum Patrum Societatis permotus, accinxi me ad opus quàm secretissimè, donec adesset tempus illius publicandi; quod esse consuevit post mortem personæ, cujus gesta conscribuntur.

XXV. Et quantumvis id exequi fuisset facile, si secutus fuisset ordinem, quo suas ipsa res conscribebat, vel dictabat; quia tamen omnia erant indigesta, transiliebat enim ex his ad alia, & quædam interrompebat, ut ad prorsus diversa transiret; judicavi è majore DEI gloria futurum, si assumerem aliquem modum, quo clariùs, ac distinctiùs exponeretur excellentia, & sublimitas mysteriorum nostræ Fidei, ac mirabilium operum, quæ Divina Majestas in ista sua Famula, & per illam operata est, etsi quandoque non haberetur ratio ordinis temporum, ubi illuminari parum referret: semper tamen fui sollicitus, ut non recederem ab ejus stylo, & verbis eò, quòd mihi viderentur ipsiusmet esse DEI, & ex ejusdem inspiratione magis genuinè manifestarent mysteria, quàm alia, quæ visa fuissent elegantiora;
dem-

demptis etiam nonnullis, quæ ipsa adjungebat, ac repetebat, ut se magis aperiret, vel declararet repugnantiam, quam sentiebat, in acceptandis adeò invetis gratijs, donec adigeretur ad illas admittendas.

XXVI. Quas equidem repugnantias repeto sæpius, ut sint instar theriacæ, seu antidoti, contra venenum, quod solent haurire Tirones, & imperfecti ex læctione hujusmodi revelationum, dum similiū vana concipiunt desideria: quod non facient, videntes Venerabilem Marinam se ità illas recusando, cautèque admittendo, dignam reddidisse, ut eas consequeretur, dum conaretur pro viribus viæ communi, ac tritæ verarum ac solidarum virtutum insistere.

§. IV.

Partitio primæ Partis hujus Historiæ in sex Libros.

XXVII.

QVapropter contenta in hac Historia, quæ sunt innumera, neque minus proficua, quàm gloriosa, redigemus in sex libros.

Primus Liber comprehendet extraordinarias vias, quibus illam Deus duxit, combinatas ex admirandis favoribus, horrendis cruciatibus, & eximijs virtutibus; quæ tria hujus vitæ Sanctitatem reddunt undequaque absolutam, ac perquam stabilem; secundum illud dictum Ecclesiastis: *Funiculus triplex difficile rumpitur*; quia favores, ac dona, absque crucibus, facile consuevit vincere superbia, præsumptio, & vana gloria; cruce autem, ac tormenta, sine gratiarum solatijs, nullo negotio præcipitant in impatientiam, tædium, & pusillanimitatem spiritus; & virtutes absque prædictarum duarum rerum mixtura nunquam sunt solidæ, nec robustæ, neque bene probatæ; ideoque facile illas superat pigritia, ac tepiditas cordis. Quando verò omnia tria sunt conjuncta, constituunt Sanctitatem excel-

lentem, & quasi inexpugnabilem. Atque hæc tria generatim erunt argumentum istius primi Libri, qui exhibet specialium rerum fundamenta, quæ singillatim referuntur in sequentibus Libris.

XXVIII. *Secundus* Liber erit de admirandis revelationibus, quas habuit de mysterijs nostræ Redemptionis, &c.

Liber *tertius* est de admirabilioribus revelationibus spectantibus ad mysteria Divinitatis, & Trinitatis Divinarum Personarum, &c.

Liber *quartus* complectitur speciales revelationes, quas habuit de officijs, & excellentijs Angelorum Custodum, ac Sanctorum, &c.

Quintus Liber erit de rebus memorabilibus, quibus juvat animas purgatorii, & promovit salutem proximorum &c.

Denique Liber *sextus* erit de heroica ipsius Perfectione, &c. Hactenus Introductio.

XXIX. Ad calcem verò totius Libri primi sic Venerabilis Pater Ludovicus de Ponte concludit, & scribit: Sic finem imponimus primo Libro, qui est *Summa* quædam trium rerum, quas complexa est via extraordinaria, quâ illam duxit Dominus noster, contexta (1) miris favoribus, & delicijs: (2) terribilibus cruciatibus, & tormentis: (3) non sinè illustribus virtutibus, quas inter elucebat illa profunda *Humilitas*, & cognitio vilitatis suæ: *Obedientia* exactissima ad nutus DEI, suorumque Angelorum, & Confessoriorum: *Zelus* ardens salutis animarum: continua *Oratio*, & tractatio cum DEO, à cujus præsentia nunquam recedebat: insignis *Patientia* in suis necessitatibus, infirmitatibus, tormentis, & veluti martyrijs, quæ de manu DEI, operâ Angelorum, dæmonumque patiebatur: atque hæc, ultra graves sui afflictiones, rigidas verberationes, frequentia cilicia asperrima, continua jejunia, aliæque generæ poenarum, quæ dum corporis vires utcunque sufficerent, spon-

te

te suscipiebat, communicato consilio cum suis Confessarijs; & exequiebatur quantum hi permittebant accommodantes se ejus ardori tam flagranti; tametsi cum prudentia Christiana. Hæc omnia declarabuntur, & magis patefient per ea, quæ singillatim referentur in sequentibus Libris.

XXX. Concludamus hanc materiam ijs, quæ ad rem, istam habet P. Henricus Lamparter in Vita Venerabilis P. Ludovici de Ponte, Lib. 1. cap. 8. §. 4. sic loquens: Neque verò, Marinam de Escobar, Vallisoletanam Virginem, prodigio similem, cavâ specie imaginum, vel diabolicis præstigijs delusam fuisse, magnis argumentis Ludovicus collegit, quæ fuerunt, summus nitor, & castimonia mentis, & corporis cum horrore culpæ cujusvis: maxima inter tantos favores cœlestes animi demissio, quem nulla unquam gloria pulsabat, nec elatio: cogitatio semper absque remissione intenta in DEI, magna cum tranquillitate, præsentiam: ingens cura, nè qua sibi fraus diaboli subreperet; quo factum est, ut totis viribus obstiterit his afflatibus, donec ipsi divinos esse certò constaret. Accessit ardens desiderium patiendi multa DEI causâ, & in acerbissimis doloribus æquitas animi, & mirus consensus cum DEO: studium vehemens alienæ salutis, & in miserijs aliorum sensus tenerimus: postremò cupido directionis alienæ, ut nihil quidquam suarum rerum celaret animi sui moderatores, nihil suo sensu, judiciove auderet. Quæ omnia cum in ista Virgine cumulata, cernerentur, nulla potuit præstigiarum, fallaciarumve locum habere suspicio. Cum autem Ludovico per mortem sibi erepto non parum doleret, ipse illi de cœlo gloriosus adfuit frequentissimè ad eadem officia, quæ illi vivens præstiterat, consolando, dirigendo: donec eum post annos novem secuta est. nono die Junij 1633. CHRISTO cum innumeris Cœlitibus animam ipsius deducente: omni autem ordine funus ejus maximis honoribus profecuto.

CAPUT XI.

Revelatio specialis de Excellentia Venerabilis Patris Ludovici in Magisterio spiritus.

I.

Planè admirabile, & omnem laudem humanam excedens est, quod habetur Parte 2. lib. 1. cap. 8. ubi Pater Andreas Pintus Ramirez, narrat ea, quæ post mortem Venerabilis Patris Ludovici contigerunt admirabili huic Virgini Marinæ: quam, ait, DEUS ad maximam suam Gloriam, nostro sæculo Virtutum statuit Exemplar, secururis autem Divinarum Gratiarum Prodigium. Ibi ergo refertur, quòd Anno 1626. in medio Januarij, adeoque biennio ferè post mortem Patris Ludovici Venerabili Marinæ apparuerit CHRISTUS Dominus sollicitus de substituendo aliquo in locum Patris Ludovici cātenus Directoris ejusdem magnæ Virginis; & nullum huic muneri parem invenerit, adeò ut ipsemet CHRISTUS Dominus munus hoc imposterum assumpserit.

Ubi & advertenda est Humilitas Patris Michaëlis Orenna, quicum Confessarij ac Directoris officium post mortem Venerabilis Patris Ludovici apud Venerabilem Marinam sustineret, bene advertit, in hac revelatione à DEO ipso declarari, quòd ipse muneri huic non esset par, nec sufficiens, qui in hoc succederet Venerabili Patri Ludovico; nihilominus tamen Revelationem hanc à Venerabili Virgine Marina sibi traditam, non suppressit, sed in suam erubescentiam Mundo publicavit.

II. Sic autem habent verba ipsa Venerabilis Marinæ: Conspexi CHRISTUM Dominum delictum nostrum, in specie duodennis Adolescentuli, comitantibus ipsum multis Angelis, qui illum adorabant ei que inserviebant. Incedebat summam præ
se

se ferendo gravitatem, & amabilitatem, deambulans in quadam velut Aula: circumspiciendo autem huc & illuc, demonstrans sollicitudinem, gravem sanctis suis manibus edidit gestum, dixitque: Non reperio, mi Pater, ullam creaturam, ullam personam, quæ mihi omnimodè sit apta, ut hujus Animæ necessitatibus prospiciat, eamque consoletur; non reperio, Pater mi, nec ullum possum exquirere. Dum hæc admiranda verba audirem, & judicarem mihi nihil quoad id deesse, de quo Dominus loquebatur, & querebatur, atque omnia mihi in rebus tam spiritualibus, quàm temporalibus abundè suppetere, obstupefcebam, & recurrebam sæpius cum solitis meis timoribus ad magnum DEUM nostrum, rogando illum, ut me illustraret, daretque mihi lumen, ad percipiendas suas veritates. Sacratissimus verò ille Adolescentulus non cessabat prædicta iterare, & eisdem edere gestus cum Summa Majestate. Tandem vidi, quòd arcano modo ascenderit ad cælum, & prostratus coram suo Æterno Patre eadem cum magna reverentia repetierit, indicans dolorem, ob non repertum id, quod optabat. Divina Majestas est illum intuita cum singulari complacentia, & amore, suamque ipsi impertiendo sanctissimam benedictionem respondit: Bene dicis, fili mi dilectissime, bene dicis. Et conversus ad me, dixit mihi: Veni jam huc Anima mea, veni huc, & respice ad illum in meo cælo locum. Ego non potui tergiversari, & obtemperando conjeci oculos ad eum locum, quem mihi DEUS designabat. Vidi ibi gravissimam quandam personam, & intellexi ipsam esse præditam sublimi spiritu, minimeque vulgari virtute, atque majestate, & sapientiâ, nec tamen mihi manifestabatur, quisnam esset. Dum hærerem attonita, dixit mihi Divina Majestas: Anima, spectabilis hæc persona, quam illic vides, erit tuus Dux, tuusque InstruCTOR, & Adjutor tuus in rebus omnibus, docebitque te omnes linguas. Obstupescens his auditis, respon-

spondi humiliter, & verecundè: Mi Domine, tu es meus DEUS, meus Dux, mea Lux, & meus Magister; quomodo me aliteri vis committere? qua in re mea anima videbatur sentire difficultatem. Verùm idem Dominus DEUS noster me est consolatus dicendo: Ità est, Anima, & erit sicut dicis: modò autem non intelligis, quo colimem sic tecum agendo, donec tibi id magis aperiam, ac declarem.

III. Post quinque dies declaravit ei Dominus mysterium, quòd Persona illa esset ipsemet CHRISTUS Dominus, Filius DEI, qui ei tandem dixit: Anima, ego sum tuus Dominus, tuus Dux, & tuus Magister. Ego sum ille, quem videbas quasi personatum, ut propterea obstupueris, fuerisque perplexa & attonita.

Quid autem præterea eàdem occasione ei declaratum sit, videri potest loco citato.



TRA-

TRACTATUS TERTIUS.

De Sanctitate Vitæ, nec non de
altissima Scientia Ascetica, ac Spi-
rituum Discretionem

VEN. VIRG. MARINÆ DE ESCOBAR.

Prologus.

INter Regulas examinandi veritatem
Revelationum, allegavi Tractatu primo ex
Præclarissimo illo Viro Alphonso Episcopo
Giennensi, ut & ex Doctissimo Joanne Cardi-
nale de Turrecremata, esse etiam Vitam & San-
ctitatem, bonam & piam mortem, nec non mi-
racula Personæ illius, cui Revelationes factæ esse dicuntur. Res
ergo ipsa exigit, ut ostendamus hæc omnia in gradu planè ex-
cellenti fuisse in Venerabili Virgine Domina Marina, adeoque
hoc signum veritatis ejus Revelationum ei non defuisse. Et
verò tantò id libentius faciam, quòd Viri aliqui graves, scien-
tiji, Prudentiâ, experienciâ valde illustres, mihi fassi sint, se post
perlectam primam Vitæ, hujus admirandæ Virginis Partem à
Ven. P. Ludovico de Ponte conscriptam, de veritate harum,
Z Reve-

Revelationum adhuc hæsisse perplexos, donec secundam quodque ejusdem Vitæ Partem à P. Michaële de Orenia, Venerabilis P. Ludovici in confessionibus mirabilis hujus Virginis audiendis successore collectam, à P. Andrea Pinto Ramirez depositam & editam perlegissent, in qua visa tam stupenda altitudo Sanctitatis Venerabilis hujus Virginis, intellectui eorum, omnino pervaserit, non posse esse diabolicas illusiones, & falsas apparitiones ac revelationes Personæ tantorum apud DEUM meritorum. Nempe in secunda illa Vitæ Parte, post felicem jam Venerabilis Marinæ obitum, securius, & liberius Sanctitas ejus & stupendæ Virtutes vulgabantur, tam beatâ morte jam consummatæ; quas eâ adhuc superstitite, cautiùs, & circumspectiùs enarrandas prudentia Venerabili P. Ludovico persvadebat..

Seligam autem solummodo pauca ex immenso cumulo Sanctitatis ejus, quasi ex mari paucos congios, cum non solum sint tanta, & tam multa, quæ in Vita ejus sunt consignata; verum etiam plurima se omisisse ipsimet Conscriptores fateantur, ex quibus etiam aliqua in alijs libris, ut & in informationibus, & processibus pro ejus canonizatione reperiuntur: ac denique P. Michaël de Orenia ejus Confessarius, qui Funeri ac Exequijs præsens aderat, Panegyricas tot præclarissimorum Concionatorum audierat, non dubitavit tamen pag. 409. in 2. Parte Vitæ illius lib. 3. c. 2. sequentia verba asserere: *Sed quidquid dictum fuit, ac dicetur in justis funeribus & exequijs, quibus illi quidam seorsim & Viri Nobiles, & Communitates volunt parentare, nihil est comparatione multorum, qua dici possunt.*

Nec potuit esse aliud: cum enim Viri ascetici asserant (nempe ex propria etiam experientia) in Anima cujuslibet Sancti majorem reperiri varietatem, quam sit rerum materialium omnium in toto mundo; quantam necesse est, fuisse in hac sanctissima Anima, quæ à præsentia DEI non recessit tanto vitæ suæ

suæ tempore per annos prope octoginta, tot millenis vicibus cum sanctis Coelitibus, cum Sanctissima Coeli Regina Matre DEI, & cum ipsa Divina Majestate tam familiariter conversata. Dividam autem Tractatum istidem, ut de Venerabili P. Ludovico feci, in partes duas, quarum Prima Virtutes ejus, ac Sanctitatem; altera Scientiam asceticam, ac Doctrinam de discernendis spiritibus, ac Revelationibus, reliquàmque Prudentiam & Lumen spiritus complectetur.

PARS PRIMA.

Vita, & Sanctitas Venerabilis Virginis Marinæ de Escobar.

CAPUT I.

Ortus ejus, & Ætas prior.

I.

Venerabilis Virgo Marina nata Vallisoleti (quod olim *Pincia* dicebatur) Anno 1554. die 8. Februarij, filia fuit Jacobi de Escobar Juris Doctoris, & Margaritæ Montanæ, filiæ Bernardini Montanæ, qui fuit Protomedicus Caroli Quinti.

Cùm Pater ejus piissimus tres jam haberet filias, instantissimè à DEO (non tamen absque resignatione in ipsius voluntatem) masculam prolem petebat: sed internam sensit DEI vocem futurum, ut si illi filios negaret, daturus esset filiam plus ei allaturam emolumenti, quàm multi adferrent filij, & cui esset insignes præstiturus gratias. Nata igitur est hæc quarta filia, mansuetâ & suavi indole, ingenio docili, & prompto ad imbibenda

bona documenta : apto intellectu ad quidlibet condiscendum ; præclarâ memoriâ ; iudicio pacato & moderato cum naturali modestia & gravitate. Sed specialiter placuit DEO dare illi naturam mirè verecundam, & vehementer in rebus proprijs meticolosam ; ità ut hic metus fuerit ei instar fræni, nè evanesceret, nève sibi fideret ; ac simul instar calcaris, ut confugeret ad DEUM pro auxilio. Fuit præterea prædita singulari propensione ad virtutem & pietatem.

II. In quanto autem periculo fuerit constituta adhuc intrà uterum Matris à diabolo, qui jam tunc præfagiebat, quanta esset futura serva DEI, eamque oderat, narravit illi ipsi jam septuagesimum vitæ annum prætergressæ Divina Majestas his verbis : Ostendi tibi limbum parvulorum, quibus multùm es compassa, ut te admonerem, quod te liberaverim ex gravi periculo intrà uterum tuæ Matris, ubi te diabolus voluit enecare, conando te suffocare, ut devenires ad eum locum ; atque ut mihi gratias ageres, pro præstita tibi tunc à me gratia. Quo in loco (Parte 2. lib. 2. c. 28.) subdit Venerabilis Marina : quando mihi id à Domino fuit dictum, venit mihi in mentem, quod mihi mea Mater sæpe narraverat, se, dum me pariebat, in summo versatam fuisse discrimine, tantùmq; non extinctam. Addidit præterea tunc Divina Majestas : dæmon te in tua infantia voluit ex fat alto loco præcipitem agere, & ego illum cohibui, nè id exqueretur. Paulò pòst voluit tibi diabolus persuadere, ut desilires ex fenestra, dicendo tibi esse ibi vicinissimam terram, teque non lædendam.

III. Cùm esset unius ac dimidij anni, abduxit eam Marina Avia paterna in civitatem Roderici, ubi quædam ejus Patris soror eam speciali curâ Christianæ Doctrinæ rudimentis imbuebat. Cum attigisset vigesimum ætatis mensem, DEUS illi dignatus est accelerare usum rationis, ut Decalogi præcepta discernere incipiens specialiter expendere primum : sublatisque ad

œelum oculis interrogabat magno affectu, suam illam Amitam quidnam esset DEUM super omnia amare? Illa verò respondente, esse magis DEUM, quàm suum Patrem & suam Matrem, ac suam Amitam, & quam reliqua omnia amare; iterabat frequentissimè ipsa apud se hæc verba: amo DEUM magis, quàm meum Patrem, ac Matrem, & quàm Amitam, quàmque reliqua omnia. Quin & sæpe dicebat: amo DEUM super omnia, & nihil magis, quàm illum, sed neque ità sicut ipsum. Hinc exquirebat abditos domûs angulos dicens ad DEUM: ibo ad solitudinem quæsitum te, Vita mea.

IV. Vitabat alias puellas, in quibus si quod peccatum adverteret, tenerè illacrymabatur, propter offensum eo, tanto opere sibi dilectum DEUM. Quadrimula habitabat cum sua Amita quatuor à civitate Roderici levcis, in quodam loco dicto Robleda, ubi domum ejus præterfluebat rivulus, ultrà quem erat pratum. Accessit puella ad rivulum, & aspiciens versùs pratum intrà se dixit: volo transire istum rivulum, ut ibi quæram DEUM meum. Cùmque jam elevavisset pedem, ut ingrederetur aquam, dixit illi DEUS: Quid agis puella? expecta quò vadis? Cui ipsa: volo quærere DEUM meum. DEUS verò respondit: ego ipse sum DEUS, quem tu quæris, & qui te priùs quæsi; veni mecum. & deductam usque ad domum Amitæ reliquit in introitu portæ. Jam tum cæpit multis CHRISTUM Dominum venerari precibus; precatoriâ Coronâ Beatissimam Virginem, atque alijs orationibus alios Sanctos. Quin & supplicare pro Animabus Purgatorij, & existentibus in peccato mortali.

V. Nono anno ætatis completo domum ad Parentes redijt, ubi statim coepit eam DEUS expolire pro extraordinarijs gratijs futuris, permittendo, ut varios in via virtutis prosperos & adversos experiretur casus, nunquam tamen, ut in aliquid grave scienter laberetur. Scrupulis etiam mirè fuit exagitata usque

ad periculum infantiæ, per annos ferè quatuordecim, usque ad annum ætatis 28. Tum se tradidit magnâ diligentia orationi mentali, ita ut etiam in ea noctes diebus conjungeret, partim magna in ariditate, partim ab omnibus dæmonis infestationibus, & scrupulis libera. Præsertim circa Passionem Domini, ut apud CHRISTI Domini Crucifixi pedes ejus essent deliciæ: non sinè profectu animæ. Pridie Sancti Michaëlis dum irecubatum, apparuit ei improvisò CHRISTUS Dominus eâ figurâ, quâ Pilatus eum ostendit populo, dicens: *Ecce Homo*. Hanc novitatem ipsa admirans, vix potuit totâ nocte dormire, accensa tanto illius Domini amore, ut non posset cor & animam aliò avertere. Unde postridie adhuc stupens & ardens amore CHRISTI Domini, cum à Matre secum ad spectandas in foro nundinas esset abducta, ipsa quasi nec videns, nec intelligens, quid secum ageretur, primò demum in foro inter tantum populum & strepitum, quasi excitata, vix scivit, quomodo illuc devenit; ita præ Sancto illo intrâ animam amore, habuit sensus exteriores veluti sospitos.

VI. Posthæc in morbum lapsa gravissimos dolores amore Domini libenter toleravit, & ter à febris eodem momento, quo Venerabile Sacramentum sumpsit, statim sanata est. Nilominus dæmon sub specie virtutis, quasi orationis mentalis usui multa & magna subessent pericula, ei post diuturnam luctam pervasit, ut ex proposito orationem, quæ est animæ cibus, defereret. Ex quo in varias misérias prolapsa, etiam suis domesticis molesta, pacem animæ amisit, plena anxietate, ex insultibus iræ & melancholiæ, omissis suis consuetis devotionibus, ut nec libenter audiret conciones, confessionem diutius differret: videbaturque illi impossibile emergere ex illo pelago miseriæ. Gemebat tamen ad DEUM, optans iterum illum statum tranquillitatis pristinum, dicendo cum lacrymis: quid est hoc mi Domine? quis me perduxit ad tam lugubrem & miser-

ferabilem statum? In hunc modum vixit circiter quinque annis. His elapsis, anno ætatis trigésimo tertio respexit eam, & ex illa miseria extraxit DEUS, disponendo durum cor ejus pro favoribus, quos ei conferre statuerat. Cæpit igitur in Quadragesima experiri novum gustum, ac desiderium audiendi Conciones, quolibet feriâ sextâ de Passione Domini, cujusdam Patris e Societate JESU, cum magno suo fructu, ut cor indies illâ divini Verbi medicinâ magis magisque mollesceret, præsertim cum ipsemet Dominus DEUS aliquas occasiones & impedimenta ei abstulerit. Unde orti sunt in anima ejus quidam gustus ac sensus, & cognitiones DEI, ex ipsius mirabilium operum intermicantibus repentinis irradiationibus, ut sæpe obstupescens quasi à sensibus alienaretur, cognoscendo res tantas de magnitudine Perfectionum & Attributionum divinorum.

VII. Narrat ipsa se sub hæc initia fuisse instar cujuspiam rudis rustici, qui ad palatium Regis admissus, conspectâ tantâ magnificentiâ nunquam visâ, stuperet ad omnia, & perlustrando interrogaret: quidnam hoc esset? quid illud? Hinc jam occupata divino amore cæpit sui oblivisci, & tota ad dilectum suum DEUM anhelare, non sine solatio Confessarij ejus Patris Didaci Perez ex Societate JESU; qui tamen tunc mortuus est relicta Venerabili Virgine multum afflicta à resurgentibus quibusdam scrupulorum reliquijs, donec post octo circiter septimanas stabilem rursus conscientiæ suæ Arbitrum elegisset, Patrem Franciscum de Lara Societatis JESU, non nihil austerum: qui tamen jussit illam bis intrâ septimanam, & quandoque sæpius sacra Communionem refici, cum antea soleret ordinariè octavo tantum die.

VIII. Hoc divino epulo tantopere fuit corroborata, ut jam esset disposita ad sufferendas amore DEI cruces, nec eas amplius recusaret: propterea Confessarius videns eam ita confortatam, cæpit eam variè mortificare & humiliare, quandoque
cam

eam repente privando sacrâ Communionem, nec causam explicando; severe reprehendo de eo, quod ipsa nec fecerat, nec cogitaverat: abigendo eam quandoque ex sua sede confessionalis tanquam inobedientem, superbam, cum vehementi cordis ejus per aliquot etiam dies cruciatu: quem Patrem tamen ipsa per amorem DEI obsecrabat, ut eam reciperet, quia propter fructum, quem ex ejus institutione capiebat, desiderabat illum retinere à confessionibus, donec DEUS aliud statuisset. Quâdam vice mortificavit eam tribus mensibus, reprehendendo quotidie ut ream (etsi esset innocens) negando etiam quibusdam diebus, aut ex alio in alios dies transferendo Sacram Communionem adeò, ut notabiliter ipsa ex his afflictionibus debilitaretur. Nè tamen illi in spiritu noceret, solabatur eam prædictus Pater explicando se ea adhibere ad promovendum majus animæ ejus bonum: eamque collaudando, quando aliquid grave toleraverat. Denique in longum & gravem morbum prolapsa, multas diversas, arduas passa est molestias, in quibus Pater Confessarius eam inviscendo multum juvabat, & consolabatur.

IX. Quatuor annis sub hoc Patre elapsis, quamvis non amplius tantopere ab eo mortificaretur; nihilominus ex verecunda sua natura etiam eum ita timebat, ut non auderet illi reddere prolixam statûs animæ suæ rationem; etsi adverteret hoc sibi opus esse, ut omnia fusiùs cuipiam exponeret, qui eam diutiùs audiret. Allocuta ergo est Patrem Petrum de Leon ejusdem Societatis, Virum svavioris naturæ, & magnæ charitatis, cui etiam Divina Majestas contulit peculiare lumen ad eam & res ejus intelligendas: donec tandem consilio etiam gravium Patrum valedixisset Patri Francisco de Lara, eoque factum hoc probante cœpisset confiteri Patri Petro de Leon, qui cœpit eam regere cum extraordinaria sollicitudine: cui ipsa exactissimè obediebat, non prætereundo vel minimum quid, quod intellegebat ipsum velle; firmâ fide adhibitâ ipsius dictis, nè erraret.

&

& sic se conformando in omnibus voluntati DEI, cui desiderabat viribus omnibus placere.

X. Sic ergo Divina Providentia dabat illi semper Confessarios aptos ad regendam ejus animam in statu, in quo tunc erat constituta. Quando igitur incipiebat incedere viâ novâ mirabili ac extraordinariâ, adeoque secundum se periculosâ ac difficili, tunc datus est illi iste Pater Petrus de Leon, qui perspecto jam aliquantum bono spiritu, quo Venerabilis Marina agebatur, facilius eam dirigebat. Hanc specialem suam de ea providentiam revelavit ei ipsamet Divina Majestas posteriori tempore, quando in visione quadam huic ejus Confessario sic, eâ audiente locutus est: *Animadvertite, tradidi tibi istam, ut tua sitis habere illam, ut talem, & custodi atque consolare ac gere ipsius curam.*

CAPUT II.

Ætas ejus posterior.

I.

EXcitavit tunc DEUS in ejus Anima desideria ardentia, ut ex intimis præcordijs amaret DEUM, & investigaret, ubi eum reperiret, suspirando diu nocturne: ubi es Bonum meum & quies mea, quia tui desiderio emoriar? ubi moraris cor meum? ubi te quæram & inveniam infinitum Bonum Animæ meæ.

Cùm ergo DEUS hanc suam famulam jam videret bene dispositam, statim applicuit manus operi, quod proposuerat in illa operari; factio initio ab apparitionibus in somno. Somniavit ergo, quòd concitato passu, & quasi fatiscens, atque anhelans quærendo CHRISTUM Dominum, obiret quoddam claustrum, & sacella cujuspiam monasterij; & sic ex improvviso viderit ac invenerit CHRISTUM Dominum affixum cruci, lamentabiliter quidem, sed ut simul accenderit vehementem sui amorem; atque ideo sine ulla mora cucurrerit ad amplexandos sacratissi-

mos ejus pedes dicendo: *Ubi eras Bonum Anima, & cor meum, quòd te non in-venerim? quarebam ego te omnibus meis viribus, & non te videbam: ubi te abdideras, dic, Bonum meum infinitum?* Dominus amantissimè ostendebat sibi non displicere, quòd ipsius pedes tanto amore stringeret. Expergefacta retinuit ardentissimos affectus erga Dominum, quem viderat, firmissimè statuens derelinquere amore ejus universa.

II. Alià vice somniavit, se in quodam cubiculo domûs suæ reperisse puerulum duorum vel trium annorum, quem existimaverit esse CHRISTUM Dominum, & mox cucurrerit ad ipsū & sublatum in ulnas amplexata sit & osculata, ei blandiendo, donec menti occurreret puerulum illum esse DEUM: quo consternata subito ipsum deposuerit humi; & sic fuit expergefacta. Postridie dum jam sumptura esset sacram Communionem, videbatur illi puerulus ille amplecti ejus Animam. Unde tanti affectus amoris fuerunt in ea excitati, ut putaverit se jam morituram; idque triduo vel quatrduo duravit. Hæc somnia fuisse à DEO certum est, quia hos divini Amoris affectus, nec natura nec dæmon potest excitare. Post hæc incæperunt apparitiones in vigilia tam frequenter, ut DEUS aliquando illi dixerit, non esse multum, si quotidie semel invisantur amici; prout referuntur expansè in duobus voluminibus vitæ illius scriptis à Venerabili Patre Ludovico de Ponte, & à P. Andrea Pinto Ramirez, cui materiam præparatam reliquit P. Michaël de Orennia.

III. De his suis initijs scripsit illa: Ex eo tempore cœpi rejicere, ac deferere ex corde omnia propter hunc Dominum, & odio me ipsam prosequi, ac amare Divinam Majestatem ex omnibus viribus meis, optando & satagendo, ut in omnibus exequerer ejus voluntatem, utque honorarent illum, & ipsi servirent omnes creaturæ. Quo factum est, ut illius gratiâ adjuvante pervenerim ad eum statum, ut jam non in me, sed in CHRISTO Bono ac Domino nostro viverem, amando quàm possem maximè,

ximè, quod ipse amat & abhorrendo similiter ab eo, à quo ille abhorret, idque sinè difficultate & repugnantia; jam enim caro quasi subjecta est spiritui, nec fertur vel propendet magis in quidquam aliud, quàm in id, quod ille vult. Et quamvis verum sit me deinceps passam fuisse aliquam tentationem diaboli, nulla tamen earum est fundata in passionibus immortificatis carnis & sanguinis, sed proveniunt à fraudibus inimici, qui cum strepitu armorum, ac tumultibus vult quasi extrinsecus animam invadere DEO id ex incomprehensibilibus judicijs permitte. Iste est status, in quo me Dominus DEUS per suam tantam misericordiam modò tolerat, & ego fruendo istà pace & quiete, amandòque DEUM ex toto corde, & omnibus viribus, velut oblita omnis rei, quæ non est ipse, & omnem in illo spem reponens, vivo simul in magno timore, metuens ac timens in omnibus meis operibus, & verbis, & cogitationibus, dum semper omnia perscrutor, nihilque prorsus mihi ipsi fido, sicut qui semel iterumque incidit in dentes lupi, didicit vivere cum timore, ac solitudine.

IV. Ab eo statim tempore incœpit se illi spectandum exhibere Angelus Custos in specie decennis pueri, mirè formosum, ac splendidum, & candidà veste indutum, præferens in vultu magnam honestatem & potentiam. Reliqui Angeli agebant cum ipsa modo quodam humano, sicut amici solent: ille verò cum imperio & tanquam hospes domûs ingrediebatur & egrediebatur, exequébaturque universa pertinentia ad salutem animæ ipsius, quæ prudens aliquis, amans, ac sollicitus Pædagogus potest ac debet agere cum puero, cujus curam gerit. Procedente tempore, cùm miseriæ, infirmitates, ac dolores ejus augerentur, dedit ei DEUS circiter quadragesimo quinto ætatis anno alios quatuor Angelos, qui ei aspectabiles assisterent; id quod ipsa humiliter imputabat suæ imbecillitati, quod alijs hominibus sufficeret unicus Angelus Custos, ipsa autem tot custodibus indigeret.

V. Dein addidit illi Deus in specie bimuli pueri Angelum alium. Ac tandem alios quinque Angelos, qui admirabili modo semper cum ipsa versabantur in cubiculo, quamvis illos non semper videret, sicut priores. Omnem admirationem longè excedunt immensi, innumerabiles, inusitatique divini favores ei postea totâ vitâ exhibiti, de quibus, cum illa valde miraretur, (prout habetur 2. Parte Vitæ illius lib. 2. c. 28.) quòd Deus fecum, tam vili, & abominabili tam mira ageret, causamque hujus rei à Deo instantè rogaret, ac tandem diceret: dic mihi deum, mi Deus, quod te interrogo, per te ipsum te rogo; tandem Divina Majestas respondit: Anima mea, magna profectò est tua interrogatio. Sciendum namque tibi est, quòd divina mea judicia sint altissima & secretissima, quòdque ego solus meâ æternâ sapientiâ possim meipsum comprehendere. Nihilominus respiciens tuum ingentem purum, candidum ac sincerum, affectum, itemque amorem, quo erga te feror, volo te consolari, tibi que ad tuam interrogationem respondere, quantum à tua capacitate potest percipi.

VI. Vocavi te à principio tuæ primæ ætatis: & simul ac audisti meam vocem ac vocationem, verè & efficaciter mihi respondisti, sicut scis: atque postquam te ad id disposueram, ac doctoribus non modò spiritualibus, sed etiam naturalibus instruxeram, teque juvabam, & illuminabam per totum vitæ tuæ cursum, semper fuisti cooperata progrediendo gradatim in fidelitate, & solitudine, quæ tot meis debebatur misericordijs. Sic Anima pervenisti ad statum aptissimum, ut in te mea mirabilia operarer, tibi que mea dona communicarem, quemadmodum, tibi constat, & constabit deinde mundo. Ego te diligo, mihi que in te complaceo. Istud, Anima, est responsum ad tuum quæsitum. Nunc vale, & quiesce in me.

CAPUT III.

Humilitas Venerabilis Virginis Marinae.

I.

Vixit Venerabilis Marina 79. annis, ad cuius obitum enarrandum priusquam accedamus, compendio enarrabimus virtutum ejus aliqua specimina, ut visâ ejus tantâ sanctitatis altitudine, manifestum fiat omnibus, quàm meritò sit Revelationibus ejus fides adhibenda, quantòque fundamento Venerabilis P. Ludovicus de Ponte tantâ veneratione siccam, ejusque visiones prosecutus.

Hoc etiam Lectorem admonitum velim, quòd sub finem hujus narrationis post funus & exequias sim daturus rursus aliud compendium Vitæ hujus mirabilis Virginis à Domino Francisco de Vinivela ex Concionibus funebribus de ea habitis concinnatum, quia eo loci illud collocare fuit magis opportunum. Nunc à virtutum fundamento humilitate exordiamur. Viæ, quâ eam duxit Deus, Summa fuit, extraordinarij favores, extraordinarijs crucibus permixti, præsertim internis, minùs obnoxij vanæ gloriæ: prout hæc fortunissima Virgo nunquam passa fuit tentationem vanæ gloriæ, præsertim cùm Deus ei dederit profundissimam sui ipsius cognitionem, quæ illi erat locò crucis tam terribilis, ut temperaret abundantiam spiritualium deliciarum adeò, ut ipsa diceret, se, si hoc cognitionis propriæ tormento careret, victuram in continuo gaudio, sicut in cœlo.

II. Scripsit ipsa de se ad Confessarium sequentia: Dominus Deus, pro sua infinita sapientia, indiderat meæ animæ pro ejus bono, tam profundam cognitionem mei ipsius, ut propter illam me tantopere & cum tali nausea, atque horrore omnium, quæ habeo, & in me interius, ac exterius deprehendo, vilipendam, ut sæpe mihi videatur impossibile, nisi me Deus conser-

vet, subsistere cum tam gravi onere, quod me adeò opprimit, ac tam potenter compellit ad abyssum meæ vilitatis & miseriæ. Cum autem ita me ipsam cognoscam, frequenter me ipsa indignabundè sic alloquor: Adesto stolidi, inconstans & destituta iudicio, sterquilinum immundum, ac abominabile, quid agis? quomodo te geris? in quid aliud impendis omnes horas & momenta diei, quæ tibi concedit Deus, ut in illis ipsum ames, ei que servias, quàm in committendos defectus, & multiplicanda peccata? Quomodo omnes decipis? Deum sanè non latet, quod facis; vide sis an hoc sit verum; offendis omnes, præbesq; illis malum exemplum, omnes affligis & vexas. Eritne tandem aliquis, inimica Dei, qui te aliquando exerceat, sicut mereris? Propterea desiderabam, ut me Deus puniret, ac ulcisceretur peccata mea, atque ut reperiretur quispiam, qui, ut mihi, & alijs benefaceret, me concluderet, & aliquò compelleret, ubi laterem: & inter omnes quasi erubescbam ac pudefiebam, ita ut me ipsam ferre non possem. Conquerebar, quòd exiguam cognitionem haberem meorum errorum ac dicebam: Anima tunc etiam me vis decipere miserabilis? Ergone non possum, neque scio mala, quæ à te sustineo, aliter exponere, quàm ut, dum ijs tam graviter affligor, & illa volo explicare, sim instar comædi, qui dicturus videtur, aut facturus, magna, ac post omnia animadvertitur meram exhibuisse repræsentationem, & nihil ampliùs? sic tu facis, quæ nec scis, neque potes dicere, sicut se verè habet id, quod fit in tua anima. Et re ipsa non est aliter. Cum enim usque adeò vera sit nostra miseria, & vilitas; propria miseriarum cognitio, est quædam comica istius veritatis, quæ existit intra nos ipsos, repræsentatio.

III. Hoc agitur in mea Anima, & solus Deus potest dare cognitionem Intellectus, ac verba lingvæ, ad explicandum modum, quo ipse id facit, & exuscitat istam crucem in Anima. Sicut enim præ mea ruditate non possum intelligere, neque ex-

po-

ponere admirabilem modum, quo Deus suâ infinitâ potentiâ res creat ex nihilo: scio tamen ipsius voluntatem sufficere ad quidlibet faciendum; itâ nescirem dicere quomodo Divina Majestas id operetur in mea anima, ut in se est, & accidit, sed agnosco hoc ab ipso fieri. Nam licet hæc omnia absque ulla fictione & exaggeratione sint vera, neque sit tantum modus loquendi; nihilominus si me aliquis ex Reverentijs Vestris interrogaret: Tu dicis, quod scandalizes omnes, & quod illis præbeas malum exemplum, atque illos decipias, & fallas; dic ergo modò, si itâ est. Fefellistine, scandalizavistine aliquem, & præbuvistine ulli malum exemplum? vel decepistine quenquam verbo, aut opere, vel cogitatione, vel desiderio? ego verè responderem, nisi vellem mentiri: Pater, non, per DEI misericordiam! à cujus potenti & clementi manu nobis provenit omne bonum. Atque ista veritas replet magno solatio animam, reddique illam quietam & contentam. Cum autem itâ sit, quomodo possunt se compati, & conjungi hæc duæ veritates in speciem contrariæ? & quis sciet intelligere aut ediscere modum, quo Deus id facit, & conjungit has veritates, itâ ut neutra illarum in ullo deficiat. Illud est secretum, & opus Divinæ Sapientiæ, quod Anima experitur, nec tamen lingua scit explicare: ac proinde Deo, qui hoc facit & intelligit, soli relinquatur, ac Animæ quæ idem experitur: mihi verò sufficit dicere utrumque esse verum.

IV. De hac re alibi lib. 2. c. 36. elegantissimam habet doctrinam in hunc modum. Anima, clarissimis divini luminis perfusa radijs, videt se ipsam tanquam in clarissimo speculo: videt suam naturalem miseriam, sua peccata atque defectus, itâ ut illam nè minimùm quid hujus generis aut minutissima ulla, atomus lateat. Aliunde illuminata à Deo, videt pro suo capto Immensitatem, Omnipotentiam, & Sapientiam cum cæteris perfectionibus illius infiniti Esse, atque unâ, quomodo mereatur

tur ut ametur, & ipsi serviatur ob id solum quod Est. Horum veluti conspiciolorum ope, quæ ei Deus ipsius applicuit, procul & acutum cernens, quamvis ex natura sua cæcutiat, præclare utrumque agnoscit, atque deinde sublimissimè videtur mutuo comparare: unde fit, ut illi levissima ipsius culpa, & minimus defectus dum cognoscitur commissus fuisse contra immensam illam Majestatem, tantus, adeoque deformis appareat, ut existimet esse montem insvetæ magnitudinis & horribile monstrum. Tale est illud spectaculum, ut Anima videatur extra se rapi. Incredibiles sunt affectus, & motus displicentiæ sui ipsius, quos hinc elicit, & in ijs solis invenit solatium: videtur namque sibi ab illis reduci ad locum, quem promeretur, ubi se deprehendit, quantum ad ipsam attinet, quodammodo capacem esse omnium miseriarum, culparum, & peccatorum, quæ sunt reperibiles in omnibus creaturis. Est res admirabilissima, quomodo tunc advertatur hujus magni Dei Sapiëntia & Potentia, quod hanc Animam ita illuminet, ut absque ulla sua ratiocinatione ob solam simplicem & acutissimam Dei atque sui cognitionem, indubitanter, & prorsus verè possit dicere, se esse omnium in mundo pessimam, & abominabilissimam creaturam.

V. Cum hæc sint adeo sublimia, ut sive ductum sequendo humani Intellectus naturaliter ratiocinantis, sive spectatis usitatis meditationis regulis, Anima difficulter possit dicere, qualiter id fiat, si interrogetur, aut quomodo intelligi queat ac verificari, quod sit pessima creaturarum, siquidem scit, à se nunquam, per divinam misericordiam, commissâ fuisse gravia peccata, imò se totâ vitâ suâ anhelare ad majorem perfectionem, & amorem Dei, adnitendo omnibus suis viribus ac desiderijs, ut juvet suos proximos, quantum sibi est possibile: hic non potest ulterius procedi. Infinita est Potentia, Sapiëntia, ac Amor magni Dei, & sicut scivit populo Israëlítico solum Manna condire, ut contineret saporem omnium ciborum, quibus singuli de-

lecta-

lectarentur, ita etiam scit, dum cognoscitur, seque ipsum cognoscendum præbet, præparare animæ ferculum, in quo percipiat saporem omnium eorum, quæ sunt necessaria ad spirituale alimentum, & majorem ipsius profectum. Atque in talibus occasionibus vult, ut anima se sustentet profundissimâ humilitate, quin sciatur, unde in eo divino lumine, quo alitur, possit provenire iste sapor, qui facit, ut sibi ipsi sapiat, acsi foret pessima totius mundi anima.

VI. Ex omnibus gratijs tam mirabilibus sibi à DEO exhibitis proficiebat imputando eas suæ indigentiae, ac tantæ imbecillitati, ut nisi DEUS sic cum ea ageret, ipsa peritura esset, cum tamen alij homines sinè tantis gratijs salventur. Ipsa de se sic narravit: agnoscens quid fuerim, & quid sim, ac foetorem prodeuntem ex hoc sterquilinio, quod est intrâ me, ita ut ego ipsa illum non possim tolerare, aut sufferre meos multos defectus, ac fragilitates, & malum exemplum, quod præbeo; erubesco & pudeo, vellémque omnes vitare, nè ullum scandalizarem. Video quoque torum, quod sentio, esse quasi nihil, ac veluti umbram respectu veritatis, & ejus quod est re ipsâ. Metuebam comparare coram DEO meo, eò quòd mihi Divina Majestas meritò diceret: quid fecisti? quantum tibi dedi, stolida, mente capta, & insensata? dedi tibi dona pretiosissima, ut cum illis mihi placeres, & tu mihi talia rependis lacerrimum mendicabulum miserabilis & absurda? Quomodo fuisti usa tot gratijs, quas à me accepisti? Tum nesciebam quidquam dicere, sed confidebam in miserationibus DEI mei. Unde illi ex intimo corde dicebam: mi Domine, noscitne me tua Majestas? videbatúrque mihi respondere: Ita nosco. Reponebam ego ac dicebam: heu me miseram? quomodo sum ausa huc venire, cum sim tam immunda, & plena miserijs.

VII. Sciendum autem est eam, quando erat rapta & absorpta, fuisse quasi immemorem propriæ cognitionis de sua vili-

rate, utpote elevata à Divino Spiritu, ut amor purus & castus summopere ardens illam animaret ad acceprandum divinos favores, eisque fruendum. Cæterùm ipsa scripsit se cum tanta reverentia agere cum DEO, ut quando coram illo versabatur, contremisceret, vellètque se intra terram abdere; amando nihilominus toto corde infinitam Bonitatem tanti Domini.

De profundissima sui ipsius cognitione & contemptu habet multa P. Ludovicus de Ponte Parte I. lib. I. cap. 7. Hinc proveniebat humillima illa reverentia, quæ venerabatur DEUM, ita ut magna cum ipso familiaritas, non pareret contemptum. Imò vel ideo ipsum magis æstimaret, quòd videret tantum DEUM versari tam familiariter cum tam vili creatura. Quin & immersa huic abyssò sui nihili videbatur sibi opus habere alio majori inferno, quàm sit is, quem DEUS habet pro reliquis peccatoribus: & propterea Angeli ei dixerunt: etiamsi alij magni Sancti majora præstiterint opera pro DEI gloria eamque in hoc superaverint; nihilominus alios vicissim superari ab illa in eo, quòd se tam profundè cognosceret, ac despiceret.

VIII. Hinc etiam procedebat dolor & pudor, quem sentiebat, quando res admirandæ, quæ ipsi accidebant, spargebantur inter alios. Et propterea experiebat, magnam difficultatem ac repugnantiam, in prodendis illis, quæ DEUS ei manifestabat, & illam jubebat alijs dicere, conabaturque talia ita proferre, ut non intelligeretur, quòd eas sciret ex revelatione.

Hinc etiam oriebatur, quod extremè refugeret omnia exteriora, quæ conciliant opinionem Sanctitatis apud homines, ut est: pati raptus publicè, suspendi elevato corpore in aère, vivere absque omni cibo, habere visibilia signa vulnerum, in manibus, pedibus, latere, & capite, atque alia hujusmodi, quibus non parvum subest periculum illusionum.

IX. Nomen *Ancilla Domini* cordi suo infixum habebat intimè, adeò, ut conceperit desiderium efformandi cujuspiam annuli in-

in sculptis in illo istis verbis: *Ancilla JESU CHRISTI mei Domini*, quem & illuminata à DEO, consentiente Patre Ludovico de Ponte fieri fecit, inseruitque minimo suo digito. Et cum Angeli postea sæpius tum concinendo, tum aliàs eam vocarent, Sponsam CHRISTI Domini, eos corripiebat, & humillimè rogabat, nè vocem illam unquam usurparent, sed ut se vocarent, *Ancillam*.

Innumera sunt,, quæ sparsim de illius Humilitate habentur per totam partem primam à Patre Ludovico de Ponte conscriptam, quæ nimis prolixum esset hic congregare.

CAPUT IV.

Mortificatio & Patientia Venerabilis Virginis Marine de Escobar.

I.

Mortificationum corporis usus proportionatus in hac Venerabili Virgine cæpit jam inde ferè à secundo tenellæ ipsius ætatis anno (multi namque testes, & cum bono fundamento, asserunt, acceleratum illi fuisse usum rationis, dum esset viginti, aut viginti duorum mensium) atque continuavit affligere suum corpus, toto tempore, quo non penitus fracta ipsius duravit valetudo, & quoadusque ipsi DEUS immisit morbos, per quos voluntarias afflictiones mutavit in dolores, longè magis penetrativos, & acutos, quibus à DEO expoliebatur. Quamdiu verò potuit, insolito se exercuit rigore vigiliarum, jejuniorum, ciliciorum asperriorum, multarum flagellationum ad profusionem usque sanguinis, & rerum hujusmodi, uti erat imponere aliquid calceis, quo continuo pedes divexarentur.

Erat naturæ sanguineæ, & ardentissimæ; plerumque indigebat copiosiore aquâ, & hunc appetitum domabat, seu ita

hanc indigentiam defraudabat, ut multos consequenter dies summa cum molestia transigeret, nè guttam bibendo. Interula linea (quam ut suos falleret Parentes ac sorores induebat) illi tantummodo fuit velum ac tegmentum asperrimæ tunicæ e rudi panno, quæ à pectore usque ad pedes nudæ adhærens carni virgineum ipsius corpus discruciat.

II. Diu abstinuit ab esu carnis & piscium, ac ab omnibus, quæ palato arriderent, eâ utens occasione, quod mensæ suorum Parentum non assidens, sed cibos numerosæ familiæ distribuens, poterat alijs minimè observantibus, nullo cibo degustato frequenter jejunare. Exibat postea coopertâ facie ad vestibula monasteriorum, immiscens se pauperibus mendicis, quibus meliora dabat ex ijs, quæ ei mendicanti obvenerant, & quandoque ab illis ipsis contemptui habebatur, quibus gratificabatur. Retinebat quosdam solum bolos minùs appetibiles, quos libentius sumebat, asserens sibi eos esse instar sacrarum reliquiarum. Erat ex natura sua modici somni, & quædam socia illius jurat, auditam fuisse à se eandem Virginem, dum necessariâ aliquâ occasione diceret, quòd in ætate puellari multas horas continuas exegerit in oratione flexis genibus, ita ut se loco non moveret. Lecti ejus deliciæ erant aspera sarmenta, donec eam Confessarius, visis illius morbis jussit mutare modum cubandi, & relinquere sarmenta ac lapidem, quo utebatur vice cervicalis.

III. Post annum vitæ ejus circiter 45, incepit in ea novo modo continuus status admirandæ Patientiæ in tolerandis horrendis doloribus per tres gradus: quorum primus est sustinere molestias æquo animo: secundus optare ex animo afflictiones: tertius gaudere in ærumnis, & exultare gloriando in cruce, CHRISTI, amore illius tolerata. Et quidem tener ac sçavis, & fervens DEI Amor illi interdum eam injiciebat aviditatem tolerandarum afflictionum, ut quidquid pateretur, ipsi videretur

mo-

modicum; aut nihil, tametsi re verâ esset multum, dicerétque, quàm cupidissimè ad DEUM: mi Domine & meum Bonum, estne possibile, quòd mihi nihil sit pro te patiendum? Verùm Dominus respondit: ità, pateris, sed non sentis. Illa nihilominus replicabat inquires: aliquando mihi tua Majestas dixit; quid à me petivisti, quod tibi non concesserim? Quomodo ergo mihi non das, quod à te peto, dum tantopere desidero pro te pati? Et cum nesciret, quomodo posset pro tantis gratijs exhibere se gratam, rogavit DEUM, ut sibi aliquem daret, qui se excrucicaret, tametsi esset Diabolus.

IV. Licèt autem Deus permetteret, ut affligeretur, & assidue ac plurimum pateretur, adeò ut, nè quidem momento careret afflictione; tamen etiam ità illam confortabat, tranquillabat, & quasi solabatur, reddebátque contentissimam omni eo, quod ipsius Majestas faciebat, & permittebat in illa fieri, ut in una eademque Anima invenirentur duæ res, in speciem oppositæ, quas solus Deus potest componere, videlicet turbatio, timor, afflictio, dolor maximus; & aliunde solatium, summa confidentia erga DEUM, summum desiderium patiendi, quidquid ei placeret, nec non magna conformitas, cum sancta ipsius voluntate.

V. Unde ipsius cubicellum, quod lecto affixa inhabitavit 30. annis, erat quidem quasi Paradisus deliciarum coelestium, & adumbrata quædam Beatitudo instar Coeli empyrei, eò quòd in eo semper reperirentur Angeli, vel Sancti, qui veniebant ad illam invisendam, cum supremo Rege, vel Regina universorum; aliunde tamen etiam fuit instar angusti, & luctuosi carceris, ac velut theatrum, & locus supplicij, ubi nunquam deerant cruces, unci, sagittæ, ignes, bestię, & alia instrumenta pro ipsa excarnificanda. Propterea sancti Angeli sæpe illam appellaverunt, Martyrem Domini. Imposuit CHRISTUS Dominus illius capiti coronam spineam, cum ingenti illius dolore, ut & sacra-

tissima sua quinque vulnera ei indidit, eaque sæpius renovavit ingenti cum cruciatu; ac denique fecit eam participem dolorum suæ passionis, prout refertur Parte I. c. 29. ac 30.

VI. Et lib. 3. c. 19. ipsa narrat, postquam octo horis fuisset passa terribile martyrium, ita ut non possem respirare, neque vel modicum quiescere, quasi conciderer novaculis, nocte sequenti me dignatus est Dominus visitare, cui dixi: Domine, quale tormentum fuit istud? Responditque mihi: ego accendi ignem in tuum commodum, sed dæmon egit partes foeminae irritantis ligna in furno, ut ardeant. Non vidisti tamen illum, nè nimium affligereris: sicut quando cooperiuntur oculi alicui, qui capite plectitur, nè videat gladium. Dixi illi: Domine, quæso nè in morte patiar tam terribiles dolores, quia me non permitterent, ut me præpararem; etiamsi meus Confessarius mihi dixerit, se non petere ullum certum mortis modum, sed eum, qui Deo placuerit, cum ipse sciat, quis illi magis conveniat. Respondit: iste spiritus est bonus, sed tuus mihi non displicet.

VII. Lib. 6. part. 1. c. 1. §. 3. ipsamet narrat sumere cibum vel potum (ad quod me propter meam magnam imbecillitatem compellebant Medici) erat mihi martyrium, quasi gladii flammæ ustulantis ac vulnerantis totum meum corpus & cor; unaque patiebar ingentes angustias & afflictiones, ac destituebar omni solatio ac remedio, omnesque res naturales, idem in me operabantur, ut etiam applicatio qualiscunque vel minimi remedij. Corpus meum & omnes illius sensus, ac pars inferior Animæ, omnesque ipsius potentia sustinebant perpetuò martyrium, & erant quasi in ardenti igne, simili meo iudicio igni purgatorij: dolores quas patiebatur universum meum corpus, præter ea, quæ dicta sunt, erant intimi, vivacissimi & intensissimi, qui totum penetrabant, ac lancinabant, absque ullo levamine. Videbar mihi semper versari in craticula S. Laurentij, & in rota referta

ferta novaculis S. Catharinæ. Inter hæc martyria tam diuturna patiebar & illud gravissimum, quòd metuerem, nè non essem bene resignata in divinam voluntatè in his occasionibus, & tantis martyrijs, quorum author & causa principalis erat dæmon, à quo torquebar, permittente id DEO, ad majus bonum, meæ animæ; quamvis diu noctuque elicerem multos actus resignationis cum summo & vehementi desiderio placendi DEO in patientia, plurisque facerem meum martyrium, quàm omnes thesauros, & solatia à DEO condita. Eodem anno in Aprili sustinui (ait illa) quadriduo vehementissimum martyrium, ac terribiles dolores, ità ut nec de die neque de nocte possem quiescere, neque cum ullo agere, viderérque mihi ustulari & comburi, atque excoriari, ac pati poenas Purgatorii.

VIII. Sed audiamus, quæ Confessarius ejus P. Michaël de Orenia post ejus obitum juratus retulit, quæ prope eadem etiam juravit P. F. Andreas de Ponte Ordinis Prædicatorum, frater Ven. Patris Ludovici de Ponte, & sũnt sequentia: Tota hujus magnæ servæ DEI vita meritò vocari potest rigidissima & continua poenitentia, propter continuos ac rigidos morbos, & acutos dolores, quos perpetuò fuerat passa: siquidem illi singulare tormentum erat lectus & cibus, quæ duo esse consueverunt ægrotis fomenta, & refocillationes, quia tres, quatuor & sex solebant elabi menses, quin ipsi dictus lectus sterni posset, eò quòd illi hoc esset summè molestum: & quia in eo prope semper in uno situ decumbebat, ità ut alium non posset capere, sæpe mihi dicebat, tanquam suæ conscientiæ arbitro, corpus suum frustatim diffindi, seque sic esse comparatam, ac si jaceret in magnis lapidibus. De cibo autem agebat, se si solum spectaret tormentum, potius electuram cruciatum mortis, quàm illum, quem sentiebat ex sumptione cibi, propterea quòd iste non alios effectus in se produceret, quàm si stomacho ingereretur modicum arsenici. Quamvis autem illi Ven. P. Ludovicus de Ponte jam

vitā

vita functus revelaverit, cibum non converti in ipsius substantiam, atque CHRISTUS Dominus insinuaverit, quod vivere posset absque cibo; noluit tamen hunc favorem acceptare, quin imo dicebat: Nequaquam Domine: oportet me comedere, sicut tu comedisti, & comedit Sancissima tua Mater: non sum enim Angelus, sed mortalis ac miserabilis foemina. Hucusque Pater Orenia.

I X. Hæc veritas clariùs patebit, si expendatur conditio ipsius morborum, & heroica patientia, quâ illos sustinuit. Doctor Gabriel de Canseco, unus è Ministris Sancti officij, Promedicus Regiæ Majestatis, vir pius ac doctissimus, & bis primæ Cathedræ in Universitate Vallisoletana Professor, qui hîc semper huic Virgini astitit; in multis & eruditissimis paginis, quas in suo jurato testimonio huic argumento impendit, exponit suam hac de re sententiam, quam redigam (ait P. Ramirez in 2. Parte Vitæ lib. 3. c. 5.) in compendium, quàm maximâ potero brevitate, nihil substantiale prætermittendo, eò quod ista materia in historia hujus admirabilis Dominæ sit præcipui momenti, cujus vita potiore sui parte fuit in his morbis transacta, quorum tolerantia innitebantur illustriora spiritûs ipsius merita. Sic verò hic testis ait.

X. Audivi dici graves à juventute ipsius fuisse, & continuas corporis afflictiones, toleratas in periculosis & continuis morbis, quos ex eo tempore, quo bona mihi fors obvenit, ut illius Medicum agerem, jam à decennio magis habeo perspectos, quemadmodum, & magnam ipsius circumspeditionem ac prudentiam & timorem profectum ex virtute, quo erat prædita. Siquidem ex præscripto & mandato expresso Confessoriorum suorum (quod quidem prudenter statuerant, ut agnoscerem causam ejus infirmitatum, & earundem effectibus quopiam remedio obviarem) mihi recensuit terribilem ictum sibi inflatum à diabolo, mihi que modestè ac humiliter aperuit, grave, nocu-

nocumentum sibi propterea illatum : & ex eo die sinistra illa pars, quæ crudeli illo ictu fuerat contusa , tam malè mansit affecta, ut inde provenerit gravissimus dolor, quem ibi patiebatur talem, ut ipsi interdum viderentur costæ, & os pectoris divelli. Atque ex illo tempore affixa fuit lecto, unde eam intelligo nunquam surgere potuisse sinè miraculo. Erant graves & assidui dolores, quos in diversis corporis partibus sentiebat, & hi interdum adeò invalescebant, ut impossibile videretur vitam inter illos naturaliter conservari.

XI. Scio præterea ab illa nihilominus fuisse tam patienter ac pacatè toleratos, ut licèt eorundem acerbitas ex sensibilibus indicijs appareret; spectatis tamen gemitibus hujus Virginis, ac suspirijs, nequaquam ipsa videretur esse, quæ eos sustineret. Tanta erat illius tolerantia, & conformitas cum divina voluntate. Solebat mihi summum dicere: Domine Doctor, doleo præberi à me occasionem, ut tua Dominatio, & meæ sociæ molestantur: sed ad nihil aliud sum utilis, quàm ut ij, qui mihi assistunt, magnam erga me suam exerceant commiserationem. Diuturnâ didici experientiâ, etiam id, quod alijs infirmis solet naturalem adferre sublevationem, uti est somnus & alimentum in tempore, ac in qualitate & quantitate congrua oblatum, huic sanctæ Dominæ præter naturæ leges, fuisse molestum, grave, & perquam difficile, usque adeò, ut mihi exponendo quid hac in re pateretur, diceret: Domine Doctor, nescio, quid sentiunt moribundi, meâ tamen opinione, & judicio mihi non videntur posse plus sentire, quàm ego sentiam. Et propterea, pro animi sui demissione, quæ erat profundissima, petebat à me veniam, quòd mihi incommodaret, advocando me sæpe ut judicarem, an periclitaretur de vita. Talis erat ipsius sollicitudo, ut se bene disponeret, atque judicium suum & arbitrium Medico corporali in affectionibus corporis submitteret; quemadmodum est notorium semper fuisse spiritali Medico in rebus ad animam spectantibus obsequentem.

Cc

XII.

XII. Ex bonis Medicæ Facultatis principiis agnovi tunc & modò agnosco, ejus indispositionum & infirmitatum causam non fuisse naturalem, earundemque originem extitisse supernaturalem. Hinc accidit, ut aliquando dum non invenirem remedium, quo mederer morbis hujus sanctæ Domine, illi quasi joci causâ dixerim: Juva me Domina indagare causas tuorum morborum, ut tibi præscribam remedium; quod idcirco desidero, quia tuæ Dominationis statum non capio: es enim Domina, methodo consuetâ incurabilius omnibus quorum habui curam. Ipsa intelligens, quò collimarem, mihi perhumiliter, & gratosè unâque graviter respondit: Talis ego sum Domine, quæ ad nihil aliud profum, quàm ut tua Dominatio & reliqui tecum laborent, atque suam mihi exhibeant charitatem. Postea verò obstricta à suis Confessariis, qui ipsi mandaverunt, ut mihi in hujusmodi occasionibus aliquid daret luminis, quò scirem qualiter me gerere debeam; hæc verba cum magna prudentia & elegantia, sed profundâ animi demissione subjunxit: Jam Domine, dato casu, quod diabolus, permittente id ipsi Deo, efficeret indispositionem alicujus corporis humani, eique præberet occasionem infirmitatis; hæc illatâ, productus effectus bene admittit remedium: quemadmodum si hic ab igne produceretur alius ignis, vel diabolus illum eâ ratione, quâ potest, accenderet; quando dictis ignibus affunderetur sufficiens aqua, uterque videtur extingvendus. Conemur igitur, Domine, obviare producto effectui, sive ex hac, sive ex alia causa proveniat. Mea Domina, reposui ego, si adhuc supernaturalis perseveret causa ignis, quamvis illi contrarium agens naturale applicetur, non cessabit, eò quòd istud sit ordinis inferioris, & illa semper actionem continuat; idem dico de morbo. Nihilominus, Domine, respondit sancta Domina, faciamus, quod tua Dominatio judicat juxta suam scientiam, & reliquum permittamus Deo.

XIII. Post hoc dictus testis fusè describit morbum, quem hæc Virgo sustinuit, quando coacta fuit à diabolo deglutire retrimenta, & sordes cubiculi, & hæc deinde coaluerunt in calculos, qui ipsi terribiles attulerunt dolores, quibus non potuit esse remedium, nisi supernaturale. Idem dicit de alijs casibus. Conformiter etiam juravit Doctor Torres Jordanus hanc Virginem vixisse miraculosè. Quales porrò fuerint dolores & cruciatus, quibus Infernalis Tortor hanc Ven. Virginem exercebat considerandum potius est, quàm confidendum calamo.

XIV. De admirabili autem Patientia, quam Deus illi in his afflictionibus largiebatur, gravissimi testes mira asserunt. Mater Soror Maria de Trinitate Monialis Recollecta Ordinis Sancti Bernardi, quæ à tenera ætate fuit educata in ejus domo, jurat hanc Virginem, quo magis affligebatur, eò fuisse svaviorem, tantàmque extitisse tolerantiam, quàm patiebatur, ut licèt lecto superpositam habuisset sanitatem, manum ad eam arripiendam non extendisset.

Domina Marina de Obregon Monialis Trinitaria, similiter quondam socia Ven. Virginis jurat, quòd ipsam in acerrimis ejus doloribus, ac molestijs semper viderit hilarem, ut nunquam fuerit magis contenta, quàm dum ampliùs patiebatur, ità ut existimarem (ait illa) hanc famulam DEI sustentari ac vivere afflictionibus, & easdem esse diu, noctuque ipsius panem & alimentum.

XV. Mater Maria de Sanctissimo Sacramento Abbatissa Conventûs S. Brigittæ septennio fidelissima socia hujus Virginis, quæ illi adfuit usque ad ipsius obitum sic ait: Vidi semper hanc servam DEI valde patientem, ac resignatam, quamvis tales, tamque continui essent dolores, vixque tantum dici valeat, quantum in re erat, adeò ut interdum non potuerit quiescere, spatio, quo symbolum Apostolorum possit recitari, præterquam in nostris brachijs, quæ illam ex uno latere movebamus

in aliud cum ingenti ipsius molestia, eò quòd esset tam malè affecta. Et quanquam tantus esset naturalis dolor, ut necesse fuisset sinè intermissione ejulare, in his tamen omnibus exhibebat indicia gaudij, & ostendebat internam hilaritatem, quâ nos quoque replebat, dum illam videremus prorumpentem, prout posset, in hymnos & breves preces ad DEUM (licet non polleret ijs viribus, ut multum attolleret vocem) ac dicentem: Optimè esse suæ animæ suam cruculam patienti apud pedes CHRISTI Domini. Et cum in ejusmodi periculosis symptomatibus metuerem (ait ipsa) nè moreretur, ipsamque interrogarem, quid sentiret; respondit: non scio plus, quàm tu; hanc mihi Divina Majestas præstat misericordiam, quòd relinquer sola, dum patior, & in tali verber obscuritate, ut cœlum videatur esse æneum, ac terra metallina: nisi enim ita fieret, non foret crux; tantumque mihi adfert gaudium & solatium, hoc modicum, quod mihi Divina Majestas offert patiendum, ut id non permutarem donis, & beneficijs, quæ mihi elargitur. Licet enim ea æstimem, tanquam ipsius favores & gratias, majorem tamen anima sentit consolationem in molestijs ac doloribus toleratis cum resignatione. Utinam verò sim bene resignata! Examinabat se, an prorupisset in gemitum voce aliquanto elatiore: & petebat veniam mali exempli, id quod nos vehementer pudefaciebat.

XVI. Certum est, nisi fuisset tanta ipsius suavitas ac tolerantia, nemo eam patientem potuisset aspicere, vel tot horis ei assistere: ideòque cum jam interdum deficeremus viribus, & essemus fessæ ac fractæ; animus tamen noster non fatigabatur, optantes illi assistere certabamus, quæ ipsi diu, noctuque diutius esset astitura. Unam habuit specialem, plurimumque sensibilem occasionem, quando illi Deus abstulit sanctam ipsius sociam Marinam Hernandes, quæ ei viginti quinque annis convixerat. Hæc tota erat genio illius accommodata tam in rebus spiritualibus, quàm temporalibus, tam pro conversatione cum
pro-

proximis, quàm pro rebus alijs, cum qua poterat de quibuscvis materijs conferre, eratque ætatis aptissimæ; nempe quinquagenaria. Abstulit illi postea DEUS aliam sociam, quæ ipsi convixerat sedecim annis. Omnia nihilominus pertulit æquo animo, nihil aliud dicens, nisi: Fiat in omnibus sanctissima DEI voluntas.

Claudit P. Andreas Pintus hanc materiam lib. 3. cap. 5. his verbis: Exstant multi casus, iisque acerbissimi, in quibus multi alij testes interposito juramento asserunt, heroicam istius Virginis Patientiam; quos omitto: nunquam enim finem facerem, nisi paucis duntaxat singula perstringerem.

C A P U T V.

Rabies Dæmonis.

I.

PArte 1. lib. 1. c. 15. §. 3. Venit ad me (narrat illa) diabolus cum multis alijs, intentans mihi furiosè minas, dixitque: ego tibi auferam cranium, ut nihil loquaris. Et quamvis ego hoc non crediderim, interrogavi meos sanctos Angelos, an id DEUS vellet. Responderunt mihi: DEUS id permittit pro tuo bono, ac fructu illorum, qui te audiunt, & non proficiunt. Diabolus igitur & ipsius socij, derepente seiderunt circumquaq; totum meum cranium, & ego re verâ vidi cerebrum. Postquam dæmones cranium undique recidissent, avulserunt illud ex una parte, ac deinde ex altera, cum ingenti meo dolore; sic autem penitus avulsum cum quibusdam membranis & cerebro rapuerunt ex ipsorum manibus mei sancti Angeli, quorum unus afflavit, eodemque flatu redintegravit caput & cerebrum, meque magno replevit solatio & gloriâ, qualis potest hic haberi: cum enim fuisset afflata, repositum mihi ab ipsis est suo loco cranium, atque sanatum, & ego summo perfusa sum gaudio

propterea, quòd DEUS ità mecum dignaretur agere, quamvis, quia tantus fuerat cruciatus, etiamnum sentiam illius effectus, ut mihi videar interire.

II. Post hoc quādam nocte quatuor dæmones in humana specie eam abreptam ad pontem superstructum majori fluvio urbis Vallisoletanæ, ex altissimo illius loco cum magna furia præcipitaverunt ad maximam fluvij profunditatem: & sic raptatam procul ultra pontem, cū iterum emerisset, rursus abripuerunt secundo, ac tertio eodem modo ex ponte præcipitaverunt. Unde corpus ejus mirum in modum alteratum horrendis vomitibus, confusione pessimi humoris, immixti sanguini, non absque molesta febris & convulsione, afflictum rediit.

Alijs vicibus eam in specie tauri cornibus procul ex lecto eiecit diabolus, quā jactatione non aliter fuit concussa, quam si verè ipsum corpus corporaliter sic tractasset. Aliàs excruciauit illius ventrem, ac si esset plenus vivis vermibus, qui intra ventrem reptabant. Aliquando in specie molossi commordebatur ipsius brachia & manus.

III. Anno 1616. prout ipsa narrat, prope Quadragesimam, eram majorem in modum afflictā, & patiebar gravissimos dolores totius corporis ac stomachi, amaritudinem oris, & ingentem sitim, nec poteram comedere, vel etiam bibere, neque dormire. Nesciebam, quid mihi esset, præterquam quòd versarer in continua cruce, & sentirem magnam inquietudinem corporis, quamvis totus spiritus esset valde resignatus in manus DEI. Venerunt ad me sancti mei Angeli, ut me consolarentur ac animarent, & videbantur mihi aliquid agere manibus. Atque tum adverti me esse indutam quādam veste, confectā ex durissimo corio, suffultā carduis, qualibus uti solent lanarii pro carminanda lana, quorum cuspides erant acutissimæ; pertingebat verò usque ad genua, & manicæ ejus erant latæ, protensæ ad cubitos. Iste vestitus me vehementer torquebat, afferebātq; mihi

mihi prædictos dolores, & ingentes corporis ardores. Venerunt deinde Angeli, qui illum manibus modicum dimovebant, nè me tantopere cruciaret. Quidam autem atrocissimus dæmon in specie deformis viri prodivit ex improvviso, quem eatenus non videram; murmurans intrà dentes, dicebatque sanctis Angelis, quare me sublevarent, cum ipsi Deus dederit facultatem me induendi illà veste, sicut fecerat. In hoc tormento exegi complures dies, qui erant tredecim vel quatuordecim.

IV. Post paucos dies, quodam die antecinerali mane venerunt mei sancti Angeli, dicentes mihi, se jussu Dei venire, ad exuendam me istà veste, & quamvis ego noluissem mihi ipsam ab illis auferri, re ipsà me eà, quàm suavissimè exuerunt. Fui sublevata, utpote exonerata tam veste molestà: remansit mihi tamen dolor, & retinui corpus totum afflictum. Angelus complicit vestem, posuitque sub brachium, & cum cæteris quatuor adivit CHRISTUM Dominum, coram quo flexis genibus explicuit vestem dicens: Domine, hìc adferimus vestem, quâ fuit excruciatà illa, quæ tui amore patitur; aspiciat ipsam tua Majestas. Aspexit illam Dominus, ac dixit: estne ista? Ità, ista est, dixit Angelus, videat tua Majestas sangvinem, quem profudit in hoc martyrio. Erat enim cruentata sanguine, quam elicuerunt cuspidēs carduorum. Interrogaverant quoque Angeli Dominum; quid dicemus Domine, nomine tuæ Majestatis isti famulæ tuæ, & cui commitemus hanc vestem? Dominus respondit: dicetis illi famulæ & Animæ meæ nomine meo, omnia, quæ est passa, & patietur, ipsi profutura ad augmentum majorum coronarum in mea gloria, quam me illi daturum polliceor, atque ex hoc momento illi concedo, quod à me toties petivit, videlicet magnam conformitatem cum mea voluntate in patièdo pro me: vestem autem tradite Angelo ipsius Custodi, ut illam in die judicij ibi exhibeat & appareat, quid pro me hæc mea Creatura fuerit passa. His auditis sancti Angeli post exhibitam magnam reveren-

rentiam Domino, convolventes suam vestem redierunt ad meum cubiculum, quam minor expandit coram meo Angelo Custode, inclinansque se coram eo usque ad terram, tradidit illam ipsi nomine DEI, qui eam accepit similiter, non tamen adeò se profundè inclinans, & asservavit cum alijs meis rebus sibi commissis. Idem sancti Angeli mihi nomine DEI nunciaverunt, quod illis fuerat demandatum.

V. Quàdam nocte fui quasi in somnis à diabolo & ejus focijs cum magna crudelitate ac tumultu rapta, & suspensa per capillos, ut mihi videbatur, vel per collum, & collocata in quadam re altissima ac posita in aëre, ubi mihi inflixerunt multos & acres ictus quodam fune, qui habebat crassissimos nodos. Evigilavi ex hoc somno afflictissima, tam internè in anima, quàm quoad molestiam & cruciatum naturæ. Et fuerunt tanti dolores atque confractio miserabilis corporis, ut intrà quatuor vel quinque dies vix me potuerim movere.

VI. Parte 2. lib. 2. c. 48. narrat ipsa sequentem casum: Anno 1624. accessit dæmon & forcipibus velut ferreis, versavit prunas, tanquam illas fuscitaret, non modici ignis, quem ipsemet sub paupere lecto succenderat, in quo à tot jam annis ægrota patior. Videns autem dæmon Angelum Custodem se moventem ac si mihi vellet succurrere, totus terrefactus celerrimè sibi fugâ consuluit: cum sinè mora incepti sentire crudeles illius infernalis ignis effectus, qui spatio duorum mensium augebantur, ut incredibiles sustinuerim dolores ac tormenta. Superadebat idem hostis alia, atrociter torquendo miserabile corpus, eà vehementia, ut existimem potuisse brachium cujuscumque alterius, si tale foret, dirumpi. Tandem mei dolores intrà istud spatium temporis, usque adeò incruduerunt, ut me nec interdix, neque noctu, vel modicissimè sinerent quiescere. Tum Dominus misertus meæ afflictionis, mihi inspiravit, ut confugerem ad Sanctissimam Virginem suam Matrem; ad quam vix dum fini-

finiveram meam affectuosam petitionem, cum humores velut in lapides concreti prodiverunt ex corpore, qui me tantopere excruciauerunt. Exstant hodieque illi lapides ante miraculosam Imaginem DEIPARÆ in Collegio Anglicano Vallisoleti, authenticum testimonium miraculi, à Beatissima Virgine patrati, ac dolorum, antè à Venerabili Virgine Marina toleratorum.

VII. Aliàs dixit illi S. Angelus Custos, quòd à dæmone (qui eam ultra viginti annos fuerat persecutus) tunc, quàm sollicitissimè DEO permittente dilanietur quibusdam acutis uncis ferreis, tam properanter, quàm textor celeriter jactat liciatorium, texendo telam. Vidit etiam juxta se quasdam flammæ ignis excitati à dæmone, quas illi ingressit, unde provenerunt illi calores. Narrat etiam ipsa de se in Julio An. 1623. in alijs cruciatibus mihi videbantur dilacerari viscera, & putabam me comburi. Gemebam ob vehementiam dolorum, quibus non eram ferendis, & non sciebam tum, quis me discruciaret. Dominus autem mihi ostendit multos diabolos in specie rabidorum canum, qui latrabant, & me invadebant, ut me morderent.

CAPUT VI.

Paupertas Venerabilis Virginis Marinae.

L

AMavit semper Paupertatem, & primis annis ab obitu sui Parentis se voto Paupertatis obstrinxit non perpetuo, eò quòd ex justis considerationibus, à suo Confessario permissa non fuerit. Renunciavit legitimæ sibi à Parentibus relictæ, seque exspoliavit facultatibus, & vixit eleemosynis, quæ illi à devotis Personis dabantur. Tunc apparuit ei S. P. Dominicus, rogavitque illam, ut recurreret ad suos Religiosos, & ad suum Conventum pro petendis necessarijs, promisitque fore, ut in illius Ordine adjuvaretur, tam in spiritualibus, quàm in-

D d

tem-

temporalibus, quamdiu victura esset. In festo S. Thomæ Doctoris Angelici non habebat, quo vesceretur, gratias agens DEO, quòd se videret tam pauperem. Tum pulsavit ipsius fores quidam Religiosus Dominicanus ex Conventu S. Pauli, quem illa noverat, & ingressus ejus cubiculum, invenit ipsam abreptam in DEUM, reliquitque penes illam, quod æquabat pretium duorum ducatorum, monetæ argenteæ; & subito discessit. Obstupuit Divinam Bonitatem Virgo, & quomodo S. Dominicus sibi tam citò subvenisset per illum Religiosum, qui ad eum usque diem nunquam ipsius domum intraverat. Deinceps autem illi semper & omni occasione Ordo S. Dominici succurrebat, ut Patri Fratri Andræ de Ponte solita fuerit dicere sanctè jocando: bene apparere, sanctum Dominicum fuisse nobili stirpe progenitum.

II. Afflictissima vixit, quòd sibi videret suppeditari necessaria, usque ad abundantiam, ideòque dicebat DEO: Mi Domine, quare à me vis haberi istud stercus? sic enim appellabat pecuniam; & rogabat, ipsum instanter, ut sibi illam auferret, darètque licentiam ejus non acceptandæ. Divina Majestas respondit: bene eam impendis, in sublevandos orphanos, & cætera, quæ tibi injungo. Ecce hæ eleemosynæ, si à te non acceptarentur, fuissent malè insumptæ: danturque tibi ex devotione, quæ erga te feruntur: & si tu eas non susciperes, ipsi non promererentur præmium, quod illis à me dabitur. Noli affligi, nescis enim meas intentiones; & propterea fac, quod te facere jubebunt tui Confessarij. Et verò ita faciebat: nolebat enim suscipere eleemosynas, nisi ab ipsis approbarentur, & habità ab iisdem facultate. Atque accidit aliquando, ut missam sibi à quadam Moniali ex Conventu Matris DEI, eleemosynam non attigerit, donec mihi suà manu scripisset schedam, quàm servo, perens à me veniam illius acceptandæ. Hucusq; P. F. Andreas de Ponte Dominicanus, germanus frater Ven. P. Ludovici de Ponte.

III. Pa-

III. Pater Michaël de Orenia post alia supradictis similia, de hac materia dicit: Ea, quæ illi dabantur nomine eleemosynæ, non habebat pro suis facultatibus, sed sumendo indè, quantum præcisè erat necessarium pro sustentatione propria & Virginum, quas penes se habebat, reliquum existimabat spectare ad DEUM, tantumque impendebat in opera concernentia ipsius honorem, quæ illi Divina Majestas inspirabat: ac proinde ex his eleemosynis ipsi oriebantur curæ, partim ut se quàm gratissimam ijs exhiberet, à quibus afferebantur (quia gratitudinis virtute plurimum excellebat) partim ut assequeretur voluntatem DEI in electione operum cedentium ad ejus obsequium, quibus à se essent impendendæ. Solebat dicere, maximum esse habituram solatium si nihil haberet: quæ autem habebat, deponebat semper ad pedes DEI rogans illum, ut ab ipso edoceretur, in quid eas eleemosynas ad majorem suam gloriam vellet infumi: propter quem zelum & sanctos affectus charitate plenos, illi DEUS tam opportunè & amanter usque ad abundantiam providebat. Cum verò deficerent nonnullæ eleemosynæ, ob absentiam vel mortem eorum, à quibus illi dabantur, statim Divina Majestas excitabat cor aliorum, qui ipsoꝝ vices supplebant. Nuncupavit quoque hæc Virgo votum, non habendi ulla bona stabilia ex sua voluntate, nisi illi id injungeretur à suo Confessorio, qui tunc erat P. Petrus de Leon, quod fecit Anno 1597. sicuti mihi constat ex quadam scheda, quam suâ manu scripsit.

IV. Domina Angela de Oforio jurat se audivisse hanc Virginem, postquam renunciavisset suæ legitimæ, suo se sustentavisse labore, nihil temporis otiosè conterendo, tametsi esset admodum debilis & morbida; atque addit, ipsammet aliquoties narravisse, ridere fuisse solitas suas Sorores, quòd earum domum frequentarent fœminæ rusticanæ, interrogantes de Netrice Fonsaldanensi, siquidem ipsa pro eo oppido, & alijs vicinis pagis nebat, quæcunque poterat. Postquam illi DEUS sub-

venit eleemosynis, dicebat: nihil eorum, quæ habeo, est meum, omnia sunt DEI: ego solummodò sum pauper œconomus, optans bonam reddere rationem. Faxit ipse, ut eam reddam exactam, meque conformem cum sanctissima ipsius voluntate. Quando illi agebantur gratiæ, quòd aliquam collocavisset in monasterio, respondebat: Ego nihil ago, neq; aliud sum, quàm miserabile instrumentum: meæ Dominæ & Amicæ totum præstant propter DEUM.

V. Idem jurat Mater Maria de Sanctissimo Sacramento. Mater Soror Mariana de CHRISTO, post alia, concludit suum juramentum his verbis: Quando isti Venerabili Virgini & Dominæ mittebantur aliquæ eleemosynæ, audiebam illam dicentem: Benedictus sit DEUS, qui ità providet suis creaturis. Sorores meæ (sic nos appellabat) habetote magnam fiduciam in DEUM, ipse enim vobis subveniet; non solùm in spiritualibus, sed etiam in temporalibus: & hac de re nobis multa dicebat. Ego novi omnes octodecim Virgines, quas ista sancta Virgo promovit ad Ordinem Religiosum, & vidi meis oculis, quasdam emittentes professionem; alias suscipientes habitum, & omnes scio esse professas. Constat mihi quoque, precibus ipsius, & consilio factum esse, ut multi alij tam viri, quàm foeminæ ingrederentur Religionem, & alij inirent matrimonium, quibus illa præbuit necessaria subsidia.

VI. Mater Joanna de CHRISTO Professa in Conventu S. Annæ, post alia narrat, quòd in hoc genere est singularis exempli, cùm nostra Virgo jam fuerit septuagenaria, ac ità morbida, sicut fuisse novimus, quando illa ipsi convivebat; sic verò dicit: Erat adeò accurata, ut si pauxillum carnis ex olla, quæ illi hodie coquebatur, remansisset, juberet sibi eam dari postridie. Atq; si interdum eveniebat, ut ipsi opus esset, propter magnam quampiam stomachi debilitatem, subvenire aliquo cibo; quamvis residuum illud minùs esset aptum, extaretque domi, quod illi

illi magis conducere; nunquam poterat persuaderi, ut fumeret, seu comederet aliud, quàm illud modicum, quod eo die vel præcedenti superfuisset.

VII. Concludo hanc materiam juramento Dominae Magdalena de Cisneros, quæ fuit amica hujus Virginis ultra sexaginta annos, & insignis ejusdem benefactrix. Sic autem ait: Quando Domina Marina erat octodecim circiter annorum, conveniebam ipsam in templo Domus Professæ Societatis Jesu, & optimè recordor, illam tum habitam pro sancta, atque ut talem observatam & æstimatam fuisse. Ego attentè contemplantur ipsius vultum, & optimè in eo advertebam venustatem animæ illius ac virtutum. Rara erat ejus modestia, & in ipso vultus colore deprehendebatur quiddam supernaturale. Semper vidi hanc de ea famam continuari ultra sexaginta annos, quibus dum familiarissimè cum ea conversarer, quidquid in ea vidi, me confirmavit in hac opinione, de rara ipsius sanctitate: atque, postremis his vitæ annis, quibus cum ipsa egi, mihi in illius vultu fuit ea coloris supernaturalitas repræsentata, ut me redderet attonitam, ac demonstraret divinos affectus, qui in corde ipsius ardebant. Novi quandam Personam fide dignissimam, quæ egit testem, quando hæc sancta renunciavit legitimæ suorum Parentum, & vidi meis oculis singularem providentiam, quam Divina Majestas habuit, ut tam ipsi, quàm illis, quas domi suæ alebat, de omnibus necessarijs prospiceret. Experta quoq; sum in me rem prorsus singularem & est, quòd non solum magnâ animi voluptate succurrere fuerim solita, sed etiam nunquam notaverim in mea domo deficere id, quod dabam isti Servæ DEI. Contigit quoque mihi, ut cum redditus mei essent moderati, ipsi intrâ unum annum dederim ducenta scuta, quin tamen adverterim illorum defectum, aut me ijs caruisse: quod semper existimavi fuisse miraculū, quo Deus volebat significare, quantopere ipsi placeret data huic Dominae eleemosyna.

CAPUT VII.

Castitas Venerabilis Virginis Marinæ de Escobar.

I.

DEUS Dominus noster. (ut loquitur Venerabilis P. Ludovicus de Ponte lib. I. c. 12.) dedit huic suæ famulæ jamindè ab ipsius infantia singularem affectum ad Castitatem perpetuò servandam, cum speciali quodam ac raro privilegio, ut caro quoad hoc, non rebellaret spiritui, sed semper illi esset subjecta.

Aliam præterea gratiam non minùs raram illi præstitit, præservando illam à molestijs, tentationibus, & persecutionibus, quas contra hanc virtutem suscitant dæmones, ità ut quamvis allumerent horrendas figuras bestiarum, & truculentorum hominum, ad illam terrefaciendam, & cruciandam, dicerentq; ipsi enormes contumelias, ac blasphemias; nunquam tamen illis Deus dederit facultatem, exercendæ fædæ alicujus actionis coram ipsa, vel proferendi verba turpia, quæ potuissent virginicos ejus oculos & aures offendere.

Præterea dedit illi Deus quandam modestiam naturalem & inusitatam circumspeditionem, ità ut, quando prodibat ex domo ad templa vel aliò, prout illi Deus præcipiebat, vel inspirabat, semper ambularet intrà cellam sui cordis, cum assidua collectione, atque tali modestia, gravitate & quiete, ut nemo illi auderet dicere quidquam indecens, sed omnes componeret. Tam firmiter decreverat servare perpetuam Castitatem, ut ei non venerit in mentem consecrare illam, & confirmare voto, donec ipsam Deus post completos 40. annos ætatis illuminavisset, id esse melius, sibi que magis placere: atque tum collato mecum (ait Pater Ludovicus) consilio, hoc fecit in festo Nativitatis, Anno 1595.

II. Ex

II. Ex hac tam exacta puritate processit, quod etiam cum ipsis Angelis, qui illi semper aderant, ageret mirā circumspeditione. Non intuebatur ipsorum vultum, nisi rarissimè & obiter. Diverso item modo aspiciebat Sanctos & Sanctas, atque eos, qui ipsi comparebant in specie infantili, vel ætate provectā, cum omnibus se gerendo eā modestiā, quā decebat, ut se gereret cum talibus personis. Quando in lecto decumbebat tam debilis, ut se non posset erigere, nec vertere ex uno latere in aliud, accedebant, quotiescunque eorum operā indigebat, ad illam juvandam sancti quatuor Angeli, & Angelus Custos summa cum honestate ac decentia. Quamvis enim illi inservirent in ea apparente forma suis brachijs, juvabant tamen ipsam modo quodam spirituali, & Angelico, itā ut non sentiret contactum corporis humani; atque quā verecundissimè averterent vultus.

Cum quadam vice haberet brachia extra togam, vellētque illa in ipsam imponere, nec posset ob suam debilitatem; accessit Angelus minimus, qui præ se fert speciem biennis pueruli, ut eam juvaret: ipsa verò retraxit brachia, & noluit juvari. Dixit illi Angelus: quid times, ego enim non sum caro, sed spiritus: & licet essem præditus carne, ob ætatem tamen, in quā me vides, tibi non esset timendum.

III. Aliās cum eam visitassent Sancti, Franciscus, Ignatius, & Dominicus: & S. Franciscus pervenisset ad me (inquit ipsa) extendit manum quasi attrectaturus meam. Fui vehementer turbata propter solum illum gestum, retraxique me celerrimè, ac si esset homo mortalis, qui id vellet facere. Ipse autem subrisit, ac dixit: quare turbaris? an ignoras, hoc non esse verum meum corpus, sed umbram & figuram illius, quod habui, quam assumpsit meus spiritus? Itā recessit, ac appropinquavit S. Ignatio, intuendo ipsum cum quodam risu, quasi illi diceret, ut consideraret, quid contigisset, & quā bonum fuisset illud experimentum. Sanctus Pater Ignatius autem respondit: admiranda est puri-

puritas hujus creaturæ, quoad istam materiam Castitatis. Propter hoc Sancti responsum fui turbata, & magis afflicta, quasi me puderet illius dicti, quod audiveram; S. Dominicus me animavit, & reliquit plenam solatio.

Similiter lib. 5. part. 1. c. 13. refertur, quomodo noluerit omnino colloqui cum duobus sanctis Angelis, eò quòd comparerent vestiti instar adolescentulorum, donec ei in alia specie apparerent.

IV. Et parte 2. lib. 1. c. 19. apparuit illi Ven. P. Ludovicus de Ponte, dixitque illi: modò Anima libenter cum Domino ires ad cœlestem Patriam: ego te ducam, veni mecum. Omnino, respondit Venerabilis Marina, libenter eò pergerem, fateor; nolo tamen sancte Pater, ut à te ducar. Quare autem, quaesivit ipse. Quia es vir, aiebam ego, & non soleo comitari viros. Quamprimum id protuli, comparuit Marchio septem Ecclesiarum (nempe D. Rodericus Calderon, magnus in vita ejus amicus, de quo multa part. 1. l. 5. c. 8.) admodum hilaris, dixitque: Etiam ego illam pari ratione aliquoties invitavi. Subjunxit tunc P. Ludovicus: nōne verò Sancti DEI, qui te visitaverunt, & interdum duxerunt, sunt Viri, quales nos? Ità est, respondi, sed quia illos in vita mortali non noveram, non me reddiderunt ità perplexam. Si DEO placet, ut proficiscar ad cœlestem Patriam, ducent me sancti mei Angeli, sicut plerumque solent. Sancti approbaverunt meam tergiversationem.

Denique circumspectio hujus Virginis, quâ in sua juventute cavebat virorum conspectum, & consortium, adeò illi profundè inhæsit, ut etiam grandæva modestè verecundaretur sancteque metueret, visâ tantum humanâ virorum specie, quâ se ipsi spectandos exhibebant Sancti: cujus rei mira sunt in ejus vita exempla.

V. Pater Michaël de Orenia ait se novem annis, quibus illi fuit à confessionibus, istud raræ ipsius puritatis indicium agno-

agnovisse, quòd ab ea nullum propè verbum audiverit concernens hanc virtutem aut vitium contrarium, sed profundo istam habuerit materiam silentio sepultam, ac si foret purus spiritus.

Mater Maria de Sacramento post enarratum votum & puritatem hujus Virginis, atque circumspèctionem, quam suas socias docebat, subjungit: quanquam speciale habuerit à DEO donum, ad consolandum dandúmque consilium in afflictionibus internis, de rebus tamen spectantibus ad Castitatem, nihil noverat loqui, nisi obiter, nec illas intelligebat, dicebátque his occasionibus, se ignorare, quid posset dicere, eò quòd sibi DEUS nihil in hac materia confidisset.

VI. Et verò admirabile est, quòd nec ipsa S. Fidei nostræ mysteria ei DEUS voluerit revelari cum eis circumstantijs, quæ virgineo illius pudori potuissent videri minùs congruere. Ità parte 1. lib. 2. c. 8. cùm ei repræsentaretur mysterium Circumcisionis, omnia vidit usque ad ipsum actum Circumcisionis, quando DEUS ei immisit somnum, ut obdormiret donec actus ille perageretur, nè Circumcisionem ipsam aspiceret. Sic ipsa narrat. Obambulabat ibi S. Josephus disponendo ea, quæ erant facienda pro Circumcisione. Ista omnia hinc mihi quidem cor præ dolore dilaniabant; indè verò me rubore suffundebant, & pudefaciebant, expendentem gratias, quas mihi Dominus præstabat, ità ut si Dominus permisisset, egressa fuisset ex stabulo: quocirca me subduxi; & quia habui caput vehementer fatigatum, volui modicum dormire. Cùm autem quasi essem sopita, audiivi vagientem sanctissimum InfanTEM JESUM, ideòque fui subito expergefàcta, & vidi illum in brachijs suæ sanctissimæ Matris, jam enim fuerat cessatum à vulneranda ejus carne.

Ec

CAPUT

CAPUT VIII.

Obedientia Venerabilis Marinae de Escobar.

I.

Venerabilis Marina de Escobar tanti fecit obedientiam; quam exhibebat Confessarijs, à quibus regebatur, ut nec attentaret quidpiam agere contra illorum iudicium: sed neque quod à DEO jubebatur facere vel dicere audebat exequi absque prævio Confessarij consensu: intelligebat enim hanc esse voluntatem DEI. Narrat ipsa parte 1. lib. 1. c. 19. sequentia: Cùm DEUM interrogarem: mi Domine ego persevero in eo proposito ac decreto, quod tua Majestas meae indidit Animæ & est: quòd tanti faciam Obedientiam, quam me jussisti exhibere illi, quem mihi dedisti Magistrum, ac Ducem, qui me doceat, ac ducat per viam tuæ voluntatis, ut etiam si tuo illustrata lumine noverim absque ullo dubio, quædam esse tuæ conformia voluntati, propterea que illa facerem, possemque peragere, cum magno solatio; nihilominus si meus Confessarius mihi præciperet contrarium, subjicerem meum intellectum & voluntatem ipsius iudicio, ac voluntati: quia existimo me tibi magis ita placitum, & sic me esse à te instructam. Quæ est tua hac super re sententia, mi Domine? Respondit mihi Divina Majestas: mea sententia est te optimè procedere, neque mihi id displicet, quod dicis. Quando enim subjeceris tuum intellectum, ac voluntatem illi, cui teneris obedire, & qui te debet docere, tibi que præcipere, non habebit locum diabolus, ut te possit decipere falsitatibus, erisque hoc modo securior. Æquum præterea est, ut hæc Obedientia exhibeatur ideo, quod ego in mea Ecclesia reliquerim hunc Ordinem, & hoc remedium ac solatium pro omnibus fidelibus, quò habeant Magistros ejusdem secum naturalis, ac visibilis naturæ, ut possitis ipsos intelligere, ac vicissim

ia-

intelligi ab illis : qui Magistri si sequantur *directionem Scripturae Sacrae* non errabunt ; ac proinde quilibet potest esse securus & acquiescere ipsorum iudicio in suis dubijs.

II. Magno tenebatur desiderio nuncupandi votum Obedientiæ præstandæ suo Confessario ; qui tamen illi ea in re contradixit , siquidem Confessarij Societatis expressam habent regulam , quâ jubentur non admittere ejusmodi vota eorum , quibus peccata confitentibus præbent aures , præsertim fœminarum. Ipsa tamen perseveravit ultra unum annum in petenda facultate à suo Confessario emittendi sui voti , & rogando DEO , ut sibi id concederetur. Cum his desiderijs aliquando inter orandum elevavi (narrat illa) oculos Animæ & vidi adesse nostrum S. Patrem Ignatium , qui mihi dixit , quasi ad me probandam : Quid tibi videtur de eo , quod petis ? itane vis , ut mei faciant , quod illis prohibui in mea regula ? Ego propterea fui vehementer confusa , & respondi illi : verè ego , sancte Pater , nolo à meo Confessario fieri , quod tu ipsi prohibuisti , & reliquis Religiosis Societatis : sed quod vellem , est , si peragi potest , annuentibus Superioribus , sinè violatione regulæ , ut cum ego sim quoddammodo Filia Societatis , quamvis indigna , cumque ipsa me educaverit suâ doctrinâ , & instructione , mihi præstaretur ista Charitas , & hoc beneficium , quò admitterer ad ejus obedientiam. Tum mihi dixit noster S. Pater Ignatius : unde ? nec enim es ita domestica , sicut tibi esse videris ; statimque disparuit.

III. Egò magis mansi confusa , & cum hærerem dubitans , quid mihi esset agendum , confugi ad DEUM dicendo illi : mi Domine , vultne tua Majestas , ut me obstringam hoc voto ? Respondit Divina Majestas , ut convenirem Ignatium , & rem istam cum ipso transigerem , esse enim ipsius negotium. Quo responso aliquantum fui afflicta , quòd recorderer me non fuisse à sancto nostro Patre Ignatio exauditam.

Visitavit illam in suo festo sanctus Bonaventura, cui illa hoc suum desiderium aperuit rogando humiliter, ut ipse à sancto Patre Ignatio ei hanc facultatem peteret. Sanctus Doctor dixit se id facturum, statumque illa vidit ipsum in spiritu loquentem in cœlo cum glorioso Patre sancto Ignatio, & allegantem illi quasdam rationes propter quas non violaretur regula, tamen ea licentia concederetur. Summè sancto Patri placebant illæ rationes, sed significabat id à se procrastinari, etiam ideo, ut disceret Ven. Marina esse patiens, evaderetque robustior.

IV. Narrat ibidem Ven. Pater Ludovicus de Ponte etiam aliam fortè fuisse causam; quia ipsa erat de se timida, & scrupulosa, ac facilè quâlibet re turbabatur, quam illi Confessarius dicebat, adeò, ut contremisceret; & quidem illis ipsis diebus præter morem magis à colloquio cum Confessario recedebat turbatior plena imaginationibus ac scrupulis, etsi ignoraret, unde talis anxietas oriretur. Tandem post istam tempestatem cum facultate & benedictione nostri sancti Patris Ignatii emisit suum votum non perpetuum, sed ad vitam præsentis Confessarii, qui tunc erat Pater Petrus de Leon, neque de omni materia, sed solummodo circa solam Paupertatem, in qua nonangebatur scrupulis. Hoc votum permittente pro eo tempore Patre Provinciali acceptavit P. Petrus de Leon: quo vita functo P. Ludovicus de Ponte, qui ei successit non consensit, ut votum illud renovaret.

V. Pater Michaël de Orenia in processu pro ejus Canonizatione juravit se novem annis, quibus ipsius Confessarium legi, esse ejus obedientiam expertum. Quo tempore, ait, aliquoties evenit, ut illuminaretur à DEO ad aliquid agendum, aut dicendum: & cum ego non consentirem, ut fieret, vel diceretur, obtemperabat, penitusque intermittebat, quod statuerat, DEO semper commendans imperatam sibi ab eo executionem, ut ipse sècundum decerneret, quod esset, quàm convenientissimum. Et
exau-

exaudiebatur à Divina Majestate, ut semper in hujusmodi occasionibus, meum animum ita disponeret, ut sponte atque ex interno motu, & inventis congruis rationibus, quibus ea refellebantur, quæ mihi antea contrarium svadebant, approbaverim, quod ipsa agebat se intellexisse à DEO, illique injunxerim, ut sic faceret vel diceret. Ex bonis autem effectibus inde procedentibus, experiebar, ac advertebam eam prudenter agere, & regi à DEO.

VI. Demonstravit quoque DEUS paternam in hoc genere suam providentiam; veluti quâdam vice, dum Virgo, quod pateretur ardentem sitim, & quæ aderat aqua, esset valde calida, petijt à suo Confessario facultatem, ut afferretur modicum nivis, cui admoveretur poculum aquæ refrigerandum. Confessarius id ipsi negavit, putans non esse tantam necessitatem; ac aliàs, & revertebatur domum. Unde Virgo mansit afflicta ob vehementem efferatam sitim, cum eo tamen solatio, quod eam toleraret ex obedientia. Verùm vix Confessarius è Virginis domo est egressus, quando repentè fuit mutatus aër & cœlum, stupente dicto Patre tam subitam mutationem. Cùmque nimbus grandinis decidisset in aream ejusdem Virginis, quædam puella ibidem habitans, mota (ut fuit existimatum) à DEO, eandem collegit, & superposuit lagenæ plenæ aquâ. Quando autem advenit hora vespertina, quâ Sanctæ ægrotanti præbenda erat illius cænula, infusa illi fuit illa aqua; dum verò animadverso algore quæreret, atque audiret causam, agnovit, cum sua magna erubescencia, effectum Divinæ Bonitatis, & Liberalitatis, mihi que postea retulit, quod evenerat.

VII. Nullam alicujus momenti epistolam mittebat, quam prius non tradidisset alicui Confessario suo manifestandam. Quando illi aliquid injungebatur à DEO, nihil exequiebatur, antequam id Confessarij expendissent, & mandassent. Et frequenter dicebat, nullum sibi alium à DEO relictum fuisse modum

securè procedendi, quàm regulam Obedientiæ suis Confessarijs.

VIII. In sua Juventute optavit fieri Carmelitana discalceata, quod proposuit sanctæ Matri Theresiæ, quæ tum degebat Vallisoleti fundando suum Conventum. Sancta Mater examinavit ipsius desideria, & pollicita est, quòd ipsam ibi esset susceptura. Ivit postea hæc Ven. Virgo, ut resciret diem, quo sibi conferendus esset habitus, & quomodo se ad id disponeret. Sancta verò Theresia illi ex revelatione dixit: ipsam à Divina Majestate servari ad majora; dimisitque illam dicendo, nè de eo negotio amplius ageret. Hoc ipsa Domina Marina Patri Fratri Andreæ de Ponte sæpius narravit. Svadebat suis Sociabus, ut omnia panderent suis Confessarijs suoque exemplo illas permovebat.

IX. Mater Maria de Sacramento refert frequenter evenisse, ut illi valde serò adferrentur litteræ alicujus momenti, quæ velox responsum pro solatio proximorum exigent. Quia verò illa horâ non poterant adesse Patres, & interea ipsa Maria videret eam dolenter optare, ut responsores expedirentur, dicebat ipsi: mittantur nunc, mea Domina, hæ litteræ, postea id expones tuis Confessarijs. Respondebat: minùs refert illas non mitti, per hunc veredarium, quàm expediri non lustratas prius à meis Patribus; hoc enim est securum. Benedicta sit Divina Majestas, quòd nobis in sua Ecclesia tam grande bonum reliquerit. Equidem ignoro, quomodo solatium habere possint, qui proprium caput sequuntur. Inter alias vices aliquando vidi scriptam ab ipsa fuisse epistolam magni momenti ex inspiratione DEI, qui mandaverat, ut illam mitteret. Consenserat etiam unus Confessariorum: sed alter non ità erat promptus, quia ipsi res hæc videbatur continere aliquid minus conveniens. Quapropter expeditio istius epistolæ fuit diu dilata. Ego illi dicebam (ait Mater Maria de Sacramento) Domina expediatur hæc

hæc epistola, cum id Divina Majestas jubeat, & ille Pater approbet. Sancta verò mihi respondit: tace, quia id non intelligis. Egone istud faciam? non incumbit mihi hujus rei cura, sed DEO; ipse de ea disponat, quando illi placuerit, & sicut fuerit sanctissima ejus voluntas. Et re verâ ita Deus disposuit; epistola fuit expedita, habuitque effectum desideratum. Multa hujusmodi sunt visa.

C A P U T IX.

Virtutes Theologicæ ac Cardinales Ven. Marinæ.

I.

Pater Michaël de Orenia, ut & P. Fr. Andreas de Ponte, in suo juramento pro informatione ad Canonizationem Ven. Marinæ hæc protulerunt: Fides, quam hæc famula DEI habuit, de divinis mysterijs, agnosci potest ex magnitudine luminis, quod illi DEUS ad ea penetranda communicaverat. Dicebat enim se vehementer mirari, potuisse in ullum intellectum cadere dubium de illis veritatibus. Hinc fiebat, quod differendo de his mysterijs, non loqueretur, quasi illorum notitiam haberet ex solo Fidei lumine, sed acsi ea vidisset. Tanta erat claritas, ac facilitas, quâ ab illa explicabantur.

II. Pater Frater Andreas de Ponte, de ejus virtute Spei sic loquitur: semper in ipsa, quamdiu cum ea sum versatus, spatio 36. annorum, agnovi illam cum magna suæ salutis spe vivere. Ac proinde licet in ipsius scriptis toties legantur anxietates, dubia ac timores, in quibus vivebat; nunquam tamen versabantur circa salutem, sed circa viam tot visionum, quâ à DEO ducebatur, an foret secura.

III. Pater Michaël de Orenia addit: solebat mihi multoties dicere, suam animam esse instar aviculæ, quam aliquando vidisset uno pede alligatam filo, semperque sursum evolantem,

&

& conantem se solvere: quæ si id potuisset assequi, sustulisset se in ærem, effugiendo hominum conspectum: atque sic animam suam mortalitatis catenis vincitæ semper volitare affectibus, cupientem dissolvi, ut frueretur stabilitate illorum immortalium bonorum, quæ ipsi diu nocturneque ad ea aspiranti toties Deus ostendebat. Dicebat mihi quoque se interdum quærere ex Divina Majestate, quandonam futurum esset, ut illucesceret ille exoptatus dies: & responderi sibi à Domino, ut se non affligat, brevè enim futurum; statimque subjungebat: Ah Pater! quàm diuturnæ sunt breves moræ DEI. Hæc tamen ardentia desideria erant cum tanta voluntatis resignatione, ut diceret se, dummodo esset voluntas DEI, & aliquâ ratione prodesse posset suis proximis, libentissimè hic permanfuram, ad finem usque mundi. Domina Magdalena de Cisneros jurat, Venerabilem hanc Virginem de desiderio suo moriendi loqui consuevisse, cum magno affectu, immutataque facie vultum præ se tulisse coelestem, incitantem ad laudandum DEUM.

IV. Cum utraque pars vitæ ipsius plena sit innumeris argumentis, & exemplis, igniti illius Amoris erga DEUM, nimis prolixum esset velle exactè ea, quæ ad Charitatem erga DEUM pertinent, conscribere, adeoque tantum carptim, quædam huc adducemus, cum sit cuique primum, inspicere quodcunque, ut sic loquar, folium ejus revelationum, ut statim incidat in aliquod specimen talis Charitatis. Videatur Pars I. lib. I. c. 8. ubi inivit cum DEO pactum, ut omnia DEO daret, solum pro eo, ut eum amaret: quod pactum scripto ab Angelis confecto confirmavit. Et cum his desideriis dixit aliàs ad DEUM: mi Domine, quid faciam, ut tibi placeam? emorior præ desiderio tibi placendi, & darem mille vitas, si eas haberem, atque omnem sanguinem meum pro eo, quod desidero. Impera mihi aliquid, Bonum meum; adsum enim prompta ad omnia, quæ mihi volueris imperare, quamvis me jubeas sustinere maximos dolores, & cor-

& corpus meum projici in grandem rogam, quo consumatur. Et in eo loco consequenter elegantissima habet documenta per suam experientiam, de insatiabilitate amoris DEI, illustrata. Unde etiam conscripsit lib. 5. c. 29. sex media consequendi perfectum amorem DEI, nec non sex impedimenta ejusdem assequendi. Videatur etiam part. 2. l. 1. c. 9. 10. 11. ac 12.

V. Præterea supremus effectus divini Amoris, est intima unio animæ cum DEO; ipsa autem innumeris vicibus, fuit admirandis modis DEO unita. Sed & valde admirabile est, ac profundissimum, quod illa explicat part. 2. lib. 2. c. 34. pag 364. de illo actu S. Augustini, ubi dicebat: *Domine, si ego essem DEUS, & tu esses Augustinus, ego vellem esse Augustinus, ut tu esses DEUS.* Explicans ergo Venerabilis Marina stupendos effectus amoris DEI, & resolutiones Animæ concludit his verbis: Hoc autem Anima facit cum tam profunda sui judicij, & clarâ deliberatione, tam impetuosa sui affectus vehementia, ut si per impossibile commutatis vicibus fieret DEUS, atq; DEUS in ipsam converteretur; indubitanter existimet, quod se abdicatura esset Divinitate, ut eam possideret ipsius Dilectus: & redacta ad inopiam, mendicitatem ac miseriam, summè gauderet, quod illam permutationem fecisset in ejus honorem.

VI. Hanc ejus Charitatem erga DEUM sic P. Fr. Andreas de Ponte juratus describit: Æstuabat amore DEI, & hinc derivabantur in naturam magni ardores externi, ut ipsi necesse fuerit succurrere aquâ. Erat notorium inextingvibilem sitim, quam patiebatur, processisse ex incendijs hujus divini Ignis.

Pater Michaël de Orenia prolixius jurat sequentia: Effectus hujus amoris, qui sensibus percipiebantur, ego ipse frequenter observavi ex calore, quem respirando meæ manui imprimebat, dum illi porrigerem epulum Eucharisticum. Et quia illam videbam grave corporis patientem incommodum, propter incendium, quod in illud derivabatur ex Anima, impera-

F f

bam

ban ipsi, ut temperaret vehementiam affectuum Amoris Dei, ad laborando, ut isti remanerent in superiore animæ parte, cohibitis, quoad fieri posset, potentijs materialibus. A Medicis ob notitiam & experientiam, quâ perspectos habebant hos affectus, jubebatur interdum sumere aliquos aquæ haustus, ad temperandos illos ardores, qui erant tanti, ut mihi aliquando Marina de Hernandez ipsius socia, magna Dei serva, dixerit, videri sibi Dominam suam torrerì ad ignem.

VII. Mater Maria de Sacramento jurat sequentia; quia Amor Dei, qui in ipsius corde ardebat & pectore, adeò erat vehemens, tantique inde procedebant ardores in vultum & manus, ut nos in rigore hiemis oportuerit flabello chartaceo excitare ventulum, ad dictas manus refrigerandas, quod viderentur aduri; porrigebamus illi idcirco aliquot haustus aquæ frigida propterea, quòd cibus in ipsius stomacho combureretur. Aliàs in ea attollebatur ipsa pectoris latitudo, eratque necesse, illud totis viribus, quibus ego & meæ sociæ valebamus, comprimere. Addit Domina Angela de Oforio tantâ interdum visuisse superficiem pectoris & stomachi elevatam, ut cum nec ipsa, neque sociæ possent illum impulsu coërcere, solitæ fuerint adhibere patinam ligneam, quam ipsi omnibus viribus apprimebant, ad eum cohibendum. Medici quoque testabantur varia se in ea deprehendisse incendia, quorum causa non potuerit esse naturalis, sed processerint ex ardore amoris divini. Hinc non est mirum, quod omnes tituli, quibus Sancti Patres & Doctores compellant charitatem, fuerint tam vivaciter in hac felicissima Virgine expressi, ut nihil scripserit, nullum peregerit negotium, & nè verbum propè sic locuta, quod hanc virtutem manifestè non indicaret.

VIII. Quod Virtutes Cardinales attinet, de ejus Prudentia agemus in secunda Parte hujus Tractatus. De Temperantia ejus non est, quod quærat, cum ex omnibus appareat fuisse sum-

summam. Justitia emicuit in distribuendis eleemosynis, quas illi DEUS submittebat, nihil amplius suis consanguineis tribuens, quàm alijs in simili penuria constitutis, ut nulla unquam importunitate posset flecti ad cedendum affectui carnis & sanguinis. Sed Fortitudo erat ad miraculum heroica in tolerandis tam gravibus, & tam coacervatis molestijs, quibus illam Divina Majestas probavit: in exequendis cum admirabili perseverantia, bene cæptis, nè minimum ab eis desistendo, quæ semel prudenter decernebat, esse è majore DEI gloria.

CAPUT X.

Charitas erga Proximum.

I.

Tanto admirabilis hæc Virgo deplorabat dolore calamitates suorum proximorum, ut solita fuerit suis Confessarijs dicere, quòd hac de causa sibi jam cor sit disruptum, & consumptum: atque si DEUS molestari posset, pridem illum jam molestiâ affecisset, ac fatigavisset suis importunis postulationibus, diu nocturne ipsum invocando & rogando, ut compateretur imbecillitati, ac miseriæ humanæ. Multa illi DEUS revelabat de corruptis moribus, perditione & damnatione Animarum: quod nihil erat aliud, quàm ligna adjicere ad ignem, quo vehementius ureretur earundem salutem instantius petendo. In diversis verò personis fuerunt animadversari eventus efficacis, quæ his inerat precibus, ut defererentur peccata, & obtineretur Gratia DEI.

II. Ex eadem charitate provenit ille conatus, quem à DEO significante ipsi expressè suum beneplacitum, compulsæ, adhibuit in fundando & reformando Ordine S. Brigittæ in Hispania, ad tantam DEI gloriam, & fructum jam sub hac Regula militantium Animarum, ut speretur, DEO favente, magnis per totum

tum Regnum dilatandus incrementis. Animavit Deus hanc suam insignem Servam ad molestias, ac difficultates, quas in isto negotio erat perpeſſura; præſcripſit illi, quid facere deberet, ſi ab ejus Majestate auferretur ex hac vita, antequam executioni mandaretur Fundatio primi Monasterij. Deſignavit ipſi novas Regulas, quæ eſſent addendæ, mutatis, aut reformatis antiquis & accommodatis ad præſentia tempora atq; genios noſtrorum Regnorum: eaſdemq; illi Regulas, cum jam conſcriptæ fuiſſent, exhibuit inſculptas cordi & pectori JESU CHRISTI Domini noſtri, ut ipſi ſignificaret, omnes eſſe ſuas, & illas velut ſuū opus à ſe amari: ſeq; velle, ut tanquam tales obſerventur.

III. Viſitavit noſtram Virginem initio hujus moliminis Beatiffima Virgo Domina noſtra unâ cum S. Brigitta, quæ illi oſtendit, qualis eſſet ſuæ Religionis proprius habitus, cujus antehac Venerabilis Marina nè minimam habuerat noticiam, juſſitq; ipſam ad dictum habitum adjungere Scapulare, ut ſe comuni Monialium in Hiſpania uſui conformaret. Mandavit illi denique CHRISTUS Dominus, ut nomine ipſius diceret ſuo Confeſſario, P. Michaëli de Orenia, ut in ſe ſuſciperet ſolicitam hujus operis procurationem; quod is diligentiffimè eſt executus eo fervore, quo conſueverat opera tendentia ad divinum honorem: promovit illud cum magna prudentia, adjutus conſilio & precibus ejuſdem Sanctæ Domine. Videns ergo id in hoc negotio ante omnia curandum eſſe, ut dicta Regula approbaretur à CHRISTI Vicario, imploravit per ſupremum aulæ tum Præfectum, favorem Regis Catholici Philippi IV. Hic autem pro piſſimo ſuo zelo ſtatim ſcripſit ad ſuum Legatum & Cardinalem de Borgia, ut id peteret à Sanctiſſimo Domino noſtro Papa Urbano VIII: iſte autem ſufficienter informatus expedivit Bullam, quâ confirmavit Regulam, ſicut illi à Venerabili Virgine Marina erat propoſita. Rex non contentus hoc facto, primum Regiâ munificentia fundavit cœnobium.

IV. Fuit quoq; hæc fidelissima famula DEI admirabilis in benignitate, & commiseratione erga proximos, quos in CHRISTO tenerè diligebat, & propterea graves in sua juventute à quadam persona sustinuit persecutiones. Narrabat illa (attribuens humillimè eventum Divinæ Bonitati, quasi ea in re nihil virtus ipsius egisset) sibi quâdam occasione magnæ famis à suo Parente datum fuisse medimnum tritici, ut subveniret pauperibus, atque à se panem, quem inde suismet manibus confecisset, liberaliter distributum omnibus eleemosynam petentibus: totâ domo obstupescente, tam diu illam farinam duravisse, ut ex ea habuerit, quod largiretur egenis, toto penè tempore, quo duravit necessitas.

V. An. 1630. qui in Castella vetere fuit sterilissimus, ipsi à personis beneficis fuerunt submissæ eleemosynæ ad sustentandas suas domesticas, & succurrendum nonnullis proximorū necessitatibus. Videtur illi tum indubitanter, fidelissimorum testimonio iudicio, fuisse multiplicatum, quod accipiebat: multa namq; in domo ipsius dabantur pauperibus mendicis; mittebatur subsidium quatuor, aut quinque honoratis familijs, quas à mendicando retrahebat verecundia: sublevabat Monasteria indiga integris tritici medimnis: ut, nisi Deus acceptum multiplicavisset, impossibile visum fuerit, potuisse sufficere ad tot expensas.

VI. Animadversum specialiter est, quod allato panepisto, qualis prostabat venalis, tantumque ponderante, quantum ipsius focia absumere consueverant; dum is postea revocaretur ad calculos, repertum fuerit omnibus illo resectis, tantundem tamen fuisse datum mendicis, ac si ipse nihil inde absumpsissent. Mirabantur illæ, & Sancta illis respondebat: Nolite mirari, filia, diurnâ enim experientiâ didici, tantopere à DEO æstimari pauperes, & quod pro ipsis fit, ut modicum multiplicet pro eorum sustentatione.

VII. Quis non obstupescat, à Virgine Paupere, & carente

omni patrimonio, vivente eleemosynis fidelium, has nihilominus potuisse erogari tam copiosas, atque inde dotari octodecim Virgines, quas in diversis collocavit Monasterijs, & minimum quatuor alijs provideri de statu matrimoniali; fundari in quibusdam coenobijs redditus pro lampade arsurâ coram Sanctissimo Sacramento; in iisdem institui aliquot Missæ Sacrificia: ac denique pro tot pijs operibus necessaria suppeditari, prout erat publicum, & exploratum, tot gravibus testibus, qui id iurato asserunt! Imensus erat labor, quo illi singula ista constabant, neque minor difficultas, ut puellis quibusdam, & pueris orphanis procuraret Dominos, ac Dominas, à quibus deinde, protegerentur; utque impetraret à nonnullis Prælatiis Religiosis susceptionem quorundam proborum adolescentium, qui se ipsi commendabant: præcipue verò quòd se videret à DEO, à quo illi id expresse mandabatur (cùm alioquin quoad hoc naturæ esset verecundissimæ) impelli ad acceptandas & quandoque petendas plures eleemosynas, quàm pro se ipsa indigeret, tantum ut succurreret suorum proximorum indigentia.

VIII. Prædicta, quæ in bonum proximorum egit, non satisfaciebant generoso, & amantissimo cordi nostræ Virginis: sed etiam notabiliter illis profuit scribendo, quamdiu potuit, ac deinde dictando spiritualia documenta, & salutaria consilia pro omni hominum genere. Multoties magna cum admiratione (ait in suo juramento P. Michaël de Orenia) considerabam, quomodo mulier tam afflicta tot se rebus posset impendere, alijs aurem præbendo, alijs scribendo; sollicitando de subsidijs pauperum, & de spirituali sociarum profectu, de solatio Monialium, de directione cujusvis status hominum: conscribendo admirandas, divinâ plenas prudentiâ instructiones pro animabus, earumque Directoribus Magistris, extendente se ipsius charitate etiam ad procul disitos: scripsit enim præclaram epistolam exhortatoriam ad Catholicos Angliæ.

IX. Petebat à DEO illius Regni conversionem, quamvis non futuram ipsâ vivente. Tantum diu noctûque tribuebat temporis his operibus charitatis, ut non solum mirarer ei suppetere vires pro tam magno labore, verum etiam eundem tolerari posse à sociabus, quarum vices dolebam, eò quòd ipsis inter has occupationes multum noctu esset vigilandum: quia Venerabilis Marina per diem perque noctem, non dormiebat ultra fefquihoram circiter, & quibusdam diebus ab omni prorsus somno abstinebat; omne autem reliquum tempus transigebat contemplando coelestia, patièdo & laborando, ut proximis suis benefaceret.

X. Dictis addit P. F. Andreas de Ponte: siquidem Venerabilis Domina nunquam ultra horam & dimidiam somnum protraherat, nonnullis verò diebus penitus in somnis perdurabat, suppetebat illi inter alia, quæ agebat, tempus scribendi tot, ac tam admirabiles tractatus pro utilitate proximorum. Unus fuit de modis supernaturalibus, quibus se DEUS communicat animæ: alter quomodo Anima DEUM cognoscat per alloquia interna: tertius de medijs, quibus obtinetur perfectus Amor DEI, & de ejusdem impedimentis: quartus de causa, & medijs actualis in Anima præsentia DEI: quintus, qualiter Sponsa CHRISTI amare debeat crucem ad ejusdem Domini imitationem: sextus, in quo consistat actualis præsentia DEI in Anima: septimus de instructione Confessoriorum pro adjuvandis Animabus: octavus de Prælati Religiosorum Ordinum. Omnes hi Tractatus, etsi breves, sublimem continent doctrinam, ac talem, ut eam doctissimi Viri fuerint admirati.

XI. Non possum silentio præterire, quomodo hæc Virgo inter suos dolores, non sine divina inspiratione scripserit vitam Venerabilis Marinae Hernandez, & ipsius obitum. Convixit illi hæc Sancta Matrona viginti quinque annis; operâ ejusdem utebatur Domina Marina in omnibus peragendis; eratque insignis

signis DEI Serva. Multa recenset nostra Virgo, tanquam testis oculata de ipsius virtutibus. Fuerat conjugata, atque tam in statu matrimoniali, quam in viduitate vitam agebat sanctissimam: adeo ut nostra Domina Marina lectum suæ sociæ Marinæ Hernandez moribundæ viderit, circumdatum ab Angelis, & postea felicem illius Animam in cœlo magnâ conspicuam gloriâ. Omnes hos tractatus ego habeo. Hactenus P. Fr. Andreas de Ponte Ordinis Prædicatorum, frater Venerabilis Patris Ludovici de Ponte.

XII. Tantus fuit in ea animarum zelus, ut præ compassione erga peccatores quodammodo emoreretur, quo Divina Majestas mota ei concessit, ut quotiescunque sumeret Divinum Sacramentum, si eo die intercederet apud DEUM, pro quapiam anima existente in peccato mortali, ipsa esset liberanda ex malo statu, accepturæque talia, ac tanta auxilia, ut consequeretur suam salutem prout refertur parte 1. lib. 5. c. 11. ut & admirabilis ejus zelus explicatur c. 10. ac 12. Verum quia ea quæ charitatem ejus erga proximos concernunt plerumque ab ipsamet. enarrantur, adeoque ab eis, quibus Revelationes ejus nondum plenè satisfaciunt, possent videri supposititia, aut fide minùs digna, ideo ab ijs commemorandis hic abstineo, cum scopus meus sit Revelationibus illis auctoritatem conciliare per vitæ illius sublimem ac certam Sanctitatem.

CAPUT XI.

Quædam à Venerabili Marina præstita Hispaniæ.

I.

ANno 1625. die 9. Aprilis vidit Ven. Marina quasdam suas corollas precatorias, à quodam Angelo speciosissimo Seraphino, radijs suis ferri. Paulò post autem apparens Ven. P. Ludovicus de Ponte easdem benedixit. Interrogavit

rogavit suum S. Angelum Custodem, quem in finem S. P. Ludovicus benedixisset eas corollas, quandoquidem ipsis jam virtutem communicaverit S. Seraphinus, dum eas suis attigit gratijs. Respondit mihi (scribit illa) meus S. Angelus: Adverte, Magnus Deus noster communicat nonnulla privilegia Sacerdotibus, quæ non communicavit Angelis, quale est conferre virtutem rebus materialibus, ut per eas fugentur dæmones, sedentur tempestates, curenturque morbi. Et quia is, cui datura es unam ex istis corollis, omnia hæc incommoda experietur in longo itinere, quod illi imminet, voluit Deus, ut hic Pater, qui fuit Sacerdos & Sanctus, ijs impertiretur suam benedictionem, propter quam illis Divina Majestas virtutem indidit contra omnia prædicta pericula.

II. Quem Ven. Marina hic insinuat, unâ ex illis benedictis corollis donandum, fuit Joannes de Haro, qui tunc solvit in Indias, futurus Gubernator Portus divitis, vulgò Portorico, in Insulis Oceani Americæ. Quid Dominus Deus illic contra hostes Fidei & Hispaniæ sub finem illius aîi 1625. præstiterit, fuit tunc notorium, & quantum illi profuerit subsidium spirituale acceptum à Ven. Marina, constat ex sequenti Epistola ad eam data.

J E S U S.

Omnes meæ molestiæ, Domina, mitigantur, dum solummodo considero me à tua Dominatione protegi. Jam mihi id hac occasione patuit, siquidem sanctæ tuæ preces effecerunt, ut evaderem Victor, vitamque conservarem: quod fuit evidens miraculum. Quamvis enim mihi fuerint inflicta quatuordecim vulnera, & quædam prorsus periculosa, non corripuit me tamen febris, quanquam cibum sumam tantum unciatim, & quidem salitam bubulam, ac panem ex herbarum radicibus confectum, & aquam bibam valde insalubrem. Scribo fusè meæ sorori: ipsa referat omnia, quæ ego propter occupationes meas non possum. Tua Dominatio sit mei, per Amorem Dei rogo,

Gg

in-

singulariter memor; & ego per omnem vitam recordabor, me esse tuum obedientem Filium. Dominæ meæ Elisabethæ exosculor manus, eamque obsecro, ut mei meminerit in suis precibus: id quod etiam ab omnibus in hac sancta domo commorantibus efflagito. DEUS mihi tuam Dominationem servet, sicut desidero, & indigeo. Ex Portorico 14. Febr. An. 1626.

Tuæ Dominationis

Joannes de Haro.

III. Huc spectat Revelatio, quam habuit eodem Anno 7. Decembris Venerabilis Marina, quam ipsa describit parte 2. lib. 2. c. 9. p. 251. Sum ducta ad coelestem Jerosolymam, & præsentata Beatissimæ Trinitati, quæ mihi dedit suam sanctissimam Benedictionem. Indè fui ducta ad quendam altum locum, plenum inæstimabili gloriâ, &c. Hinc jubente DEO inclusa in quandam velut nubeculam auream sum translata ad longè dissitum locum, qui habebat speciem commodi oppidi, seu parvæ urbis. Ibi vidi castellum munitum, quod obsidebatur ab hostibus, non circumquaque, sed ab una parte & quasi ex adverso. Pugnabatur utrinque & aggressoribus fortuna minùs favebat. Ex nube autem, in qua ego eram, emicabant quidam radij luminis, quibus excæcati hostes, aliqui præfocabantur calore, & alij despondebant animos. Conabantur nihilominus iterare oppugnationem, ut de novo invaderent obsessos, qui erant Catholici & Hispani. In hoc statu illos reliqui, sperans tamen fore, ut Divina Majestas concederet victoriam nostris. Locus, quantum ex indicijs mihi datis collegi, est Portus dives. DEUS sit in æternum benedictus, Amen.

IV. P. Michaël de Orenia, jurat se multis mensibus, antequam ea in Hispania scirentur, audivisse ex ore ipsius expressissimè, quæ apud Portum divitem fiebant. Scribit præterea, qualiter liberaverit classẽ Hispanam interpositâ nebulâ, nè ab Anglica

glica classe hostili invaderetur. Atque id, quod in Hispania innotuit, postquam nostri ex navibus exscendissent, jurat uterque Confessarius se longè priùs intellexisse, sibi que de die in diem ab ipsa fuisse narratum, quid cum classe nostra ageretur, quam illa semper comitabatur.

V. Item ambo jurant, quòd hæc Ven. Domina ipsis aliquando dixerit, ostensum sibi fuisse in mari ingentem tumultum, & interceptum esse argentum ab hostibus, quod advehebatur ex Indijs. Fuit ab uno illorum interrogata, quid evenisset tot animabus (solita enim erat in hujusmodi conflictibus videre, quæ salvarentur, & quæ damnarentur) & respondit, nullam sibi à DEO exhibitam esse. Cùm id audirent, ac divinarent Hispanos se nequaquam dedidisse absque conflictu, & moraliter esse impossibile, ut si conflixissent, nulla fuisset edita strages hominum: dixerunt illi: videtur non fuisse intercepta classis, sed naves aliquæ mercatorum venientes in Hispaniam. Non, Patres, reposuit illa, sed argentum, ac thesaurus, qui ex Indijs Regi & privatis advehi solet, est perditus ablatiisque ab hostibus. Post aliquot menses viderunt ità evenisse: spectavitque post aliquot annos Hispania capite plexum classis Ducem, quòd nullo exploso tormento bellico, neque educto gladio, tam opulentam prædam Hollandis tradidisset.

VI. Anno 1626. cùm DEUS varijs modis ostendisset se parare calamitates Hispaniæ, institit Ven. Marina ex inspiratione divina, ut ejus Confessarius adiret Aulam (nonnullis vehementer obmurmurantibus) atque de hoc ageret; qui singulari sua Religiositate, ac prudentiâ, multoque magis adjuvante divina gratia, alloquendo & exhortando præcipuè Aulæ Magnates, obtinuit, ut decerneretur de gravioribus quibusdam negotijs & obviaretur aliquibus majoris momenti damnis; quod tum DEUS fieri volebat. Nonnemo è summis Proceribus ejus ætatis gratias egit Ven. Mariinæ epistolâ manu propriâ scriptâ quin-

que paginarum in folio integro, implorans plures preces, pollicitus se pro viribus facturum, quidquid fuerit possibile.

VII. Part. I. lib. 4. c. 9. habetur memoratu dignissimum, quod illa ipsa refert his verbis: Frequenter me Dominus consolabatur, appellabatque filiam, ac dicebat mihi: Quid vis? quando autem ego ipsum invocabam, & dicebam: ubi es mi Domine? Ille mihi dicebat: hic sum tecum, hic me habes. Semper tamen eram sollicita de his præsentibus necessitatibus, & implorabam ejus misericordiam, atque etiam cogitabam, an non Deus propter nostra gravia peccata esset aliquando derelicturus hæc regna, sicut dereliquit alia, quæ id promeruerunt suis sceleribus. Et dum ea de re agerem cum Divina Majestate, dixit mihi: nè timeas, quia tu id non videbis. Tum ego dixi: cæteri autem, mi Domine, qui nunc vivunt, videbuntne tantum malum & afflictionem? subindicavit mihi, quod etiam non. Rursum dixi, evenièntne tamen aliquando, Domine, tantum malum & infortunium? nam dolor, quem inde percipiebam, me adigebat ad hoc dicendum Deo, qui mihi respondit: nè id velis scire; quasi mihi hoc nollet manifestare, nè me affligeret. Ego suspicata fore, ut eveniat, mota commiseratione dicebam illi cum multis lacrymis: non, non, mi Domine, per tuam misericordiam, neque jam, neque unquam. Et petebam id perseveranter à Divina Majestate, quæ videtur me voluisse consolari, dicendo mihi: quid tandem tuâ refert, quòd hinc tranſeam aliò, vel hic maneam, cum tu id non sis visura? Ego verò dicebam eâ animositatè, quam mihi Deus dabat, alioquin enim non essem tam audax: refert, mi Domine, multum meâ refert. Domine, per tuam clementiam, nè id facias nunc, sed nec unquam, propter tuam infinitam Bonitatem. Dum hæc atque alia dicerem, advertebam, quòd mihi Divina Majestas compateretur, videns me ita afflictam, ideòque mihi dicebat: omnia bene fient, fatisfaciam tibi, & consolabor te. Nunquid autem nihil voles aliud, quàm

quàm quod ego voluero? Ego illi dixi: procul dubio, Domine, ego nihil aliud volo, quàm quod tu volueris, & hinc solatium capiam. Dicebat mihi præterea Dominus: ecce adhuc multum præteribit temporis, & multa effluent sæcula; multa etiam contingent, & varia evenient. Ego attendebam, quid diceret, neque poteram non advertere, ac intelligere à Divina Majestate, mihi ista dici, ac manifestari.

VIII. Quando primogenita filia Philippi III. quæ postea fuit Regina Galliae, erat infans, dum Aula moraretur Vallisoleti, ægrotavit, habuitque caput & faciem coopertam, quibusdam crustis, ut aspectus ipsius moveret ad commiserationem; visitavit Deipara Venerabilem Marinam, & expressit modicum lactis ex suo sacratissimo ubere ad volas manuum ipsius, dixitque ei: Visita filiam Regis, & applica istud lac illius capiti, ac faciei, sanabiturque sinè mora. Ipsa invisit Dominam Marchionem de Valle, quæ tunc erat nutrix filiae regiae, sicut illam alias confecerat invisere; quia hæc Domina vehementer delectabatur illius conversatione, & ex ea proficiebat. Rogavit ipsam, ut sibi ostenderet primogenitam Regis, & valde dissimulanter; ita ut non adverteretur, quid ageret, contrectavit illius caput, ac faciem, atque intra quatrimum ipsi deciderunt illæ crustæ, & abscessit omne malum, quod fuerat passa.

CAPUT XII.

*Venerabilis Marina, Gustavum Adolphum Regem
Sueciæ Hereticum, prostravit.*

I.

Quando Gustavus Adolphus Sueciæ Rex ingressus est Germaniam, Venerabilis Marina cum intellexisset damna ab ipso Catholicis illata, & pericula graviorum, quæ intentabat; coepit hoc negotium impensè Deo commendare.

dare. Tametsi verò à Divina Majestate peteret hujus hæretici conversionem, dolens, ut ipsa ajebat, hominem tam nobilis naturæ, tot præclaris animi dotibus, ac tam egregiâ indole præditum, ruere in exitium; nihilominus in suo corde aliud & vehemens sentiebat desiderium ipsius interimendi, & exterminandi tanti hostis fidei, quandoquidem obstinatè nolleret converti. Admiranda hoc negotium concernentia fuerunt acta cum DEO, quæ ab ipsa scripta sunt An. 1632. initio Julij, undecim mensibus, antequam ipsa migraret ad meliorem vitam, ubi P. Michaël de Orenia apposuit sua manu in margine hæc verba: Istud scriptum continet ea, quæ Venerabili Marinæ acciderint versanti cum DEO, quando Rex Sueciæ gerebat bellum in Germania, & Hollandi invaserant Trajectum. Nec dubium est, quin ipsa, huic suo Confessario, cum quo coràm conferebat de omnibus specialibus circumstantijs, plura dixerit, quæ in suis scriptis non exprimebat.

II. Scriptum autem illud refert P. Andreas Pintus Ramirez, parte 2. lib. 2. c. 24. ubi legi potest: cui P. Michaël de Orenia suâ manu adjungit eodem anno & mense, quid Venerabili Marinæ quoad hæc bella evenerit, & quantum ipsa suis precibus juverit, ut furor Suecicus cohiberetur. Die Sanctæ Annæ, An. 1632. (quo id scribitur) Venerabilis Marina mihi dixit, se ante octiduum vidisse, quòd grandis armatorum Angelorum exercitus fuerit egressus è cœlo cum vehementi tympanorum, tubarum, ac fistularum strepitu, & pulchro ordine proficiscens processerit ad eam Regionem, in qua manent exercitus Catholici, & hostiles, quòdque isto Angelorum exercitu conspecto, innumerabilis ibidem existens cohors diabolorum deseruerit suas stationes, iidemque diaboli incredibili celeritate fugientes, se præcipitaverint ad mare, ac descenderint sub aquas, ita ut illos tum ultra non conspexerit. Sancti verò Angeli postquam fecissent quendam circuitum, veluti ostentantes suam potenti-

am,

am, rediverint ad coelum. Aliâ die vidit eos dæmones, qui se immiserant aquis, prodivisse ad terram: verum tanquam contusos, afflictos, & viribus fractos.

III. Dixit præterea Venerabilis Marina se nudiustertius in vigilia Sancti Jacobi vidisse prodeuntem ex coelo eundem exercitum Angelorum, eodem, quo dictum fuit modo. Non conspexit tunc dæmones, vidit tamen multos ex innumerabili exercitu coelesti remansisse inter milites Catholicorum exercituum. Contemplabatur ipsos, factâque suâ supputatione, prout illi id hic repræsentabatur, videbantur ei contra quaternos hostes mansisse singuli Angeli. Cæteri regressi sunt ad coelum. Hucusque ipsius Confessarius P. Michaël de Orenia.

IV. Sæpe Venerabilis Marina in spiritu allocuta est impium illum Regem, mirumque fuit, quod illum tam genuinè descripserit quoad colorem, formam capillorum; lineamenta faciei, staturam, habitum corporis, & ætatem, ut ambo ipsius Confessarij jurent verissimam illius effigiem ex Ungaria allatam, exactissimè respondisse verbis, quibus ab hac Virgine fuit repræsentatus. Confessarios suos, qui metuebant & angebantur, propter periculum, quod adire posset Fides Catholica, semper, etiam dum Tyranni illius prosperitas maximè videretur fore durabilis, & insuperabilis potentia, jubebat esse bono animo, moriturum enim esse hæreticum Principem. Atque ita prorsus contigit, quia suis precibus à DEO impetravit, ut ipsi auferret dæmones familiares, quos sibi habebat assistentes. Cùmque etiam postea maneret obduratus, & in magnam ageretur rabiem, quod infernali esset destitutus subsidio, cui prius innitebatur; jam tanquam imbellem hæc Virgo armis invisibilibus sibi à DEO datis (quæ precum ipsius repræsentabant efficaciam) est aggressa, prostravitque illum humi, & vidit coram oculis suis extinctum. Hæc jurant P. Michaël de Orenia, & P. F. Andreas de Ponte, se audivisse à Virgine, multò antequam acciderunt.

V.

V. Mater verò Maria de Sacramento, arcanorum ipsius particeps, fatetur in suo jurato testimonio, se aliquot mensibus citius, quàm isthicaliquid sciretur, manu suâ scripsisse, quæ ex ore suæ sanctæ Dominæ excepit, dum intima sua manifestaret Confessarijs, de morte hujus Tyranni: & quomodo illi DEUS in eum finem dederit gladium invisibilem, quo in os ipsius infixò eundem coram se mortuum conspexerit. Similiter jurat Domina Angela de Otorio ejusdem socia, & alia socia nomine Domina Dorothea.

VI. His concordat, quod Excellentissimus Cæsareus Generalis Dominus Comes Casparus Kaplirz de Sulevitz referebat, qui olim hæreticus, è Bohemia, nè hæresim deserere cogere-tur, cum suis amicis egressus, ephebum apud hunc Regem Gustavum agebat, eo ipso tempore, quo illum occidi contigit in prælio, contra Cæsareum Ducem Albertum de Waldstein Principem Fridlandiæ, ubi prædictus Dominus Kaplirz toto tempore lateri prædicti Regis, usque ad mortem proximus ab obsequijs cum Francisco Alberto uno è Ducibus Saxoniae adhæsit. Narrabat ergo prædictus Dominus Kaplirz, Regem Gustavum ultimo vitæ suæ anno fuisse factum tam furiosum & rabidum, ut omnibus esset intolerabilis, adeò ut non dubitaverit asserere Ludovicum XIII. Regem Galliae, arma sua, quæ cum eo contra Ferdinandum II. Cæsarem conjunxerat, fuisse paulò post rupto foedere sejuncturum, ob intra&ctabilem ejus furorem.

VII. Audivi autem ego bis eundem Comitem Kaplirz (qui postea Pragæ à P. Bernardo Oppel Societatis Jesu, ad Fidem Catholicam conversus, desertis hæreticis partibus, etiam Regis Hispaniæ copijs in Ducatu Mediolanensi præfuit, dein Cæsarea, usque ad ultimam senectutem, auspicia secutus Viennam, Austriæ contra Turcas An. 1683. bellicâ suâ tot annorum in tam varijs occasionibus conquistâ prudentiâ, consilijs & directione Christianitati integram conservavit). Audivi, inquam, bis

bis super mensam, nempe semel apud Excellentissimum Dominum Bernardum Comitem de Martinitz Supremum in Regno Bohemiæ Burggravium; alterâ vice apud Celsissimum Principem Joannem Fridericum Comitem de Waldstein Archiepiscopum Pragensen narrantem mortem Regis Gustavi, de qua mirè Scriptores variabant sic accidisse.

VIII. Dum Rex ille castra ad oppidum Lutzen haberet, eum cuiuspiam mensæ solum manè assidentem circumstantes suos Duces bellicos consultabundum interrogâsse, essetne cum Cæsareis vicinis confligendum. Hæsisse tacitos omnes, & Franciscum Albertum è Saxoniæ Ducibus, baculum Ducalem, cui incumbibat, manu rotâsse in signum perplexi animi, & anxietatis suæ cogitationis. Fit interea rumor adduci militem Cæsareum captivum, quem sibi sisti jussum Rex ipse cæpit examinare; cumque is nominaret Legionem, ad quam se dicebat pertinere, Rex prorupit: mentiris! Legio enim hæc cum Generali Popenheim abest. Cui miles: Domine (nec enim sciebat se loqui Regi) hodie Generalis Popenheim cum Legione illa, & omnibus suis copijs transit pontem per Albim. Tum Rex: ohe! pugnandum ergo esset mihi cum duobus (nempe cum Duce Fridlando, & Generali Popenheim) statim detur signum pugnae, priusquam Popenheim adveniat. Tum ipsemet, assumptâ cataphracturâ, aciem obequitans ordinabat, atque alâ dextrâ constitutâ, transivit ad constituendam sinistram, ipso ephebo Kaplirzio, ei semper famulandi gratiâ proximè adequitante: cum repente solliciti accurrere nuntij, Equestre Regimen Svecicum Steinbok dictum consternatum hæsitare, eò quòd adverteret sibi pugnandum esse, contra Legionem equestrem Piccolomini, quæ profectò, ut affirmabat Dominus Kaplirz, horrida fuerit omnibus aspectu, toto corpore ita cataphracta, ut quodammodo merum ferrum aspicientibus videretur. Hoc nuncio Rex in solitam suam rabiem actus, equo calcaribus quam vehementissime

adacto, fulminis instar ad eam Legionem solo Saxonico Duce Francisco Alberto, & ephebo prædicto Domino Kaplirz comitatus accurrit, verbisque acerrimis, admixtis contumelijs, suos illos Svecos proscissos iussit se præeuntem sequi.

IX. Fuisse autem tunc tam densam nebulam, ut necdum, exercitus potuerint se mutuò videre, adeoque nec Regem putasse Cæsareos esse jam proximos; cum ecce jam Piccolominiani ei obviarent, nullo adhuc ab exercitibus facto bombardarum ictu, sed tunc omnium primus aut certè (prout Comes Kaplirz repetitò assererat) summum secundus ictus bombardæ, aut minoris sclopi in dextrum Regis humerum incidit. Hoc accepto, Rex Duci Francisco Alberto dixit: Nos sumus tacti; statimque equum vertit ex acie abiturus, deducente prædicto Duce Francisco Alberto; cum ecce alter ictus globi majoris (prout hodiè que in ejus ex corio Alcis gravissimo thorace, seu collobio in Cæsareo Viennæ reposito apparet) supervenit in medium dorsi, jam lethalis, quo etiam videtur spina dorsi ejus fuisse fracta; & Rex moribundus in brachia ponè adequitantis Ducis Francisci Alberti decidit, qui eum conatus est sustentare, donec ex acie educeret. Sed Legiones interea acerrimè conflixere, sic tamen, ut Piccolominiana Svecicam Steimbokianam retruderet tanto impetu, ut ipsi Duci Francisco Alberto jamjam immineret adeò, ut ipse Regem, quem videbat se ampliùs eripere non posse, ex equo deciduum dimiserit, ut suam saltèm vitam, morti subduceret. Sic ergo tota adventans Legio Piccolominiana super jacentem Regem progressa soleis equorum proculcatum, laceratum deformavit. Dux autem Franciscus Albertus unà cum ephebo Kaplirz è vestigio intra Svecicum exercitum evolantes, triste nuncium, occisi Regis attulerunt; sed jussi rem habere tacitam, nè in medio fervore pugne Syecorum animi debilitarentur, congregato celerrimè fortissimorum cuneo, qui illuc ubi corpus Regis jaceret, perrumperet, ipsi locum ostensu-

ri,

ri, præiverunt, & Cæsarianis tantisper repulsis Regium cadaver eis Dominus Kaplirz ostendit, collobio, seu thorace (mirum in tanto fervore pugnae!) jam spoliatum. Sublatum ergo cadaver silentio ad suos detulerunt, donec prælium absolveretur.

CAPUT XIII.

Revelationes præviæ de morte Ven. Marinae.

I.

Quia multa Ven. Virgo Marina futura prædixit, quorum eventus necdum constat, adeoque non defuit, qui objiceret has ejus prophetias posse esse suspectas, præsertim cum non determinaverit tempus, quando ea essent evenitura; ideo videtur mihi valde expediens ad faciendam fidem, ejus prophetijs, si ea, quæ pridem de ejus futura morte P. Ludovicus de Ponte novem annis ante eam mortuus, aut etiam Pater Michaël de Orenia ante ejus obitum consignata reliquit, hic adducantur, & expendantur, quàm cor respondeant ad ungverm ijs, quæ re verâ in morte ejus acciderunt. Neque enim possibile est hic dolum intervenisse, cum scripta fuerint omnia, & in manibus extiterint prius, & quidem aliqua tot annis antè, quàm postea in conspectu tot millium hominum, publicè evenerint.

II. Optaverat illa, prout retuli suprâ in fine Capituli IV. in ipsa morte non habere terribiles dolores, ut melius se posset præparare; cui desiderio annuens Divina Majestas fecit, ut dolores præcederent, & postea mors ipsa in quiete & solatio sequeretur, prout infrâ referetur. Hoc ergo circa annum Domini 1623. ei Deus repræsentavit visione sequenti, quam P. Ludovicus de Ponte part. 1. lib. 3. c. 16. §. 5. refert. Quâdam nocte derepente me inveni extra meum lectum in terra stantem, oneratam cruce gravissimâ, ita ut me non possem movere ex lo-

co, in quo stabam. Aspiciebam meos Sanctos Angelos, qui aderant, modò hunc, modò illum, qui se ostendebant vices meas dolere, & animabant me ad ferendam meam crucem. Sanctus meus Angelus Custos illam modicum sustentavit, & sic potui incipere cum ipsa progredi, comitantibus me Sanctis Angelis, qui dicebant: lentè, lentè; quasi dicerent, ut incederem paulatim, & pedetentim. Postquam diu hoc modo ambulavissem, descendendum mihi erat procul deorsum ad profundam vallem, qui descensus fuit molestior. Pervenì ad quendam fluvium, quem facilius transivi; atque trans ipsum erat via instar Paradisi: dixeruntque Angeli esse mihi eundem per illam viam, Ego verò illis respondi: non, mei Domini, nolo enim in hac vita paradisum: & hoc bis terve constanter asserui. Illi iterum dixerunt: opus esse illac transire, & me tunc non experturam ejus viæ jucunditatem. Ità consensi, ac transivi per illam viam, gestans meam crucem humeris, quasi ipsam non transirem.

III. Postquam autem aliquamdiu ambulavissem, ex improvviso me inveni apud portas coelestis Jerosolymæ, ac vidi CHRISTUM nostrum Dominum, qui mihi venit obviam, & sustulit meam crucem, quam portabam, deditque illam uni ex illis Angelis. Deinde me amplexatus est, introduxitque me in eam coelestem Civitatem, & constituendo me in certo loco, dixit mihi: sede & quiesce, ac aspice magna bona, quæ hic reperiuntur, quibus fruitura es in æternum. Tum ego cum eo lumine, quod mihi Dominus contulit, incepti contemplari beatitudinem Sanctorum, & aliquantum illà frui, ac deinde me sensi quasi submersam in abyssò Divini Esse, unitam Divinæ Majestati. Et postquam ità ibi aliquamdiu mansissem, quando mihi sum reddita, reperi me in meo lecto. Deinde mihi fuit declaratum mysterium totius hujus rei, dum mihi diceretur, quòd illa crux significaverit afflictiones & angustias, quas patior, & maximà illà molestià, quam sensi in descensu ad eam vallem, fuisse repræsen-

sentatas summas angustias, quas, vicina morti essem perpeffura; sed non diu duraturas, atque potituram me magnâ pace, & quiete, significatâ per illum Paradisum.

IV. Aliâ vice aliquando manè mihi ostendit Dominus quasdam scalas, quæ à terra pertingebant ad cœlum. Erant ex auro purissimo, ac tenebantur à quibusdam Sanctis Angelis, in parte posteriore, dixitque Dominus: Ascende sursum Anima per has scalas, non enim est, cur illas taliter aptatas reformides. Auditâ voce Domini ascendi velocissimè, quia virtus divina, sublevabat meam Animam, adeò ut videretur esse instar triremis, quam fulcantem mare svavis ventus velociter impellit. Pervenit mea anima usque ad summitatem illarum altarum scalarum, & statim videbantur aperiri cœli, quasi in momento disrumperentur: atque Dominus subitò dixit sublimi & benigno quodam modo: intra Anima in gaudium tui DEI. Lætata est rum mea anima, in ea regia & beata Civitate DEI, in qua illi fuerunt ostensa admiranda bona, quibus aliquamdiu fuit fruita, sicut aliàs. Revelavit mihi Dominus suo lumine, scalas aureas fuisse figuram & symbolum meæ mortis, in qua in momento, ac facillimè per ipsius Bonitatem & misericordiam esset transferenda mea anima, ad illam felicem Patriam, manibus Sanctorum Angelorum. Deus novit confusionem, quam mea anima sentit, quòd hoc scribam, & ipsa id intelligat à suo DEO; quàmque timeam, si propter meas tepiditates ac peccata deberem perdere thesauros suarum misericordiarum. Confidam in Domino DEO meo, qui est infinitè bonus, & dives in misericordijs.

V. Hoc tempore, quo mihi Deus toties revelabat suam gloriam, dixi meis Dominis Sanctis Angelis, me relinqui incertam à DEO, quoad meum transitum. Ipsi contraxerunt humeros, & Dominus mihi respondit: non est incertus is, cui proficiscenti ad suam Patriam & Civitatem ostenduntur illius rur-

res, & portæ, ac ædificia & palatia. Signum est ipsum esse vicinum. Hoc Dominus dixit, ut me conservaret, sicut me conservat unâ cum cruce, quam patior, in illa unione Animæ, cum ipsius Divinitate, & quasi inter cœlestis aulæ incolas.

VI. Lib. 3. c. 17. §. 5. dixit illi Deus: Etiam si te sim consolaturus, tibi que satisfactorius, quod à me petivisti, concedendo tibi mortem suavem, & plenam solatio, atque ita sis finitura vitam, ac migratura ex hoc exilio in meis brachijs; tamen animadvertite, te paulò ante tuum obitum passuram tentationes & oppugnationes diaboli, qui te affliget, ac stringet pro viribus, me permittente. Sed noli timere; confide in me, quia cum mea gratia & auxilio tibi omnia bene succedent, & diabolus confunderetur, atque tum occludetur tuum cor, ac adveniet solatium tuæ beatæ mortis, quando exspirabis, in meis brachijs, & in meo corde, hoc enim est præmium eorum, qui moriuntur in Domino.

VII. Ibidem cap. 20. §. 1. Anno 1621. in Decembri circa festum Nativitatis dicit: Rogavi Dominum, ut dignaretur, si ipsi placeret, me auferre ex hac præsentī vita, & facere, ut moreretur absque doloribus, qui me distinerent, ac impedirent, nè obirem quietè: quod mihi Dominus concessit, dixitque: Ubi hoc tempus advenerit, ego occupabo spiritum tuum, atque nè priveris usu sensuum, abstraham tali raptu, ut te non perturbent dolores, & tamen audias ac intelligas.

Lib. 4. c. 16. §. 3. dixit illi S. P. Ignatius: Ego veniam horæ tuæ mortis, ut te invisam, teque comiter, & eam tecum ad cœlestem beatitudinem. Comitabuntur te quoque alij Patres Societatis. Hæc Revelatio congruit cum ea S. Benedicti, quam paulò post referemus.

VIII. Lib. 6. c. 19. §. 1. ipsa refert: Vidi DEUM colloquentem cum Sanctis Angelis, qui mecum manent, quasi secretò. Ego auscultabam, & nihil audiebam; dixitque mihi Divina Majestas:

jestas: nè sis sollicita; quod dicebam meis Sanctis Angelis, erat, ut quando te tollam, expires in ipsorum brachijs. Ah mi Domine, aiebam ego, tua Majestas ubi erit? etiam ego, dixit, tibi adero, & suscipiam tuam animam.

§. 2. scribit: Derepente mihi visa est à DEO avelli anima, ità ut corpus remaneret quasi mortuum in lecto: univítque animam secum in abyssò Divinitatis, ubi diu mansit; post hoc denuò anima revisit corpus. Intellexi à DEO fuisse mihi ità repræsentatum modum, quo eram moritura, cum aliqua exstasi & elevatione ad cœlum.

IX. Alio die vidi venientem CHRISTUM Dominum stipatum multis Angelis, valde affabiliter, & jucundè cum ipsis conversantem, veniensque ad me, dixit mihi visne mecum venire? Ego statim respondi: ità Domine; tum est quasi amplexatus meam animam, univítque illam cum sua Divinitate, eo modo, quem ego nescirem verbis exprimere; & tulit me secum ad cœlestem Jerusalem, remanente hic meo corpore, quasi semimortuo, quia viginti quatuor horis, quibus ea res duravit, erat quodammodo destitutum animâ, tantùmque mihi videbantur remansisse in meo corpore aliqua accidentia, quæ illud sustentabant, ità ut cùm ad me venissent isti mei Domini, qui hic manserant, & nescio quid mihi dixissent, responderim illis, quasi intra dentes: Sum mortua: usque dum elapso hoc tempore redij ad me, & Dominus mihi ad hoc propositum dixit: non recordaris quòd tibi dixerim, te ità morituram, sicut dum noctu quæpiam Domina exiit togâ, ut collocetur in suo lecto?

X. §. 3. Cùm longa mirabilis apparitio præcessisset, tandem mihi dixit (ait illa) Divina Majestas, totum fuisse quoddam experimentum meæ mortis, quæ brevi esset futura, daturùmque se mihi tempore mei obitûs, quendam vehementem raptum, ut omnes sint cogitaturi me exspiravisse; redituram autem ad me, & toleraturam tantillum molestiæ, ac deinde morituram.

turam. Ibidem Angeli ei promiserunt, quod usque ad diem Judicii non essent derelicturi ejus cineros & ossa.

XI. §. 5. Quâdam nocte, inquit, egit mea anima diu cum DEO, atque interea me reperi, quasi in momento in ipsius manibus, ac divinis brachijs. Occupavit me ibi quædam mystica mors, & somnus spiritualis, cum affectibus, & sensibus spiritualissimis, pacatis, ac suavibus, & quadam luce, atque cognitione de ipsius Esse, & illa, ut ego eam voco, divina ipsius caligine; neque enim aliud scio. Post hoc dixit Dominus: sic tibi fiet Anima, sicut vidisti. Cum enim tua vita fuerit plena continuis doloribus tui corporis, æquum est, ut illos non patiaris extremâ tuâ horâ.

XII. Eodem libro, cap. 20. §. 5. apparuit illi Sanctus Ignatius cum multis Beatis Patribus Societatis, cum suis pallijs, & luminibus in manibus, cantantibus Psalmos, sicut fit, dum sepelitur defunctus. Erant tamen Psalmi jucundi, & canebantur tono læto. Tum magnâ pompâ processit processio, in qua illam Angeli detulerunt usque ad cœlum, ubi multa mira ei sunt repræsentata. Post omnia cum iterum esset in suo angulo, dixit illi S. Ignatius: Filia mea, & Soror nostra, omnes nos, quos vidisti, intererimus tuæ sepulturæ. Cumque illa inciperet turbari, addidit: melius convenis cum Angelo tuo Custode, ipse tibi declarabit. Vale. Sanctus Angelus ei dixit eam rem fuisse quandam adumbrationem ejus, quod eventurum esset in ejus sepultura, & corpus ejus prius inferendum cœlo ad conspectum DEI, quàm hîc sepeliatur.

XIII. Anno 1626. decimâ quintâ Januarij rapta fuit in cœlum, & collocata coram Beatissima Trinitate. Ibi, narrat ipsa, vidi meum corpus exanime, atque tanquam tale expansum in pavimento illius cœli. Hæc Revelatio congruit cum alia, quam pridem antè habuit, quod corpus ejus, priusquam sepeliretur, esset deferendum ad cœlum. Subjungit ipsa: postea
mihi

mihi Dominus declaravit, quid significârit illa figura mei defuncti corporis, dixitque, quòd ante meam mortem essem passura tam magnam ecstasim, ut omnes sint judicaturi, me exspiravisse, licèt re verâ sim victura; futurum enim, ut ex ea revertar ad me, & paulò pòst moriar. Hoc ipsum mihi aliàs fuerat à DEO dictum. Anno 1627. undecimâ Augusti habuit Revelationem, quòd adhuc victura esset septem annis: id quod omnino impletum est, prout narratur à P. Pinto Ramirez, parte 2. lib. 1. cap. 16. pag. 72.

XIV. Non diu ante ejus obitum venit ad eam gloriosissimus Patriarcha S. Benedictus (prout refertur eadèm parte 2. lib. 3. c. 1.) cum comitatu multorum Sanctorum Monachorum sui Ordinis, & Angelorum DEI, & postquam cum magna majestate confedisset in quadam mystica sella, dixit: Magnus DEUS noster sit tecum, Anima, venio ad te jussu & nomine hujus Domini, propter duas res maximi momenti, quas DEUS te vult scire, ac nôsse. Et postquam ei explicuisset primam pertinentem ad gubernium ejus Ordinis, subjecit: Alterum cujus causâ ad te venio, & quod tibi magnum adferet solatium, est, ut te doceam, quis sit futurus modus tuæ beatæ mortis, transitus ex hac præsentī vita ad æternam, & possessionem tui DEI. Quapropter tibi dico, hunc transitum brevi futurum, idque postquam longo tempore manseris abrepta in DEUM. Quando revertēris ex exstasi, invenies, videbisque Sanctissimam Virginem in tuo paupere cubicello, & Beatos Patriarchas S. Ignatium, S. Augustinum, S. Dominicum, S. Franciscum, & me, qui comitabimur Cellissimam Reginam Dominam nostram, erimusque tibi viciniissimi. Aderunt unâ multi Angeli DEI præter illos, quos tibi Divina Majestas attribuit socios. Paulò pòst descendet, cum summa pompa Majestas CHRISTI Domini nostri in habitu regio, gerens coronam in suo Sacro Capite, atque accedens ad te cum sua magna complacentia, & tuo solatio complectetur

tuam animam, & exspoliando te corpore mortali, ac veste veteris Adami, ut te induat veste immortalis, & pretiosa, te secum, ac in proprijs suis manibus feret ad eam coelestem Patriam, ubi in sempiternum vivimus, sumusque beati in eodem DEO, comitante ipsum Sanctissima ejus Matre, & nobis Patriarchis, alijsque Sanctis, tuo Angelo Custode, & reliquis antè dictis. Atque hunc in modum Divina Majestas te constituet in loco, quem tibi ab æterno destinavit, juxta suam infinitam bonitatem, & merita tua, ac multa, quæ es passa, per longævæ tuæ vitæ decursum. Dum hoc fiet, idque operabitur magnus hic DEUS, vehementer, mirabitur Aula coelestis, multisque DEUM extollens laudibus, canendo dicet: quæ est hæc anima tam felix, & beata, quam potens Dominus immensæ Majestatis fert suis manibus, & in loco tam excelso constituit? Talis erit, Creatura DEI, tuus obitus. Habe solatium in tuo DEO, & age illi infinitas gratias.

XV. Hæc Revelatio non contradicit ei, quam initio ex P. Ludovico de Ponte p. I. l. 3. c. 16. retuli, ubi asseritur, quod anima ejus manibus Angelorum transferetur in coelum: quia illud intelligitur eo sensu, qui ibi in apparitione exprimitur; ibi enim fuit repræsentatum, quod Angeli suis manibus tenuerint scalas aureas, per quas ipsa ascendit in coelum, adeoque hoc sensu Angeli animam ejus transtulerunt ad coelum, quatenus eam juverunt in ultimo ejus transitu, & via, usque ad ipsissimum punctum mortis, seu usque ad finem illarum scalarum, quas moriendo, & ad mortem properando decurrerat, quàm diu mors (ut scholasticè loquar) erat in fieri. Quando autem ventum est ad mortem in factum esse, seu quando ex illis scalis egressa est, nihil ibi dicitur de Angelis, quod eorum obsequium interveniret, nec quod ipsi animam ejus susceperint, sed narratur, quod subito ibi Dominus adfuerit, adeoque quod ipsemet eam ex scalis illis egredientem suscepit, & coelo repente aperto inse-

rue-

ruerit dicendo: Intra in gaudium DEI tui. Et sic optimè congruit, quod in utraque Revelatione narratur, prout & magis illustratur per Revelationem suprâ ex parte 1. l. 3. c. 17. allatam, ubi promittitur in brachijs CHRISTI Domini expiratura. Imò plenissimè totum combinatum est in illa Revelatione, quam ex p. 1. l. 6. c. 19. §. 1. paulò antè legimus.

C A P U T XIV.

Mors Venerabilis Marinæ de Escobar.

L

Non potest meliùs felicissimus beatæ hujus Virginis obitus describi, quam adducendo quandam epistolam in universa Hispania, aliisque Regnis typis vulgatam, scriptam à P. Michaële de Orenia, qui tanquam hujus Ven. Virginis Confessarius semper illi adstitit, usque ad extremum vitæ ipsius momentum, & omnia, quæ in ejus exequijs fuerunt acta, spectavit, Rector tunc existens Collegij Societatis Jesu ad Sanctum Ambrosium Vallisoleti. Sic autem ad Excellentissimum Dominum Comitem Ducem de Olivares, Dominum Casparem de Guzman, Primum tunc Ministrum Catholici Regis scribit.

Ignoscat Tua Excellentia, quòd manu utar alienâ, cum nequeam propriâ, ad perscribendum, quid actum fuerit in morte Dominæ Marinæ de Escobar. Quia verò Excellentiae Tuæ tempus non suppetit, ad prolixas legendas historias, paucis hanc perstringam verbis.

II. Feriâ quintâ, quæ fuit Solennitas Corporis CHRISTI, me contuli ad excipiendam ipsius confessionem, ac dicendam illi Missam, horâ quartâ & dimidiâ matutinâ, sicut alijs diebus consueveram. Atque dum suæ mihi conscientiae redderet rationem, dixit mihi, visum à se ante duas circiter horas in suo cubiculo dæmonem, transfigurantem se in personam JESU CHRIS-

STI Domini nostri, sed subito à se agnitum fuisse. Et subjunxit: Metuo, nè mihi quodpiam damnum intulerit, & ingesserit ali- quod venenum: statim enim ad me accessit meus Sanctus An- gelus Custos, & contrectavit manu meam frontem atque ca- put, quasi me demulcendo, & applicando mihi quoddam me- dicamentum. Paulò post vidit descendentem ex coelo JESUM CHRISTUM Dominum nostrum, stipatum multis Angelis, qui apud ipsam mansit, consolando illam & animando, eamque communicavit spiritualiter.

III. Hoc & alia, quæ evenerunt, mihi admodum prolixè recensuit, & ego celebravi Missam, ipsique sacrum Evcharistiæ epulum præbui, ac redivi domum: quò non multò post adve- nerunt illius sociæ, ad peragendam sacram Confessionem, & Communionem, mihiq; dixerunt me vix ex ejus domo fuisse egressum, quando ipsarum Dominam vehementissimus invasit dolor lateris, quo graviter affligeretur. Audivi id, licètque fuerim suspicatus, esse opus diaboli, non curavi magnopere, eò quòd dolores ipsius essent per frequentes, & valde magna cru- ciatum variatio, quos continuè patiebatur.

IV. Dolor iste duravit eo die, & inceperunt alij pectoris, ac stomachi, atque etiam si ipsam hi vehementer affligerent, gra- vissimus tamen oriebatur ex oppressione cordis, tantisque an- gustijs, ut illa, & Medici, etiàmque ego, qui ei assistebam, & ipsius domesticæ, animadverteremus, illos effectus non posse procedere ex causa humana. Quia nihilominus ipsa summe sem- per propendebat, ut consuetis procederet vijs, utereturque re- medijs, permisit se curari à Medicis, qui illi applicuerunt reme- dia, quorum erat capax ipsius debilitas. Sed omnia nihil pro- derant, quinimo, sicut ab ipsissimè notabatur, augebantur do- lores, qui occupaverunt omnes corporis partes, adeò, ut nulla ab ijs esset immunis, præter caput, eo loco, quem Sanctus An- gelus attrectaverat, præservando illam partem, ut posset pro- sequi

suum exercitium præsentiæ DEI, cui continuè inhærebat, & conversationem cum ejus Majestate & Angelis, beatisque Cœlitibus.

V. His tam acerbis cruciatibus tantopere natura debilitabatur, ut Medici judicaverint expedire, ut ipsi conferretur Sanctissimum Sacramentum pro viatico. Quia tamen eo die, manè sacrâ synaxi refecta fuerat, & esset contra communem Ecclesiæ usum bis intra unum diem communicare, feci, ut id differretur in diem sequentem, quo illi dedimus CHRISTUM Dominum horâ sextâ matutinâ, allatum ex ipsius Parochia, pro communi exemplo; quamvis quotidie domi suæ communicaverit. Suscepit illum magna cum quiete, licet in hac non multò diutius permanserit, quàm spatio unius horæ: subitò namque rediverunt dolores cum ingenti vehementia, eaque tanta, ut Medici obstupefacti spectaculo, tantùm contraxerint humeros nullo applicato remedio, & nè verbo dicto. Sociæ quoque & ego, ipsi noctu diuque assistentes aliud agere non poteramus, quàm lacrymari, eique compati præ magno dolore, videntes tam multùm sustineri, à tam sancta creatura. Interrogabam illam interdum, quo modo internè quoad animam esset constituta, & respondebat mihi: Pater, magnis me DEUS exercet obscuritatibus, & derelictionibus; sed fiat in me sanctissima ejus voluntas, veniantque super me in nomine Domini omnia tormenta, quæ ipsius bonitas permiserit. Quanquam me vehementer affligit quædam rabies (sic enim loquebatur) quam in me suscitât hostis, ut me magnopere sollicitam reddat.

VI. Neutrum cessabat, & quamvis ex natura sua esset patissima, ac propter suam sanctitatem, adeò patiens, ut ob gravissimos dolores (sicut patebit ex eo, quod mox dicam) raro quereretur; in hoc tamen noctu diuque tam dolenter exclamabat, ut satis appareret vehementia cruciatûs. Ut verò id aliquâ ratione concipiatur, referam Tuæ Excellentiæ, quod decem-

hinc annis evenit, paucis diebus ante obitum Sancti Patris Ludovici de Ponte.

VII. Vidit eo tempore dæmonem, qui in horrida specie ad ipsam veniebat obverso dorso, & retrogradè incedens, atque in modica distantia se ad illam convertit, & incredibili celeritate, congerens pulverem cubiculi, aperuit ipsius os, illumque deglutire coëgit: deinde verò eadem velocitate supposuit ejusdem dorso prunis refertam acerram, quæ se referebat ab eo esse adustam, & non minùs sensisse tormentum, quàm si injecta esset in grandem rogam. Ex illo pulvere & calore coaluerunt in ipsius corpore quinque calculi, à quibus paulò minus, quàm quinque mensibus fuit vehementer excruciat. Quamvis autem unicus calculus magnitudine non excedens nucem avellanam, aut etiam minor, soleat graves adferre cruciatus, quod multorum docet experientia: & singuli hi calculi, dum illos eiecit, æquaverint vitellum ovi; omnia nihilominus illa tormenta tam diu adeò patienter, & pacatè sustinuit, ut rarò fuerit audita attollere vocem gemendo. Hæc tamen occasione dæmon, quia erat ultima, quam DEUS illi indulgebat (quod ipse desideravit, & ipsa sibi ab eo frequenter prædici audivit, mihi que retulit) usus fuit, omnem suam exerendo potentiam, permittente id DEO, ad majorem suæ famulæ coronam, & nè illi deesset, martyrium, quod ipsa tantopere desideraverat.

VIII. Sic fuit constituta usque ad feriam secundam ante suum obitum, quando mihi horà primâ noctis dixit: se putare bonum fore, si sacro Oleo ungeretur. Misimus pro eo, & fuit inuncta, sedatis tum per breve tempus doloribus, qui statim cum eadem furia sunt reversi, & eodem ipsius cruciatu, ac gemitu, qui à multis extra cubiculum cum ingenti commiseratione ac dolore auscultantibus, fuit auditus; id quod duravit usque ad feriæ quartæ horam nonam & dimidiam noctis, quo tempore omnes dolores cessaverunt, potuitque illi nonnulla verba loqui, sed

sed pauca : quia subito cæpit abripi in ecstasim , quæ ab ea hora perseveravit usque ad feriam quintam paulò ante horam decimam diei.

IX. In his raptibus & mentis excessibus illi DEUS tam singulare præstabat beneficium , ut licet intimè esset unita DEO haberetque sublimes revelationes, posset respondere, dum vocaretur, & conversari, si quis tum alloquij causa ingrederetur, quamvis, ut ipsa aiebat, id naturæ accideret nonnihil molestum, eò quòd Anima eo tempore esset adeò abrepta ab amore DEI, ac attenta mysterijs, quæ illi DEUS manifestabat & arcanis, quæ illi pandebat. Cumque ego id scirem, interrogavi illam præsentibus ipsius sociabus, an meminisset DEI, respondit mihi valde pacatè & gratiosè, quasi subridendo, dixitque: quoad hoc bene agitur. Sciebat enim mihi constare ipsam à multis annis nullà unquam occasione, dum conversaretur cum creaturis, aut pateretur dolores & cruciatus Animæ suæ, obtutum à DEO aver-
tisse.

X. Nolui illi plura dicere, quia recordabar revelatum ipsi fuisse à DEO ante complures annos, & post primam vicem, deinde frequentius, quòd illi nollet dicere horam mortis, quia id ipsi non expediret; sed daturus esset signum, quod videlicet ante suam mortem passura esset raptum, & ab alienationem à sensibus duraturam multis horis: solebatque mihi dicere, ut attenderem ad illam revelationem, nè viva sepeliretur. Videns igitur hunc raptum tam diu durare, judicavi adesse ultimum indicium, adeoque etiam, quamvis esset quietissima, nec malum haberet pulsum, appropinquare mortem, ac felicem transitum illius Animæ, quæ tam impensè DEUM amaverat, eique serviverat, in vita mortali.

XI. Unde sumpsi in manus sacram Crucifixi effigiem, quam multis annis habuerat ad caput sui lecti, & obversam illius vultui tenui, usque ad dictam propè decimam horam diei (quæ fuit
nona

nona Junij) quâ se modicum commovens tradidit suum spiritum DEO, à quo ad tantam gloriam condita fuerat, relicta mihi firmâ spe, quòd implenda esset revelatio, quam S. Pater Ludovicus de Ponte habuit, & illi perscripsit in schedula, dum gravibus pressus doloribus decumberet: ubi hæc ipsi verba manu suâ exarata, & à se subscripta dicit: Volo tibi pro solatio tuo dicere, quod te hæcenus celavi. Esto certa, te ex lecto evoluturam ad cœlum, atque multum tibi satisfactionis superfuturum. Et est revelatio conformis alijs, quas ipsa quoque habuit à S. P. nostro Ignatio, & alijs Sanctis Patriarchis, à quibus illi etiam dictum fuit, quòd essent adfuturi, in ipsius transitu, cum multis Angelis, & Animabus beatis, càmque ducturi ad cœlestem Jerosolymam, ubi per omnem æternitatem esset possessura bona, quorum illi aliquam particulam toties DEUS ostenderat.

XII. Rescita isthic fuit continuò mors hujus Sanctæ Dominiæ, & populus permotus affectu ipsius videndæ, atque exosculandi ejus pedes, tam frequens accurrit, ac numerosus, ut, nè se invicem suffocarent, & domus, quæ est exigua, ac vetusta corrueret, fuerit necessarium, ut Dominus Petrus Carilius Collegialis S. Crucis vicesgerens Domini Episcopi, mitteret sex Sacerdotet, qui intentatis poenis & censuris populum arcerent, ac prohiberent ab ingressu. Verùm cum id non sufficeret, jussit Magistratus illic propterea adesse Prætores, qui statim adveniant. Licet autem noctu diùque assisterent Dominus Joannes Arias de la Rua Judex Criminalis, nec non Dominus Didacus Calderonius Præfectus Satellitum Cancellariæ, ac etiam Vice-Gubernator Urbis, quorum unus manebat ad januam, cum multis apparitoribus, alius ad gradus, & tertius ubi jacebat Sacrum Corpus, omnes stipati Satellitio; non poterant tamen multitudinem submovere ex omni statu Vallisoletanorum magna cum pietate ac devotione accurrentem, tam Religiosorum, quàm Sæcularium, universis se se provolventibus ingenua ad exoscu-

lan-

landos ipsius pedes, & petentibus corollas suas precatorias ejusdem, manibus applicari.

XIII. Taliter fuit transacta illa dies, & magna pars noctis: deinde feria sexta usq; ad horam quintam vespertinam. Quamvis enim copiosa caderet pluvia, madefiebant in platea, nolentes recedere, revertentibus semel ac iterum multis è nobilioribus ad pedum ejus oscula. Haëtenus P. Michaël de Orenia, cujus epistolam hic interrompo tantisper, ut interpositis ijs, quæ Dominus Franciscus de Vinivela ad Dominum Ludovicum de Castilia, Assessorem Consilij Granatensis, & Gubernatorem Guipuzcoæ perscripsit, lucem aliquam dictis addam. Sic habet:

Ignosces mihi, quòd me non possim in recensendis, quæ his diebus acta fuerunt, diffundere, pro rerum ipsarum exigentia, cum id integrorum potius sit librorum argumentum, quàm adeò brevis epistolæ.

XIV. Ante felicem Dominæ Marinae de Escobar transitum metuens hæc Civitas, nè istius thesauri faceret jacturam, convocavit suum Senatum, ad designandos Deputatos, adstuturos dispositioni eorum, quæ facere meditabatur, in hujus Dominæ honorem. Deputatio fuit prensata ab omnibus Dominis Senatoribus, & cum nullius affectus cederet affectui alterius, oportuit rem sortibus peragere, quæ obtigerunt Domino Petro de Vega, & Domino Petro de Barcena. Vix benedicta illius Anima est egressa è corpore, quando id toti innotuit Urbi, quæ universa interno permota impulsu, se contulit ad videndum, & venerandum ipsius Sacrum Corpus. Credat mihi Tua Dominatio, tanquam testi oculato, non unum, sed millena contigisse miracula, quòd non interierint suffocati tot, qui tam angustam habitationem adeò impetuosè intraverunt, dum quisque magni se jacturam thesauri facere putaret, nisi ea illi obtingeret felicitas, ut testem ageret pulchritudinis, quæ huic Sanctæ inerat, post tam diuturnas, & extraordinarias afflictiones octoginta

propè annorum, quibus vixit. Fuit absque dubio prodigiosa vultus ipsius venustas, ac teneritudo, seu tractabilitas, unaque fragrantia corporis & manuum, quæ omnia manifestè indicabant ejusdem sanctitatem.

XV. Toto eo die mansit expositus hic thesaurus, & populus nunquam satiabatur illo contemplando: perseveravit ad fores domus, usque ad horam undecimam noctis, quâ fuerunt melius obfirmatæ, cum timeretur, nè everterentur. Custodiverunt ipsum eâ nocte quinque Religiosi Societatis JESU, & Dominus Didacus Calderonius Præfectus Satellitum hujus Cancellariæ. Vix autem illuxit dies, quando maturè adfuit turba ad videndam Sanctam: hoc enim nomine illam omnes compellant. Satisfactum fuit paulatim tam pijs desideriis, tot integrarum communitatum religiosarum, qui ad pedum ejus oscula advenerunt, unâ cum flore totius urbis tam Ecclesiasticorum, quàm Sæcularium, admoventibus omnibus suas cruces, & numismata, & corollas precatorias benedictis illius manibus, ac desiderantibus aliquid habere ex ejus vestibus & reliquijs. Plures fuerint decem millibus, quibus janua paruit. Reliquis autem est satisfactum promisso, quòd ferenda esset ad sepulchrum discooperta, & palàm omnibus exponenda in templo per triduum. Stratagema hoc fuit sanctum, quo non sunt delusa, sed dilata tantæ multitudinis desideria, quamvis nihilominus ad januam perseveraverit ultra tres horas, quibus copiosus duravit imber. Hactenus Dom. Franciscus de Vinivela.

XVI. Redeo ad epistolam P. Michaëlis de Orenia, quam is sic prosequitur. Interea Ecclesia Cathedralis, & quidam Capitulares optantes habere ipsius reliquias consultaverunt, an adesset aliqua ratio, ob quam sanctum illud Corpus possent auferre; quem ego conatum intelligens egi cum Senatu, ut mihi in casu necessitatis faveret, quo satisfaceret DEI ac Defunctæ voluntati, quam ante complures annos declaraverat, ut suum corpus

pus

pus humaretur in templo Societatis, ubi Anima illius, ab ipsis infantiae suae principiis divina didicit mysteria. Verum nullis opus fuit suppetijs, aut auxilio Magistratús. Cum enim P. F. Andreas de Ponte ex Ordine S. Dominici hanc DEI voluntatem manifestavisset Capitulo & Civitati, postquam ipsum secretò de suo proposito consuluissent, conformaverunt suam cū divina voluntatem submissis mihi utrinque Commissarijs, duobus Præbendatis, & duobus Senatoribus, offerentes se ad suscipiendam curam omnium, quæ essent agenda, tam in sepultura, quàm in novendialibus exequijs, quas in memoriam hujus sanctæ Concivis celebrare cogitabant.

XVII. Tanta siquidem fuit devotio, quā hæc pia Civitas est amplexa istud consilium, ut fuerit uniformis, & universalis; atque singulis pro se sortem hujus executionis exoptantibus, & nemine alteri volente cedere, judicatum fuerit expedire, ut de ea sortirentur, quod & factum est: statimque Civitas jussit fieri tumbam, rubro coopertam holoserico, latis fimbrijs aureis exornato, suffultam intus albâ attalicâ, additis sex inauratis seris, quarum claves duæ darentur Capitulo, duæ Civitati, & duæ à nobis servarentur; quod libentissimè admisi, quia securus eram id non fieri aliâ intentione, quàm ut sanctum illud Depositem custodiretur.

CAPUT XV.

Funus Venerabilis Marinae de Escobar.

I.

DE hoc P. Michaël de Orenia sic scribendo prosequitur: Postquam sacrum hoc Corpus fuit impositum tumbæ, & ex speciali DEI Providentia cessavit pluvia, quæ eò usq; duraverat copiosa; confluxerunt omnes Ordines Religiosi, Clerus Urbis, & Capitulum hujus Ecclesiæ, omnesque Confr-

ternitates cum suis labaris, subministrantes suis sumptibus ceram Vice-Comite de Vitoria, quæ non alia fuit, quàm candida, cujus quoque coloris cera arsit per integrum novendium. Senatores Urbis extulerunt Corpus suis humeris, & pro populi solatio, qui totus erat effusus in plateas, & fenestras, bajulaverunt illud per celebriores vicos, supponentibus humeris alijs ac alijs, eò quòd nemo illius officij pietatis esse vellet expers.

II. Cùmque pertigissent ad primam stationem, ubi erant substituri cum sacro Corpore; quando collocabatur super mensam, quæ cum in finem erat præparata, tantus fuit populus, qui turmatim accurrit, ad applicandas corollas precatorias, & alia, quæ idcirco adferebant, ut à Satellitibus abigi non possent. Quare ad evitandum omne infortunium, decretum fuit à Capitulo, & Civitate, nè amplius subsisteretur; atque ità processerunt per cæteras plateas, & forum majus, resonantibus, interea omnibus Urbis campanis, donec pervenirent ad Domum Professam Societatis, ubi jam aderant Prætores, Dominus Petrus Alarcon Ocon, & Dominus Joannes Arias de Rua, ut pararent aditum Ecclesiasticis, & ijs, qui ex his tribus Societatis domibus convenerant. Equites verò Hospitales ad Esquevam præstolabantur sacrum Corpus: ibi illud susceperunt, & collocaverunt in Tumulo honorario, bene copiosis candelis, & facibus instructo. Officium funebre persolvit Ecclesia Cathedralis, assistente solenniter Capitulo, & Magistratu, præsentibus multis ex omni conditione: quo finito discesserunt, relicto super Tumulum Corpore, quia promissum fuerat populo, quòd illo ibidem per biduum, aut triduum esset fruiturus, ut id videre & suæ posset indulgere devotioni.

III. Ità videlicet honorat, & conspicuos reddit DEUS, volentes se amore ipsius occultare, & sepelire, dum vivunt, uti hæc Sancta Domina fecit, quæ triginta annorum spatio gravissimos tolerando cruciatus, in obscuro carcere latuerat: tale enim erat
 ipsius

ipsius cubiculum, ubi nullum aliud conspiciebatur lumen, quàm candelæ, quæ per noctem & aliquot diei horas ardebat, continuato illic perpetuo miraculo. Siquidem in eodem cubiculo, licet ibi peragerentur, quæcunque exigunt necessitates, quibus humana miseria est subiecta, corpusque ipsius adeò varijs morbis divexaretur, nunquam animadversus fuit odor adversus, non aliter, quàm si in medio esset campi situm, vel undique pervium.

IV. Elapsâ eâ nocte, postridie sub diluculum matutinum, rediit Dominus Episcopus, qui pridie adfuerat occultus: & existimans: difficilem admodum fore sepulturam, si constaret de hora; iussit illam recondi in concomerato repositorio, quod in hunc finem paratum fuerat, intra ambitum summi Altaris. Cum autem ventum fuisset ad Corpus, atque istud repertum, nonnihil malè præter spem conceptam olens, & essem de hac re domi meæ ad S. Ambrosium monitus, curavi advocari ipsius socias, quæ composuerant Corpus defunctum. Cumque eæ comparuissent, & illud lustravissent, reppererunt, quòd per os magnam eiecisset sanguinis copiam, & puris, unde scilicet oriebatur ille malus odor: quia ablato eo pure, caruit corpus omni graveolentiâ, fuitque non aliter tractabile, quàm si viveret.

V. Tunc apparuit verum esse, quod mihi dixerat, ingestum sibi absque dubio fuisse aliquod venenum à diabolo: & ex illo provenit apostema, sicut alias calculi ex igne & sordibus cubuli: indè quoque cruciatus fuerunt derivati, ad reliquas corporis partes, quarum nulla à capite usque deorsum fuit ab ijs immunis: passa enim illos est vehementissimos in gutture, pectore, stomacho, latere, brachijs & cruribus, ultra omnem modum, ut nemo possit concipere, quid tum fuerit actum, præter nos, qui id spectavimus. Ipse etiam Doctor Cansecus, qui illam curabat, cum accessisset visurus, an aliquam haberet inflammationem in gutture, notavit odorem oris ipsius (qui in alijs

occasionibus defluxionum, ac doloris dentium fuit, qualis est corporis sani, & bonæ complexionis) hâc vice fuisse gravem, ortum ex apostemate. Et quamvis tum causam non animadverterit, deinde tamen re melius considerata, illam agnovit. Hastenus P. Michaël de Orenia.

VI. Dominus Franciscus de Vinivela verò hoc idem funus sic describit. Convocati fuerunt omnes Ordines Religiosi, Parochiæ, & Confraternitates, ut adessent feria sexta post vesperras, decima hujus mensis: & adfuerunt omnes absque metu incommodorum in captando honorariore loco, ardentem exoptantes videre, & venerari tam sanctas reliquias. Daræ fuerunt omnibus candelæ ex cera alba, & hanc, quia Sancta fuerat pauper, donavit elemosynæ loco, Vice-Comes de Viloria.

VII. Toto pomeridiano tempore illius diei cœlum resolvebatur in pluviam, & cum esset constitutum, ut sepultura differretur in diem sequentem, derepente fuit totum serenatum, prodiiitque Sol clarus, quasi cupidus illius spectandæ, quæ tot annis in angulo obscuri cubicelli à videnda ipsius luce abstinuerat. Quæ res pro cœli favore habita est, ideoque concurrerunt universi ad sepulturæ illius Festum: sic ajunt, ante complures menses à Sancta vocatum fuisse istum diem. Civitas honore, semper prosequens suos indigenas, sibi hoc die assumere honorem voluit, gestando Beatam suis humeris: & quia omnes istius oneris freri voluerunt participes, fuit decretum, ut per intervalla, in aliorum ac aliorum humeros deponeretur.

VIII. Egressam est ex sua domo cum eo triumpho, ut major his sæculis vix fuerit visus. Erat induta veste, quâ uti consueverat antequam affigeretur lecto. Habebat solitum suum, capitis operimentum, pallium gossipinum, togam è rudi panno, & superpositum scapulare, in quo erat expressum nomen JESU, à Sancta, serico citrij coloris pro hac die, ante 40. annos efformatum: & tanto tempore permanserunt vestes tam munda,

quam

quainquam paupertinæ, atque si paucis mensibus fuissent gestatæ. Ut autem satisfaceret communi desiderio, deportata fuit per plateam domicellarum ad fontem regium, processumque est per eam, quæ est sita ad rivum Esquevam & Aurificum ac Negotiatorum, per forum summum, plateam angularem, & Benedictorum, usque ad templum Societatis. Multi existimaverunt, neque cum exiguo fundamento, Vallisoletum hâc occasione, solito fuisse copiosius, siquidem non fuit parvula fenestra, aut subdiale ambulacrum, unde conspici posset Sancta, ut non replerentur hominibus, qui etiam adeò in plateis erant addensati, ut difficulter possent perrumpi. Quod verò tum maximè sum miratus, est neminem adfuisse nisi detecto capite; quod ipsum accidit, in omnibus concursibus per novendiales ipsius Exequias, & in panegyricis, de ea habitis concionibus.

IX. Fuerant in quatuor locis platearum dispositæ stationes, ubi sacrum Corpus erat substitutum, ut cum omni solennitate caneretur responsorium. Primus erat in platea ad Esquevam: sed vix fuerat ex humeris depositum à Senatoribus, quando confertissima confusi populi turba voluit accedere, ad applicandas suas corollas precatorias. Quapropter cum se viderent opprimi, necesse ipsis fuit abruptâ deinceps omni quiete resumere Corpus, & non dimittere ex suis humeris, nè simile periculum incurrerent, à quo illos eximere non poterant satellites, quantumcunque prompti essent ad arcendam ingentem hominum multitudinem, cum id, quia erant infiniti, esset impossibile.

X. Pervenit ad Domum Professorum Societatis JESU, ubi illi ab ijs Sanctis Patribus fuerat exstructus Tumulus honorarius, eâ gravitate, & concinnitate, quæ ipsis est propria, etiâmq; circumdatus crate ferreâ, quæ impetuosos populi impediret assultus. Evenit, ut templum splendide esset peristromatis con-
vestitum, pro festo Sanctissimi Sacramenti, quod ibi fuerat ce-
le-

lebratum, & quamvis illa Ecclesia sit semper quoddam Cœlum; hœc tamen annò & istâ occasione fuit majore curâ, quàm aliàs antehac, exornata. Hic illius honori justa Exequiarum solenniter peregit, Ecclesia Cathedralis, suâ adhibitâ musicâ; & Dominus Decanus sacro apparatu vestitus obivit in hac functione munus Sacerdotis. Occlusum fuit templum reliquæ multitudini, quòd licet par sit magnis concursibus, pro hoc tamen nimis erat angustum, siquidem à multis fuerunt occupandæ parietum prominentiæ, ut non privarentur aspectu Sanctæ. Repletum, fuit templum communitatibus Religiosis, & præcipuis è statu tam Ecclesiastico, quàm sæculari hujus Urbis: nam etiam proVectiores ætate, & venerabiliores Prælati Religionum, honori sibi ducebant aliquid operæ conferre ad ipsius Exequias, ac testes agere oculatos inusitatorum affectuum, quos DEUS omnium cordibus inferebat. Quæ commotio non erat affectata, sed manifestè cœlestis, eò quòd tam universali animorum à DEO impulsorum conspiratione omnes optaverint adesse testimonio tam rari eventus.

XI. Mansit ibi per totam noctem feriæ sextæ, & Dominus Episcopus ad evitanda majora incommoda, quæ accidere possent ex inconsideratione vulgi, svasit Patribus, ut die Sabbathi sepukuræ mandarent sacrum Corpus; cui Illustrissima ejusdem Dominatio adfuit singulária exhibendo indicia venerationis, ac devotionis; atque peracta est eâ solennitate, quam harum reliquiarum exigebat æstimatio. Collocaverunt illam in repositorio concamerato, intrâ ambitum summi Altaris ad latus Epistolæ, qui locus dicitur fuisse designatus à Domina Comitissa de Fonsaldania Fundatrice illius templi, ex amore, quo ferebatur erga hanc Famulam DEI & ejusdem æstimationem. Hactenus epistola Domini de Vinivela.

XII. Notandum tamen est Venerabilem Marinam ex divina revelatione habuisse, quòd locus sepulchri ejus erit latus dextrum

dextrum Evangelij, prout scriptum reliquit Ven. P. Ludovicus de Ponte in fine primæ partis, quò postea translata est, etiam in initio fuerit quali raptim collocata in latere sinistro ex parte Epistolæ. Unde post septemdecim annos fuit illi in parte dextra altaris formata decens urna, & in ea sunt collocatæ sacræ ejusdem Reliquiæ dempto uno brachio, quod pro solatio Filiarum ipsius fuit datum Regio Conventui Sanctæ Brigittæ. Atque ibi expectantes ultimum diem suæ gloriose Resurrectionis requiescunt in Domino: quibus is honor, quem pietas præsentis statûs patitur, à tota illa urbe felice ipsius Patria deficitur.

CAPUT XVI.

Exequiæ Venerabilis Marinæ.

I.

HAs P. Michaël de Orenia sic in sua epistola describit: Feriâ terciâ (quæ erat 14. Junij) cæptum est novendium distributum inter Ordines S. Dominici, S. Francisci, S. Augustini, Carmelitas Calceatos, Trinitarios, Mercenarios, Clericos minores, Societatem, Ecclesiam Cathedralē, & Civitatem. Quamvis verò præteritis diebus magnus fuerit hominum concursus, affluentium ad visitandum sanctum Corpus; ab eo tamen die usque ad ultimum, tam fuerunt conferti, ut licet multi abirent, essetque templum adeò capax; totum tamen à porta usque ad summam aram impleretur, nullo relicto spatio vacuo, præter illud, quod occupabatur à celebrantibus Missam, cum etiam, qui possent, conscenderent sedes confessionales, prominentias parietum templi, & subsellia chori, perseverando ibi à matutino tempore, usque ad horam primam pomeridianam, quâ plerumque finiebantur conciones; in quibus multa, sunt dicta de ipsius virtutibus, & aliquid de revelationibus, Prophetijs, ac miraculis. Sed quidquid dictum fuit, ac dicitur

LI

in

in iustis Funebris & Exequijs, quibus illi quidam seorsim, & Viri Nobiles, atque Communitates volunt parentare continuandis à feria secunda, nihil est comparatione multorum, quæ dici possunt.

II. Duo verò (præter complura miraculosa, quæ deinceps evenerunt) fuerunt in his concursibus animadversa. Unum est, quòd ex quo Corpus ipsius elatum est ex domo, donec inferretur in templum, nemo sit visus, qui caput cooperuerit: neque per totum novendium videre fuit in templo ab ullo fuisse appositum pileum, quatuor, aut quinque personis exceptis.

Alterum, quòd licet in huiusmodi concursibus sæpe videntur Juniores Nobiles, & alij Viri advenire, ut confabulentur cum foeminis, etiam dum est expositum Sanctissimum Sacramentum; hac tamen occasione in tanta multitudine, ac tam numerofo affluxu, nemo virorum sit conspectus, qui foeminam alloqueretur, neque ullus fuerit in templo strepitus, sed altum silentium, ac si longè adessent pauciores. Hæc P. Orenia.

III. Dominus Franciscus de Vinivela exactius, quoad quædam, has ipsas Exequias describit his verbis. Decrevit Civitas spectabilem horum dierum celebritatem reddere novendialibus Exequijs, quibus singuli Religiosi Ordines sibi suum fumerent diem, servato ordine suæ antiquitatis, & præstantiores eorumdem Concionatores in suis panegyricis publicarent. eximias ipsius virtutes: quod est factum. Et incepit sacra Religio S. Dominici, quæ utpote plurimum æstimata, ac honorata ab hac insigni Matrona, illi pro affectu, quo ab ea semper colebatur, scivit reddere gratias per P. Fr. Franciscum de Peralta. Si namque illustre semper fuit ipsius ingenium, nescio quid illi splendoris, procul dubio, DEUS hoc die addiderit, quo tum gratosè peroravit, tum totius sui auditorij, quod erat infinitum, sibi conciliavit æstimationem. Sit verò dictum anticipatò, prorsus nunquam auditum, aut visum fuisse talem auditorum.

con-

concursum, qualis fuit per omnes hos dies: & exaggerationis gratiâ, quæ tamen nullum hic habere locum potest, sufficiat dicere, nunquam celebrari potuisse Sacrificium Missæ, ministris suo ordine dispositis, sed innitentibus altari. Quòdque omnem excedit fidem, est, nemini curæ fuisse, quam occuparet sedem aut locum: semper enim decens ac honoratus judicabatur locus, etiam pro magnis Dominis, quisquis inveniretur, unde possent audire hujus Domine encomia: quandoquidem insolita erat, præoccupatio locorum. Hoc primâ die accidit, quæ fuit feria tertiâ.

IV. Seraphicæ Religioni S. Francisci obtigit feriâ quartâ. Dixit pro concione P. Fr. Bonaventura de Salcedo, primarius hujus Conventus Concionator. Satisfecit populo, ac debito.

Feriâ quintâ secutus est Ordo S. Augustini, & concionatus fuit P. Fr. Joannes de Bonayalle.

Feriâ sextâ Conventus PP. Carmelitanorum Calceatorum; Dixit P. Fr. Alphonsus Perez.

Die Sabbathi Ordo Sanctissimæ Trinitatis, cujus Prælarus P. Magister Frater Joannes de Avendanio noluit laudes tam insignis Domine alteri committere, & deprædicavit illas, cum insolito applausu, ac præclaro ingenij specimine, quòd jure merito omnes magnificerunt.

Sequens dies Dominica, 21. hujus, fuit Conventus Beatæ MARIE de Mercede, & suggestum conscendit P. F. Didacus de S. Agatha, Commendator hujus domus; cujus consveta eloquentia magnam reddidisset hanc diem, nisi eam virtutum ac elogiorum Sanctæ argumentum effecisset maximam. Tantis fuit concursus & applausus

Collegium PP. Clericorum Minorum sibi sumpsit diem sequentem; concionem habuit P. Hieronymus Pardus miram, quoad thema & res ipsas. Auditus est cum gustu universali.

V. Domus Professa, felix hujus thesauri Custos, suam ex-

hibuit gratitudinem feriâ tertiâ, & obvenit Concio P. Michaëli de S. Romano, cui ob magnam cum hac Sancta habitam familiaritatem, breve est viſum tempus, quod horæ ſpatium exceſſit, pro heroicis virtutibus, & ſingularibus prærogativis Deſunctæ exponendis. Fuit dictio elegantiffima, & plena rebus pretioſis, depromptis ex ipſius vita. Bene eventum ominabatur Civitas, quia ad illum audiendum confluit indicibilis hominum multitudo, adfuitque Concilium Regiæ Cancellariæ huius Urbis.

Nona & ultima dies feriæ quartæ fuit Illuſtriſſimi Capituli S. Eccleſiæ, & Magiſtratûs nobiliſſimæ Urbis. Hi adfuerunt Miſſæ & Concioni Domini Doctôris Ferdinandi de Baſtida, cujus licet exigua eſſet corporis valetudo, egregia tamen fuit dicendi gratia, & ingens applauſus, quo ſunt audita eximia decora, quæ de hac Sancta recensuit. Hæc Dominus de Vinivela, qui interpoſitis nonnullis infrâ referendis ſic proſequitur.

VI. Iſtis diebus celebriores à ſæculis non fuerunt, & necdum illos terminari permittit devotio, ac affectus, quem DEUS omnibus indidit. Siquidem feriâ ſecundâ 27. huius, Exequias celebravit Collegium S. Ambroſij in hac Urbe Patrum Societatis JESU, domus ſpecialiter huic Sanctæ chara, cò quòd ſervet Corpus Sancti Patris Ludovici de Ponte. Dixit pro concione P. Didacus Bæſſa, qui utpote Pater ac Magiſter Concionatorum præſentis ætatis, excelluit ſubtilitate, & animadverſionibus ad ſtupendam ipſius vitam, adaptatis Evangelio, quod Eccleſia canit pro Deſunctis. Concurrit univerſa Civitas quemadmodum primis diebus. Fuit elegans peroratio, & quæ novam ſuſcitavit devotionem, ac venerationem erga ſanctitatem huius Dominae.

VII. Sequens feria tertia, 28. huius, fuit Nobilium iſtius Urbis, qui non contenti, quòd omnium dierum auditorium, ſuâ illuſtraverint præſentiâ, hunc eſſe voluerunt proprium, ut

tunc

tunc devotum suum erga Sanctam demonstrarent affectum per P. Joannem Fernandez de Saavedra Concionatorem domus Professæ Societatis JESU. Et procul dubio magnum oportebat esse affluxum, tum quòd foret dies consecratus à Nobilitate, tum propter æstimationem, ac dotes dicentis, quæ sunt eximix, & præclaræ, qualis fuit etiam dictio plena admirandis rebus, de vita, virtutibus, & miraculis Dominæ Marinæ.

Feriâ quintâ, 30. hujus, finem solennitatibus in Domo Professæ imposuit devotio multorum Illustrium Civium, qui solennissimas instituerunt Exequias, ubi de Vita Sanctæ panegyricam dixit Pater Magister Frater Placidus de Aquilar ex sacro Ordine de Mercede. Fuit Concio admirabilis à facundia, ingenio, acumine, & gratia, quâ recensuit & expendit tot eventus vitæ & mortis, hujus Ven. Matronæ.

VIII. Heri feriâ secundâ, 4. Julij celebratæ sunt Exequiæ ab insigni Conventu S. Pauli sacri Ordinis S. Dominici, qui non satis habens, quòd primus dies ipsius fuerit in domo Professorum Societatis JESU, domi quoque suæ voluit iteratò solennem exhibere gratitudinem, quam sancta illius Religio debet Sanctæ, eò, quod hæc vivens eximio illam fuerit profecuta, honore, & singularem erga ipsam habuerit confidentiam, magnique eandem fecerit. Hoc die vastum ejus templum S. Pauli tota occupavit nobilitas, & Ordines Religiosi cum innumera multitudine. Concionatus est Pater Magister Navarete, quia Sancti illi Patres ostendere voluerunt, magnum esse istum diem, & hoc festum, cum nobis concesserint præcipuum divini Verbi Præconem, quem universus Orbis, propter ipsius scripta, totusque ejusdem Ordo propter grandem zelum plurimum veneratur. Confirmavit singulari gravitate & efficacîâ discursuum deprædicatam à Concionatoribus, qui illum præcesserunt, Veritatem, ac addidit quædam specialissima de ipsius vita, miraculis, & prophetijs.

IX. Tumulus honorarius fuit elegantissimus refertus floribus, & coronis, atque in eo collocata effigies Sanctæ, cujus conspectus ad magnam omnes permovit reverentiam, & ingenti affecit solatio, atque tunc clarè apparuit, quàm meritò in sua concione dixerit P. Didacus Bæza magnum esse indicium sanctitatis Dominæ Marinæ, eò quòd in ea asserenda specialibus convenerint affectibus Patres Dominicani, & Patres Societatis JESU: cum etiam si in alijs adeò sint differentes ipsorum sententiæ, non tamen discrepaverint, imò summè fuerint uniti, & concordēs in perhibendo verò testimonio, quòd fuerit Spiritus DEI, qui in illa tam admiranda est operatus. Ipse sit benedictus in Sanctis suis, & conservet tuam Dominationem quemadmodum exopto. Vallisoleti 5. Julij An. 1633.

CAPUT XVII.

Speciale Compendium Vitæ Venerabilis Marinæ.

I.

Dominus Franciscus de Vinivela in sua epistola ad Dominum Ludovicum de Castilia scribens recenset specimen eorum, quæ pro Concionibus dicta sint in Exequijs Venerabilis Marinæ, his verbis:

Prætermitto ex proposito dicere; quid in his concionibus audiverim, siquidem id nec fert epistola, neque patiuntur tempora. Attingam pauca de ipsius virtutibus, ut ex ijs cæterorum colligatur veritas, quæ sunt dicta, præmonendo me nihil memoraturum, quod ibi non fuerit relatum.

Fuit hæc Famula DEI oriunda Vallisoletto, Filia Doctoris Didaci de Escobar, Professoris in hac Universitate Sexti Decretalium, ac Dominæ Margaritæ Montanæ Monferatensis, parentum sanctorum. Solebant nonnulli dicere: Sancta est Domina Marina, sed sanctior ipsius Pater.

II. Pucl-

II. Puella viginti & duorum mensium novit amare DEUM super omnia, accelerato illi usu rationis, ut tempestivè inciperet jacere fundamenta fabricæ virtutum, quæ tam altè erat exsurrectura. In sua juventute optavit fieri Monialis, & discipula Sanctæ Matris Theresiæ, quæ est gloria nostræ Hispaniæ, & expetiit sibi ab ea dari habitum. Intuita est illam Sancta, responditque ipsi: Vade filia, non debes fieri Monialis, quia DEUS magna vult per te agere in angulo tuæ domûs. Insignis prophetia, indicans, qualis fuerit Domina Marina: quæ videns præclusas esse ex DEI voluntate fores suis desiderijs, non arctavit animum, quin potius dilatavit, egitque Monialem in corde, quantum status ipsius patiebatur, nuncupato perpetuo voto virginæ Castitatis, & Paupertatis, atq; Obedientiæ præstandæ suis Confessarijs, quod per omnem suam vitam exactissimè observavit; nè unquam exorbitaret.

III. Quia verò DEUS jam cor illius occupaverat, præbitis indicijs rerum magnarum, quas in ipsa, & per illam erat operaturus, commisit se instructioni, ac directioni Patrum Societatis JESU, interque eos Patri Petro de Leon, magnæ virtutis viro. Suscepit hic sanctus Pater curam expoliendæ istius Animæ, quæ intrà breve tempus evasit perfecta, Mandavit illi quâdam die, ut acceptâ sub brachium scutellâ se conferret, ad capiendum, cum cæteris pauperibus cibum, apud januam cujusdam domûs religiosæ: ac licet esset tam spectabilis conditionis, ivit eò semel ac sæpius. Cùmque se jam videret esse pauperem, utebatur industriâ petendæ eleemosynæ, quodocunque advertibat aliquam minùs decentem conversationem virorum & foeminarum, quò accedebat mendicans, & erat adeò importuna, ut ab illis non discederet, donec eam conversationem cogerentur arumpere.

IV. Ità egena sanctam suam transigebat vitam, non induendo interulam lineam, neque decumbendo in lecto, cujus locò
illi

illi per plurimos annos erant fasces sarmentorum. Jejunia ipsius in pane & aqua fuerunt continua, magisque assiduæ flagellationes, quibus sese cruentabat, & cilicia, quæ perpetuò gestabat. De ejus modestia rarum aliquid fuit dictum, & est, quod Sancti Patris Ludovici de Ponte, sui tot annis Confessarij, faciem nunquam fuerit intuita, neque illum ex visu noverit.

V. Quantum attinet ipsius patientiam, ea non est summa, quòd triginta annis decubuerit, sustinendo tantos dolores, & cruciatus à DEO immisos vel permisos; sed quod inter tot ærumnas nunquam visa sit vultum exhibere minùs serenum, gravem & modestum, ità ut posset dubitari, patereturne cruciatus, an verò quiete frueretur. Sufficiat ad præsens propositum, quòd quâdam die dixerat illi, qui id in concione retulit, se nempe sic esse comparatam, ut si DEUS ità suo arbitrio permitteret sanitatem & quietem, ut ea sibi non constaret majori labore, quàm extensione manûs, hanc non extenderet. Nam in cœlo Domine (subjunxerat Sancta) nullæ sunt afflictiones, & oportet nos esse avaros horum cimeliorum mercatores, eademque copiosè accumulare: ibi enim carissimo venduntur pretio.

VI. Fuit ultra modum humilis, suique ipsius contemptrix, jam indè à sua tenella ætate: tum enim, quando illius Amita dicebat ijs, à quibus invisebatur, ipsam esse gratiosam puellam; erubescibat, ac verecundabatur, & finitâ visitatione flens Amitam rogabat, nè talia diceret. Vix verba pronuntiare noverat, quando in corde seipsam scivit despiciere.

Anno hujus sæculi 14. prohibita fuerunt Oratoria privata, & ipsa existimavit à se, exiguâ reverentiâ, quam illa suo exhibuisset, DEUM fuisse compulsam, ut ederetur illud mandatum: adeò ut eam non possent consolari ipsius Confessarij, securam reddentes, non ità se rem habere.

VII. Cum decumbens in lecto rationem eorum, quæ in illius

illius Anima agebantur, reddere deberet suo Confessario sancto P. Ludovico de Ponte, quia alienâ uti manu ad suas res annotandas cogebatur, habebat puellas domi, à quibus conscribebantur. Evenit illi quâdam die, ut haberet unam nescientem, scribere: jussit ipsam sumere apparatus scriptorium; & puella respondit, se scribendi esse ignaram, cui illa dixit: scribe, scribe; & scripsit omnia sibi dictata à Sancta. Aliâ quoque vice idem egit cum alia puella, quæ nec nec legere, neque scribere novérat. Ambæ etiamnum vivunt in hac Urbe Moniales, ut nullâ indiguerint aliâ scholâ, in qua suas condiscerent literas; quemadmodum & virtutem ac studium solitudinis, quibus omnes suâ educatione imbuunt.

VIII. Octodecim ex ijs, quæ ipsi inserviverant, collocavit in statu religioso: atque licet omnes essent juveniculæ, & multæ formosæ, nunquam est auditum, aut visum, quidquam ab illis vel apparenter minùs bene actum fuisse, quamdiu in ejus domo manserunt. Quæ specialissima absque dubio fuit providentia DEI, cum etiam in Monialium claustris, quandoque videre sit, quòd in ea paupere domo, delitescente hac Dominâ in lecto animadversum non fuit. Pro earundem subsidio expendit ultra triginta millia ducatorum, sibi eleemosynæ nomine oblatorum, ex qua nihil unquam in se ipsam insumpsit.

IX. Domus illius commune fuit pauperum, & afflictorum refugium, etiamsi tam ipsa, quàm ejus alumnæ, viverent eleemosynâ; quâ eo anno, quo invaluerat fames, nemini negatâ, ex septem panibus (quorum quatuor integri dabantur tribus personis pauperibus) vesciebantur domestici, unâque omnibus egenis eleemosynam petentibus elargiebantur, obstupescentibus alumnis, tantum panis erogari, nec tamen deficere diurnum dimensum, quod ordinariè erat exiguum, multiplicante panem manifestè DEO, ut nescienti negare eleemosynam non deesset, quòd ad fores ipsius adventantibus impertiretur.

Mm

X.

X. Paupertas ipsius omnes rapuit in admirationem, quæ eam intellexerunt; & si acceptavit eleemosynas, id fecit ad succurrendum pauperibus. Voluit namque DEUS uti amore, quo ipsam omnes prosequerentur, ut, dum illi subveniretur, quæ oblatam eleemosynam non erat in se impensura, eadem ab ipsa dispensata cederet in subsidium omnium egenorum. In lectulo cortinis carente triginta annis decubuit plena morbis ac doloribus, & nullum in suo sancto corpore unquam sensit vulnus, aut livorem. Dum nonnisi elapsis octo mensibus mutari consuevissent lodices, eò quòd ipsi permolesta accideret lecti compositio, tam mundæ inveniebantur, nitidæ, benèque olentes, quàm erant, quando primùm fuerunt instratæ. Quamvis illi frequenter applicarentur quædam medicamenta, perliniretur oleis & unguentis, cubicellum ipsius esset angustum, & obscurum, clausæque manerent fenestræ, quòd vehementer affligeretur à lumine, nullâ unquam seu diei, seu noctis horâ fuit in eo odor, qui non esset gratissimus: & si hæc veritas non fuisset comprobata tam diuturnâ atque exploratâ experientiâ, videretur res impossibilis.

XI. Magnus ille hujus sanctæ Dominæ Pater spiritualis Ludovicus de Ponte, vicinus suæ morti dixit: Quid in Dominæ Marinæ obitu sit eventurum, ignoro, verùm quæ in vita ipsius contigerunt, sunt ex rarissimis, quæ acciderunt in Ecclesia DEI. Dictum fuit quiddam singulare, quanti magnus hic Vir æstimaverit hanc Dominam, quòd nempe ipso die sui obitûs, cum huic jam esset proximus, ut destitueretur usu lingvæ, videns ingredientem in cubiculum quendam Religiosum, solitum conscribere res hujus Sanctæ, resumpserit vocem, ipsûmque advocaverit, & jusserit accipere necessaria ad scribendum, atq; chartas, quas de hoc argumento habebat conscriptas, eique dictaverit nonnulla adhuc adscribenda, & hoc factò se convertit ad DEUM, ac dixerit: *Jam Domino obligationi meæ satisfeci: in*
MANUS

manus tuas commendo spiritum meum. Defeceritque ipsum loquela, & brevè expiraverit, ità indicando, quòd existimaverit sui esse muneris, non omittere, quidquid sciret scribendum, & præclaram pro sua tam propinqua morte fore dispositionem, si ista scriberentur.

XII. Hoc factum stupore replevit totum auditorium, novamq; istius sanctæ Dominæ excitavit venerationem: est enim extraordinaria illa, quâ in hac Urbe colitur sanctus P. Ludovicus de Ponte, veneratio, qui eodem natus est año, quo Domina Marina, & frequentaverunt unâ ludum literarium. Eo vitâ functo curam illius gesserunt P. Michaël de Orenia Societatis JESU Rector Collegij S. Ambrosij, ipsius Confessarius, & P. Fr. Andreas de Ponte, ex sacro Ordine Prædicatorum, ac sancti P. Ludovici de Ponte Frater germanus; hos enim duos fratres singulariter suspexit, & erga duos istos Ordines inexplicabili ferebatur amore, atque devotione erga Sanctos eorundem Fundatores, de quibus multa fuerunt narrata, quomodo vicissim illi fuerint addicti, seque exhibuerint faventes, ad speciale Animæ ipsius emolumentum.

XIII. Magnificè ab uno è Concionatoribus fuit appellata *Theatrum Divinorum*, quod Hieronymus dixit de Hierotheo; theatrum, quo divina fuerunt repræsentata & mirabilia. Hujusmodi sunt, quæ in hac benedicta Anima fuisse acta dixerunt, commemorando favores CHRISTI Domini, & Sanctissimæ ipsius Genitricis, atque gloriosi S. Joachimi, quem specialiter colebat, & cujus officium in Ecclesia publicari procuravit, nec non Sanctorum Patriarcharum Ordinum Religiosorum, præsertim S. Dominici, & S. Ignatii, qui de rebus cœlestibus ac divinis ad illam sermones habuerunt.

XIV. Adstiterunt ipsi continuè in ejus cubiculo per multos annos, undecim Angeli. Ponderata fuerunt illius miracula, quæ in vita acciderunt, & in morte: prophetiæ, ecstases, virtu-

tes precatoriarum ipsius corollarum, & globulorum, crucum, ac numismatum. Dixerunt subsignatum illi fuisse à CHRISTO Domino quoddam scriptum, quòd ipsam nunquam esset deserturus, semperque ipsius esset futura; datam ab eodem schedam puram, quæ se obstrinxerit ad omnia concedenda, quæ esset petitura; desponsatam fuisse à Spiritu Sancto, de qua desponsatione mira fuerunt dicta; vidisse illam in suo corde aureis literis inscripta ista verba: *Hic habitat JESUS*: in eodémque dormientem parvulum JESUM, tanquam in lecto suæ quietis: accepisse ab eo linteum, quod asservatur ad S. Paulum, ut eo sudorem, ex quodam amoris sui incendio ortum abstergeret; fuisse ab Angelis exornatam varijs cimelijs, & à Sanctissima Virgine ipsi oblatum Infantem JESUM tanquam recens natum, atque à S. Petro claves cœli.

XV. In Cœlo assiduam fuisse ejus conversationem, de cujus dispositione, & locis tam promptam habuerit notitiam, quàm de suppellectili suæ domûs, & potuisse ipsam tam faciliè videre, quæcunque ibi agerentur, quàm faciliè sit prospicere per fenestram ad videndum, quid agatur in platea: atque licet frueretur tam admirabili conversatione cœlesti, obtineret omnes illas visiones, & apparitiones, quibus illam DEUS dignabatur; habuisse tamen externos sensus & potentiam imaginativam, adeò expeditam, ut simul operam daret exequendis negotijs exterioribus.

Fundatum ab ipsa fuisse Ordinem S. Brigittæ in Hispania, cui præscripserit Constitutiones ac Regulas, quæ confirmatæ à Summo Pontifice anno millesimo sexcentesimo vigesimo nono, extent in Collegio S. Ambrosij.

XVI. Fundavit DEUS dona & favores, quibus famulam suam cumulavit, non solum in benigna sua munificentia, sed etiam in continuis ipsius & eximijs meritis, quæ consequebatur tolerando exquisitissimas & insolitas afflictiones, quibus
pares

pares nusquam leguntur in historijs tam sacris, quàm profanis. Passa est continuos morbos, dolores, & cruciatus, in suo corpore: dubia, timores, obscuritates ac derelictiones, in sua Anima, cujus virtuti magis cruentas DEUS confidit pugnas, quàm Jobo, quandoquidem diabolus etiam vitam illi abstulit, cui id ad ipsius confusionem DEUS indulgit. Exercuit ipsam aliquando per integram noctem, affando illam in veru ad ingentem ignem; confixit sagittis instar Sancti Sebastiani: & instar Sancti Laurentij superposuit craticulæ. Sustinuit rotam novaculis horridam Sanctæ Catharinæ Martyris, atque Coronam spinæ Senensis, & varijs vicibus pro Animabus Purgatorij, ejusdem poenas ac tormenta. Tot denique res, ac adeo raræ & exquisitæ, sunt dictæ, ut eas nec ego referre possim, neque capiat Epistola, quas idcirco relinquo libris, qui de his suo tempore publicabuntur.

CAPUT XVIII.

Miracula Venerabilis Marinae.

I.
Pater Petrus de Leon, Venerabilis Marinae ante Patrem Ludovicum de Ponte Confessarius conscripsit aliqua miracula, quæ contigerunt Anno 1600. ex eo, quòd Venerabilis Marina infirmos tangendo subito sanaret, prout referatur parte I. lib. I. c. 15. Contulerat enim DEUS huic suæ Famulæ gratiam, ut sanaret, quos suis manibus (servatis certis circumstantijs) attingeret: quòd illam sanè angebat, quia videlicet id posse ab alijs notari advertibat. Unde dissimulanter, & inadvertenter tangebatur infirmos, nisi adacta mandato suorum Confessariorum; ut Aloysiam de Porras ex inflammato ac tumido gutture impositâ solummodo manu parti afflictæ: & quandam ancillam in sua domo habitantem dolore pleuritico in uno latere occupato, contrectato solummodo manu loco af-

flicto. Item foeminam suam vicinam, quæ nullis medicamentis in mamilla affecta adjuvabatur. Item alium vicinum tam periculose ægrotantem, ut jam ageretur de conferendis ipsi Sacramentis. Præterea suum fratrem, suam cognatam, quin & suas sorores suis precibus sanavit.

II. Pater Ludovicus de Ponte etiam refert, quomodo sanaverit filiam primogenitam Regis Philippi III, prout jam suprà relatum est. Item quendam pauperem multas proles habentem, qui dum tectum repararet, ruit ex illo, & confregit crura, cum tangendo sanavit: ut & alium planè in simili casu.

Aliavice, cùm vicinam quandam suam susceptâ jam extremâ unctione, adhuc junior unâ cum sua Matre, præsentibus multis hominibus visitasset, occultè tetigit locum doloris: & infirma subito exclamavit: Quis me attigit? quia me sanavit. Illa, celeriter fugit, ne resciretur. Cùm quidam adequitaret in effræni equo, adeò furente, ut omnes vehementer vociferarentur, illa dixit DEO: Domine detine ipsum: & in momento stetit instar agni.

III. Continuum & notorium ab innumeris testatum miraculum fuit, quod etiam priori Capite Dominus de Vinivela specialiter annotavit: nempe quòd licèt triginta annis semper lecto affixa maneret, in cubiculo angusto, semperq; clauso (siquidem ipsius oculos lumen offendeat) & ibidem peragerentur obsequia, quibus eget corpus, & quæ tot symptomatum cura, medicinalis exigebat, ardente per noctem in eo perpetuo, atque totâ ferè hyeme, etiam interdiu lucernâ, præter aliâ luminâ, quæ accendebantur, dum illi celebraretur Missa; & licèt illud cubiculum implerent integris propè diebus, seu ipsius sociæ, seu alij eam visitantes, nunquam tamen in dicto cubiculo sit animadversus ullius generis adversus odor, nec ulla fuligo è luminum fumo, acsi foret campus svavibus expositus ventis, cuius auræ pervius: id quod Doctor Gabriel de Canseco Medicus.

dicus scribit se infinities æstimâsse, & celebrâsse, tanquam miraculum. Sed neque etiam ullus sentiebatur odor gratus, nisi ab intransantibus inferretur, qui tamen corporalibus Ven. Marinæ affectionibus notabiliter incommodabat, ut statim oportuerit adhiberi odores ingratos & contrarios excitando ex combusta lana, vel charta fumum, quo refocillaretur. Altitudo dicti cubiculi, & latitudo fuit undecim pedum, ac dimidij, & longitudo pedum tredecim. Erat in illo constructa ex tabulis (intra quam stabat lectus) clausura longa septem justos pedes, totidemque minores lata, & octo pedes alta. Cooperiebatur ista clausura hyeme tribus tapetibus, æstate verò tribus lintheaminibus.

IV. Idem Doctor Gabriel, pro miraculo habuit, quòd Ven. Marinæ corpus ex sua complexione carnis teneræ potuerit conservari vividum inter tot morbos tot annis absque pellis læsione, etiam cum nec ipsa, nec alij eam possent in isto angusto lecto movere, intra sex, & interdum decem, ac plerumq; duos, tresve menses. Interula & lodices ab ea his occasionibus receptæ fuerunt tam mundæ, quàm si illi ante octiduum datæ fuissent.

V. Marina de Obregon Monialis Trinitaria sub juramento fatetur: frequenter ego, & aliæ sociæ, quæ illi assistebamus, quandam percipiebamus fragrantiam suavissimi odoris, quem præsertim manus Sanctæ, & Venerabilis Dominæ exhalabant. Interula quæ illi auferebatur, ut alia indueretur, quòd semel intra duos menses solebat fieri, redolebat, ac si eximeretur ex multis floribus, gratissimum spirantibus odorem. Cibo tam modico intra diem & noctem sustentabatur, ut à me cibus appellari nequeat, optimèque apparuerit, eam miraculosè fuisse à DEO sustentatam.

VI. Mater Maria de Sanctissimo Sacramento Abbâtissa. Conventûs Sanctæ Brigittæ affirmat itidem ejus lectum quandoque intra decem menses non fuisse stratum. Et licet in hoc
situ

situ multis maneret mensibus, nunquam tamen illud virgineum corpus fuisse vulneratum, neque ullas protulisse sordes; imò interdum ait, sentiebamus ex eo prodeuntem odorem, & fragrantiam, quæ nihil spirabat terrenum, sed aliâ quâdam afficiebat, suavitate & solatio. Et hoc non solum sumus expertæ, quæ postremæ fuimus ipsius sociæ, verum etiam illæ, quæ nos præcesserunt, à quibus ego id audiveram, quod postea meis oculis conspexi.

Domina Angela de Osorio addit & alias circumstantias, tum cubiculi, tum corporis, quod per complures menses immotum, & in eodem non immutato decumbens strato, tam erat mundum, & integrum, quàm est virginea bimulæ puellæ caro, adeò ut nonnunquam coelestem exhalaret fragrantiam.

VII. Refert P. Pintus Ramirez lib. 3. cap. 12. sequentia: Illustrissimus Dominus Josephus Gonzalez, & Domina Catharina de Baldes ipsius conjunx jurejurando interposito (idem jurant multi alij) asserunt, quod evenit Joanni Gonzalez eorundem filio in pueritia, hodie in una è præcipuis in Hispania dignitate constituto, sequentibus verbis in compendium contractis. Filius meus Joannes dum 4. vel 5. esset annorum, fuit correptus morbo, quem Medici vocant epilepsiam, ut quævis nox timeri posset vitæ ipsius postrema. Quamprimum indormiebat graviter ronchifabat, ac incipiebat contorquere oculos, gyrare, tremere toto latere sinistro, circiter spatio, quo bis dici potest Symbolum Apostolorum; deinde invalescebat magis, ut necesse fuerit totâ illi nocte adesse, eò quòd quater, etiamque sexies, nonnullis noctibus sæpius, quàm decies sexies corripere-tur, idque ad annum usque ætatis ipsius decimum. Omnibus remedijs frustratis in hoc filio nostro unico, Parentes confugimus ad P. Michaëlem de Orenia Confessarium sanctæ Dominae Marinæ, qui suo nomine impetravit, ut meo filio liceret adire ejus domum, utque illa ipsi porrigeret manum, & suam impertiretur bene-

benedictionem. Ipse Pater duxit meum filium ad sanctam Dominam, quæ puerum (postquam is recensuit suam infirmitatem) blandè allocuta, eique bene precata (Pater de Orenia, qui adfuit, addit eam signum crucis super puerum formavisse) subjunxit se sperare in DEO, futurum deinceps ab eo morbo immunem, atque ut à sua Matre peteret facultatem colludendi alijs pueris auræ capiendæ gratiâ. Ex eo tempore qui fuit Majus vel Junius Anni 1625. in hodiernam diem, quæ est 7. Decembris 1633. per DEI misericordiam, neque morbus, neque ipsius indicium in puero fuit adversum.

Idem Dominus Josephus Gonzalez Supremus Regius Quæstor, à gravi capitis dolore liberatus est, imposito capiti suo velo, quo usâ fuerat Serva DEI Marina.

VIII. Varias morborum sanationes refert P. Andreas Pinus Ramirez ibidem parte 2. lib. 3. c. 12. ut & conversiones animarum. Pater Frater Andreas de Ponte juratus testatur, dum ægrotaret Mater Soror Beatrix de Castro, Monialis in Conventu Matris DEI, nostri Ordinis, quæ ibi ob suam virtutem, & regendi gratiam egit Priorissam, misit rogatum hanc Virginem, ut ipsam commendaret DEO. Idem instantissimè petiverunt multæ aliæ Moniales notæ Ven. Marinae, gravissimè enim ferebant jacturam talis personæ. Invaluit morbus, suscepit Sacramenta, & post datam illi extremam Unctionem, mansi ibi eâ nocte, cum multis Monialibus, ut eidem impertirer sacram Absolutionem, si ab ea peteretur, diceremque commendationem animæ. Infirma obdormivit modicùm, & evigilavit exclamando: Quis hunc meum lectum conscendit, meque attigit? accessi ad lectum, quæsi ex ea, sciretne quis ipsam attigerit. Et respondit mihi: Videbatur mihi esse Ven. Marina, quam nullum mihi dixerit verbum. Effectus is fuit, quòd sinè mora inceperit convalescere, & intra brevissimum tempus fuerit integrè sanata, atque postea quinque adhuc annis vixerit.

Videns illam eâ nocte adeò derepente convaluisse, postquam illuxit dies, egressus sum ex Conventu, ac adivi domum Marinæ. Interrogavi ipsam, fueritne in dicto Conventu? dixit mihi se fuisse, ductamque esse à suis Dominis Angelis, & quâ horâ id acciderit, qualiterque lectum conscenderit, atque amplexata fuerit infirmam, & subito sanaverit, omnia ita distinctè exprimens, sicut mihi dixerat infirma.

CAPUT XIX.

Testimonia de Sanctitate Venerabilis Marinæ.

I.

IN authenticis informationibus pro Canonizatione hujus Venerab: Virginis à Domino Georgio de Pedrosa Episcopo Vallisoletano confectis citantur plures quàm quadraginta, omni fide dignissimi testes, plerique sanctitate, literis, ac nobilitate insignes, familiariter versati cum sancta Virgine, vel qui sufficientissimam virtutum ipsius habuerunt notitiam.

P. Frater Andreas de Ponte ex Ordine S. Dominici, qui diutius, quàm 36. annorum spatio familiarissimè cum hac Virgine egit, ejusdemque etiam Sacramentales excepit Confessiones, juratus asserit, eam semper à se habitam dignam, quæ compararetur omnibus Sanctis antiquis, quorum historiæ ab Ecclesia celebrantur.

P. Michaël de Orenia Societatis JESU, ejus per novem annos usque àd ejusdem mortem Confessarius jurat se illam similem fecisse ijs Sanctis, qui specialiter in DEI obsequio eminuerunt. Pariter juraverunt omnes sociæ, quæ sanctæ Virgini convixerunt, aut ipsius morti adfuerunt.

Similiter Religiosi, qui ex diversis Ordinibus sunt cum ea conversati.

II. Excellentissimus Dominus Alphonsus Pimentel Comes de

de Benavente in sua attestatione jurat se in hac Virgine expertum fuisse magnam omnium virtutum perfectionem, & cum eam inviseret, atque in omnibus adversis temporalibus eventibus, & in summis spiritualibus animæ suæ angustijs, ac luctis confuleret, semper apud ipsam reperisse magni solatij, & præclaræ prudentiæ monita & consilia, sibi que tam bene convenientia, ut nullâ ratione ab illius jussis recederet: seque ex ipsius præsentia solitum fuisse exardescere in magnum amorem Castitatis, & gratias agere DEO, quòd tantam huic Virgini contulisset puritatem, ut ipsam intuendo delibaret istius virtutis delicias. Testatur præterea se quotiescunque illam videret specialissimos suos sensisse motus, & ingressum ad ipsam esse expertum specialem affectum ad honorandos tot Angelos (sicut dici audiverat) illi assistentes. Quòd si interdum intrando hujus venerationis ijs cœlestibus Spiritibus debitæ oblivisceretur, statim suam mentem fuisse internè permotam, quid sibi esset agendum. Stupori etiam sibi fuisse profundissimam animi demissionem, quâ hæc Virgo mirabatur, quòd ipse eam domum dignaretur ingredi.

III. Illustriissimus Dominus Franciscus Calderon, & Vargas, Comes Olivæ, Marchio septem Ecclesiarum, Filius decollati Domini Roderici Calderon, se ac suum Dominum Parentem, & Avum familiarissimè per multos annos egisse cum hac magna DEI Serva, cum tanto honore, ac æstimatione, ut nihil agerent, quod cum ea non conferrent, & illius precibus non commendarent, usque adeò, ut Parens paulò antequam esset, comprehensus, quamvis sciret negotia sua in malo statu versari, seque comprehendendum esse, Sanctam accesserit; interrogaturus, quid sibi factò opus esset. Illâ verò respondente, ut si cuperet bonum suæ animæ, nihil ageret; ipse penitus conquieverit, & exspectaverit incarcerationem, in qua postea etiam decollatus est. Post multa alia concludit se intrando in illius cu-

biculum, nunquam caput cooperuisse, neque ut id faceret, sibi in mentem venisse quòd pileum adferret.

IV. Illustrissimus Dominus Franciscus de Guzman Vice-Comes Villoriæ post multa de heroicis virtutibus concludit, constare sibi communem de hac Famula DEI opinionem esse, quòd sit maxima Sancta, ac tanquam de tali omnes loqui: & multos reveritos fuisse, ac specialiter veneratos domum, in qua felicissima ista Domina vixit, transeundo plateam ubi sita erat, dum adhuc viveret: idemq; nunc facere postquam obivit, æstimates dictam domum, tanquam magnum Sanctuarium.

Illustrissimus Dominus Josephus Gonzalez Eques S. Jacobi ex Consiliarijs Regiæ Majestatis in Consilio Castellæ & Cameræ, jurat sequentia: Novi Dominam Marinam de Escobar jam indè à 20. annis habitam fuisse pro sancta, sicuti dum est mortua: qualem & ego esse semper judicavi, frequenter cum ea conversando, cujus omnia exteriora erant clarum speculum, in quo relucebant magni splendores & sanctitas ipsius Animæ.

V. Dominus Joannes Arias de Rua Consiliarius Regiæ Majestatis, & Judex Criminalis in Cancellaria Regia Vallisoleti, gravissimis verbis exponens, quæ ipse expertus erat circa admirandas hujus Virginis virtutes (quas existimabat esse tales, ut quamvis tam multa de ipsius sanctitate dicerentur, omnia tamen excederent) subjungit: Scio transeuntes plateam, in qua vixit, ac obiit Famula DEI, solitos fuisse detegere caput, eandemque venerari instar Sanctuarij, eò quòd ab omnibus haberetur pro sancta, atque ego illam pro tali habeo.

Dominus Æmilianus de Zupide à Secretis Cameræ Judicariæ Biscajæ in Regia Cancellaria Vallisoleti, post fusè narrata, quæ est expertus, ita ait: Quando ingrediebar ipsius cubiculum jubebat Venerabilis & Sancta Domina afferri mihi sedem, ego verò illam nunquam acceptavi, quàmvis me urgeret; sed procubui in genua, & venerabundus, ac si loquerer cum creatura, plus-

plusquàm humana, acclinatus lecto Sanctæ illam alloquebar.

Plura testimonia congerere videbatur mihi superfluum, cum jam sint instituti processus pro Informationibus ad ejus Canonizationem, in quibus erit affatim Testimoniorum. Subjiciam ergo unum solummodo speciminis gratiâ scriptum in simili processu apud legitimum Tribunal pridem formatum.

CAPUT XX.

Interrogatorium circa facta egregia Dominae Marinæ de Escobar, quæq; ferè jam undecies sunt comprobata.

HOc Interrogatorium ex Hispania R. P. Roderico de Arriaga Hispano Academiæ Carolo-Ferdinandæ Pragensis tum Theologiæ Decano, postea ejusdem ante unionem cum Carolina Cancellario, transmissum, mihi deinde ab eodem Rever. Patre, meo Confessario communicatum, ante quinquaginta annos descripsi; quod cum jam tunc fuerit toties testibus sufficientibus probatum, magnum videtur pondus auctoritatis Sanctitati Venerabilis Virginis Marinæ additurum. Sic sonat:

I. An sciverint, vel narrari audierint, quòd Domina Marina à pueritia ostenderit singularia indicia virtutis, & sanctitatis, quam postea totâ vitâ manifestavit, ità ut apparuerit Dominum DEUM in illa accelerâsse usum rationis, cum antè expletum tertium annum ætatis interrogavarit, quomodo essent intelligenda ea verba: Diliges DEUM super omnia. Et quid tunc contingerit ipsâ recedente ad secretiora domûs, ut meditaretur ejus præcepti sibi dati explicationem. Et quòd exiverit quasi absorpta, ut Dominum DEUM ubique quæreret.

II. An audiverint in ea ætate incepisse Dominum DEUM in ea omnium virtutum fundamentum Humilitatem tam pro-

fundam jacere, ut quandocunque domestici laudabant ejus modestiam & obedientiam cum devotione, ipsa amarè fleverit, quæstaque fuerit, quòd ità æstimaretur: & ab eo tempore tam fixam fuisse in ea Humilitatem, suique cognitionem, ut toto tempore vitæ nec minimum senserit in se superbiæ aut vanitatis motum. Dicant Confessarij quid judicaverint de ipsa in hac virtute, & quàm vehementer renuerit, nè aliquis se adiret, aut videret titulo sanctitatis.

III. Utrùm sciant eam quarto ætatis anno Rosarium Beatissimæ Virginis, & multas alias orationes in honorem CHRISTI Domini & Sanctorum maximo cum affectu singulis diebus orasse? specialiter autem pro Animabus Purgatorij, & à decimo quarto ætatis anno integerrimas noctes in Oratione consumpsisse, ità raptam in Domini DEI amorem, ut vix unquam cogitationes ab eo summo bono averterit, etiamsi per multas horas in meditatione permaneret: quod idem in vocali contigit, & indè ad tam perfectam de Domino DEO considerationem ascendisse, ut in Vigilia nunquam ipsum è mente deponeret.

IV. Item eo tempore ac toto reliquo vitæ, dum per valetudinem corporis licuit, poenitentias rigorosas, jejunijs, flagellis usque ad sanguinem, cilicijs &c. egisse, dormiendo supra siccos palmites, aliisque modis suum corpus macerando, castigando, solo Domino DEO placendi desiderio.

V. An audiverint, quòd ab ea ætate cum maxima devotione Sacramenta frequentaverit, ità erga Venerabilem Eucharistiam affecta, ut perpetuis eam sumendi desiderijs flagrarit, Domino DEO id miraculosè approbante, cum ter graviter ægrotanti febribus, Medici non aliud remedium præsentius invenerint, quàm ut communicaret: statim enim sanitas perfectè restituta est.

VI. An audiverint, quòd antequam domi oratorium haberet, cum non posset ob summam debilitatem domo exire, fuc-

fuerit aliquoties ab Angelis portata, ut Sanctissimum hoc Sacramentum susceperet; & quod alijs vicibus spiritualiter in suo lecto per manus CHRISTI Domini & aliquorum Sanctorum suscepit.

VII. Item quòd ab ea ætate, etsi exercitijs spiritualibus summe occupata, ita tamen Parentibus, & ijs, sub quorum tutela erat, fuerit obediens, ut nunquam vel in minima re fuerit illis refragata: quòd ipsum erga Confessarios semper observavit, eis de omnibus rebus minutissimam reddens rationem, & nunquam aliquid contra eorum voluntatem fecerit, Domino DEO hanc obedientiam approbante, ipsi, ut de ea votum faceret, præcipiente. Dicant Confessarij quid de hoc genere sciant, & an non multis miraculis confirmarit Dominus DEUS.

VIII. An sciant erga Paupertatem tam affectam fuisse, ut cum Parentes obierunt, à se statim Patrimonium adicarit ferventi desiderio actu Paupertatem CHRISTI Domini imitandi: non considerans, quiposset Virgo honesta juvenis sustentari, sperans sibi Providentiam Divinam non defuturam: & quòd sæpe cum Domino DEO confidenter contenderit, optans ut omnia sibi deessent; Domino DEO tamen abundè ipsi miraculose providente. Et id deponant de particularibus casibus, qui illi in hac materia contigerunt.

IX. An sciant eam à Domino DEO tali pudicitia virginali fuisse dotatam, ut non solum ad mortem integra permanserit, sed nec minimam contra eam virtutem in se tentationem fuerit experta, nec vel levis in contrarium occurrerit. Quòd verò castigationes voluntariæ, non ad rebellionem carnis domandam, sed ad imitandum CHRISTUM Dominum, ejusque Sanctos ab ipsa fuerint assumptæ. Et cum Dominus DEUS permiserit in hujus Sanctæ Virginis conspectu dæmones mille exercere nugæ, & eam varijs modis vexare; nunquam tamen permiserit eos dicere, aut facere in ejus præsentia aliquid inhonestum.

Quòd,

Quódque Dominus DEUS illi manifestaverit per miraculosam visionem, pulchritudinem, & divitias hujus virtutis. Dicant Confessarij, quid in hac materia sciant, cæteri que, qui eam agnoverunt modestiam, gravitatem, quam dum per plateas incederet, servavit, quâ cæteros ad modestiam componebat. Item, an sciant Dominum DEUM illam in omni materia à gravi culpa illæsam servasse.

X. An audiverint à Domino DEO tam naturalibus, quàm supernaturalibus talentis, quæ ei famularentur, fuisse dotatam, ingenio, memoriâ, maturo judicio, prudentiâ, facili indole, modestâ sçavi conversatione, & gravibus verbis, ponderosisque. Item virtutes morales, sinceram veritatem, sine ulla dissimulatione, etiam in rebus minimis, mansuetudinem, temperantiam, & in rebus arduis ac honestis aggrediendis invincibilem fortitudinem in ipsa repertam. Dicant, qui eam agnoverunt, an non ipsius exteriora opera manifesta fuerint harum virtutum testimonia.

XI. Utrùm sciant Revelationes, quas scripsit de vijs spiritualibus, per quas eam Dominus DEUS duxit: documenta spiritualia in utilitatem animarum, & circa exercitia virtutum tradidit; modum item explicandi visiones, & Revelationes divinas, intelligentiam communionis Animæ cum Domino DEO per omnium potentiarum perfectissimos actus, cum unionem per affectum cum summo Bono, esse plenum doctrinæ coelestis ad dignoscendum Spiritum Divinum ab humano, & diabolico. Dicant Confessarij, & qui cum illa egerunt, quid circa hæc intellexerint, & quàm scripserit non tam voluntate propriâ, quàm Confessarij, & Divinâ.

XII. Utrùm sciant, quòd in verbis earum personarum, quæ in Revelationibus cum hac Sancta Virgine loquebantur, reperiantur circumstantiæ & signa, quæ à Sanctis traduntur ad dignoscendum spiritum DEI, diabolico, & discernendam sanctita-

eternitatem, veritatem, puritatem, sapientiam, gravitatem, manifestationem Divinæ Essentiæ, attributa & perfectiones divinas cum ad finem ordinatas, ut homines in via spirituali proficiant, & perfectionem consequantur; & an etiam in rebus, quæ per revelationem illi dicebantur, reperiantur hæc indicia.

XIII. Item an audiverint in decursu hujus Virginis vitæ repertas fuisse supra enumeratas virtutes, cum singulari sollicitudine vitandi vel minimas culpas, profunda cum humilitate, cognitione sui ipsius, vehementi desiderio, ut ab omnibus contemneretur, maximo semper timore, nè deciperetur, perpetuo recursum ad Dominum DEUM, ut omni fraude se liberaret, neque ipsam per similes vias duceret, semper, quantum est ex se, optando revelationibus, & apparitionibus carere, & se per alias solidas virtutes cum Domino DEO unire; semper omnia cum Confessariis conferendo, ipsisque exactè obediendo.

XIV. An sciant ei à Domino DEO in excellentiori gradu fidem communicatam: quod & certitudine, quâ divina mysteria credebat, & claritate summâ, proprietate ac facilitate, quâ ea explicabat, manifestè ostendit.

XV. An sciant ipsi scientiam mysticam spiritûs communicatam per Revelationes mysteriorum CHRISTI Domini, Nativitatis, Infantiae, Passionis, & Mortis, Resurrectionis, Ascensionis, & Adventûs Spiritûs Sancti. Omnibus ita erat præsens spiritu, acsi corpore, quando contigerunt, præsens fuisset, eodem affectus, & motus animi sentiens, maximè dolores, & tormenta CHRISTI Domini, in quorum signum ipsi ineffabili modo impressit stigmata in manibus, pedibus, & capite, visibile autem in latere, unde ipsi fluebat sanguis, & aqua, quorum signa nonnullæ personæ post mortem viderunt. Dicant hæc & similia Confessarij, & qui ipsam agnoverunt, ac de hoc mysterio aliquid intellexerunt.

XVI. Item quod hæc Virgo eandem scientiam mysticam

O o

ha-

habuerit mysteriorum Sanctissimæ Trinitatis, Immensitatisve; de Beatitudine Angelorum, cum aliqua participatione, & fruitione in se ipsa, eorum, quæ Beati in cœlo vident. De mysterijs Angelorum Custodum erga homines, & quid multi alij Sancti præstent hominibus, maximè Fundatores Religionum erga suos.

XVII. Item quòd habuerit experientiam omnium communicationum Domini DEI cum Anima, per inspirationes, figuras, visiones imaginarias, illuminationes, raptusve; & quòd ipsius cor ita Dominus DEUS dilatârit, ut inter altissimas Revelationes potuerit agere familiariter cum hominibus.

XVIII. Quòd habuerit frequentes visitationes Sanctissimæ Trinitatis, CHRISTI Domini, Beatissimæ Virginis, Angelorum, qui ipsam recreabant dulcissimè colloquijs, & Revelatione Secretorum cœlestium ac terrestrium, ipsam adhortantes ad servitium Domini DEI, & ad tolerandos pro ipso dolores, eamque à dæmonis insultu protegentes: in quem finem multis ante mortem annis ipsi Dominus DEUS designavit decem Angelos, præter Custodem, cum quibus familiariter agebat, de rebus spiritualibus, in sui & proximi utilitatem.

XIX. Quòd eadem Virgo habuerit manifestum prophetiæ donum, Domino DEO ipsi multas res futuras, & absentes revelante; ad varias partes mundi ipsam ferente, in subsidium multarum personarum particularium, vel ob causas communes Catholicorum Regnorum, & defensionem Fidei; sæpe etiam manifestando ipsi animarum statum, & quid in earum consolationem & fructum dicere deberet, vel ut evitarent magnum aliquod corporale aut spirituale periculum.

XX. Item quòd tam ardenti Charitate in Dominum DEUM & CHRISTUM flagrârit, ut in ipsum corpus haud rarò redundârit, necessariûmque fuerit sæpe ex consilio Medicorum aquæ haustum ad extinguendum ardorem porrigere, & Confessa-

fessariorum industriâ temperare cum spiritûs fervorem, qui & in tactibus, & in respiratione manifestabatur persæpe.

XXI. Item quòd adhuc Juvenis hoc amore divino, ità rapiebatur, ut cùm semel in festo S. Michaëlis mater eam secum duxerit ad videndas nundinas ibi celeberrimas, nihil prorsus viderit, aut notaverit, nisi cùm primùm intravit forum, ubi vehementi strepitu parùm ad se rediens, mirata est ibi se esse, ignorans à quo ducta esset, cùm etiam pedes illuc venisset; & quòd Medici non potuerint in ipsa eo tempore pulsus dignoscere, asseruerintque eam miraculosè vitam protrahere. Eodem etiam tempore, cùm simul federet cum sororibus acu pingens, & frequentissimè ità rapiebatur in Domini DEI amorem, ut non valens tolerare illum, debuerit in proprium cubiculum includi, ut lachrymis & affectibus paulisper respirare posset.

XXII. Item quòd Dominus DEUS zelum & amorem proximorum in ea promovens jussit in bonum animarum, ut in Hispaniam induceret Ordinem S. Brigittæ cum novis Regulis, quas ipsi inspiraturus erat; & licèt cum humilitate per multos annos id recusârit, tandem obedivit, & revelatas sibi Regulas scripsit, quas Sanctissimus Urbanus VIII. Pontifex examinatas approbavit speciali Bullâ datâ 1629.

XXIII. Item quòd ex amore eodem prodierit misericordia, quâ in pauperes utebatur, Domino DEO miraculosè multiplicante, quæ in eorum subsidium habebat. Cùmque nihil aliud possideret, quàm quod ex eleemosynis acquirebat, potuerit in diversis monasterijs octodecim Virgines dotare, quatuor in matrimonium locare, & alias eleemosynas publicas, & secretas largita fuerit monasterijs, dotaverit etiam in alijs lampades coram Venerabilissimo Sacramento; & perpetua Sacra pro Animabus Purgatorij. Item quòd in distributione horum nihil dederit ulli consanguineorum, nisi præcisè sicut pauperibus cæteris.

XXIV. Item quòd ex eodem Domini DEI amore processerit summa fiducia, cum qua petebat & obtinebat à Domino DEO singularia beneficia in bonum proximorum, ut ex casibus particularibus, à testibus depositis manifestè constabit. Et quòd semel CHRISTUS Dominus ipsi dederit syngrapham (ut dicunt Carta bianca) ut ipsa apponeret, quidquid vellet, promittens se omnia concessurum.

XXV. Item quòd ut eam Dominus DEUS ad tantam perfectionem eveheret, prius illam maximis laboribus & afflictionibus corporis & animi exercuerit, cum sæpe in juventute usque ad mortem ferè ægrotaverit: & molestissimis scrupulis humiliata fuerit, ac postquam revelationibus divinis recreari cæpit, semper fuerit in perpetuo timore, & reflexione, nè deciperetur.

XXVI. Item quòd cùm prædictas infirmitates & vexationes per viginti sex annos sustinuisset, Anno 1631. tandem 21. Novembris, festo Præsentationis Beatissimæ Virginis, dæmon ipsam tam fortiter in pectore percussit, ut imposterum sine particulari miraculo, & aliorum auxilio, nec moveri quidem potuerit, ac in perpetuo morbo triginta tres annos exegerit, ità ut nullam diem, neque horam sine gravissimo dolore habuerit; & cùm semper jacuerit in angusto valde cubiculo, ubi remedia adhibebantur, & pro morbis, & humani corporis necessitatibus subveniebatur, nunquam tamen ibi notatus fuerit ab ullo, vel minimus ingratus odor, neque è contrario bonus, nisi à personis, quæ illam visitabant, afferretur, quo incredibiles Virgini augebantur dolores.

XXVII. Item quòd ad majorem hujus Virginis coronam sæpe dæmonem permiserit Dominus DEUS, ut eam affligeret, & torqueret varijs modis, & quodam die, post longum & crudele martyrium, ipsam visitaverit Sanctus Laurentius, & Sancta Catharina Martyr, qui ipsi dixerunt, se non passos graviores

res

res dolores, quàm ipsam: & quod aliâ vice, cùm dæmon collegisset pulverem, floccosque è cubiculo, eos ad os intruserit, & à tergo acerram ardentibus plenam carbonibus illi applicuerit, quibus & Virginem immaniter adussit, & sordes in quinque lapides vitelli magnitudinem æquantes coaluerint, quos tandem post quatuor mensium gravissimos dolores Beatæ Virginis intercessione ejecit, qui usq; ad hodiernum diem asservantur. Dicant Medici, an sinè speciali miraculo tam diu in adeò gravibus tormentis vitam protrahere potuisset.

XXVIII. Item quòd prædicta Virgo similes afflictiones & vexationes semper pluris fecerit, quàm revelationes omnes & visiones divinas, tum se maximè securam credendo, cùm affligebatur magis. Unde semper repetebat sibi futurum grave, si vitam sinè ejusmodi laboribus transigeret.

XXIX. Item declaret Confessarius, an sit verum, quòd, cùm in festo Corporis CHRISTI 26. Maji mediâ quintâ matutinâ ad ipsius Confessionem audiendam accessisset, sibi ab ea dictum fuerit, paulò antè ibi dæmonem comparuisse, & licèt ab uno è Sanctis Angelis inde statim repulsus fuerit, vereri tamen se grave aliquod damnum, ab eo passuram, & venenum ab eo sibi injectum. Nam statim Angelus Custos blandè ejus frontem absterfit, acsi eam demulcere voluisset, medicinamque aliquam applicuisset, & quòd statim CHRISTUS Dominus multis stipatus Sanctis Angelis se spiritualiter communicârit. Dicant Confessarius & Medici, qui assisteabant, an non sit verum quòd intra paucas horas inceperit vexari gravissimis doloribus à loco, ubi eam Angelus tetigit, usque ad octavam Junij mediâ decimâ vespertinâ, quâ totus omnino dolor cessavit; & quòd apostema duobus diebus post mortem ipsi per os erumpens, fuerit signum injecti à dæmone veneni, sicut olim lapides illi quinque fuere signa pulveris. Dicat Medicus, quid in hoc puncto sentiat, & quòd aperiens illi os, ut judicet, quid in gutture patere-

tur, notaverit malum odorem, quem ad eam usque horam nunquam aliàs adverterat.

XXX. Item quòd à quo cessârunt dolores, incepit omnium summa quies usque ad mediam decimam diei insequentis, quâ Sacramentis omnibus munita animam Domino DEO reddidit. Dicant Confessarij, an non Dominus DEUS sæpe dixerit, non expedire, ut horam mortis scirer, significaverit tamen ante mortem habituram eam gravem crucem, & paulò pòst morituram. An sciant Dominum DEUM illustrem reddidisse hanc Virginem, multis miraculis, & supernaturalibus operibus: dicant casus particulares.

XXXI. Item quòd hæc Virgo totâ vitâ fuerit æstimata, tanquam raræ Sanctitatis foemina, & singulariter à Domino DEO exornata, & quòd quicumque cum illa egerint Viri docti & sancti, Prælati, Religiosi, Titulares, Equites, omnesque alij eam opinionem de ipsa habuerint, nec solum in hoc Regno, sed & apud cæteros, ut Sanctam habitam fuisse, multosque se ejus precibus commendasse, & quòd Venerabilis Pater Ludovicus de Ponte Societatis JESU, qui cum ea tot annis egit, tanquam Confessarius, & vitæ Spiritualis Magister, per tentamenta varia, ipsam ut Sanctam reputaverit, reliqueritque scripta ea omnia, quæ de vita ipsius sciverat. Cùmque sanctus Vir habuerit revelationes suæ mortis, & eam imminere noverat, ut non nisi aliquot restarent horæ vitæ, judicârit optimam esse præparationem ad mortem, occupare se dictando virtutem hujus Virginis. Dicant, qui noverint hunc insignem Virum, an non ea actio tanta è prudentia & sanctitate promanans, magnū fuerit testimonium Sanctitatis hujus Virginis Revelationum & Miraculorum.

XXXII. Utrùm sciant, quòd in puncto mortis hujus Virginis, tantus fuerit concursus ad ipsam invisendam, & osculandos illius pedes, ut brevi sex Sacerdotes debuerint designari, quo

quo concursus prohiberetur, néve homines accederent; quibus nil juvantibus Magistratus validam manum mittere debuerit, né multitudinem irruente aliqui opprimerentur. Tota platea semper hominibus plena, etiamsi gravissima ceciderit pluvia, imò & sequente die horâ quartâ matutinâ vix modum fuisse per plateas vicinas perrumpendi, ut cum Collegium Societatis JESU Sancti Ambrosij, eâ horâ, utpote tempestivâ valde, & quâ vix ullus alius secularium pergere solet, ad corpus ipsius cucurrisset venerandum, non potuerit perrumpere aliquis, nisi petito auxilio brachij secularis. Item quòd Capitulum Cathedrale, & Senatus à seipso, nemineque urgente in se suscepisset funeris expensas tanta cum aviditate, ut nullus alteri cedere voluerit, necessûmque fuerit sortes mittere: quæ cum obtigissent Dominis Don Petro de Vaga, & Don Petro de Barcena, curârunt fieri capsam, intus Attalicâ albâ materiâ suffultam, foris autem holoserico rubro tectam, fimbrijs aureis distinctam, sexque inauratis feris.

XXXIII. Quòd ad funus ipsius concurrerint ad octodecim Religiones, Paræciæ omnes, & Confraternitatum Sodales Civitatis, omnibus ubique plateis, fenestris, & ipsis etiam rectis, ubique hominibus refertis, ut vel videre Corpus, quod detectum à Senatoribus portabatur, vel saltém venerari liceret, ut triumphum magis, quàm funus fuisse diceret. Cúmque semel stetissent, & Corpus paulisper in terram deposuissent ob devotionem præsentium convenientium, tantus fuerit repente accursus, ut necessarium fuerit illud statim elevare, ac citissimè ad Domum Professam deferre; & ut satisfaceret populi pietati, non est usque ad sequentem diem sepultum, & per consequentes dies fuerit & Officium Defunctorum, cum Missa solenniter cantata, Concióque habita, Religionibus eos dies inter se dividendibus, tanto semper hominum concursu, ut né quidem, in maximis solennitatibus simile quid fuerit visum. Post no-


ven

vem autem illos dies, aliquos Religiosos rursus Sacrum, Concionesque instituisse, ut sedecim in universum fuerint, semper omnibus tanto cum silentio, modestia, ac devotione adstantibus, ut nec minimum murmur fuerit auditum, & omnes semper, etiam in Concionibus præter ordinarium morem, detecto spectaverint capite. Quodque cum sit in Hispania solitum, defunctorum funera & exequias candelis ex communi cera flavii coloris celebrare; Exequias tamen hujus Virginis ex communi motu ac consensu, non nisi albâ cerâ celebraverint, & pretiosiori, quali utimur in Sanctorum festis.

XXXIV. Utrùm sciant hæc omnia publica, & notoria esse, ac è communi sensu, ferè certò constare omnibus, domum hujus Virginis tanquam magnum aliquod Sanctuarium venerantibus.



PARS



PARS SECUNDA.

Prudentia , Magisterium spiri-
tûs , & Scientia mystica

VEN. VIRG. MARINÆ DE ESCOBAR.

Prologus.

Sapientissimus ille Episcopus Giennensis Alphonfus , postquam signa & argumenta , quibus Revelationum S. Brigittæ veritas probaretur , adduxisset , postea ad ipsammet S. Brigittam provocavit , & ea , quæ ipsa à DEO edocta , de discernendis spiritibus , & Revelationibus tradidit . Operæ ergo pretium erit , etiam hic adducere mirabilem ac cœlestem Venerabilis Marinæ doctrinam de rebus ad directionem in Vita , Ascetica pertinentibus , de quæ ijs specialiter , quæ ad cognoscendam Revelationum Veritatem jussu Divinæ Majestatis conscripsit ; præsertim cùm futurum sit , ut hinc etiam appareat , quanto fundamento Ven. P. Ludovicus de Ponte dixerit Ven. Marinam de Escobar suâ Prudentiâ , atque in rebus Animæ experientiâ , & spirituum discretionem multum sublevâsse curam sui Patris & Ducis spiritualis .

CAPUT I.

Rara Ven. Virginis Marinæ in omnibus Prudentia.

I.

Testes Illustriissimi in Informationibus pro ejus Canonizatione , nunquam , ut loquitur Pater Pintus in II. Parte

P P

lib.

lib. 3. cap. 7. finem faciunt deprædicandi præclaras dotes naturales, quibus DEUS, hanc suam electissimam Virginem, prorsus eximiam in numero Virginum prudentum exornavit.

P. Fr. Andreas de Ponte sic ait: Opinione omnium illorum, qui cum Domina Marina sunt conversati tam virorum Doctorum & Magistrorum, quam Dominorum & Dominarum dubitari nequit, quin fuerit Mulier majore prædita ingenio, capacitate, prudentiâ, ac discretione, quam ætate nostrâ ullam fuisse constiterit. Spatio 36. annorum multa cum illa tractavi negotia, tam de rebus spiritualibus, quam de spectantibus ad regimen, publicis ac domesticis: & semper adverti admirabilem, fuisse verborum ipsius prudentiam, ac pondus, ab eâque omnia accuratè expensa, & animadversa. Præcavebat incommoda, suggerebat modos pervincendarum difficultatum, ità ut satisfaceret obligationibus, debitûsque cuivis rei ac personæ reservaretur locus.

II. Et quamvis verum sit in istis materijs notatam esse in hac Virgine gratiam & lumen divinum, quod ipsi pro illis largiebatur DEUS, atque pro exequendis prudenter actionibus, tam experimentalibus & practicis, quam speculativis & intellectualibus (nulla siquidem naturalis habitudo videtur potuisse sufficere illis tam securo & præclaro consilio transigendis) aliquando tamen ingens apparebat capacitas, & advertebantur excellentia naturæ dona, quæ ei DEUS contulerat: ideoque Pater ipsius (Vir tam prudens, tam doctus & sanctus) illi adhuc Juvenculæ commisit externum domûs suæ regimen; constatque mihi ipsum in rebus alicujus momenti expetivisse ejus sententiam, quam illa expromebat convenientissimam. Colligitur etiam singularis ejusdem habilitas ex labore manuum, quandoquidem agere poterat Magistram foeminarum, in quibuslibet operibus lini, serici, fimbriarum, & aliarum muliebrium artium. Omnia sciebat conficere, & intelligebat omnia eminent. Hæc P. Andreas.

III.

III. Ex ista naturali prudentia, cœlesti auctario illustrata ortum habuit ingens accuratio, quâ Virgines à DEO ad suum Convictum pertractas, ipsa securissimis vijs perducebat ad statum perfectionis : quæ jam in diversis sacris Conventibus , ubi vivunt, agunt spiritûs Magistras.

Mater Maria de Sacramento jurat sequentia. Occurrentibus occasionibus loquebatur juxta cujusque captum pro animæ commodo, & bona negotiorum expeditione. Nullum proferbat verbum inane, omnia enim erant admodum solida, & quæ magis ab ijs probabantur, qui eam melius percipiebant. Licet verò responsa ipsius essent pondere singularia; modus nihilo minus, quo illa dabat, erat vulgaris. Hæc tamen consilia ijs solum suppeditabat, qui ea ab ipsa petebant: alioquin enim tam simpliciter loquebatur, quàm ego & quivis alius loqui potest. Si illi aliqua ex domesticis inter conversandum dicebat: Domina, tali ego dixi, & svasi hoc & illud; respondebat nobis: Melius esse existimo tacere, nolite vos in id ingerere, quia foeminae communiter non sumus aptæ pro dandis consilijs; suscipiamus, quæ nobis dantur.

IV. Talis erat illius propensio: neque ipsa aliter faciebat, nisi à DEO impelleretur ad respondendum ijs, quæ illi consilij causâ proponebantur, idque præmissâ magnâ consideratione. Ostendebat naturam egregiam, docilem, pacatam, & consideratam, quam illi DEUS tam excellentem dederat, ut dicere solemus, quòd etiam naturalibus ipsius actionibus Divina Majestas aliquid supernaturale adjicere videretur, siquidem inter tot cruciatus, ac tales occupationes, quibus distinebatur scribendo & juvando proximos, ut nec inter diu, neq; noctu quiesceret, animum etiam minutissimis rebus domesticis applicabat, interrogando de ijs, & omnes præviâ suâ directione disponendo, ac si illas videret, ac domum obambulare.

V. Specialem verò rerum spiritualium, & singularum per-

sonarum seorsim gerebat curam : distribuebat dies, quibus unaquæque sacram perageret exomologesim, ut eam aliæ his, aliæ illis diebus adirent. Præmonebat nos antecedente vespere, quibus esset exeundum, aut manendum domi, omnes liberando curâ, dum ipsa sola sollicitaretur. Videbatur Contubernalibus suis tam puellis, quàm ætate provectioribus infundere morum compositionem, modestiam, & gravitatem, ut eis visis etiam ignoti dicerent : procul dubio istæ ibi sunt ex familia Dominæ Marinæ : & aliæ contremiscerent præ reverentia, quâ eas revereantur : omnibus tamen erant spiritali solatio, eò quòd illarum sermones essent mirabiles ac doctrinales.

VI. Domina Angela de Osorio inter alia sic ait : Nullam unquam in illa animadverti actionem, quæ peccati venialis posset insimulari : & quanquam ab ea viderim increpari, ac reprehendi aliquas domesticas, non faciebat id tamen, nisi exigente necessitate, & ad majorem nostrum profectum moderatè & prudenter, sollicita de omnibus domesticis rebus parvis & magnis, ac si unicè singulis esset intenta. Reddebat se amabilem unaque vehementiâ suarum correptionum formidabilem. Omnes majorem Consolationem non habebamus, quàm si illi inserviremus, semperque maneremus in ipsius cubiculo, assistendo ipsi ; & propterea quodammodo certabamus, quæ nostrum minus dormiret, ut ei adessemus in illius doloribus, semper namque rara erat, & extraordinaria ipsius mansuetudo, suavitas, & agendi gratia.

VII. Mater Mariana de Christo sic jurat : Semper in hac Ven. Domina talem vidi puritatem, gravitatem & modestiam, ut mirarer, diceremque in animo meo ; non est possibile, ut ista sit Mulier : est Angelus. Et certò scio ipsam Angeli speciem præsetulisse, tum majestate & indole, ac puritate, tum etiam affabilitate, & candore, quo suas socias alloquebatur. Nunquam illam conspexi iratam, licèt notarem quasdam indignationis occa-

occasione; neque aliquid dicentem aut agentem, quo nos audientes turbaremur. Reprehendebat nos solo aspectu, & iste sufficiebat, quia ipsi DEUS ejusmodi contulit gratiam, ut penetraret nostra corda, & pudefieremus, eoque magis miraremur illius patientiam ac discretionem. Nunquam aliquid recenscebat, quod non faceret ad plenam nostram instructionem, nostrumque exemplum: dirigebat sermonem ad illam, quæ præ cæteris indigebat admonitione, cum magna tamen dissimulatione, ut ipsi id dictum à DEO fuisse videretur.

VIII. Non patiebatur ullum verbum proferri, quod non esset bonum & necessarium; quod tamen insuper oportebat, etiam esse valde purum: dicta verò ab illa ipsa erant purissima, ut & purissima intentio, quod quidem nobis semper ostendebat, nosque operibus & verbis docebat. Dederat illi DEUS præclarissimum intellectum, sicut semper ex omnibus, quæ agebat, collegi, ac talem memoriam, ut si necesse foret, multa exponeret, quæ nobis convenirent ex Scriptura Sacra, & multos Psalmos nullo ad manus sumpto libro; id enim non poterat amplius facere, propter magnam suam debilitatem. Interdum jubebat nos omnes coram se comparere, & unam aliquamdiu legere: ex qua spiritali lectione sumebat, quod nobis deinde ab ipsa dicebatur, & singulis erat magis accomodatum, juxta cuiuslibet indigentiam: Credo autem illam melius scivisse, qualis singularum status esset, quàm nos ipsæ, quæ ea instructione, egebamus.

IX. Loquebatur cum tanta Majestate, ut DEUS per os illius loqui videretur, & intra ipsius animam existere: alioquin enim effectus secuti viderentur esse impossibiles, cum plerumque appareret clarè ipsam edoceri à DEO, quale singulis deberet suggerere medium, pro uniuscujusque necessitate, ità ut nos redderet contentas & pacatas, nobisque eximeret scrupulos, in quibus Confessarii nostri vix reperiebant, quo nos solarentur.

Illustrissima Domina Elisabetha de Silva Marchionissa de Monte Allegre dicit : In honore deferendo ijs , à quibus visitabatur, erat modestissima, & omnibus grata, gravis in conformatione vultus, & in suis verbis ac operibus accuratissima. Omnes, qui cum illa egerunt, agnoverunt, uti & ego, magnam prudentiam in consilijs, quæ dabat. Nemo enim aliquod petijt, ac verè est executus, qui erraret, & quidem in quibuscvis materijs. Atque ista consilia adeò erant naturæ rerum accommodata, ut semetipsa approbarent; quòd proprijs didici experientijs, ac aliorum, qui per litteras & ore tenus uti ipsius favore voluerunt.

X. Domina Magdalena de Cisneros jurat sequentia: Erat omnis expers fictionis, & candidissima. Quod attinet ad ipsius socias, quæ fuerunt multæ & complures ex ijs juvenulæ, nunquam ab ijs audivi, quòd redoleret levitatem. Semper optimæ fuerunt famæ, & multæ sunt factæ Moniales, in quo statu optimum præbent exemplum, ut abundè appareat, quale in domo sanctæ suæ Dominæ lac suxerint. Illas, quæ alium iniverunt statum, vidi optimè se gerentes, & secundùm instructionem, quam hauserunt. Omnes, quæ ipsi convivebant, vidi frequentantes Sacramenta, & perseveranter assiduas in audiendis concionibus. Scio quoque hanc DEI Servam cum magna sollicitudine ac vigilantia hujus rei curam habuisse.

XI. Specialiter in domo ipsius novi Marinam Hernandez rari exempli & sanctitatis: quæ cum sufficientes possideret facultates ad vitam juxta suum statum transigendam, omnia deferuit, ut illius frueretur Societate, ipsique cohabitaret, instar ancillæ, eò quòd hujus Dominæ æstimaret sanctitatem, cui ob Sanctissimæ DEI Genitricis honorem, suam navabat operam, atq; ut vitam suam tam sanctæ Matronæ impenderet obsequijs, & cum illa conversando sese in virtute perficeret, ad quam omni studio aspirabat: & sic in diætæ Sanctæ consortio cum magnæ san-

sanctitatis opinione vivere desijt. Hæc de consummata Prudentia admirandæ hujus Virginis, quam DEUS in humili astrusi cubiculi angulo constituerat, veluti cœleste lumen, tanquam sacrum sæculi nostri oraculum.

CAPUT II.

Spiritus Prophetiæ Ven. Virginis Marinae.

I.

Dum Societas JESU filiali affectu optaret videre honoribus ab Ecclesia auctum magnum suum Patrem, & Patriarcham S. IGNATIUM, rogatâ Ven. Marina à Patribus, qui tum cum illa agebant, negotium hoc singulariter commendavit Divinæ Majestati, & Divini Oraculi percepto lumine asseverantissimè dixit suis Confessarijs; nec Papa, qui nunc vivit, neque is, qui illum sequetur modico victurus tempore, sed post hos duos tertius Beatum pronunciabit S. P. IGNATIUM. Hoc subito fuit per totam Provinciam Castellæ divulgatum, & P. Michaël de Orenia jurat, se id, cum juvenis vacaret studijs, audivisse à senibus Patribus, semperque curiosè observavisse, an esset implendum: ac demum suis vidisse oculis, quòd ita prorsus evenerit. Qui enim tum vivebat, erat CLEMENS VIII, quem immediatè secutus est LEO XI, cujus regimen fuit paucorum dierum; & huic successit PAULUS V, qui Beatorum numero accensuit S. Patriarcham. Idem jurat P. Ferdinandus de Espinosa. Idem P. F. Andreas de Ponte, qui addit etiam sibi, priusquam S. IGNATIUS in Album Beatorum referretur, ab ea aliquoties dictum, id esse certum. Addebat autem se hoc visuram, antequam à DEO ex hoc mundo auferretur.

II. Dum P. Christophorus de Ribera Præpositus Provincialis visiteret nostrum Collegium Oviedi An. 1599. significavit ipsi Veneranda Virgo per suum Confessarium, ut inde quan-

quantocyus discederet, alioquin peste corripendum & moriturum; executus est id Pater Provincialis, atque paulò post oppidum illud invasit pestis.

P. Michaëli de Orenia dixit Ven. Marina quandam personam brevè morituram, ideo, quòd DEUS irasceretur cuidam, alteri, sanguine proximè junctæ huic, quæ erat moritura. Respondit Pater, quòd DEUS sit misericors, sciatque sententiam poenæ suspendere, si emendaretur vita illius, qui esset reus. Verum reddidit Virgo, hâc tamen vice, mandabitur executioni, vidi enim à DEO intentari ictum lethalem. Distabat illa persona multis levcis, sed evidenter deprehensum est, eandem post tridie incidisse in morbum, & eâ ipsâ septimanâ obiisse.

III. Quidam Religiosus Dominicanus valdè probus, sancto zelo voluit proficisci in Indias ad opem animarum: Sancta, à qua petijt consilium, dissuasit, eò quòd zelus illius non esset satis prudens: erat enim naturæ austeræ, minùs idoneus ad agendum cum hominibus fragilibus, & recens conversis. Noluit obtemperare. Ven. Virgo Patri F. Andreæ de Ponte uno anno antè prænuñciavit ejus mortem, prout evenit; navim enim conscensurus incidit in febrem tertianam, cujus tertio paroxysmo est extinctus; priùs tamen à Socijs monitus, ut peteret à DEO veniam, quòd famulæ ipsius morem non gessisset.

IV. Idem P. Fr. Andreas oculatus testis jurat sequentia: Habebat Domina Marina sororem nomine Julianam, tam anxie conscientiæ, ut nemo Vallisoleti Sacramentalem ipsius Confessionem vellet excipere. Incipiebat jam delirare. Et spatio 46. annorum, quibus Animarum gero curam, nihil in hoc genere tam terribile, aut simile sum expertus. Commendabatur impensè DEO à Domina Marina; solabantur ipsam Viri doctissimi, & nihil sufficebat. Tandem autem, & quidem disertissimis verbis dixit Ven. Virgo prædictæ sorori, ut haberet patientiam; non enim expedire ipsius animæ, ut liberetur à

scru-

scrupulis, quoad viveret: sub horam tamen mortis, & in Confessione, quâ tunc animam esset expiatura, restituendam à DEO quieti. Ità factum est. Vocatus fui ad commodandas confidenti aures, non sinè ingenti meo timore, & miratus sum opera DEI: confessa enim est cum magna pace ac tranquillitate, suscepitque omnia Sacramenta, acsi nunquam scrupulis fuisset exagitata.

V. Addit prænominatus P. F. Andreas: Certò mihi constat, quia id sæpe sum expertus quasdam personas, eò quòd non acceptaverint ipsius admonitiones, neque secutæ fuerint consilia, gravibus à DEO & peracerbis fuisse castigatas pœnis temporalibus. Manifestabat mihi Virgo aliquot mensibus antè, distinctèque exprimebat pœnam, quàm DEUS istis comminaretur. Ego de ea illas personas præmonebam; cùmque manerent obstinatæ, ità planè puniebantur, ac dixerat. Vice versâ ijs, qui sanctis ipsius consilijs obtemperabant, vidi prosperè negotia cessisse: cujus rei longam ex multis eventibus habeo experientiam.

VI. Quâdam vice DEUS huic Virgini dixit: Veni citò mecum, veni mecum, & ostendam tibi, quid agatur. Duxit illam nullâ ei concessâ morâ ad locum procul distantem Vallisoleto, ostenditque ipsi quoddam opus, & occupationem nonnullorum, quos P. Orenia noverat. Notavit Virgo locum, actiones, vultus & constitutionem omnium, retulitque universa, dicto Patri Orenia suo Confessario, qui unum illorum in bonum ipsius de hoc facto admonuit per Epistolam, & quantum opere DEUS esset offensus, exponendo singillatim, quæcunq; fuerant acta. Respondit ille, fatendo ità omnino esse, vehementer obstupescens, rem tam remotam adeòque secretam fuisse tam celeriter rescitam; & quidem cum tam clara omnium circumstantiarum notitia.

VII. Missus erat Madrito specialis cursor, qui significaret

Qq

Re-

Regis filiam ægrotare, ut illam Venerabilis Marina commendaret DEO. Rogata est à suo Confessario, ut id faceret: ipsa modicum hærens, seque interne colligens, respondit: Filia Regis ex hoc morbo morietur; quod intra paucos dies evenit.

VIII. Comparuit Ven. Virgini Sanctus Patriarcha cujusdam Ordinis Religiosi, comitantibus ipsum nonnullis SS. Patriarchis aliarum Religionum, dixitque illi: Vides meos Filios conventuros ad electionem novi Prælati, à quo regantur, ac tractaturos negotia suæ congregationis. Rogo te, ut illos commendes DEO. Ipsa tergiversabatur dicens: se parum posse præstare, facturam tamen, quòd ab eo juberetur, ut illi obediat. Sed id melius ab ipso fieri posse, qui frueretur DEO. Ità faciam, respondit Sanctus: verum etiam tu preces tuas offer, cum DEUS magnificiat preces justorum degentium in terra. Scias quoque me ad futurum Capitulo, cum his Sanctis Patriarchis, quos hic vides. Sic Sancti valedixerunt Virgini, & illa, quemadmodum animam suam pandere consueverat, narravit visionem Confessario, cui post paucos dies dixit.

IX. Fuit hic heri talis Religiosus (erat Vir magnæ in suo Ordine autoritatis, qui ibi vivebat) dixitque mihi, Superiorem, qui se abdicaturus erat officio, ac duos tresve alios ex Capitularibus brevi adventuros, & ab his videri adferendam jam peractam electionem; innuens, ipsos venire, postquam jam inter sese concluderunt, quem essent electuri, & qualiter pro suo beneplacito distributuri officia. Adfuit denique designatum tempus; ingressi sunt statò die Capitulares locum suæ electionis, & cum illam postridie ipsius Confessarius adivisset, ut exciperet ejus Confessionem, illique celebraret Missam, dixit ipsi Venerabilis Marina: Heri jussu DEI adfui Capitulo illorum Religiosorum, & vidi, postquam consedisent, Sanctum eorundem Patriarcham ingressum fuisse, cum alijs Sanctis, quos tuæ Paternitati nominavi; atque severo vultu ad quendam ex
ijs

ijs Religiosis confidentibus accessisse, arreptoque ejusdem habitu, illum magno impetu & vi extrusisse ex conclavi, ita ut ibi ultra non comparuerit.

X. Accessit deinde ad alium, quem apprehendit, ut & ipsum ejiceret; verum is aliquantum restitit, & allegavit quasdam causas, quæ tamen illi nihil profuerunt, nec à Sancto sunt approbatae, ideoque fuit ex conclavi ejectus, sicut præcedens. Postea S. Patriarcha arripuit alium, qui magis repugnavit, attulitque rationes, quibus quidem S. Patriarcha sibi minimè satisfactum esse ostendit, nihilominus ipsum reliquit, quasi alio tempore promeritam poenam luiturum. Hoc Sancta suo Confessario recensuit. Ille observavit, quid esset eventurum. Accidit verò, ut intra octo circiter dies primus illorum fuerit mortuus; alter paulò post, uterque enim obiit durante Capitulo. Tercius autem graviter ægrotavit, & quamvis convaluerit; sæpe dixit, se non victurum usque ad finem sui officij, sicut factum est, quia citò è vita migravit.

XI. Multis diebus ante exortam quandam persecutionem Societatis JESU Venerabilis Marina monuit suum Confessarium, magno dæmonem flagrare desiderio, ut nos gravi afficiat molestia; felicem tamen fore exitum. Omnia sic evenerunt, ut obstupesceremus, atque Divinam Protectionem grati agnosceremus.

XII. Vocavit quâdam vice Ven. Virgo ad se Dominam Cassildam de Rotulo, magnam suam benefactricem, eique tenere valedixit. Domina Cassilda domum reversa dixit, dubio procul nobis morietur Sancta, hodie enim mihi ultimum valedixit: sed ipsamet intra sex dies correpta morbo obiit, adjuncta tum in infirmitate, tum in purgatorio precibus Ven. Marinæ; qua de re mira quædam testes jurant.

XIII. Tres Personæ præcipuæ autoritatis decreverant, quidpiam facere, quod ad maximum DEI honorem existima-

Q q 2

bant

bant cessurum. Commendârunt hoc per litteras Sanctæ, quæ rescripsit rem, etsi videretur pia, non expedire, nec DEUM vel-
le eam fieri, nec habituram bonum successum. Quia autem di-
ctæ Personæ manum jam operi admoverant, proposuerunt.
Confessario rationes valde convenientes, ut Ven. Virginem
induceret ad ei negotio favendum. Ipsa dictis suis firmiter in-
hæsit: illas verò cum destinata perficere conarentur, Divina
Majestas impedivit gravissimis morbis, unde duæ sunt mortuæ,
tertia diu versata in magno periculo.

XIV. Complures graves testes jurant, quòd Ven. Marina
corda hominum, & occultissimas atque arcanissimas animarum
necessitates penetraverit, & de earum præmonuerit remedio.
Dum Mater Mariana de Christo sociam ageret hujus Venera-
bilis Dominæ, visitata fuit à suis Parentibus, qui deinde invise-
runt etiam Dominam, adducentes unà Filiolum. Rogavit ipsam
Pater, ut illum puerum commendaret DEO. Faciam id, respon-
dit Virgo, applica ipsum studijs litterarum, ingreditur enim
Ordinem S. Dominici, eritque optimus Religiosus. Habeo,
subjunxit Parens, alium aptiorem, quem tibi alio die adducam;
ut ei bene preceris. Venit aliâ vice, adduxitque alterum pue-
rum. Intuita est illum Sancta, statimque dixit: ô quam strenuus
miles erit iste pusio! DEUS ipsum conservet. Ità omnia evenie-
runt, & pusio iste eo tempore, quo id juravit testis, gerebat in
Brasilia officium Supremi Vigiliarum Præfecti.

XV. Anno 1631. Sacra Inquisitio statuerat, quandam
mulierem obstinatam in suis erroribus extradere brachio secu-
lari, ut combureretur. Venerab. Marina id rescians, ducta fuit
à suis Angelis ad carcerem, ubi illam miserabilem ab octo dæ-
monibus circumdatam invenit, quos arreptâ scuticâ, quam ipsi
dederat DEUS, expulit: atque eodem momento obstinata cæ-
pit emolliri, imploravit misericordiam, & falsa est culpam.
Tam distincta expressit Sorsa DEI indicia ætatis, vultûs, vesti-
tûs,

tus, ut quando deinde prodivit ad ferale theatrum, ipsam statim is agnoverit, cui Ven. Marina prius narraverat, nullo penitus indicio discrepante.

XVI. P. F. Bartholomæo de Cruce Dominicano, Novitiorum Magistro, supplicanti pro quodam præclaræ indolis Novitio, qui jam decreverat deferere Religionem, Famula DEI gratiosissimè subridens respondit: noli affligi, mi Pater, quia hoc non fiet; revertere, & dic illi, ut uno saltè die perseveret. Reversus reperit Novitium immutatum, qui se obstrinxit votis religiosiis, & gratus agnovit beneficium sibi à DEO per Venerabilem Marinam præstitum, ideoque illam semper appellabat suam Matrem.

Excellentissima Domina Maria de Toledo, Ducissa de Alba interrogavit Sanctam de duabus Virginibus, quas in suo monasterio Lauræ collocare volebat. Respondit: Bene Domina, potes tali habitum Ordinis conferre, alteri verò non videtur convenire. Ducissa suscepit etiam alteram; sed illa ipsa paulò post deseruit habitum, & monasterium.

XVII. Cùm Domina Magdalena de Cisneros esset deposita à Medicis, Venerabilis Marina optimè id sciens, ei significavit; nè gravaretur ad se, ubi convaluerit, venire. Statim sensit se plurimum sublevatam; brevì convaluit, visitavitque suam amicam.

Eadem jurat se ità solitam fuisse orare: Sancte mi Angele Custos, alloquere Sanctos Angelos, qui morantur apud meam Dominam & amicam Marinam, ut ipsi dicant, quo me in hac molestia commendet DEO. Statimque solitum fuisse sibi aliquid à Ven. Virgine significari ad magnum levamen suæ afflictionis, cujus notitiam Sancta Virgo, nullâ viâ humanâ potuerit habere.

Eadem, Venerabilem Virginem aliquando invisens, dixit: Commenda me DEO, pessimè enim valeo, & videor mihi bre-

vi moritura. Subridens Ven. Marina respondit: nequaquam mea Domina, aderis enim meo Festo (itā appellabat diem sui obitus) & vesties, juvabisque componere hoc meum exanime corpus. Itā prorsus accidit, attulit interulam lineam, quā est induta Sancta mortua, adfuitque dum ipsius corpus componeretur. Publicas ærumnas & calamitates sæpe prævidebat, ac prædicebat, ut multi spiritum ejus propheticum venerarentur.

CAPUT III.

Instructiones circa viam spiritualem, præsertim pro incipientibus.

I.

Quispian Religiosus direxerat ad Ven. Marinam quandam Personam, ut ejus spiritum examinaret; cui ipsa sic respondit, Part. 2. lib. 2. cap. 23. Hactenus non retuli Paternitati tuæ, quæ mea fuerit sententia de Famula Dei, quam tua Paternitas ad me misit, donec expenderem casum, Deoque illum commendarem. Dico autem, mi Pater, plurimum placuisse ipsius virtutem, probitatem & candorem, nec non ferventem ejusdem spiritum, & ardentes affectus Divini Amoris, quibus anima illius est præditā. Quia tamen hæ spirituales materiæ sunt tam profundæ, ac difficulter penetrantur, & intelliguntur, opusque est illas magnopere explorare, & considerare; invenio hic nonnulla laudabilia, & alia, quæ indigent ponderatione.

II. Optima siquidem & perfectissima conditio spiritus est, quod affectus & ferventes motus amoris DEI maneant in intimo recessu, seu suprema parte Animæ, atque itā operentur, & radices agant, ut non perstrepant, ac tumultuentur in parte ipsius inferiore, aut in sensibus externis, privando illos suis naturalibus operationibus. Si namque permittamus, ut affectus
suum,

scum, quod ajunt, attingant scopum, arrogant sibi dominium nostræ animæ, & ejus potentiarum; cùm tamen contrarium fieri oporteat, eò quòd illis debeat dominari anima, ut melius exequatur, & exerceat virtutes.

III. Hæc DEI Famula, multum de eo, quod ad rem præsentem attinet, meâ opinione habet: quandoquidem ut est adeò simplex, sincera, & bonâ ducitur intentione, omnia amplectitur, tanquam profecta à DEO, non considerans, unde exteriores ij proveniant tumultus, & strepitus, quos tua Paternitas in ea advertit; quæ ex re ingens potest percipere damnum, non solum quoad actiones naturales, sed ipsum quoque spiritum: omnis enim naturalis passio, quæ deviat à regulis Prudentiæ (hæc verò est, quæ omnes virtutes & affectus perducit ad maturitatem) abfert perniciem & nocumentum.

IV. Frequentissimè nobis, Pater, accidit, quod Paternitas tua melius novit, ut spiritui, licet sit bonus, se admisceat natura cum suis propensionibus suum sequens genium. Unde fit, ut nisi magna adhibeatur cura, iste spiritus, tum propter novitatem, & exiguam hujusmodi rerum experientiam, tum etiam ob grandia diaboli stratagemata, abducatur in errores, malisque innitatur fundamentis.

V. Magni verò refert bene illum fundare in principio, ut evadat robustus, generosus, liber, & Dominus suorum affectuum, ita ut in operando ac judicando possit esse ambidexter. Volo dicere: ut possit prodesse vitæ activæ, & contemplativæ. ut non inebrietur, & satiatur modico vino Divini Amoris, verum sit aptus. ac animosus ad plura & plura à DEO accipienda, quin statim anima prosternatur, & fiat instar trunci; quâ ratione se deprehendit prope ad omnia esse inhabilem.

VI. Remedium pro consolidandis hujusmodi spiritibus est, quod adhibere solemus in fabricis, ac proinde dicimus, non exstruitur ædificium solidum; quia debilia habet fundamenta; ideo-

ideóque priusquam altiùs assurgat, necesse est, ut diruatur, & nova illi bona fundamenta substruantur. Idem hìc dico: Applicemus denuo hanc famulam DEI orationi solidæ & ordinariæ, qualis docetur à Sanctis: & quando illam occupant ij vehementes affectus, à quibus extra se rapitur, reprimat ipsos, séque inde abstrahat; & si fuerit opus, intermittat tunc orationem, conferátque se ad externa opera, charitatis, & officia humilitatis.

VII. Quamvis etiam sibi videatur esse abalienata à sensibus, & non posse resistere; perseveret, ac inferat sibi vim: plerúmque enim istæ sunt naturales fragilitates spiritûs, ubi insuper secretissimè consuevit subingredi diabolus. Quòd si hæc Famula DEI id seriò & promptè egerit, consequetur paulatim cum divina gratia, quod optat. Licèt autem ipsa, ex sua parte conatum hunc adhibere debeat pacatè ac svaviter, & confidendo in DEO, Paternitas tua nihilominus se ei exhibeat aliquantùm asperam, ac si talia, & exteriores, atque extraordinarios strepitus, parvi vel nihili faceret, adeò tamen discretè, ut illam rigor non nimium contristet, ac affligat: Nam in his rebus extraordinarijs crediderim non intervenire culpam, sed naturales hujus personæ defectus, quos ipsa, quia est inexperta, nescit agnoscere. Hunc in modum oportet Paternitatem tuam perseverare, in regenda ista Anima. Si enim in ea operatur DEUS, polliceor illi non perdituram propterea ipsius favores, imò cumulatiores consecuturam.

VIII. Advertendum est, si hâc industriâ utendo non obtinuerimus victoriam, quam exoptamus, atque illa in dictis externis strepitibus permanserit, existimandum esse, quòd sint permissiones DEI, & altissima ipsius judicia. Toleranda erit, & adjuvanda, sicut infirmus, qui patitur invitus. DEUS sic benedictus, juvètque nos omnes per suam misericordiam, doceat, ac illuminet, prout indigemus. DEO GRATIAS. Hactenus Epistola.

IX. Scri-

IX. Scripsit Ven. Marina similes complures epistolas ad quoddam monasterium Hispaniæ, quarum una pulcherrimis documentis plena reperitur, Parte 2. lib. 2. cap. 23. pag. 312. ubi contra modernos Quietistas concludit: Fugiat Anima, quantum ipsi fuerit possibile, extrema singularia, & nova, quæratque DEUM perfectè, sed viâ usitatâ, quam docemur à Sanctis, & ejus Ecclesia. Hæc enim illum, & ipsius Veritates reperiemus. Ipse sit in æternum benedictus, qui tantam nobis in ista sua Ecclesia & in suis Sanctis reliquit doctrinam.

X. Narraverat Venerabili Marinæ quispiam Religiosus, de quibusdam gratijs, & speciali devotione cujusdam Servæ DEI; quod cum ipsa coram DEO expenderet, audivit à sua Majestate sequentia: Adverte Marina, cum hac & quavis alia Anima, quam in simili habeo statu, me eo modo gero, quem tibi nunc dicam. Æternâ meâ Sapientiâ cognosco ex una parte naturam, propensiones, imbecillitatem; ex altera verò bonam dispositionem talis creaturæ. Incipio igitur illam educare instar Matris ad ubera mea, sustento eam dulci lacte, gesto in meis ulnis, nè pedes ipsius cespitent: blandior illi, meque exhibeo benevolum, & omnia ad virtutem spectantia reddo facilia: atque ita progreditur sinè defatigatione, ac si portaretur lecticâ, omnem in me collocans suam confidentiam. Taliter ipsam educo, donec videam esse solidatam, ac radicatam in meo amore. Tunc illam sensim sinè sensu incipio ablactare, & evolvere è fascijs, ut jam comedat panem cum crusta, suisque incedat pedibus, tametsi eam manu ducam, non absque sustentaculo ambulatorio, ac dispono, ut se in tentatione difficultatum, afflictionum, obscuritatum, ac meæ absentiæ, sic sciat gerere, ut non exorbitet aut perdat firmam in me fiduciam, audendo aliquid, quasi proprijs viribus, & laborando; me ipsi præbente auxilium, quod ei non potest deesse, quando teruncium sui liberi arbitrij ducit ad omnia meæ voluntati, mearumque legam observationi con-

formia, non volendo, vel desiderando solatia, quamvis à me profecta.

XI. Postquam Anima jam ad hunc statum pervenit, incipio illam aliter tractare, utpote quæ talem à me acceperit virtutem, & generositatem, ut jam æquis possit luctari viribus cum suis hostibus, quantumvis fortibus, & ferocibus, eosque (referendo de ipsis felicem victoriam) subjugare, sibi subjicere, & stupenda ac mira in obsequium mei operari. Quia namque me sibi scivit devincire, bene respondendo meis vocationibus, adeò, ut se mihi totam submittat ad exercenda opera charitatis, & procurandum bonum Animarum; ideò constituit se quodammodo murum fortem inter me & meum populum, ut avertat indignationem & poenas à mea Justitia irrogandas, dicendo mihi pari demissione, ac animositate: hoc non fiat, mi DEUS, non fiat: mihi sunt prius infligendi ictus tuæ iræ, quam populo tuo Christiano. Dum pertingit ad istum statum, laudat me, & benedicit ex corde, contestando seriò meam esse, & non suam omnem virtutem, & generositatem, quam ipsi largior, ex infinita mea bonitate. Agnoscit & absq; omni dubio credit, quod ex se ipsa non sit ad quidquam utilis, ac idonea, quòdque illius miseria, fragilitas, inopia, & mala dispositio ad accipienda mea dona, sit quasi infinita, atque puteus carens fundo, ubi nunquam possit figere pedem. Hunc in modum, & in hoc statu ascendit gradatim, & crescit in admirandis virtutibus, donec perveniat ad culmen altissimæ perfectionis, & amoris divini in eo gradu, quem ipsi à mea æternitate decrevi.

XII. Tales sunt, Marina, viæ & status, quibus communiter duco Animas, donec eas constituam in apice perfectionis, si me nôrunt sequi, seque mihi integrè offerre, ita ut nè minimam retineant atomum propriæ voluntatis; semper adhærentes perfectæ observationi non modo meorum præceptorum, sed omnium quoq; Evangelicorum meorum Consiliorum.

Quan-

Quaquam verò hæ sint meæ viæ consuetæ in perducendis Animabus ad dictam perfectionem; pro mea nihilominus summa Sapientia, multas habeo extraordinarias, tametsi omnes ab hac regula (nullam autem extra ipsam) dependenter, quòd in omnibus, & per omnia debeant deferere in modicis & magnis suam propriam voluntatem, ut meam perfectissimè sequantur. Nunc vale.

CAPUT IV.

Sanctus hujus Virginis Timor, & Propensio ad viam ordinariam.

I.

Insinuaturn est capite præcedenti, quantum distaret spiritus Venerabilis Marinæ à spiritu hæretico nupernorum: Quietistarum. Hoc ut pateat magis, subjicio caput sequens. Etsi autem per utramque partem Vitæ hujus Mirabilis Virginis innumera quasi per omnia folia sint exempla Timoris, & cautelæ, quâ in tam extraordinaria via procedebat, semper quantum erat ex se, eam fugiens, & sinè singularitatibus cupiens DEO sua exhibere obsequia (id quod est unum è præcipuis signis verarum revelationum) pulcherrima & relatu dignissima mihi videntur, quæ P. Andreas Pintus Ramirez habet cap. 42. lib. 2. sequentia.

II. Quisquis hanc historiam attentè ab ejus initio legerit, observaverit quoque, paucissima esse folia, in quibus Venerabilis Marina non meminerit timorum, quibus semper angebatur, utrùm gratiæ, quas consequabatur, essent profectæ à DEO, atque an assequeretur divinam voluntatem; qui omnes timores oriebantur, ex ijs duabus præcipuis virtutibus, quas plurimum vegetas, & radicas, in purissimo suo pectore habebat: profunda nempe Humilitate, quâ se quocunque favore judicabat

indignam, & ardenti Charitate, quâ summè optabat unicum beneplacitum & gloriam sui DEI. Licet verò illam Divina Majestas frequenter juberet esse securam, ac durante eo actuali lumine, omne nostra Virgo deponeret dubium, essetque Anima ipsius serenissima: nihilominus disparentibus ijs radijs, timores revertebantur vehementiores: tam longè enim ab amantissimo DEO nostro aberat, ut ipsam simul ac semel ab illis liberaret, ut potius, tanquam id summi ad majorem ipsius spiritûs progressum foret momenti, eosdem permiserit profundiores agere radices. Et quod est notabilius (prout multis antea locis scripsimus) hoc illi signum, se esse, qui ipsam regeret, ac alloqueretur, dabat, quòd isto sancto timore, & circumspectâ cautela nunquam esset caritura.

III. Nè autem ullus miretur, cum perfecta charitas expectat omnem timorem, illum tamen per totam vitam duravisse in Virgine, quæ fuit purissimum quoddam probatissimorum DEI amorum archivum, proderit scire, quòd etiamsi perfecta charitas, omni se expoliet timore servili, ità nihilominus amplectatur timorem filialem, ut illa nihilo evadat auctior, nisi eam iste pariter comiteretur. Et quia istud est fundamentum quodammodo omnium, quæ nostra Virgo in sua vita refert, judicavi non solum lecturis esse utile, verùm etiam pro tam admiranda historia necessarium, breviter hic perstringere, quæ Sacer Textus, & Sancti Patres dixerunt de hoc filiali Timore istius meticulosæ Reverentiæ, quæ inseparabiliter unitur Amori, unde agnoscat, quàm securæ fuerint viæ, quibus DEUS hanc suam Sponsam duxit.

IV. Hic igitur castus Timor est ille, à quo Sancti ajunt, nihil admitti reliquiarum ullius rei terrenæ; Timor sanctus, qui à Davide celebratur tanquam manens in sæcula sæculorum, eò quòd, licet non quoad omnes, secundum aliquos tamen suos effectus, duraturus sit per totam æternitatem in Animabus beatis.

ris. Isto, in quantum est amabilissima Reverentia, & omnimoda resignatio in subjectionem, quam creatura debet suo Creatori, dicuntur timere Seraphini, ac tremere coram Divina Majestate. Non est amor, quia necdum rem amatam securè possidet, multum nihilominus habet amoris, quia totus occupatur veneratione & honore objecti amati. Atque sicut hic interdum furculus, qui ramo cujuscumque stipitis inseritur, producit fructus diversos à cæteris, qui in eadem arbore crescunt, sed ita ut semper sapiat radicem, cui fuit insertus: ita regio charitatis trunco videntur inseri, nescio quales, timoris affectus, qui colore, ut sic dicamus, odore & sapore semper demonstrant generosiorum se habere originem, solumque amorem esse radicem, ex qua progignuntur.

V. Metuunt Animæ sanctiores, quamdiu degunt in hoc exilio, non poenam quam possint incurrere: sed culpam cujus exponi possint periculo: non coercet illas timor supplicij: sed odium sanctum peccati. Noverunt, se in eo adhuc versari statu, ut possint offendere suum DEUM, timéntque etiam minimam umbram tam terribilis executionis: & dum cognoscunt, amabilitatem sui Domini, atque fragilitatem nostræ naturæ, oritur inde etiam tam peregrinæ speciei affectus, ut, cum is respicit DEUM, totus videatur Amor, totusque appareat esse Timor, quando nostram respicit imbecillitatem. Exardescit, luctet, anhelat (quæ omnes sunt qualitates amoris) dum considerat summam bonitatem, à qua abripitur: congelascit, obscuratur, & reformidat (quæ sunt naturalia accidentia timoris) dum expendit lubricitatem nostræ conditionis. Sufficeret ad privandos vitâ justos, & perfectos, afflictio ex eo proveniens, atque id quod metuunt de se ipsis, nisi ad illos in confidentia confirmandos, superesset vigor, quo se experiuntur confortari à DEO.

VI. Non metuunt perdere bonâ æterna, quæ ipsis ab hoc

Domino promittuntur, quia unicum suum Bonum arbitrantur esse ipsummet DEUM: sperant præmia, non tamen ambiunt: æquè illa conarentur promereri, tametsi scirent minimè sibi esse conferenda. Volunt gloriam cœlestem, ut in ipsis augeatur Gloria DEI, tantùmque moverunt timere, nè illam non obtineant: quia illis constat, eam à DEO libenter donari: cognoscunt (ac propterea illum magis amant) nihil aliud à suo DEO spectari, quàm ipsarum commoda propria, metuuntque solummodo nihil sibi ipsis lucrari, utne earum dilectus ullam patiatur jacturam. Hoc duntaxat timent, nè non obtineant, & non consequantur, magis ac magis ipsum stringendo, nexumque illius unionis, quâ unus efficiantur spiritus cum suo DEO: & quia unio est duorum extremorum, ardentissimè desiderant, ut quantum fieri potest, illa tam stricta unio convertatur in unitatem, fiatque non tam totum ex partibus, quàm carens partibus totum simplicissimum. Timent nè in hac arctissima unione admisceatur vel minima atomus, quæ sit minùs generosa: quia cavent instar imperfectionis, appetitum, ut DEUS sese ipsi uniat, & non potius ut ipsæ uniantur DEO: atque licèt non possint non possidere, dum possidentur, sciunt suo affectu collimare ad meliorem scopum, voluntque tantùm esse possessio Dilecti, non verò ut ipsarum possessio sit Dilectus.

VII. Quomodo vocari potest timor, qui tot purissimè amoris est præditus perfectionibus? ipse est absque dubio amor timens, timor amans, qui se spontè subjicit: trepidat sinè violentia: patitur sinè coactione, & absque metu contremiscit. Hujus generis timores erant Venerabilis Marinæ, quæ non formidabat abjectè, nè sibi seu infligerentur poenæ, seu negarentur præmia, sed nè in accuratissimo obsequio sui Domini, in quærenda purissima gloria sui DEI quidpiam admisceretur, quò sinceritas ipsius affectuum vel minimum obscuraretur. Progrediamur jam in recensendis, quæ ipsa de istis suis scribit timoribus,

bus, & modo, quô ipsam DEUS reddebat securam, quin tamen eosdem illi unquam penitus auferret. In charta quadam anni sexcentissimi vigesimi quinti sic ait:

VIII. Mea Anima aliquando manè eliciebat intensos, & vehementes affectus, dum essem constituta coram meo Domino, quibus Divinam Majestatem rogabam, ut mihi ex sua Bonitate largiretur lumen, pro cognoscendis suis veritatibus, meque dirigeret, ac illuminaret in tam extraordinarijs vijs, quàm sunt istæ, quibus me ducere est dignatus. Ut verò hanc obtinerem gratiam, obtuli eidem magno DEO meipsam, meum cor, ac vitam, & quidquid possidebam, atque acceperam ab immensa illius liberalitate: offerebam me ei in mancipium ipsius, & proponebam sincerissimè vitæ meæ emendationem. Interea oriebatur in me quædam confidentia, me obtenturam, quod ab eo petebam. Dum sic essem comparata, audiui Dominum mihi dicentem: Quid habes, Anima? quid sentis? cur conquereris? quæ est causa tuorum timorum? Adverte, certum esse, te bene progredi, & esse impossibile, ut possis errare in via, quâ te ego duco.

IX. Intuebatur mea Anima fixissimè Dominum, quasi attentè auscultans, dum id diceret, qui cum summo amore, & affabilitate continuò subjunxit: Quid aspicias, Anima? quid aspicias? Ego sum, qui tecum loquor; ego sum tuus DEUS & Dominus, habe in me solatium, & sustine crucem tuorum timorum: Sanctus namque Timor meus manet in æternum, quoad suum fructum, & sufficiat tibi Gratia mea, quemadmodum dixi Paulo, ac progredere viâ rectâ meæ voluntatis. Atque si tibi, propter tuos timores, facere videris cum quapiam obscuritate, quod à me juberis, ideòq; affligi in tuis gravibus negotijs, alienis à natura, & propensione, quam tibi dedi, vellesque potius cessare, & quiescere, si ego vellem, teque non inflammarem. Charitate, erga me & proximum; verè dico tibi, neminem ca-

surum,

furum, neque cespitaturum, qui portatur in brachijs à forti; & fertur à lumine; nec erraturum, qui arduâ viâ tórque habente anfractus, non ambulabit festinanter, & inconsideratè, seque comitem adjunxerit sancto Timori, cujus est considerare, ubi primùm unus, ac deinde alter pes figatur. Anima, judicia mea sunt occultissima, atque altissima, & duco, ac dirigo Animas diversimodè, & per diversos status: tu autem in ijs, quibus te duco, & in meo sancto Timore, confide meæ Bonitati & Misericordiæ, atque cum Abrahamo spera in me contra spem, & exequere, quod tibi mando. Noli dicere, non oportet me, quidquam loqui: quia loqueris, quidquid tibi injunxero: Ego enim ero tuus Dux, ac tua Lux, ego tecum manebo. Quod si necesse fuerit, portabo te, apprehensam uno capillo, ut feras cibum degenti in lacu Leonum.

X. Considera, quomodo mea Justitia, ob causas, quæ illi præbentur, festinet ad vindictam, & mea Misericordia ipsam cohibeat, propter hominem quem redemit: ità suo modo agitur tecum, & tuus spiritus videns malam quorundam dispositionem, dicit intra se: Nolo quidquam loqui. Subitò autem, zelus Gloriæ DEI, & ingens desiderium Animarum salutis te compellit, ut rursus dicas: Debeo loqui, quod intelligo ex meo DEO. Anima, omnia ista injunguntur, ut negotium non evadat deterius, & nè cogar ad puniendum: contineo me, & progredior pederentim, etiàmque te cohibeo, usque dum jam loqui oporteat. Sic fit, Anima, tametsi tu id non percipias, neque ego tibi omnia manifestem, quia sic fieri convenit. Hæc omnia evenerunt meæ Animæ agenti cum suo DEO in ista communicatione, qui propter impenetrabilia & altissima sua judicia, sit millies benedictus.

Amen.

CAPUT

CAPUT V.

De discernendo bono spiritu, à spiritu proprio.

I.

S Apientissimam admonitionem, & doctrinam tradit Ven: Domina Marina Part. 2. lib. 2. c. 35. de modo agnoscendi plenitudinem divinorum alloquiorum, quæ ibi possunt videri: atque de modo spirituum DEI à spiritu proprio discernendi, sic scribens:

Dum aliquando præ vehementia meorum affectuum, prorupissem in quandam interrogationem, quam proposui DEO, intenta ordinariæ, sed ferventi orationi, DEUS mihi gravissimè respondit, quod conveniebat. Mea Anima audivit responsum, & subito tanquam confusa considerando, animoque revolvendo modum illius divinæ allocutionis, & communicationis, dicebam intra me: Bone DEUS! quomodo, & unde agnosco hanc esse DEI loquelam? & respondebam mihi ipsi: Sine dubio id eo modo accidit, quo filius agnoscit vocem, & loquelam sui Patris, licet illum non videat, & si quis alius loquatur, agnoscit ipsum non esse suum Patrem: atque sicut amicus agnoscit se loqui cum alio amico, cum quo communiter conversatur, etiam dum sunt in tenebris. Hoc dicebam, licet intelligerem, multas alias, longè altiores adesse rationes, probantes certitudinem hujus cognitionis. Convertit se mea Anima deinde ad DEUM, dicendo illi: Mi DEUS, doce me, per te ipsum te obsecro, agnoscere loquelam proprii spiritus: & respondit mihi Dominus: Bene est, nuncne primum hac de re quæris? Satis apparet, quòd illum rarò, aut quasi nunquam audias. Et intuens meum Sanctum Angelum Custodem, dixit ipsi: Doce, mi Angele, hanc Animam, pro ipsius solatio, id de quo quærit. Tum Sanctus Angelus ad me conversus, mihi dixit: Adverte Anima,

loquela proprii spiritûs, non producit effectus luminis, & cognitionis eorum, quæ exponit, aut exhibet Animæ, quos producunt divina Domini verba, & cœlestium ipsius Ministrorum; neque adferunt eam efficaciam, ac si intimo cordi profundè infiderent; & quamvis loquela sit bona ac vera, attamen non ità fixè inhaeret, sicut loquela DEI: præterea plerumque verba spiritûs proprii, etiam dum est maximè illuminatus & fervens, sunt sicut flatus venti, non relinquentes vestigium, quâ pertransierunt.

II. Mea Anima audit cum magno solatio hæc sui Sancti Angeli dicta, eadèmq; expendens statim dixit: Bene habet, mi Domine Angele, optimè intelligo. Verùm quod mihi nunc loqueris, & edisseris, videtur resonare intrà meum spiritum, ac si ipse ità secum ratiocinaretur. Anima meticulosa, respondit tum meus Dominus Angelus, quomodo potes inficiari, me esse, qui te alloquor, cum me videas, ac me audias; atque dicere, aut velle intelligere contrarium? nōne est verum, sicut ipsamet scis, tametsi claudere velis oculos? Quod autem nunc observas, videri nempe tibi, dum ego te alloquor, mea verba resonuisse intrà te, & prolata fuisse à tuo proprio spiritu, eo fit modo, quem tibi jam pandam. Magnus DEUS habet, etiamque nos cœlestes ipsius nuntij habemus, multos modos converfandi, & loquendi cum Anima. Interdum facit, quòd pædagogus docens puerum legere, à quo pulso jubetur enuntiare & repetere eadem verba, quæ audit, ut ità exiguo ejusdem pueri caprui lectio magis imprimatur, faciliusque addiscat, quod ab illo docetur. Et hoc docendi modo, ego nunc sum usus: repetebat enim tuus spiritus, quod percipiebat. Aliàs loquitur DEUS, & loquimur Angeli, ac Sancti, tanquam Magistri in cathedra, qui habent jam adultos & capaces discipulos. Quando illi docent, sufficit, si auditores sunt attentī, conservando auditas veritates in suis intellectibus, absque ulla verborum repetitione. Omnia ista operatur

ratur Magnus DEUS noster, prout exigit capacitas, necessitas, & majus bonum Animæ, cui aliquid dicitur, totum sese accommodando ad majorem suæ creaturæ profectum. Id mihi dixit meus S. Angelus. DEUS sit in æternum benedictus, Amen.

III. Mox describit eadem Venerabilis Marina discrimen inter eas visiones, quas post intensos affectus DEUS producit, & inter eas, quæ ex propria imaginatione consequuntur.

Duobus mihi videntur modis ferventia desideria, & intensi affectus erumpere in Anima, quæ DEO servit, quando cum ijs aspirat ad insignem virtutis gradum, & opus heroicum divini obsequij. Primus est, dum illam ita movet DEUS, cujus est omne bonum, ut clarè innotescat, etiam ipsam impendere teruntiolum sui liberi arbitrij, & liberrimè cooperari gratiæ, quæ illi à DEO communicatur. Et tali casu quæri potest, utrum quod Animæ tum, quoad alloquia, & visiones extraordinarias, contingit prorsus conforme affectibus, quibus erat intenta, sit purè ac verè DEI opus, & ab eo solo procedens; an verò effectus ipsius desideriorum, quæ faciant, ut sibi videatur audire, quod optabat, utendo suâ propriâ imaginatione, quæ est egregia in hujusmodi occasionibus pictrix. Revera est materia valde dubia, & sic non rarò accidere solet; quamvis aliàs DEUS consueverit hos effectus supernaturaliter operari, per infinitam suam misericordiam.

IV. Dico autem in persona, quæ est bono prædita spiritu, virtute ordinariâ, & familiariter cum DEO conversatur, impendendo se orationi, & meditationi communi, quam docent libri & Sancti, quæ est via regia ac laudabilis, & utilissimum, exercitium, ut perveniatur ad apicem virtutum, & sublimem divini amoris perfectionem, non debere videri mirum, statimq; haberi pro novitate, & fallacia, si, dum suis vacat affectibus, & ferventibus desiderijs, experta fuerit alloquia, & visiones profectas à DEO; cum ipse, ut est liberalissimus, & absolutus suo-

rum donorum ac thesaurorum Dominus, possit ac soleat ex infinita sua misericordia, communicare hos extraordinarios favores, quando expedit ad majorem ipsius gloriam, & bonum talis Animæ, quam hac viâ magis ad se pertrahit. Atq; etiamsi alia alloquia, & visiones forent proprii spiritûs, dummodo Anima procedat sincerè, ac humiliter, non est occasio magni periculi; esset verò quàm maximi, si id à directore spiritus non examinaretur, ad ipsam statim initio commonendam, & omnia dijudicanda: sensim namque sinè sensu posset adolescere spiritus imperfectus, malè perspectus & instructus, qui post aliquod tempus, & jactis radicibus, ingens adferret nocumentum, & valde difficulter curaretur, propter contractum jam ab anima habitum, & vivacem apprehensionem, ad eum modum, quo credit, quæcunque videt ac audit, esse supernaturalia, ac divina. Et quia præsupponitur, hanc Animam necdum pervenisse ad perfectionem necessariarum virtutum, solet difficilè accidere, ut se submittat, & priorem suam deferat apprehensionem.

V. Alter modus, quo ferventia desideria, & vehementissimi affectus in Anima prorumpunt, est mirabilis, ac difficulter intelligibilis ab eo, qui illorum experienciâ caret; quandoquidem eos videtur Anima non tam ipsa elicere, quàm percipere à DEO, nihilque in iisdem operari illius arbitrium, sed esse puram gratiam, & prorsus donum DEI. Quando igitur Anima habet tam raros, & singulares affectus, existimo esse certissimum, quòd allocutiones & visiones, quas tum ex illis, ut sic dicamus, enatas, ipsisque saltè valde conformes, experimur, sint puræ & veræ solius DEI, absque admixtione ullius rei naturalis. Quoniam, sicut prima illa causa affectuum fuit præcisè gratia DEI, & ejusdem donum, ità effectus indè consequentes attribuendi sunt tantummodo ipsimet DEO.

VI. Pater spiritualis, qui est Servus DEI, doctus ac peritus, agnoscat, qualesnam sint singuli hi spiritus, affectus, & visiones.

siones, ex eo, quòd hujus posterioris generis affectus non dentur, nisi puræ, mundæ, liberæ, & expeditæ ab omni humano affectu Animæ; cùm omnis ipsius fiducia, omnia desideria, opera, & cogitationes semper spectent Majorem DEI Gloriam, ejusdemque obsequium, sinè mixtura cujusvis terreni, vel cœlestis commodi, & intima illius cum DEO familiaritas sit valde diuturna, multùm examinata, & agnita pro vera. Itaque Anima, cui DEUS ex mera sua infinita misericordia hanc tantam præstat gratiam, ut eam in isto virtutis gradu constituat, quando durantibus ipsius affectibus, quos nulla præcessit ad illos directa meditatio, & consideratio, audit & videt mysteria, attendendo, ac tremendo coram suo Domino, suamque, quantum potest, cognoscendo propriam vilitatem, quòd in tali adhuc statu vivat, ut possit decipi: hujusmodi, inquam, Anima, in qua hæc omnia signa concurrunt, potest esse secura, & existimare, quòd certissimum sit, solum DEUM esse Authorem omnium illarum allocutionum, & visionum, omnemque istam agendi rationem, & spiritum esse divinum; quandoquidem Divina Majestas, non est, neque esse potest sibi ipsi contraria, vel, falli, aut nos fallere. DEUS sit in æternum benedictus, Amen.

CAPUT VI.

De Illusionibus & fallacijs in via mystica.

I.

DE his Venerabilis Marina loquitur Part. 2. lib. 2. c. 37. Deceptiones istæ in nonnullis personis sunt graviter culpabiles, in alijs non item. Interdum oriuntur, quòd quæpiam persona fingat, quod non est. Interdum quòd quædam circumveniat Diabolus. Interdum aliquas fallit propria phantasia. Dicit ergo ita Venerabilis Marina: Multoties contingit, ut Magnus DEUS noster & Dominus propter sua alta &

arcana judicia, atque infinitam suam Bonitatem, ad majora mala, & graviora incommoda evitanda, permittat in aliqua persona diu dissimulari extraordinaria, ac singularissima, & quæ magna exterius apparent. • Quamvis autem non proveniant ab ipsius Majestate, possunt tamen carere culpâ talis personæ, cui eveniunt. Atque licet his occasionibus non sint defutura peccata, ac defectus, qui se admiscebunt; tam benignus nihilominus est DEUS, & misericors, ut propterea (si aliunde non adsit gravis culpa, quâ id impediatur) non sit intermissurus talem creaturam salvare, postquam hic per pœnitentiam, vel ibi per Purgatorium integrè pro defectibus satisfecerit, qui illic intervenerunt.

II. Quâdam vice me Divina Majestas docuit quosdam modos deceptionum, quæ in hac via contemplationis incurruntur, prout sequitur. Tempore matutino, post Sacram Communionem fuit repræsentata oculis Animæ scala, quæ à terra protendebatur ad cœlum. Multùm conabar me abstrahere ab ista apparitione, & orando ordinario modo, agere cum Domino, quem sumpseram: verùm, cum ampliùs resistere non possem, tandem me Dominus adegit, ut attenderem ad id, quod mihi ostendebat. Vidi Divinam Majestatem in habitu supremi Regis indicibili conspicuam magnificentiâ, quæ mihi dixit: Veni mecum Anima, & comitaberis me, ascendendo per illam scalam, ad cœlestem Jerosolymam. Deinde me, quasi arreptâ meâ togæ manicâ, secum duxit. Ascendebam valde hilaris & contenta cum Domino, quem comitabantur innumeri Angeli, qui suaviter concinebant laudes hujus Magni DEI, eique gratias agebant pro extraordinarijs favoribus, quos præstabat Animabus; specialissimè verò, quòd remanserit in Venerabili Sacramento, pro remedio & solatio suæ Ecclesiæ. Dum ascenderem, adverti ascendentes post me homines ignotos mihi, quia me non verti, ut illos aspicerem. Ibant cum ipsis quidam spiritus, quos etiam
non

non agnovi, essentne Angeli, an secus. Quando perveni ad summitatem scalæ, Divina Majestas est ingressa coelum, introducendo me secum, & statim, velut ex improvviso occlusit portam, relictis extra ijs hominibus, & spiritibus, qui eos comitabantur. Fruita sum in ea coelesti patria, juxta meum captum, bonis, ut alias, inexplicabilibus, donec me Dominus, mecum cundo, reduceret ad meum angulum.

III. Dum jam hic essem, incæpi considerare, quales homines, & cujusmodi spiritus illi forent, quos observavi, quando ascendebar, & qui manserunt extra coelum; quod licet animo meo versarem, non optabam rescire, quin imò propter meos timores dubitabam, utrum non fuisset mea imaginatio. Divina Majestas mihi hoc dubium solvit dicendo: Anima, homines, quos advertisti quasi te sequentes, & volentes ascendere ad coelum, quibus tamen est clausa janua, sunt multæ Animæ, quæ permittentes se abduci à suis suavis naturis, apprehensivis phantasijs, vel interdum deceptæ à diabolo, ex meis occultis judicijs, sibi videntur ambulare in vijs supernaturalibus, & habere revelationes, raptus, & similia, atque arbitrantur, se optime & securissime procedere. Falluntur, quamvis quod ad hoc attinet, absque malitia; siquidem illas excæcat naturalis ipsarum suavitas, & apprehensio, vel astutia diaboli. Errant vehementer, & non possunt ingredi in quietem serenissimi cœli veræ contemplationis, quia volentibus intrare occludo portam. Spiritus quos animadvertisti in earundem comitatu, sunt spiritus proprii earundem & non Angeli lucis. Ecce tales Animæ se produnt, & apparet quàm malè sint fundatæ, ex eo, quòd spiritus habeant garrulos: bene de me loquuntur, sed nimium, cum deberent meis donis frui silendo. Spiritus vani & singulares oprant duci vijs extraordinarijs, nec se regi sinunt secundum doctrinam meorum Sanctorum. Id mihi dixit Dominus, cujus judicia sum humiliter venerata, ac admirata. Ipse sit benedictus.

IV.: Quàm sint obnoxia deceptionibus signa externa, quæ solent haberi pro divinis, didicit Venerabilis Marina à suo Angelo sequenti modo. Dum graves paterer dolores in manibus & pedibus, ubi sunt impressa stigmata, præsertim in pede dextro, & manu sinistra, quia me doloris vehementia solito magis affligebat, cæpi id considerare & subtimere, utrùm non aliquâ ratione diabolus quidpiam in his stigmatibus operaretur. Cum ità timerem, accessit ad me Sanctus meus Angelus Custos, dixitq; mihi: Non habes, quod metuas, quia diabolus ad te tam propè non accedet, eò quòd te DEUS undequaque muniverit, & circumvallaverit, nè decipereris, vel tibi hac in re ab ipso noceretur, Scias præterea, DEUM esse magnum suorum thesaurorum Zelatorem, & bene scire, ubi illos deponat. Ac proinde sicut nemo prudens deponeret pretiosum aliquod monile, quod magni æstimaret, in medio fori, ut illud ibi suis volutarent rostris porcelli, aut furari possent latrones; neque Rex discretus poneret in loco maxime publico sui palatij, aut in omnium suorum famulorum conspectu suum thesaurum, cujus aliqui tantùm intimi haberent notitiam: ità quoque DEUS thesaurum suorum donorum, quando sunt pretiosissima, deponit in loco secretissimo, ubi pauci, iique selectissimi amici notitiam ipsius habeant; non in quopiam quasi foro, ubi ab omni hominum genere possit videri. Hoc, Soror, communiter in his eventibus contingit. Ità est locutus meus Sanctus Angelus, & significavit mihi hæc dicendo, quâ circumspèctione deberent Animæ DEO servientes admittere ea, quæ extrinsecus apparent, & quòd vulnera, ac alia signa, quæ solent haberi pro divinis, non solum non semper proveniant à Divina Majestate, verùm etiam rarò admodum sint ipsius opus. DEUS nos illuminet. Amen.

V. Exactiùs adhuc descripsit Ven. Marina statum quarundam Animarum seductarum, sequentibus: Novi quandam personam, opinione meâ Servam DEI, quæ spiritu erat, præ-

prædita valde extraordinario, quales quoque erant ipsius viæ, affectus, & modus procedendi in rebus spiritualibus, atque spectantibus ad obsequium DEI. Quamvis autem sæpe egerim cum ista creatura, fuerimque locuta; nunquam tamen mihi potuit satisfacere, seu spiritus ipsius quoad omnia placere, sed neque ejusdem natura, quòd hæc esset ardentissima, cholericæ, apprehensiva, ac terribilis, non quia putarem foveri malitiosè ab hac Anima imposturas, aut errores; quin imò habebat bona desideria serviendi DEO, licètque talis esset ipsius natura, qualem dixi, non agebat tamen malè, neque se patiebatur ab illa violentè abripi: sed quia mihi videbatur simpliciter amplecti, quæcunque ipsi occurrerent, acsi omnium author foret DEUS, non applicando animum ad ea examinanda, neque multum timendo, nè deciperetur à diabolo. Erat apparenter obsequens suis Confessarijs, & exhibebat indicia, atque opera charitatis erga proximos.

VI. Mea anima manebat diu hunc in modum perplexa, & quotiescunque constituta in divina præsentia, recordabar spiritus hujus personæ, deprehendebam nescio quid, ut judicarem non bene ità procedi, neque istum esse spiritum DEI purum, defæcatum, & cui nihil aliud sit admixtum. Conabar magno adhibito studio à me repellere istam cogitationem, dicendo me non esse à DEO constitutam hujus causæ judicem, ut eam proinde Divina Majestas juvaret, ac doceret: excusabam quæcunque notabam, quàm optimè poteram, & optabam mihi ipsi persuadere, esse bonum spiritum. Verum aliunde agnoscens illam naturam esse adeò terribilem, sicut dixi, mota ab eodem Domino, dixi aliquando ejus Majestati: éstne possibile, mi Domine, tantam esse tuam Bonitatem, ut velis suavissimum & pretiosissimum tui spiritus liquorem includere in hujusmodi natura? Sis benedictus! Audivit me Dominus, & gravi, suavique modo mihi blandè sic respondit: Veni huc Marina; quis mihi

T t

pro-

prohibebit, ſi velim pretioſiſſimum liquorem recondere in rudiffimo, malèque formato vaſe teſtaceo? quis id poterit impedire? Nemo profectò, mi Domine, reſpondi ego: eſt tamen etiam verum, mi DEUS, quòd in rudibus, & malè excoctis vaſis, ſoleat perdi & aceſcere quicunque liquor ijs infuſus, quantumvis ſit pretioſus. Optimè dixiſti Anima, ſubjunxit Dominus, optimè dixiſti. Nunc verò attende: volo enim tibi ſtatum hujus ſpiritus, & multorum aliorum illi ſimilium adumbrare.

VII. Reperiuntur quædam Animæ ejus conditionis, cujus eſt illa, quam tu noviſti, terribiles, ac duræ inſtar lapidis, partim cholicæ, & ferventes, partim autem melancholicæ & apprehenſivæ. Quæ taliter ſunt comparatæ, ſi non applicentur ad malos uſus, habent deſideria mihi ſerviendi, affectant nihilominus etiam ſingularia, & extraordinaria; quâ ratione concipiunt in ſua apprehenſione vanas figuras, & repræſentationes inanes, ita ut ſe exiſtiment videre, quæ ſunt in cœlo, & in inferno, nec non cognoscere futura, quæ ſunt eventura in mundo: in quibus omnibus plurimum præſtare poteſt diabolus, me id ex cauſis prorsus legitimis permittente. Ità fit, ut hæ Animæ talia perpetuò jaſtent, quæ nullius ſunt virtutis, aut ſubſtantię & exigui ſpiritus: quemadmodum, ſi quiſpiam attonitus integris diebus ſpecularetur, mappam geographicam, ac diceret: Ecce ibi eſt mare; ecce hic eſt terra; hoc eſt tale regnum, & illa talis provincia, neque tamen inde quidquam diſceret, aut ullum caperet, fructum. Taliter agunt iſti ſpiritus illuſi, loquuntur multa, & audiunt pauca: ſunt propenſi erga cibum & potum, atque virtus ipſorum, quamvis eam apparenter exercean, eſt tam debilis ac infirma, quàm cauſa, quæ ad eam impellit, & unde procedit, ideoque facilè ſuccumbunt ac deficiunt.

VIII. Mea Anima multum mirabatur, quòd docebatur à Divina Majeſtate, cui dixi: Quomodo verò mi DEUS, & mi Do-

Domine, tales spiritus possunt juvari? qualiter sunt curandi, atque ad virtutem ac debitum procedendi modum reducendi? facile si mea adsit gratia, juvabuntur; respondit DEUS. Nam Instructor, à quo talis Anima regitur perspectam habens illius naturam, bene illam debet explorare, & conari, ut perscrutetur, & undequaque penetret propensiones talis personæ, ipsius desideria, & opera, atque expendere virtutem, quoad fuerit possibile. Si enim spiritualis & sapiens Director sic fecerit, facile assequetur dolum, ac deprehendet illum malum, exorbitantem, vanum, & inutilem spiritum. Quo facto dirigat hanc misericordiam Animam benignè & suaviter: si est humilis reducat ipsam ad bona, plana, & secunda principia, ad usitatum orandi modum, & virtutes perfectas. Quia si hæc Anima non est malitiosa, & optat se cum divina mea voluntate conformare, æquo id suscipiet, ac pacato animo, atque licet in hac viæ mutatione aliquam experiatur molestiam, non est malum, imò certo modo bonum indicium. Caveat, nè hujusmodi animam vexet, aut affligat, asperitate, sed ita tractet, ut se ostendat ei bene esse addictum, ac desiderare ipsius profectum: si enim absit malitia, oportet similem animam hac viâ emendare.

IX. In praxi, ut in his procedatur prudenter, assumenda est pro exemplari quæpiam Anima ex ijs, quæ à me sunt edoctæ & illuminatæ in materijs spiritualibus, & à magistris virtute, spiritu, ac doctrinâ conspicuis, rigide omni ex parte fuerunt examinatæ & approbatæ. Videatur quomodo hæc Animæ sint progressæ, qualis illarum fuerit natura, virtus, affectus, timores, circumscriptio in rebus ad virtutem spectantibus: atque ex his capiatur idea, ut melius agnoscat, quid facto sit opus, & quâ ratione sint regendi spiritus, ac personæ, de quibus sum locutus; hoc enim multum proderit. Ista omnia tibi dixi, ut intelligatur tam necessaria, & utilis doctrina. Tum Dominus contulit, qui sit benedictus, Amen.

X. Luctuosum exitum cuiuspiam personæ malitiosè vitam contemplativā simulantis V. Marina describit 4. Maij A. 1625. Die Dominicā manè, postquam diu restiti, DEUS me compulit, ut attenderem ad id, quod mihi dignatus est ostendere. Vidi igitur, sicut alias scalam pertingentem à terra ad cœlum, & in ea ascendentem Animam, quæ gerebat speciem mulieris, indutam vestibis incompressis, præterquam quòd essent prorsus obsoletæ ac laceræ. Quando autem aliquot gradus conscendit, vidi descendisse ex cœlo quosdam Angelos, qui habebant in manibus gladios igneos, gravem in suis vultibus præferentes indignationem. Substitērunt supra Animam quatuor circiter gradibus ab ea distantes, impediendo ipsam, nè progrediretur, & comminando illi gladijs, ostendentes se terribiliter irasci eidem. Cohorruit miserabilis, & veluti obriguit, atque hæsit in eo gradu, ità ut nec ascendere posset, neque descendere. Interea ad illam venit Sanctus ipsius Angelus Custos, & arrepto uno ejus pede, monstrando indicia displicentiæ, & indignationis, eam magno impetu deturbavit ex scala, dejecitque in terram. Tum derepente in illam irruerunt plurimæ, diversarum specierum & formarum bestię, quæ crudelissimè excarnificatam videbantur velle discerpere in frusta. Cùm ab ijs fuisset pessimè habita, eadem larvæ, quæ erant dæmones, se erexerunt in pedes, & induerunt illam infelicem animam veste fuscâ, lacerâ, & lugubri, quæ antè erat brevissima, retrò autem longissima, manicas habebat procul protensas & laxas: caput ejusdem cooperuerunt cucullo, quæ omnia funestissimū exhibebant spectaculum. Postea fuit ab ipsis ducta ad profundissimum puteum, & in eundem præcipitata, dejicientibus se unâ super illam ipsam bestijs. Vidi deinde prodeuntem ex altera parte igneum, rapacissimum & furiosissimum fluvium, in quo adveniebat eadem anima, & prædictæ bestię, quæ inde profilientes ipsam denuò divexaverunt, multisque ei modis illuserunt, & exutam illo

illo habitu fusco, induerunt alio nigro luctuosissimo, ejusdem formæ, cujus fuerat prior: atque tandem multis ludibrijs exagitatam, & malè tractatam deturbaverunt in infernum.

XI. Ista ego spectabam attonita, ut mea Anima vehementer percelleretur, & conversa ad DEUM, cum magno timore & affectu ipsum rogaverim, ut me doceret, quid me vellet ex tam terribili visione discere, & Divina Majestas mihi placidissimo vultu sic dixit: Ecce, reperire est in nonnullis personis pessimos, ac diabolicos spiritus, qui abrepti à sua superbia, ex effreni appetitu vanitatis, quædam faciunt, quæ apparent sancta, & opera ducentia ad cælum. Licet verò omnia dirigant ad tam perversum finem, volunt nihilominus, ut ego ea approbem, ipsique conciliem æstimationem, efficiendo talia, quæ videantur esse miraculosa. Animæ hujusmodi præditæ spiritu, & hac viâ incedentes, vehementer exacerbant meos Angelos, & non modò non ascendunt per scalam veri spiritûs, sed etiam incidunt in laqueos diabolorum, qui illi per speciem apparentis sanctitatis mirum in modum illudunt, donec ultimò deveniant ad terminum, quem vidisti æternorum suppliciorum. Hoc me ipsemet Dominus docuit, & hoc mihi dixit, magnâ me replendo admiratione. Ille nos dignetur per suam misericordiam docere vias veras, ut humillimis animis in omnibus impleamus ejus sanctissimam voluntatem.

CAPUT VII.

Quomodo daemon non sciat simulare omnia opera DEI.

I.

Venerabilis Marina parte 1. lib. 5. c. 25. §. 4. sic habet: Dum (inquit) aliquando manè essem collecta, ageris cum DEO, & expendens, atque considerans ob certum finem, nonnulla quæ ipsius Majestas mihi dixerat, & manifesta-

Tt 3

verat

verat meæ Animæ, eidemque tam potenter ac efficaciter impresserat, ut agnoscerem essentne eæ veritates divinæ; quia mihi non poterat occurrere ulla ratio humana, quæ illas posset evertere: dum, inquam, ita essem constituta, dixi Divinæ Majestati: Mi Domine, dic mihi per tuam bonitatem, estne forte reperibilis ulla creatura, quæ possit aliquomodo imitari id, quod tu facis? Atque hoc illi dixi loquendo præsertim de diabolo, deque illius inventionibus. Audivit Divina Majestas meam istiusmodi interrogationem, & respondit mihi: Non potest dæmon, qui est pater mendaciorum, ullâ ratione re verâ imitari opera mea, neque meas veritates: idque ideò, quia ipse non potest dare, neque apponere suo mendacio colorem, nec saporem, neque odorem, quem habet virtus veritatum divinarum. Volo dicere, ipsum non posse suo mendacio dare eam vim, ut illi nequeat contradici, neque eam efficaciam, ut illud mendacium semper in corde perseveret, ita ut non possit ab eo recedi, nec in ullo deficiat, neque illi potest conferre tantum robur, ut in omnibus occasionibus contrarijs subsistat. Hoc non potest facere diabolus.

II. Quod facit, & potest diabolus efficere in hoc negotio, declarabo tibi hac similitudine. Sicut quando dæmon tentat aliquem hominem tentatione iræ, vel vindictæ, aut qualicunq; aliâ, & sic illum vehementer constringit, ut cor ipsius tyrannicè vexet aliquo dolore, & gravi commotione, facitque ut sibi videatur non passione agi, sed agere rationabiliter, nisi ipsum aliud doceret fides; hunc in modum operatur, quando vult simulare mea alloquia, & seducere animam, cui falsam quandam vim in illis infert, ingerendo ipsi vanos affectus, absque ratione & virtute, aut constantia, & stabilitate: ideòq; sicut ille homo, de quo sum loquutus, agnoscit per fidem, se aliquomodo deceptum; ita etiam Anima sancta, quæ fideliter amat suum DEUM (quia si id non haberet, esset magno opere timendum) plerumq;

sen-

sentit & habet in eo alloquio timores ac ambiguitates, & frequenter ipsi non conducit ille cibus, eò, quòd in illis allocutionibus, & documentis non experiatur dictos effectus vehementiæ, efficaciam, & fortitudinis, quos in Anima relinquunt mæ veritates.

III. Prosequitur deinde §. 5. quòd diabolus non operetur nisi in sola imaginativa his verbis: Postquam me indignam peccatricem dignatus est visitare Beatus Sanctus Bonaventura, advertissimque me propter quosdam affatus internos, quos senseram, teneri aliquo desiderio sciendi, utrùm nos, & interiora animarum nostrarum sciant, & cognoscant Sancti Angeli, ac diaboli; dixit mihi: Adverte Anima, diabolus non potest penetrare usque ad fundum Animæ, vel cognoscere ipsius interiora, aut quid ibi agatur, quia hoc solus DEUS potest, ideòque, quando advenit, non progreditur ultra imaginativam, & quasi portas Animæ. Illuc pertingit suis mendacijs, vel repræsentationibus turpibus, & abominabilibus, ibique Animam vocat, & illa ipsi annuit, atque consentit; vel illum rejicit; seque ab eo expedit. Si quis consentit & peccat solâ internâ cogitatione; dæmon id non agnoscit, nisi ex quibusdam conjecturis, quæ semper sunt sufficientes, ut astutus hostis intelligat aliquid. Hoc solum fit, nec potest ulterius pervenire, quàm hucusque, aut scire amplius dæmon, quod hanc rem concernit, nisi DEUS permittat, jubeatque ex suis incomprehensibilibus judicijs, ac Divina Justitia, quidpiam manifestari à Sancto Angelo, qui præter revelationem, quam habet à DEO, majori est quoad hoc præditus notitiâ, ex Divina Misericordia, pro nostra necessitate, quàm diabolus de rebus occultis nostræ animæ.

IV. Dixitque præterea Beatus Sanctus: Adverte Amica, quando CHRISTUS Dominus, vel ipsius Sancti visitant Animam, & ipsa illos videt cum divina pace, quæ ei communicatur; diabolus non potest scire, neque cognoscere, quid in ea agatur, nisi .

nisi per conjecturas. Quod si aliquid de his cognoverit, vel intellexit, id non aliter fiet, quàm permittente DEO, propter causam ejus Majestati notam. Et quando dæmon, eâ occasione se vult transfigurare in Angelum lucis, DEO permittente, danteque illi id faciendi facultatem; illa species, quam diabolus assumit, vel visio, non exhibetur in eo loco, seu parte, neque est in eo organo, in quo veræ visiones CHRISTI Domini, & ipsius Sanctorum.

CAPUT VIII.

Signa pro discernendis spiritibus.

L

IN eadem Parte 1. lib. 5. c. 23. §. 5. Venerabilis Virgo Marina signa hæc explicat hoc modo: Signa pro discernendis spiritibus mihi videntur esse ista.

Primò Spiritus DEI est Spiritus Veritatis, Bonitatis, ac Amor sapientiæ, ac pacis, suavitatis, & consolationis, fortitudinis, & perseverantiæ in eo, quod dicit Divina Majestas, ac Imperij & Domini, quod Divina Majestas habet, atque exercet in Animam, cui se ita communicat, ut nullam ei vim inferendo (in ijs, ex quibus agnoscere potest & intelligere id, quod ipsam vult docere, eique manifestare de suis divinis secretis) suaviter & cum solatio ac sinè afflictione hæc illi præstet, eâ ratione ut, quamvis se vellet abstrahere à videndo & intelligendo, quod ipsi DEUS vult exhibere, ac manifestare, omni præcisâ morâ non permittat ipsam id facere. Atque post hujusmodi communicationem & visionem DEI ejusque Sanctorum, sentit Anima solatium, quamvis eam diabolus conetur eo tempore aliquando perturbare, ipsæque in ea re ingerere dubia ac timores, cùm hoc non videatur posse alio modo efficere: maxime verò si talis Anima sit timida, impendet in id, quas potuerit, vires. Sed quia

quia iste nimius timor provenit à diabolo , evanescit quàm citissimè instar fumi, & Anima abundat solatio.

II. Præterea admirans tantam sapientiam ac bonitatem, talémque agendi modum illius supremæ Majestatis, & communicationem , quâ pandit sua arcana Animabus, amplius exardescit divino ejusdem amore, & se plus humiliat, ac indies proficit in sui cognitione , magisque obliviscitur rerum terrenarum , & eas deserit adeò , ut cum illis gratijs , quas ipsi DEUS præstat quotidie, quasi sensim sinè sensu crescat in ea perfectione virtuosæ vitæ, quam agit, excellatque in ijs admirandis virtutibus. Et hoc est præcipuum signum , DEUM esse Magistrum , ac Authorem ejus operis, idémque ab ipso procedere. Ille verò effectus admirationis , quem dixi sentiri ab Anima , dum se DEUS taliter communicat, videtur mihi semper esse vehementior, sub initium illius divinæ communicationis , quàm dum jam Divina Majestas familiariùs cum illa agit, & frequentius : verùm Amor & sanctus Timor DEI, atque circumspèctio & reverentia, quam debet habere in omnibus operibus, quæ facit concernentia honorem DEI , ac in misericordijs & gratijs , quas è sanctissima ipsius manu suscipit, crescit indefinenter.

III. Contrarium his omnibus efficit diabolus suis alloquijs, & mendacijs, ac malâ lingvâ, cujus talia quantumcunque ea velit dissimulare in ipsa relinquit vestigia & effectus, dum illam alloqui , atque id facere audet , ut cum DEI gratia , quemadmodum est dictum , bene cognoscantur in talibus Animabus : hoc est meum judicium , de statu istarum Animarum , quas DEUS amat ex sua bonitate tantopere : proptérque hunc amorem, quo eas complectitur, nisi habeat extraordinariam & specialem causam (qualem diximus Divinæ Majestati posse suppetere , ut se communicet , ac manifestet aliquod suum secretum Animabus, non adeò perfectis) aliúmve finem : propter illam suam infinitam bonitatem , inquam, & cum magnum amorem, quo Divi-

na Majestas illas amat, & amorem, quo ipsæ vicissim illum diligunt, dignatur & vult, estque ipsius voluntas, communicare se illis eâ ratione, eisdemque visitare per se ipsum, & suos Sanctos, ad eum modum, quò Magnus Princeps & Rex, ac Dominus se posset aperire, & pandere sua secreta aliquibus ministris domesticis, sibiq; unicè familiaribus, propter alterutram istâ causam.

IV. Primò, ut committeret alicui suo ministro exequendum, vel aggrediendum negotium magni momenti, unde sit emerfurum aliquid valde proficuum & bonum pro ipsius statu, & regno ac domo. Secundò, non quidem ideo, neque eo fine, sed quia illum tantopere amat, ut ob hunc solum amorem, quo ipsum prosequitur, nullo alio habito respectu, propè nihil habeat in suo pectore, seu corde, quod illi non manifestet, cum eoque conferat, & ipsi communicet, atque hac de re delectetur, nec non ut illi satisfaciat in omnibus, quæ voluerit ac petierit, eò quòd sciat ac optimè noverit se ab hoc suo ministro, sibi intimè familiari, ex toto corde ac anima amari, & illum, quantum in eo est optare majorem ipsius honorem & gloriam, atque incrementum ejus domûs, & ditionis, & subditorum. Adeoque iste Rex & Princeps tanquam Dominus absolutus suæ domûs, & ditionis, ac suorum ministrorum, jubet quod vult, ac agit pro suo beneplacito; & amat vultque hujusmodi bonis & fidelibus, ac sinceris ministris gratificari, & favere ac rependere tam munificè illorum ipsorum amorem, & fidelitatem, eamque bonam voluntatem, quâ illi serviunt communicando se ipsis eâ ratione, præstandoque illis eam cumulatam gratiam. Ità se gerit noster Magnus DEUS ac Dominus, Rex & Princeps Supremus noster erga suos servos & familiares, quales sunt hujusmodi Animæ, quia ipsum taliter amant, ei que serviunt, tantum & cum eâ fidelitate ac promptitudine, ut darent, exponerentque pro illo suam vitam, & mille vitas, si eas haberent, quod totum ijs videretur esse parum propter magnum amorem, quo ipsum prosequuntur.

CAPUT

CAPUT IX.

*Quomodo Anima cognoscat DEUM per viam divi-
nae internae Communicationis ex Allocutione,
Visione, & Operatione.*

I.

DOCTRINAM coelestem de hoc habet Venerabilis Marina par. I. l. 5. c. 24. §. 3. ad instruendas Animas in alta via mystica, sequentibus documentis. Primum praecipuum fundamentum, quod Anima habet pro cognoscendo DEO, per viam divinae communicationis, & internum Alloquium, est Puritas Animae, praesertim illa, quam DEUS illi concedit, in ipsius primis principijs. Secundum est mortificatio & humilitas, atque avulsio ab omni creatura, & universis quae non sunt DEUS, eorundemque oblivio. Tertium est apparatus & ornatus tam illarum virtutum, quas Dominus noster dat, & communicat Animae gratiose, & ex sola sua bonitate; quam etiam acquiritarum, cum gratia & auxilio ejusdem Domini, sudore ac labore Creaturae. Fundamentum quartum est praesentia DEI, & continua oratio; unde hoc oritur, emanat ac provenit, ut contemplando se ista Sponsa Coelestis Regis in illo clarissimo speculo Divinae Faciei, ubi videt agnoscitque se ipsam, suam vilitatem ac miseriam, cognoscat quoque, quantum capit Anima, & ei communicatur à DEO, ipsius Esse divinum, amando illum & cognoscendo ipsum atque contemplando.

II. Hoc modo devenit Anima in agnitionem loquelae divinae, intuitus divini, operationis divinae, per lumen supernaturale, quod illi communicatur, ad agnoscendam illam loquelam interiorem ac divinam, quae attingit & occupat intimum fundum, & superiorem ipsius partem, certissimeque eam illuminat, ut ipsam non permittat dubitare, sitne divina ea loquela,

U u 2

&

& communicatio DEI. Ad quam explicandam vel exponendam non suppetunt verba. Sicut enim dici nequit, qualis sit, DEUS in se ipso; ita dici non potest, quomodo loquatur, seque ipsum communicet DEUS. Ideoque solum assero, esse metallum divinum, quod sonat, ac sapit lumen DEI, ac suavitatem DEI, ac pacem DEI, atque ut finiam dico, quod sonet ac sapiat ipsummet DEUM. Et dico amplius, quod, sicut agnellus solo instinctu naturali cognoscit suam matrem ex balatu, ac illam sequitur, & querit; atque parvulus infans, sine usu rationis, suam quoque matrem ex loquela, & facie, gaudetque ac lætatur, dum illam audit ac videt: ita suo modo ista Anima pura & munda; non ex instinctu naturali, sed ex gratia & lumine supernaturali DEI, quod illi communicat, agnoscat suum Patrem, & suum DEUM, suumque Dominum, quodque omne bonum ipsius consistat, in ipsius alloquio, & intuitu ac operatione, sicut dixi, queratque illum, ei obediat, ac lætetur in eo, & gaudeat.

III. Agnoscit hæc Anima suum DEUM ex aspectu, quia, dum contemplatur in vultu illius divini Esse justitiam, postquam prius est illustrata ab ipso, & illuminata, recipit tales influxus, & talem virtutem, taleque lumen, ut summè propter istum divinum intuitum, amet suum DEUM ac summum Bonum: timet quoque ipsum ac reveretur, obedit ei, maximèque optat, se mille modis, quasi condire gustui & palato DEI; unde devenit in cognitionem clarissimam, ipsum esse, qui radio suæ virtutis pertingentis ad Animam, talem affectum est operatus in illa.

Cognoscit ista Anima suum DEUM, ac Dominum in operando, quia postquam se collocavit ad pedes Agni Divini, dum considerat, & contemplatur ipsius divina opera, & qualis hic Dominus fuerit in se ipso, ac sit erga nos; concipit Anima adjuta gratiâ istius Domini, talia & tanta desideria operandi pro DEO, & patiendi pro DEO cum magna voluptate, solatio, & gaudio, ut deveniat in cognitionem clarissimam, & supernaturalem,

ralem, cum, qui ita operatur in Anima, esse DEUM, ipsiusque scientiam, ejusdemque potentiam, & bonitatem. Iste est modus, quo Anima cognoscit DEUM per divinam ejus ac admirabilem communicationem, ut me idemmet Dominus edocuit, fecitque ut id experirer ex sola sua divina bonitate.

IV. Post hæc etiam Venerabilis Virgo cap. 25. §. 3. exponit signa pro cognoscendis alloquijs DEI, quam doctrinam ibi Venerabilis Pater Ludovicus de Ponte sic refert: Etiam illam DEUS docuit nonnulla signa ad cognoscendam veram communicationem, & alloquia Divinæ Majestatis, valde diversa ab ijs, quæ vult simulare dæmon. In festo S. Michaëlis (Anno 1603.) quâdam occasione dixit ad DEUM cum extraordinario affectu: Domine, mallet mihi linguam exarescere, quàm quidpiam dicere, quod non esset tuum. Et interrogabat ipsum: Domine, estne aliquid in hoc, & in omnibus, quæ scripsi, meum, quod non sit tuum? Responditque illi Dominus: Nihil est tuum, omnia sunt mea: & isti responso ita acquievit, ut de eo non potuerit dubitare. Cum verò consideraret, cui fundamento inniteretur tanta illa certitudo, quòd ipsi id diceretur à DEO, isque illam alloqueretur, invenit eam in tribus his præcipuis rebus fundari.

V. Primò, quòd illa loquela sit conjuncta cum tanto lumine & cognitione intellectuali proveniente à DEO, ut id quasi evidenter percipiat. Secundò, quòd illa Veritas Divina adveniat cum quadam eminentia & superioritate excedente omnes alias veritates, probatas ab Angelis, vel à nostro spiritu, aut dæmone, absque ulla comparatione: & longè evidentiùs superet mendacia. Tertiò, quòd illabatur lentissimè & suavissimè, atque unà sic Animam occupet, ut illius judicio sit conformis, eamque sibi subjiciat tam firmiter, ut etiamsi haberet libertatem resistendi, moraliter tamen non videatur posse aliter facere, quàm se illi submittere, propter dulcedinem ac suavitatem, quâ afficit Animam.

VI. Alia signa refert alibi desumenda ex fine & affectibus, quos operantur, licet sint verba admodum delectabilia & honorifica. Nemo, inquit, cogitet ista interna alloquia & verba, quæ DEUS dicit alloquens animam ita proferri, ut ipsam turbent vel dimoveant à cognitione sui ipsius, in qua eam DEUS per suam misericordiam conservat, aut à sancto illius Timore. Sicut enim proferuntur cum infinita sapientia & potentia, ita sunt plena ejusdem sapientiæ & pace, ac solatio, suavitatis, ac dulcedine & amore, relinquuntque Animam quietam & pacatam, humilem & plenam sui cognitione, hilarem, & contentam: auferunt timores ac dubia, quæ habebat, & replent ipsam amore DEI, novisque desideriis illi placendi, ejusdemque amandi. Aliâ vice intellexit à DEO unum ex maximis indicijs, pro agnoscendis veris visitationibus, allocutionibus, & revelationibus esse, si ij, qui illas assequuntur, & habent, easdem recusent, ac tergiversentur, quando ipsis adveniunt: quales contra non essent, si illas desiderarent, & ijs delectarentur.

VII. Quapropter ista Famula DEI, hæc in re prorsus stupenda fuit, propter notabilem repugnantiam, quæ refugiebat quidlibet extraordinarium, non acceptando quidquam tale, nisi quodammodo coacta; adeo ut ipsamet aliquando interrogaverit (Anno millesimo-sexcentesimo decimo quarto) nostri Sanctum Patrem IGNATIUM, an in hoc committeret excessum; & Sanctus illi responderit affirmativè, eò quod dum Anima ex DEI misericordia, purè desiderat ipsi placere, habereque tam claram cognitionem de sua familiaritate, cum Divina Majestate & Sanctis, non sit, cur adeo timeat ac resistat: quamvis aliquantum timere & resistere semper sit bonum, saltem ut magis satisfiat Confessario, à quo regitur.

CAPUT X.

*De vera atque perfecta virtute, itémque de falsa
& fucata.*

I.

NArrat Venerabilis Marina Part. 1. lib. 5. cap. 22. se iussam à DEO, ut ex Libro Sapienciæ DEI exscriberet Tractatum, in quo aliquid doceretur, & exponeretur de statu virtutum, & qualisnam sit vera virtus & perfecta; qualis verò non adeò perfecta; qualis item fucata, & apparens; ac secundum hoc quomodo possint dignosci revelationes DEI, factæ alicui Animæ ab illis, quæ sunt falsæ & apparentes, provenientes à diabolo ac imaginatione, sequenti modo, cap. 23. Mota à DEO Domino nostro, & ipso iubente ac volente, sine cuius iussu ac voluntate miserabilis Muliercula, qualis ego sum, tam rudis & insufficiens non potest tantum præsumere, ut quidquam loquatur, & scribat, neq; par est, ut sit usque adeò audax; dicam hac de re, id quod me Dominus docuerit, cum ad hoc præstandum non habeam alios libros, neque alium Doctorem, quàm Divinam Majestatem. Quantum igitur illuminata à DEO intelligo, dico, quòd quemadmodum est reperire aurum falsum & purum, & hoc ipsum purum aurum aliud est perfectius & præstantius alio, ità se habeant virtutes. Imprimis enim invenitur virtus falsa & apparens sicut aurum falsum, quia licet Anima sit plena vanitate, ac inanitate, vult tamen præferre ac præfert falsam quandam & apparentem virtutem, de qua mihi non est animus hoc loco multum differere: qualis enim causa, talis quoque erit illius effectus, & plerumque erit vanitas, ac mendacium, utpote proveniens ab Anima vana, ac plena illius falsæ virtutis.

II. Prætermisâ itaque istâ, volo agere specialius de alia,
quæ

quæ licet non sit falsa, non est tamen etiam ex ijs, quæ mereatur nomen auri obrizi, & est virtus quædam quasi naturalis, propter id, quod habet admixtum, quasi aurum, quod non est omnino purum. Reperire verò illam est in nonnullis Animabus, cujus principium ac fortè etiam perfectio oritur ex natura, cum qua DEUS Animam condidit, adeò ut hæc illius solius ductum sequatur, nihilque proprio suo conatu acquisiverit, vel acquirat, neque sit quidquam lucrata; verùm vitam agat tepidam, quæreturque duntaxat secundùm naturam, quâ est à DEO prædita, non utendo ipsâ bene, ut illâ adjuvante assequatur perfectum amorem DEI, neque cum ex naturali virtute, quam ipsi DEUS contulit faciendo opera, quæ non tam ex perfecto procedunt amore DEI, quàm ex bona natura & propensione. Anima hanc solam habens virtutem non est sufficienter disposita, ut DEUS in ea operetur istas speciales misericordias, de quibus nobis est sermo: ideòque si quis habuerit hanc virtutem, & cum illa expertus fuerit huiusmodi inusitatas gratias, de quibus loquimur, equidem illis non multum credidero. Istam verò virtutem esse quasi naturalem, & imperfectam, neque ortam præcipuè ex perfecto amore DEI, intelligi potest ex eo, quòd hæc Anima per omnem vitam sibi maneat similis, eodemque procedat passu, absque ullo progressu, aut profectu in virtute, & perfecto DEI amore, quòdque nunquam habuerit, nec habeat vincendas difficultates, sed neque sui ipsius cognitionem, quæ illam immutet & convertat, atque animet ac incitet ad emergendum ex sua tepiditate & socordia, ac ad progrediendum ut cum ea naturali assequatur perfectam virtutem & amorem DEI, quo caret. Ex his & alijs huiusmodi poterit cognosci imperfectio istius virtutis.

III. Præterea reperitur & alia virtus quasi naturalis, quamvis diversa à præcedenti, quæ inclinât, & naturaliter reddit bene affectam Animam erga bonum & omnem virtutem: adeò ut

rece-

reverâ illam inquirat, ac optet prorsus serîo. Cùm enim virtus sit secundùm se tam bona, ac amabilis, ut æstimerur à quocunq; animo bene disposito, & prædito bonâ naturâ ac judicio, fit, ut is, qui hanc bonam habet naturam, interdum illius ductu sectetur virtutem, & quidquid illi videtur bonum, magno conatu, ac promptissimè, eoque ampliùs, si unâ adsit (quemadmodum, fortè plerumque accidit) quidam naturalis appetitus: atque ut id faciat cum intimo ac secretissimo quodam desiderio proficendi ac progrediendi altiùs, assequendique & possidendi quidquid exoptat, ac putat esse bonum, vel consentaneum rationi: unde fit, ut tum virtutem longè desideret efficacius & ardentius. Inter alia verò indicia, ex quibus possit intelligi hanc virtutem non esse ex ijs, de quibus agimus, quæ sunt instar puri & præstantissimi auri, est istud. Si ista Anima usque adeò propensa in id, quod optat, quamvis sit vel appareat esse virtus, & aurum purum, ut pro eo, quod cupit, obtinendo, videatur confici; si, inquam, advertat id à se tam vehementer ac immoderatè appeti, ut propterea vivat afflicta, inquieta, ac desolata; seque ullo nunquam solatio frui vel pace internâ.

Ut verò possit is, cui incumbit cura talis Animæ, ejusque directio, cognoscere affectum, & re conditum ipsius statum, (quamvis solus DEUS sufficiat ac possit illum re ipsâ & verè penetrare) advertat, an eadem Anima se interdum affectu & voluntate affigat, quibusdam rebus aut alicui præter virtutem, quamvis non sit mala, qualis est amor alicujus rei specialis, sive sint divitiæ, sive honor, sive propensio erga cognatos, vel aliud quid simile. Si aliquid ejusmodi adhæret tali Animæ, signum est, quòd bona illa natura, de qua loquimur (quamvis ex se sola non habeat veram virtutis substantiam) etiam non excludat istum defectum desiderij & appetitûs immoderati, quo fertur in id, quod concupiscit & vellet consequi. Quando hæc virtus est, ac reperitur in Anima, & ipsa existimat, ac dicit se visitari

à DEO & ejus Sanctis, fruique eorum alloquio, ego mihi non persuadeo id esse verum.

IV. Alia virtus invenitur, quæ est verè perfectissima & instar illius purissimi auri, quod æstimatione nostrâ est omnium præstantissimum. Hanc autem habet Anima, cui ipsam DEUS est dignatus dare, & impertiri istud tam excellens & pretiosum cimelium. Hæc virtus respicit solum DEUM, & perfectissime ad eum tendit, propterque ipsum operatur, & in eo solo conquiescit, illum solum habet præ oculis, ac ad eundem ex intimo corde fertur suis desiderijs, atque affectibus. In quo modo exequendæ & exercendæ virtutis, nullum videtur habere locum bona natura, vel quidquam aliud, quòd Animam possit incitare ad peragenda ea opera, & actus virtutis, præter solum DEUM ipsius ac Dominum, qui jam illam, quasi domum suam possidet, ideòq; ab illo procedunt ejusdem Animæ desideria, & ad ipsum revertuntur.

V. Quòd si aliquando opera diaboli, vel ex motu corruptæ ac vitiosæ naturæ nobis congenitæ, quam semper nobiscum ferimus instar gravissimæ crucis, quantumcunque illam velimus refrænare, ac domare, fuerit suscitatus in hac Anima aliquis terræmotus tentationum & adversitatum, ut eo tempore omnia susque deque videantur verti, & natura satagat pro domo sua, atque alio modo videatur velle imperare, & subinde assequi suum finem in quibusdam regulis, ac præter fas, à pedibus modicum esse progressa ad manus. Quando, inquam, istud evenit in hac Anima virtuti dedita, quæ ità stabiliter inhæret suo DEO, non propterea cogitandum est, eam virtutem non esse perfectam, aut non esse bene fundatam in Anima, quæ potius procul dubio indè evadet firmior ac securior, perfectior, atque fortasse gratior oculis sui DEI, & Domini, per poenitudinem ac dolorem de admissis peccatis, & clariorem cognitionem suæ miseriæ ac vilitatis, nec non bonitatis DEI, qui illam tolerat & non punit.

VI.

VI. Atque unum è veris signis quæ haberi possunt, pro agnoscenda vera virtute, est hoc, si per DEI misericordiam & ipso adjuvante elicit fructum prædictum ex defectibus, in quos labitur pro sua miseria, & quidem subinde, ac sæpe DEO id permittente ad majus bonum hujus Animæ, quam Divina Majestas tantopere amat. Unde utiliores aliquâ ratione existimo esse hos defectus, quia DEUS ex ipsis frequentius, pro sua bonitate ac sapientia, elicit exsuperantiam bonorum, quam ex illis quasi excessibus virtutis, de quibus loquebamur earum Animarum, quas non movet tam perfectè ad operandum solus Amor DEI, sed illæ causæ, & natura, de quibus nobis sermo fuit.

VII. Aliud signum veræ virtutis & perfecti amoris DEI, est, quòd Anima, quæ illam habet ac possidet nunquam affectu adhæreat ulli rei terrenæ, sed omnia substernat pedibus, solusq; DEUS ipsius & Dominus sit illius bonum ac divitiæ, & principium in omnibus rebus, atque ultimus earum finis. Dico autem affectu: Quia poterit ubique fieri, ut patiatur aliquos insultus, quibus tamen non prosternetur, & licet modicum attenuetur, divinâ nihilominus gratiâ subveniente non conquassabitur.

CAPUT XI.

*Quenam Virtus ac Dispositio requiratur in Anima,
cui Divine fiant Revelationes.*

I.

PROsequitur Venerabilis Virgo Marina suum coelitus inspiratum Tractatum par. 1. lib. 5. c. 22. §. 2. applicando scientiam de natura virtutum ad deprehendendam veritatem sincerarum revelationum, his verbis.

Declaratis jam his virtutibus, earundemque discriminibus, dicam modò divinâ aspirante gratiâ, quod mihi magis propositum est, magisque vult DEUS.

Xx 2

Im-

Imprimis quod attinet ad primam falsam & apparentem virtutem, de qua sum locuta, non est, cur tempus in ea exponenda tereatur, quia, sicut dixi, quidquid provenerit ex mendacio & vanitate, plerumque erit mendacium & vanitas, nisi aliquid accadat insolitum, eò quòd infinita Sapiencia DEI, vellet ex suis incomprehensibilibus judicijs se manifestare, & communicare, ac pandere suum secretum, ob sublimem aliquem finem, illi Animæ miserabili, & exosæ ejus oculis, propter ipsius peccata, & vanitates; quemadmodum Divina Majestas egit cū Sancto Paulo persecutore suæ Ecclesiæ: adeoque si DEUS aliquando tale quid fecerit, quantocyus apparebit, ipsum esse Authorem istorum mirabilium, & hujus operis, ex effectibus, quos producet in ea Anima; id quod fiet, quando illam illuminabit, ut se cognoscat, & emendet sua peccata ac vanitates, amplectaturque effectum, & substantiam boni in eo, quod ipsi est revelatum ac dictum nomine DEI.

II. Quod concernit virtutem quasi naturalem, quam dixi reperiri, & esse in quibusdam Animabus ab ipso earum exortu (quæ est specialis misericordia, quam illis DEUS præstat, dum eas creat cum illa bona natura, quæ est excellentissima dispositio, pro perfectè exequendis operibus, spectantibus ad ipsius honorem, modò illâ scirent bene uti) dico me non existimare, esse sufficientem dispositionem istius Animæ, quod jam dixi, ut DEUS illam visitet, vel in ipsa peragat hæc peculiaris misericordiæ opera, de quibus loquimur: atque si dicat se eas habere, ego illi non multum credo, quia ordinariè se communicat DEUS ejusmodi Animæ, ita ut ipsi det inspirationes, quibus incitata progrediatur proficiendo in virtute, emergatque ex ea socordia in qua vivit, & conetur utendo suâ bonâ naturâ, tendere ad assequendam verè perfectam virtutem, & perfectum amorem DEI; dabit quoque illi Divina Majestas frequenter magnum gustum ac suavitatem in meditatione & ponderatione

my-

mysteriorum sanctissimæ ipsius vitæ & mortis, idque tantum ideò faciet; ut illam juvet pertingere ad finem, quem Divina Majestas desiderat. Siquidem enim illam DEUS amat, amavitque jam inde ab initio, & propter hunc amorem, quò erga illam ferebatur, ipsamque propter suam bonitatem, respexit oculis misericordiæ suæ, ut illi daret istam bonam naturam ac dispositionem pro majore ipsius profectu: nihil dubito, quin eandem sit semper adjuturus istis suis gratijs, ut hac ratione bene afficiatur erga Divinam Majestatem, atque erga id, quod est perfectius in virtute: qui est usitatio modus, quo se DEUS tali Animæ communicat. Alia verò ista specialia timeo, nè abludant à verò: sed quia non est admodum perfecta, nec habet tantam cognitionem tum sui ipsius, tum magnitudinis, ac sapientiæ divinæ, & experitur sibi fieri illam gratiam interdum à DEO, de qua loquor, sumit inde fortassis occasionem, quia non est adeò sapiens, & parùm intelligit, dandi locum imaginationi, sibi que persuadendi, eam, quæ est visio imaginaria, esse intellectualem, & spiritum proprium esse spiritum DEI; atque etiam diabolus conatur se hic ingerere, quàm maximè potest: quorum nihil fieret, si haberet veram cognitionem tam necessariam. Videret, tum & cognosceret se non mereri, nec esse dignam istis honoribus, vel his visitationibus, & allocutionibus divinis, neque etiam ipsi tali modo convenire: sed procedere quoad rem præsentem viâ ordinariâ.

III. Hoc mihi videtur de statu istarum Animarum, loquendo in genere, & sicut ordinariè solet fieri: quia nihil volo dicere de casu aliquo extraordinario divinorum judiciorum: atque si is eveniret existimo non defutura indicia clarissima, per quæ agnosceretur esse DEUS Author operis ex ijs, quæ in tali Anima ageret, vel per alia bona, quæ inde resultarent. Tamen licet sit hoc verum: & ego ità esse credam, audeo affirmare, me citius de bonitate DEI credituram, loqui; & locuturam

Divinam Majestatem illi Animæ seductæ, de qua disseruimus, propter aliquem valde sublimem ac necessarium finem; quam isti, de qua nunc ago, idque ob duas rationes. Una & præcipua est magnitudo divinæ bonitatis, propter quam dignatur Divina Majestas oculis misericordiæ respicere illam Animam perditam, ideóque indignam ipsius gratiæ ac misericordiæ, quæ absque tali divina vi, taliterque operante potente manu DEI, procul dubio periret, manerétque perpetuò immersa illis suis miserijs, & mancipata diabolo. Altera ratio est, quia æquum est, ut Divina Majestas subinde tam magna opera faciat, pro animandis & consolandis peccatoribus, ac imbecillibus: idémque conducit ad majorem ipsius gloriam, ut hac ratione agnoscatur magis ejus bonitas & potentia infinita, ac magnitudo & omnipotentia, quâ potest quidquid vult, & absque ulla aliorum injuria, alijs præstat magnas gratias; quæ omnia non ita habent locum in statu harum Animarum, de quibus modò sum locuta. Ac proinde ut est DEUS tam sapiens ac bonus, existimo & credo, quòd sua opera peragat, ubi sunt magis necessaria, ac proficua Animabus, & ubi ex illis derivari potest majus bonum in mundum, atque major gloria in suam Majestatem.

CAPUT XII.

Quomodo oporteat esse dispositam Animam, ut DEVS se illi communicet loquaturque internè: Et de varijs gradibus, per quos ipsam ducit.

I.

INstruit Animam piam DEO devotam, in hoc pulcherrimè Venerabilis Marina part. 1. lib. 5. cap. 24. §. 2. Postquam Anima se collocaverit ad pedes sui DEI, ac Domini, illique obtulerit Sacrificium solidarum, & perfectarum virtutum; & postquam per divinam Bonitatem jam nihil vide-
tur

tur intercedere inter DEUM & ipsam, eò quòd sit illi subjecta, subdita, & obediens, ac disposita ad omnia, quæ DEUS ipsius & Domini ei voluerit dare, ac præstare, disponereque de illa quoad crucem, afflictionem, ac dolores, vel solatia, & gaudia, ac suavitatem: ille verò ipsam respiciat oculis paternis, amando illam, & bene ei volendo, tanquam filiæ & sponsæ, recreando eandem & consolando sicut decet talem bonum ac magnificum Dominum, prospiciendo illi in omnibus necessitatibus, ipsamque adjuvando: postquam, dico, Anima est in hoc statu virtutum, per divinam Bonitatem & Gratiâ, atque Dominus illi se communicat, & pandit sua divina secreta ac mysteria clarè & specialiter ipsam illuminando, debet Anima in suo peculiari exercitio orationis, quando occludit portas omnibus creaturis, & sola agit cum suo DEO, offerre ipsi suum exercitium orationis; & meditationis, gratiarum actionis & contemplationis, ac cætera quæ nos docent Sancti. Hâc enim viâ nobis ingrediendum est, donec Dominus nos incipiat alloqui, ducatque Animam, quò voluerit, oblati ipsi omnibus in purissima aurea patina humilitatis, & cognitionis propriæ nostrarum miseriarum, quæ virtus admirabilis plerumque in hoc statu non acquireretur solâ consideratione, sed promanabit à lumine interno, communicato ipsi à DEO. Hæc est magni momenti ac pretij.

II. Debet Anima ingredi intimum & secretum conclave DEI libera, & expedita à desiderijs rerum mirabilium, & supernaturalium, submittendo se simpliciter ac sincerè Domino DEO, ut faciat & operetur in illa, quod voluerit, ipsique bonum factum visum fuerit; neque debet in suo exercitio subsistere ex proposito, vel in eo se desidîæ dare, ut audiat & auscultet DEUM, an loquatur: quando enim DEUS id vult facere, & se taliter communicare, seu in visione, seu in revelatione, plerumque præmittit quosdam quasi nuncios ad Animam, quòd illi præstare velit aliquam extraordinariam gratiam, ut propterea subsistat,
&

& auſcultando attendat, quid illi dicatur vel exhibeatur. Præterea concedit DEUS ſæpe moram Animæ humili, ac religioſæ, ut ſe excuſet, dicatque ſuo DEO, ſe malle in exilio pari, quàm gaudere: neque unquam hac viâ perditur DEUS. Sicut enim ipſemet eſt, qui hoc docet. ita ſe ipſe donat, & communicat Animæ abundantius: eſtque mirabile, quod hac in re Divina Majeſtas facit & operatur, pro divina ſua voluntate. Viderur rogare, & offerre amanter donum, atque dum ſe Anima excuſat, infert ipſi quandam amabilem & ſuaviſſimam vim, quâ illam ſibi reddit obſequentem.

III. Aliàs ingreditur DEUS in Animam, tanquam Dominus, ut eſt, ſuæ domûs, mandando & prohibendo, ut ajunt, dicendoque ſuaviter: hoc tibi eſt faciendum, vel hoc audiendum aut hoc eſt videndum, vel iſtud intelligendum. Tunc Anima eſt ſubjecta, & ſubdita, obediens, abundans ſolatio, & corroborata ad omnia, quæ vult DEUS.

Hucûſque explicat Venerabilis Marina, quomodo procedatur cum Anima tempore conſolationis, mox explicat ejuſdem Animæ tempus deſolationis his verbis: Et quia dixi, quid fiat in hoc felici ſtatu Animæ, in quo ſe DEUS communicat, alloquiſque ſuis divinis Animam dignatur, & ſe illi manifeſtat, ſuæque divina ſecreta, ac myſteria pandit, & exponit; volo etiam dicere ad majorem ipſius gloriam, juxta id, quod à DEO ſum docta & ipſo donante experta ob ejus bonitatem, in quali alio ſtatu ſe DEUS communicet Animæ, eidemque ſe modo prædicto manifeſtet, ac oſtendat.

IV. Dico porro, quòd poſtquam eſt egreſſa Anima, DEI adjuvante gratiâ, ex terra Ægypti, & ex poteſtate Regis Pharaonis, qui eſt diabolus, noſter adverſarius, & pertransivit mare rubrum, atque jam eſt in via, quæ ducit ad beatam Terram Promiſſionis: poſtquam præterea multum paſſa eſt in eadem, via vigilando & pernoctando in cuſtodia ſui ipſius, obtinuitq;
& com-

& comparavit cum DEI gratia, & sudore ac labore manuum suarum pretiosissimum thesaurum perfectarum, & solidarum virtutum, veræ mortificationis passionum, & contemptus sui ipsius, ac abnegationis propriæ voluntatis, amando crucem CHRISTI, eamque ex corde amplectendo: & postquam per hanc viam, regiam continuæ orationis pervenit ad cognitionem DEI, pro sua capacitate, atque ad ipsum possidendum & amandum perfectè; Dominus autem cum illa agit, sicut cum filia, sponsa, & amica sua, seque ei communicat, ipsam alloquitur, & docet multis ac diversis modis; & postquam illam Divina Majestas jam non tractat instar infantis, lactando illam semper suis uberibus, fiditque illi, ac potest fidere majora & mirabilia, ut sunt derelictiones, desolationes, obscuritates, ac tenebræ spissiores, & obscuriores, quàm fuerint Ægyptiæ, quæ poterant palpari manibus: postquam etiam Dominus fidit tali Animæ derelictæ à DEO, secundum opinionem hominum, ut pendeat inter cælum ac terram, quin possideat istam, & fruatur illo: & postquam DEUS permisit ex sua infinita Bonitate, atque pro majori bono ac emolumento hujus talis Animæ, ut omnes ipsius hostes confurgant contra illam, eamque persequantur, ac affligant, nec non passiones ipsius vel inclinationes naturales atque rebelles delinquant, ut videtur; id quod tamen jam in isto statu non accidit, in quo hæ passiones non erunt indomitæ, cum jam sint mortuæ. Quando Anima est in hoc statu, & progressa est ultra primum, de quo sum locuta, communicat se tali Animæ DEUS, loquitur illi, & manifestat se ipsi hunc in modum.

V. Ordinariè non sunt hæ visitationes, alloquia, & illustrationes, ac revelationes, quas Dominus DEUS isti Animæ communicat, longæ, neque diuturnæ, sed breves, & modico tempore durantes, non quòd propterea sint minores, aut minora mysteria, sed quia DEUS agit compendiosè & strictim, docetque Animam intrà breve tempus. Dixi autem, *ordinariè*:

T y

quia,

quia, ut DEUS est infinitus ac potens, ita potest facere ac variare sua opera, quando & sicut voluerit, fueritque ipsius sanctissima voluntas. Semper Divina Majestas præmittit, qualiter dixi fieri in altero statu, nuncios, ac indicia, ut præmoneat se venire cum suis divinis donis, & plerumque præstat istas gratias, quando Anima nihil minus cogitat, quam ut illas suscipiat, multoque minus quod illi sint præstandæ. Siquidem enim non habet suum DEUM vicinum, sicut solebat, tantumque ipsum retinuit in intimo recessu cordis (nam inde nunquam se absentat, nisi ob aliquam culpam) ubi Divina Majestas per suam Bonitatem commoratur, estque unita Animæ, id quod ipsa experitur etsi arcanissime, ut ita possit pati sine solatio: ideo Anima est quam remotissima ab eo, ut cogitet de his donis, & illa expectet. Venit nihilominus Divina Majestas ad illam, alloquitur ipsam, seque ei communicat, quando maximè est afflicta & turbata, desolata, ac oppressa à suis inimicis: tunc enim plerumque loquitur DEUS, & instar boni Pastoris sibilat suæ ovi, quia eam cognoscit, & ipsa cognoscit illum.

VI. Effectus admirandi, quos istæ misericordiæ DEI operantur in Anima, quæ in hoc statu versatur, sunt prædicti, præter alios multos, quos nescio explicare neque intelligere. Istæ Misericordiæ divinæ sunt huic Animæ, non lac dulce infantium, sed cibus & victus grandium: non sunt illi solatium, levamen, & gaudium, sed fortitudo ac virtus in ipsius pusillanimitatibus, & exanimationibus; non sunt porta patens, ut per illam contempleretur Beatitudinem, sicut solet facere in altero gradu, sed murus fortissimus, & præsidium pro impediendo ingressu hostis: non sunt Animæ ornamentum & obtutus sponforum, sed clypeus & scutum pro defensione adversus ictus, & invasiones hostiles: ac tandem non sunt gustus nec suavitates, neque dulcedo palato Animæ, sed auxilium, virtus, ac robur illius.

VII. Istæ misericordiæ DEI non adferunt Animæ ordinariæ

nariè (quia quod est insolitum , ut dixi , relinquimus DEO , qui omnia potest , & juxta id quod ordinariè fit , nos debemus dirigere ac dicta intelligere) elevationes , raptus , ecstases , atque alia hujusmodi : imò videtur per breve temporis spatium Anima quodammodo oblivisci & esse inmemor sui DEI ac Domini , tantumque retinet virtutem & fortitudinem , omniaque cætera bona , quæ dixi , sicut contingit hominì mortificato , quo comedente cum exiguo gustu , corroborantur & confortantur ipsius membra . Neque debet Anima in hoc statu multum tergiversari , ac reluctari , quando advenit DEUS cum his suis divinis donis : etsi enim hoc sit laudabile in altero statu , neque propterea perdat DEUS ; ibi enim expedit , ut reluctetur Anima tanquàm indigna ; hic autem , ut amplectatur confortationem ac medicinam tanquam debilis , & quasi infirma : ac proinde dico , quòd debeat Anima humiliter ac reverenter , & agnoscendo suam necessitatem ac voluntatem DEI , amplecti & suscipere istas misericordias ac dona DEI . Cogitet quoque , & credat hoc DEO placere , idque ipsum velle ex sua bonitate ac misericordia , & pro ipsius bono , auxilio , & corona .

CAPUT XIII.

De varijs modis , quibus se DEUS supernaturaliter communicat Animabus , & quibus ipsæ illum in ista communicatione cognoscunt .

I.

PRO eo , quod Venerabilis Marina de Escobar in se ipsa est experta , conscripsit DEO inspirante varios modos , quibus Divina Majestas se communicat supernaturaliter Animabus , & gradus seu scalas , quibus ad illos progrediuntur , unaque modos , quibus ipsæ DEUM in ista communicatione cognoscunt . Atque in his omnibus adumbrabat se ipsam , ac

depingebat id, quod illi eveniebat in duplici statu viæ, quâ illam DEUS ducebat, quando imprimis quidem prospero utens vento abundavit solatijs spiritualibus; postea verò fuit passa, varias, ac diuturnas afflictiones pro sua maiore corona. Sic igitur Par. I. l. 5. c. 24. habet:

De quatuor modis supernaturalibus, quibus se DEUS
communicat Animæ.

II. Primus modus, quò se DEUS supernaturaliter communicat Animæ (quantum cum Divinæ Majestatis gratia intellexi, & ex ipsius bonitate sum experta) est loquela quædam interior ac divina, quæ sonat in auribus, & auditu secretiore ac superiore Animæ, ubi per divinam gratiam, & per supernaturale lumen sibi à DEO communicatum, ipsum cognoscit, valde distinctè, verè ac vivaciter.

Secundus modus est cognitio clara, & manifesta, quoad DEUS vult, & est sanctissima ipsius voluntas, ut Anima & pars illius superior illuminetur, quâ videtur, cognoscitur, ac intelligitur in eo ipso Domino, admirabiliter illa veritas, & mysterium; quæ veritas remanet in tali Anima quasi inserta, & impressa valde, clarè, verè ac firmiter, ac si in molli cera remaneret figura sigilli in illam impressi.

III. Hic modus est admodum divinus, excellens & sublimis. Est & tertius modus, quando DEUS quasi explorat intimos recessus Animæ, atque ita incipit illi insinuare aliquam veritatem, vel mysterium, quod ipsi Divina Majestas vult manifestare, & exponere fusiùs per suos Sanctos Angelos: quâ illuminatione & exploratione perfectè disponitur, ut audiat, intelligat, & cognoscat, quid loquantur, ac annuncient illi Sancti Angeli, & quæ mysteria nomine DEI velint ipsi indicare, pandere, & exponere. Sicut cōtingeret cuipiam Viro gravi & prudenti, qui clarè perciperet, cognosceret, ac intelligeret, sibi à Rege Domino suo præstandam aliquam gratiam & favorem: ideoque se
dif-

disponeret pro eo suscipiendo, cum gratiarum actione, & cæteris requisitis, ad audiendum, percipiendum, & intelligendum, quid Regia Majestas illi sit mandatura, ab eo petitura, & ad quid agendum sit usura ipsius operâ: ita fit, & se res habet, in hujusmodi gratia & misericordia, quam DEUS præstat Animæ.

IV. Quartus modus est lumen & cognitio specialis, quam CHRISTUS JESUS Dominus noster dat, & communicat Animæ, quando dignatur ex sola sua bonitate & misericordia illi revelare aliquod mysterium suæ Passionis, Resurrectionis, vel Ascensionis, aut Infantia suæ, similiúmve rerum, quo lumine habito, & cognitione videt, cognoscit, ac intelligit admirabili modo, in eo Domino dolores, quos est passus in eo mysterio, quod illi manifestatur, aut gloriam Resurgentis, vel Ascendentis, vel alia mirabilia concernentia ipsius Infantiam. Quamvis autem tertius & quartus modus, quos hic refero, videantur esse potius speciales gratiæ, quas DEUS exhibet Animæ, in sua divina & mystica communicatione, quàm distinctus modus se communicandi, invenio tamen, nescio quid distinctionis, ac differentia in hoc, quòd DEUS ita doceat Animam, ut videatur somniare, intelligatúrque esse modus communicationis potius, quàm specialis gratia à Divina Majestate Animæ præstita.

CAPUT XIV.

*De modo, quo se DEUS communicat parti superiori
Anima sinè imaginibus aut figuris, inferiori autem per
has figuras & imagines; & qualiter illas dia-
bolus possit imitari.*

I.

PArs superior nostræ Animæ (loquitur Venerabilis Marina par. I. l. 5. c. 25. §. I.) quò non potest ingredi diabolus, neque ulla creatura, est pars nostri intellectûs, quæ
est

est illuminata à DEO, semperque illum intuetur, & res spirituales. Hæc est pars, in qua DEUS per seipsum patefacit Animæ, & explicat suas veritates ac mysteria, atque suas perfectiones, collustrans illam quodam superiore lumine ita, ut sine imaginibus, vel figuris aut alloquijs ipsam reddat capacem, & ei imprimat, ac infundat eam veritatem aut mysterium, quod ipsam docet, suæ Divinitatis, vel suorum divinorum attributorum, ac mysterij Sanctissimæ Trinitatis, nec non Humanitatis CHRISTI Domini vel Divinitatis, ipsiusque Incarnationis, vel Nativitatis, aut sanctissimæ Passionis, aut Resurrectionis, aut cujuscunque reliquorum mysteriorum sanctissimæ ejusdem Vitæ vel Mortis: atque hoc facit sicut dico, sine imaginibus aut figuris: sed exponendo illi veritate illâ mysticâ, & lumine superiore excellentiam, valorem, ac thesaurum bonorum, quæ continentur in eo mysterio: quo lumine habito Anima & intellectus illustratur cognitione adeò profundâ & sublimi, ut illi nihil possit obumbrare, vel obscurare eam veritatem, ac mysterium, quod DEUS ipsam docuit, & ipsi manifestavit eo modo superiore ac divino. Hæ sunt visiones superioris & intellectuâlis partis Animæ.

II. Modus tamen usitationis, quo DEUS ingreditur intimum recessum Animæ, ut ei præstet dictas gratias, est, exhibere illi in parte ejus inferiore, quæ est imaginativa, portam quandam regiam, seu pontem speciosum imaginum, & figurarum, quem ipse DEUS fabricavit, ut illac transeat Anima, & intret ad Civitatem DEI, atque ad videnda ipsius magnalia ac mysteria. Et quamvis sit verum à diabolo, permittente id ipsi DEO, posse efformari aliquam figuram vel imaginem falsam simulante veras imagines divinas; ita DEUS tamen custodit, adjuvat ac illuminat Animam, puram, castam, & humilem, ac fidelem suo DEO, quæ nihil aliud quærit aut vult, quàm ipsum, ut statim agnoscat ac advertat hostem proditorem, ideoque ipsi occlu-

cludat in conspectu portam, de qua diximus imaginum ac figurarum.

III. Ut perveniatur ad istam portam, solet adesse alia, eaque aptissima, & est, quam ipsamet Anima, cum gratia & auxilio DEI sibi in sua imaginatione, ac parte inferiore fabricat, dum tendit ad præsepe, & ad montem Calvarium, atque ad sepulchrum, ubi per considerationem tantorum mysteriorum, & repræsentato sibi Infante JESU, ac Sanctissima Virgine ejus Matre, vel CHRISTO Domino crucifixo aut sepulto, aliisve similibus mysterijs, elicit inde pro se admirabiles ac altissimos affectus, & est optimè disposita pro suo profectu, atque ut perveniat ad majora; & magnopere delectatur DEO, cui multum placet, quod Anima incipiat à tam bonis ac proficuis principijs: atque, si scit ijs bene uti & cooperari, præstabit ipsi hac viâ Dominus magna bona deducendo illam ad secundam portam, ac introducendo deinde in suam civitatem.

IV. Deinde eadem Venerabilis Virgo alios modos, quibus se DEUS communicat Animæ, explicat §. 2. Quâdam nocte mihi dixit Divina Majestas: Considera, quàm sublimi modo me communicem Animæ, hac ratione: Intellectus ipsius & pars superior se habet more ordinario & naturali, qualiter ego illam creavi, & sæpe venio ad illam obscure; deinde radijs divinis mei luminis eam inflammo, ac illumino, & clarifico illum ipsius Intellectum, ac partem superiorem; per quod lumen divinum ipsi patefacio, & illa videt mysterium, vel veritatem, quam ego volo, & est mea voluntas, ab ipsa sciri, ac intelligi, fierique aliquid vel dici. Unde frequenter provenit alius modus communicationis, qui est quædam loquela divina, quâ ego loquor Animæ, & quæ sonat in ipsius interno ac secreto auditu. Hi duo modi communicationis sunt altissimi & sublimissimi, multoque magis prior, unde illa superior Animæ pars illuminatur & collustratur divinâ luce, ejusdemq; radijs, sicut ferrum, quod pro-

prodit ex ustrina tam occupatum & accensum ab igne, operaturque talia, eò quòd impositum ustrinæ participaverit ignem.

V. In visionibus verò, quas ego Animæ longè istis inferiores exhibeo, quæ contingunt in imaginativa, ubi illi ostendo & revelo mysterium, Sanctum, vel Angelum, aut aliquid aliud, quod volo, præter lumen quod do Animæ, ut cognoscat illa mysteria, & veritates, quas ipsi manifesto (id quod in iisdem videt & cognoscit, tanquam in claro speculo) soleo dare Animæ aliam illustrationem superiorem, & cognitionem earum veritatum, quæ est quasi confirmatio prioris luminis, quod ei contuli: & ostendo ipsi quasi digito, ac dico: Ista, quæ vides, sunt veræ visiones, & vera mysteria. Atq; in hoc modo communicationis rarò permittam dæmonem sese immiscere. Istis modis communicationis, maxime verò priori, Anima summè acquiescit, & agnoscit illas veritates, ità ut etiam si timores Animæ ipsam tentent contristare, ac deicere, semper prævaleat, firmiterque inhæreat ei veritati, quam DEUS custodit & conservat in Anima.

VI. Solet se DEUS quoque communicare Animæ taliter: illuminat Animam, & pandit illi quodpiam mysterium, vel aliquid, quod vult ab ea fieri, aut dici, ad eum quasi modum, de quo egi ad initium in prima communicatione, conceditque Divina Majestas in ista communicatione locum intellectui congenito, auferendo ipsi reliquias alicujus defectus naturalis, sicut qui tollit rubiginem ex pretioso lapide; ut utens facultate sibi à DEO datâ, naturaliter discurrat & cooperetur cum eo, quod illi DEUS manifestat in ea communicatione. Atque hoc, ait Divina Majestas, multum valere ac prodesse, quia DEUS operatur, & creatura utitur eo, quod ipsi DEUS tribuit naturaliter.

Sunt infiniti & admirabiles modi communicationis, quibus

busse DEUS communicat Animæ per modum divini & cœlestis colloquij, quod Animam vehementer abripit, solatur, & replet stupore. DEUS sit benedictus.

CAPUT XV.

*Qualem oporteat esse Confessarium ac Ducem spiritûs
Anima habentis cœlestes Revelationes.*

I.

Describit hoc Ven. Marina par. 1. l. 5. c. 23. §. 6. hunc in modum. Reliquum jam est dicere, quod plurimum in eo consistat, ne Pater spiritualis erret in regendis ad Gloriam DEI istis Animabus, & in cognoscendo earum statu, ut non careat tribus maximi momenti rebus, quæ ad securè in hoc negotio procedendum requiruntur, & sunt necessariae.

Prima est perfecta virtus & charitas, quâ DEUM toto suo corde amando, amet pariter Animam, quam Divina Majestas commisit ipsius curæ, ut sit illius Magister ac Dux in via virtutis, nihilque aliud in illa desideret ac velit, nisi quod DEO fuerit gratus, magisque conduxerit ad Gloriam Divinæ Majestatis.

II. Secunda est Prudentia ac Discretio maxima, ut sciat, æstimare & expendere debite ea, quæ conveniunt statui illius Animæ, animadvertendo non absque attentione & oratione, procurandoque quàm optimè potuerit, ut cognoscat & intelligat ipsius virtutem ac spiritum, neque fidendo aut credendo facile omnibus, quæ primâ fronte illi visa fuerint esse virtus & spiritus: quia si hac in re intervenerit deceptio, fit ut inde sequantur gravia mala, ac damna illius Animæ, quæ longum esset referre. Ideoque tantummodo unum dicam, quod est meo judicio summum, videlicet diabolum, quando hac viâ ducit aliquam Animam illusam, quasi in dies magis ipsi dominari, illamque,

occupare, & quodammodo capere possessionem ejus domus, ut sensim sine sensu ipsam destruat, ac tandem circumveniat aliquibus suis mendacijs. Hoc & alia magna damna adfert istud malum & hæc deceptio.

III. Tertium idque præcipuum est, ut sit vir præditus spiritu, & familiaris DEO, qui hoc modo cognoscat, & intelligat, quid sit spiritus, & quid sit agere cum DEO, neque omnia damnet, & fortè Animas sanctas, quas DEUS ex sua infinita bonitate visitat, quibûsque se communicat, & quas docet vitam suam instituere juxta obedientiam, & alienum judicium, affligat, ac turbet, & nè, quantum est in ipso id faciendo, impediatur ea, quæ agit ac operatur Spiritus Sanctus continuè illis resistendo. Licet enim verum sit à nemine posse impediri opera DEI, neque ullum esse tam potentem; nam denique manifestabuntur, & patefient ipsius opera, & magnalia: nihilominus vult Divina Majestas, nè illi re ipsâ obsistamus, neque taliter repudiemus ejus opera & bonitatem, sed ut agnoscamus ipsum esse eundem Dominum, qui semper fuit; haberèque eandem bonitatem, quam semper habuit, & sicut novimus, quod ex eadem bonitate se, communicaverit multis Animabus, similiter posse ac velle se communicare Animabus, quas amat, quia illi verè serviunt.

IV. Nisi enim in hac re adsit sancta Discretio, neq; Confessarius velit ad hoc attendere, vel id curare, etiamsi DEUS non sit se ab ista Anima absentaturus, quoad id, quod illi magis expediverit, fueritq; utilius, cum ab ipsa repellitur, ut ei obediat, eò quòd illam jubeat obtemperare suis Superioribus, ac Magistris: imò quia ipsam amat, feret ipsam in oculis, & consolabitur, providebitque ei suo tempore de alio Magistro: tamen dum Divina Majestas ita permittit affligi istam Animam ad majus illius bonum, subtrahet suum lumen, ut puniat illum defectum, quem committit ipsius Magister, manebitque in ea deceptione, & obscuritate, ita ut non videat, neque intelligat illuminationem
DEI,

DEI, nec specialia munificentiae ipsius opera & bonitatis, ac misericordiae atque Amoris, quo Divina Majestas amat Animas, quae si ab ea cognoscerentur & intelligerentur, forte illi multum adferrent emolumenti & boni, nec solum pro ipsius Anima, sed etiam pro alijs animabus, cum unâ candelâ accensa soleant accendi multae: verum si ab aliquo obtegatur modo praedicto, extinguere enim illam hac ratione non erit possibile; non poterit emittere tam clarum lumen, necque tam facile accendere alias: ideoque bene oportet ad id advertere.

V. His tribus rebus mihi videtur habere opus Confessarius & Pater spiritualis pro regendis similibus Animabus. Ultimam DEUS per viscera suae infinitae misericordiae & bonitatis largiatur talibus Magistris & Patribus spiritualibus suam abundantissimam gratiam, ut in hoc negotio, & in omnibus assequantur, quae sit ipsius sancta voluntas: & Animabus, quae talia expertae fuerint, concedat suum lumen, & sanctissimam gratiam, ut omnia bene agant, detque illis Divina Majestas Magistrum, & gratiam convenientem ad majorem suam gloriam, & ipsarum profectum.

VI. Pulcherrimum est & illud, quod Part. 1. l. 5. c. 32. §. 3. describit Venerabilis Marina his verbis: Dicit Dominus, non esse optimum pro Magistris vitae spiritualis, qui regunt Animas, quas DEUS ducit vijs extraordinarijs, non habere affectum, aut propensionem erga ea, quae in hac materia debent docere, & ipsis communicare, quando illa existimant esse secura, & conformia regulis, quae in eam rem habentur: si enim careant illo affectu, vel habeant à talibus aversionem, necesse est, ut dent filijs spiritualibus lac insipidum, quo generantur spiritus exiguae dispositionis, ut DEUS ipsis praestet tales gratias, sive ordinarias, sive extraordinarias, quarum una valeat, ut ajunt, centum: volo dicere, ut per unam talem elevet DEUS Animam ex statu imperfecto ad perfectiorem, vel alium magis sublimem ac

coelestem perfectarum virtutum, & amoris DEI.

VII. Neque debet Magister eſſe tepidus, vel remiſſus in eo, ut velit ſcire & inquirere ſpiritualia; ſed inſtar boni mercatoris ac ſolliciti non ſolùm vendere illis, qui veniunt ad ipſius officinam, ut quærant mæces, ſed etiam illis qui tranſeunt per viam & incitare illos, ut emant aliquid ex ipſius officina. Neq; debet dicere: qui venerint ad meam officinam, illos ſuſcipiam, ſecùs verò facientem nihil curo: ſiquidem reperiet frequenter in aliquibus tranſeuntibus præclaram occaſionem, quàm tam illi, quàm ipſe, valde evadat dives coram DEO? cui rem fecerit admodum gratam, inſtruendo illam Animam, ſi erat innocens, atque aperiendo ipſi fraudes ſi erat illuſa, & non incedebat per viam lucis, ac veritatum Spiritûs Sancti & ſacræ Scripturæ. Non oportet iſtos dicere: ego non debeo interrogare perſonas ſpirituales, ſed ſolùm audire & reſpondere ad ea, quæ mihi dixerint: quia ſæpe eveniet, ut interrogando eruant venas aureas, admirandi Spiritûs Divini, quo utrique dicentur; aliàs verò deprehendent ſtagna, & lacunàs, ac ſterquilinia ſordida & abominabilia, quæ candidâ nive apparentis Spiritûs cooperta, latebant ſub illo ſecreto: quæ ſi expurgentur per veram doctrinam, non inficiunt Animam, neque corrumpunt erroribus, quos fortè conceperunt per illuſionem, & operâ diaboli, noſtri adverſarij, ac hoſtis capitalis.

CAPUT XVI.

Documenta pro Directoribus Animarum ſanctarum.

I.

Elegantem ſanè pro Confefſarijs & Ducibus Animarum Inſtructionem tradit Ven. Marina Par. I. l. 5. c. 32. §. 2. ubi ſic. Quod ſervo DEI Confefſario & Patri ſpirituali incumbit faciendum, ut proſit Animabus, quæ ſunt curæ ipſius

com-

commiffæ, & quas regendas fufcepit, amore DEI, primum eft, purificare feipfum, & effe sanctum, ac verè amicum DEI, quia re verâ nemo poteft dare alteri, quod ipfe non habet, eftque certum, quòd quale eft lac à matre datum filio, talis fit futura ipfius educatio, vigor & robur.

II. Secundum eft, ut affumat hoc tantum negotium, juvandarum Animarum confideratè ac ferio, utque fciat æftimare & magnificare valorem ac dignitatem Animarum, liberatarum, & emptarum divino ac infinito pretio Sangvinis JESU Christi Domini noſtri, qui dixit, delicias fuas effe cum filiis hominum. Et cum iſtæ Animæ ſint templum, ac habitaculum Spiritûs Sancti, ubi ipſe hospitatur; eft hoc Patri ſpirituali ſingulariter confiderandum ac ponderandum, debetque ſe æſtimare felicem, ac beatum, & humiliare ſe cum gratiarum actione, cò quòd Deus ipſum dignetur ex ſua bonitate eligere pro ſuo œconomo, qui illi debeat apparare & exornare domum, in qua ipſe ſit habitaturus, & hoſpitio excipiendus; nec non pro hortulano, qui debeat colere ipſius hortum, ut proferat copioſum fructum, & ſvaves, ac odoriferos flores virtutum, & devotionis, quò omnia poſſint proponi in conſpectu & in menſa magni Regis, ut ea ſuſcipiat in ſacrificium & holocauſtum.

III. Debet tertio, ſerio, ac toto corde deſiderare, ſalutem & profectum talium Animarum, & offerre pro illis DEO orationes, ac ſacrificia, rogareque Divinam Majeſtatem, ut ipſum faciat idoneum miniſtrum & coadjutorem ſuum. Amet quoque illas ità in Domino, ut ſit paratus, ſi opus eſſet, exponere vitam, pro earum ſalute & gloria DEI, ad id faciendum libenter propter Dominum, qui dedit ſuam divinam pro ſalute omnium. Quòd ſi viderit exiguam diſpoſitionem ad proficiendum ex parte pœnitentis, non propterea deſpondeat animum, ut fiat puſillanimis, vel affligatur, ſed ſperet in DEO, cujus eſt illud opus, corde dilatato, fore, ut ipſe per ſuam bonitatem & miſeri-

cordiam, illam promoveat, ac provehat in lucem, quomodo & quando ejus Maieſtati viſum fuerit ac placuerit, ſecundum magnitudinem ipſius occultorum, & altiffimorum judiciorum: cogitetque & credat ſe tantum eſſe miſerabile inſtrumentum divinae manûs, cujus eſt iſtud opus, ſicut diximus.

IV. Quartò, debet conari magnâ curâ & ſolicitudine, ſi vult erigere magnum & pulchrum ædificium, ut faciat foſſas, jaciâtque profunda & ſolida fundamenta. Volo dicere, adnitemdum ipſi eſſe, ut auferat ab Anima terram, ac vilitatem honorum terrenorum, vanorum ac temporalium, atque etiam quorundam aliorum, qui videntur ſpirituales, & non ſunt: utq; Anima ex propoſito ſe collocet in ſterquilinio ſuæ vilitatis, & ſui nihili, teſtâ radendo ſua ulcera, & ſanien inſtar Jobi. Et credat Confeſſarius, non reperiri (meo judicio, atque ſecundum id, quod DEO dante ſum experta) aliam majorem diſpoſitionem, quàm hanc profundam humilitatem, ut Divina Maieſtas operetur ſtupendas, & admirandas res ſuas in Anima.

V. Debet quintò, reddere Animam propenſam, quantum eſt poſſibile, erga amorem DEI, & erga ipſius crucem, ac ad patiendum pro Domino, qui in ipſa nos redemit, condiendo illi iſtam eſcam crucis mille modis, ut illi ſit addicta, & ſapiat omnimodè, inſtar Mannæ filiorum Iſraël, quia re verâ bona ac theſauri, qui in ea reperiuntur, ſunt manna abſconditum illi, qui eam deguſtat, continet enim ſaporem omnium rerum divinarum, & ipſiuſmet DEI, quo nihil ampliùs dici poteſt.

VI. Sextò conetur omnibus ſuis viribus proſcribere, & enecare in Anima poenitentis, qui eſt cupidus ſui profeſſus, omne judicium proprium, omnemque propriam voluntatem. Hæc etenim eſt peſſimus Animæ vermis; tinea, quæ omnia bona ipſius corrumpit, ea corrodit ac deſtruit. Debet autem Confeſſarius & Pater ſpiritalis illam hac in re adjuvare, & exercere, cum ſancta Prudentia, proponendo ipſi mala ac damna, quæ

iſta

ista vitia adferunt Animæ. Debet etiam propterea expendere, & explorare genium, virtutem, ac naturam pœnitentis, & gratias ac dona, quæ DEUS ipsi communicavit, & secundum hoc tendere vel remittere nervum acûs mortificationis, & probationum, quibus valde est necessarium & conveniens, illam exerceri pro ipsius profectu, utque omnes virtutes unitæ edant suavem, & concordem musicam, quæ bene ac suaviter resonet in auribus DEI.

VII. Debet quoque Confessarius, servus DEI, ut hoc opus bene peragat, observare in eo modum suavem & gravem, qui sit acerbus, unaque dulcis, nè Anima incipiens, in virtute debilis, & infans exasperetur, vel concidat animo, propter nimiam acerbitatem; id quod multum ipsi posset obesse: nec propter nimiam dulcedinem magis infantescat ac debilitetur: utque corroboretur, & acquirat vires requisitas ad obediendum: quæ res est clavis hujus totius ædificij, & id, ad quod illam debet plurimum adhortari.

VIII. Præterea illi debet magis operibus (quæ ille intelligat, cognoscat & percipiat, si nimirum toleret ipsius fragilitates ac tædia & alia) quàm verbis, præbere indicia magni desiderij, quo optat ipsius salutem, & majorem profectum, quia alioquin fortasse parum efficeret; & nullo modo expedit, Animam in hoc statu macerare, & nimiam fame sacræ Communionis vexare, si Anima sit pura, quia langvescet, nimiamque concipiet internam tristitiam.

IX. Debet septimò Confessarius, seriò persuadere pœnienti, cupienti proficere, studium continuæ orationis, adducendo ipsum & collocando, quantum potuerit, ad portas divinæ misericordiæ, ut petat eleemosynam, instar pauperis Lazari, debetque illum ducere in hoc exercitio viam ordinariam, quam nos docent Sancti (non verò aliam) orationis, ac meditationis, gratiarum actionis, & cæterorum huc pertinentium, continuæ quoque

que memoriæ DEI, & ipsius præsentia. Quod si, dum Anima hoc modo procedit in isto sancto exercitio, bono, ac utili, Deus, qui est universorum Dominus, intervenerit, duxeritq; ipsam ad aliam viam non ita ordinariam, non debet illam Confessarius ab ea abstrahere: sed debet diligenter attendere ad id quod DEUS operatur, & custodire suum illum agrum, nè veniant latrones, & fures, qui sunt diabolus cum suis imaginibus, ac representationibus & phantasia, humores, ac natura cum suis apprehensionibus, & illusionibus: id poterit agnoscere prudens & peritus Pater spiritualis ex effectibus, quos ista producant in Anima.

X. Atque si sub initia hujus novæ viæ viderit Confessarius, quod plerumque tentent intrare in Animam ista mala reptilia, reducat ipsam ad priorem viam ordinariam semel ac sæpius: ita enim expedit. Et quia diabolus, ut est tam superbus, ac hostis humilitatis, videns suos ictus resilire ad se, dum se Anima humiliat, recedet pudefactus. Neque timeatur DEUM propterea offensum iri, cum enim sit, qui est, redibit Divina ipsius Majestas semel, iterumque ita, ut nemo sit, qui ipsi id possit impedire, aut facere, quò minus exequatur, quod intendit, operando in Anima, quod vult, estque conforme sanctæ ipsius voluntati. Et probando hac ratione Confessarius Animam, acquireret illius notitiam, perspectumque habebit, quoad hoc, ejus statum. Non aperiatur autem Pater spiritualis isti poenitenti, quod sentit, & cognoscit de statu ipsius Animæ, in re præsentia, quia non expedit, nisi quando est necessarium ad ipsius profectum, auxilium, & solatium, si eo indiguerit.

XI. Hoc intelligitur de principiis, quamvis ista principia durent multis vel paucis annis, prout DEUS disposuerit, donec nempe Anima sit exercitata, & profecerit in virtutibus ac spiritu; si enim id adsit, parum hæc res potest nocere vel nihil cum gratia DEI: habeatq; pro optimo signo sanctum Timorem DEI

in

in Anima, & quòd hac viâ incedens sit circumspècta, & quasi timida, humilis, subdita, subjecta, & obsequens, iudicio sui Patris spiritualis, cui vult obedire nomine DEI, qui ipsum illi dedit pro adiutore & Magistro. Contrarium autem, ut est vana lætitia, & complacentia, atque gaudium licet sit modicum, eò quòd habeat res singulares, & extraordinarias, atque vana quædam confidentia, quamvis occulta, quæ se semper prodit per aliqua indicia, & signa sui mali coloris, atque interna inquietudo, ut in nulla re spirituali videatur conquiescere, quam sentit, audit, intelligit, & cognoscit internè, atque cum continua inquietudine audiat aliquid hic, ac videat ibi, & parùm sciat referre de eo, quod fieri internè experitur, prorsus est pessimum signum, & cura huius morbi est, humiliare istam Animam, ac abducere ipsam ab hac via, & efficere, ut observet modum ordinarium orandi sicut dixi. Atque ut procedat bene in gubernandis, & curandis huiusmodi Animabus, debet Pater spiritualis habere animum, ac affectum quoad ista, prudentem & sincerum, ut cogitet credatque Dominum DEUM, qui est, qualis semper fuit, in bonitate, sapientia, incomprehensibilitate suorum divinatorum iudiciorum, & in omnibus reliquis suis attributis, facere, ac posse facere in Animabus opera admiranda, & stupenda propter suam bonitatem, & bonam dispositionem, quam ad id habent, cum ipsius gratia; atque hoc modo operatum semper fuisse, implendo Ecclesiam Sanctis, qui admirabilibus ac diversis fuerunt virtutibus ornati.

XII. Debet quoque esse præditus, quâdam prudenti astutiâ & sagacitate, ut exploret quàm diligentissimè, quâ ingrediatur & egrediatur diabolus, ipsiusque ambages, qui frequenter, permittente id DEO, se transfigurat in Angelum lucis, sicut vidimus, ut decipiat animas. Propter hæc omnia debet Confessarius habere pondus, & stateram fidelissimam in suo corde, nè natura ipsius ad alterutram partem inclinet, sed ut consistat in medio, ha-

beátque præ oculis Scripturam sacram, & doctrinam Sanctorum. Dominus nos omnes doceat, detque nobis suum sanctissimum Lumen & Gratiam. Amen.

CAPUT XVII.

Quales debeant esse Superiores Religiosorum.

I.

Non solum Confessarios ac Patres spirituales, sed & ipsos Superiores instruxit præclaris documentis & monitis Venerabilis ac prudens Virgo Marina: ex quibus, ut omittamus ea, quæ alibi seu per epistolas ad particulares Superiores, seu alias sparsim tradidit, pro coronide, ut appareat celestis magnæ hujus Servæ DEI sapientia, apponemus, quæ specialiter habet Part. I. lib. 5. cap. 32. §. 1. sic scribens.

Declaremus, quales debeant esse Superiores, ac Prælati Religionum, ut perfectè exequantur sua munera.

Debet Prælatus esse servus DEI, bonus Dux militiæ CHRISTI, bonus Pater, bonus Judex, & bonus Pastor.

Debet esse bonus Dux Exercitus CHRISTI JESU Domini nostri, sapiens, prudens, & generosus; ipsum enim oportet esse primum, & præcipuum, ac præcedere cæteros in omnibus operibus virtuosis, ac religiosis, quantumvis arduis & difficilibus. Debet quoque magis docere exemplo, & oratione, quam strepitu verborum, ita ut sit viva regula reliquis omnibus. Debet præterea esse minister ac servus suorum militum, & subditorum, memor CHRISTI JESU Domini nostri, & Magistri, qui venit ministrare & non ministrari, sicut ipsemet dixit; debetque libenter exponere suum honorem, & suam vitam, ac sanctitatem, si esset opus, pro Ordine, ac bene peragendo suo officio, & pro honore sui Domini ac DEI.

II. Debet quoque idem Prælatus esse bonus Pater, mansue-

suetus, affabilis, consolari afflictos, & prospicere necessitatibus, ac miserijs naturalibus, & spiritualibus Filiorum CHRISTI JESU, qui illos ipsi confidit, commisitque ipsius manibus & protectioni. Debet insuper esse prudens & sagax in suo regimine, qui sciat stringere, ac laxare, quando & sicut magis expedit pro bono ordine rerum & ad gloriam DEI, ac bonum, & augmentum suæ Religionis, ac domus, accommodando se, & compatiendo naturis, genio, ac virtuti suorum subditorum.

III. Debet esse bonus Judex, executor justitiæ, si id exigat necessitas & gloria DEI; fidelis, rectus, discernens verum à falso, & liber à passionibus, semperque habens præ oculis DEUM. Debet etiam illam integrè exercere, non mutando, neque invertendo naturam, quam ipsi DEUS regendam dedit, sed perficiendo ipsam & accommodando legibus Religionis ac Justitiæ, ut in omnibus DEUS honoretur, & glorificetur, ac sacra Religio prosperè per ipsum procedat, & augeatur.

IV. Debet quoque iste Prælatiis esse bonus Pastor gregis JESU CHRISTI, curam habens suarum ovium, & erga easdem hospitalis, quærens, si id sit necessarium, ovem perditam, & referens in suis humeris ad gregem, ligans ac solvens quàm optimè potuerit, cum charitate, oratione, & commiseratione, illius fracturas, vulnera, & misérias, imponendo ipsius ori falem orationis, ut illum sumât, qui curat, ac sanat misérias humanas, ac vegetat & confortat pro omnibus bonis spiritualibus, estque præsidium & castrum divinum, quò se recipiunt pauperes, ac vulnerati milites, ut quiescant, & curentur.

V. Hæ sunt leges inviolabiles, quas DEUS vult servari à Prælatis ac Superioribus, & si quis est, in quo non reperiatur, neque ipsi data sit ista dexteritas, seu Spiritus DEI, vehementer illum rogo nomine DEI, cujus credo esse id, quod dico, ut si non vult errare & perdere tum se, tum alios, fugiat ad montes, & solitudinem, non materiales, sed spirituales, quæsiturus DEUM,

UM, ac operam daturus suo profectui, & curæ sui ipsius, donec illum ipsemet DEUS educat ad hoc opus, suâ potenti manu, operâ, & virtute sanctæ Obedientiæ : tunc enim bene procedet, & rectâ viâ progreditur. DEUS nos illuminet suâ divinâ bonitate, dirigatque in omnibus operibus nostris.

CAPUT XVIII.

*Venerabilis P. Ludovicus prudenter fidem habuit revelationibus Venerabilis Virginis Domine
Marine de Escobar.*

I.

EX hæcenus de Sanctitate Venerabilis Virginis Marine, præsertim Parte primâ hujus Tractatûs adductis, fit manifestum Venerabilem P. Ludovicum de Ponte, non tantum potuisse, verum etiam post adhibitum debitè earum examen oportuisse approbare revelationes omnes à mirabili illa, Virgine sibi expositas, cum id ad officium ejus pertinuerit, ita, ut nisi id præstitisset, notam temeritatis, infidelitatis, insinceritatis incurrisset.

Fidem revelationibus istis ante Patrem Ludovicum habuere Viri alij præclari, quales fuere totius Domûs Professæ Societatis JESU Vallisoleti Patres, quibus Revelationes has statim à principio censurandas dabat sapiens & eximius ille Pater Petrus de Leon, quorû iam autoritate poterat etiam Venerabilis P. Ludovicus prudenter moveri, præsertim tot ultra triginta consequentes annos, pari spiritu continuatâ revelationum illarum constantiâ, quin & majori semper accessione.

II. Sed & univêrsa Hispania censeri potest Ven. P. Ludovico consensisse, quando quadraginta circiter annis, quibus revelationes eæ cæpere innotescere Virginem hanc ita suspexit,
ut

ut nec de sanctitate ejus, nec de veritate revelationum unquam fuerit dubitatum, adeò ut homines Vallisoleti domum illam, in qua ipsa tot annis decumbebat, illac transeuntes honorarent, tanquam Sacrarium, in quo Angeli magnæ hujus Servæ DEI ministri habitarent. Quin & aula Regis Catholici quanto in pretio sanctitatem pariter & spiritum propheticum mirabilis hujus Dominæ habuerit, patet ex eis, quæ attulimus præsertim ex Parte secunda.

III. Neque obstat, quòd nullus adhuc eâ vivente fuerit institutus Processus, aut ullum Examen, quo veritas revelationum earum, seu apud aliquam Academiam, seu apud aliquod Tribunal Ecclesiasticum agnosceretur; quin potius vel hinc longè majorem meretur admirationem, ostenditurque specialis DEI manus in eo, quòd nullâ tali actione præmissâ, tanta nihilominus omnium mentes & corda jam occupaverit de infallibilitate omnium rerum ad Venerabilem hanc Virginem pertinentium, & tam firma ac secunda persuasio, ut eâ vix defunctâ statim sinè ulla erroris, aut præsumptionis vel temeritatis formidine profluerint Viri, ex præcipuis totius nostræ Ecclesiæ Ordinibus Religiosis in Cathedras, & Encomia hujus magnæ & rarissimæ Servæ DEI tantâ magnificentia dictionum per tot dies, tanto omnium applausu declamârint; totâque deinde in Hispaniâ typis vulgaverint, nemini ut vel in dubium quidpiam vocaret, occurrente, idque in conspectu sanctæ Inquisitionis Hispanicæ.

IV. Summus Pontifex Constitutiones ac Regulas ab illa Ordin S. Brigittæ in Hispania præscriptas Anno 29. hujus sæculi, adhuc eâ vivente confirmavit; eâque interveniente festum S. Joachimi Romano Calendario & Breviario inseruit; ac eidem viventi favores diversos concessit.

Egerunt cum illa coram & per literas Episcopi, Generales, Provinciales Ordinum, &c.

Omnino ergo necesse est jam eâ adhuc vivente famam san-

ctitatis & veracitatis ejus totâ Hispaniâ vulgatam, fidem ubique invenisse.

Innumerabiles sunt alij per Orbem Catholicum Viri omnî exceptione majores, qui revelationes istas omnes mirè suspiciunt, & tanquam pretiosum in Theologia mystica à DEO cimelium, fideique Catholicæ ornamentum venerantur, ut re verâ Venerabilis hæc Virgo non videatur potuisse tot, & quidem à prudentia, scientia, pietate, præstantiores nancisci Approbatores, sinè Divinâ Providentia planè speciali.

Sed & Sancta Theresia videtur jam prius præoccupâsse, futurâsque ejus revelationes jam in antecellum (ut loquimur) approbavisse, quando in ea DEUM sua magnalia intra angulum cubiculi operaturum prædixit.

V. Quin etsi negotium hoc totum Venerabilis P. Ludovicus solus intrâ privatas absolvisset tenebras; tanta tamen adhuc apud se ipsum habuit motiva, ut nullâ ratione aliud præstare, quàm revelationes has pro genuinis & cælestibus agnoscere potuerit. Certè Consalvus Durandus in ea, quam Revelationibus S. Brigittæ ad Cardinalem Farnesium præfixit præfatione, non dubitavit asserere, revelationes illas probari, propter sanctam Divæ Brigittæ vitam, quantum momentum apud Venerabilem Patrem Ludovicum necesse est, ut habuerit tanta Venerabilis Marinæ sanctitas, quantam vel in hoc solum Tractatu descripsi, nè dicam, quantam ipsemet Venerabilis Pater Ludovicus descripsit, & quantam ille ipsemet privatim novit, cum Pater Michaël de Orenia, ut vidimus, Confessarius ejus magnæ Virginis asseruerit omnia, quæ de ipsa per tot Exequiarum dies tam copiosè dicta sunt, quæque etiam adhuc dici potuissent, omnia, inquam, nihil esse respectu eorum, quæ in re ipsa essent. Sed ut luce clarius constent, quantum sanctitati hujus mirabilis Virginis detulerit Venerabilis Pater Ludovicus, & quibus fundamentis in revelationibus his nixus sit, audivimus suprâ in fine

Tra-

Tractatus secundi, ipsum in sua introductione enarrantem, quam propterea ibi speciali curâ & operâ produxi.

VI. His tamen non obstantibus, videamus quàm humiliter, quàm cautè se in revelationum harum approbatione Venerabilis Pater Ludovicus gesserit. Loca, in quibus specialiter ejus approbatio notatur, afferuntur sequentia.

In Introductione operis §. 1. sic loquitur: Certus sum, *quantum presentis vite constitutio patitur*, spiritum, quo agebatur Venerabilis Marina, non fuisse malum, sed bonum, non dæmonem, sed verum DEUM.

Lib. 1. cap. 11. paulò ante paragraphum primum: multis annis, quibus ego illi fui à Confessionibus, & cum ipsa egi, semper adverti, quòd illam DEUS præservaverit ab illusionibus.

Lib. 6. cap. 21. & ultimo: hoc opus est totum DEI, demptis defectibus. In his locis omnibus specialis apparet modestia sancti hujus Viri, quâ nullo usus est vocabulo specialem aliquam auctoritatem, aut prærogativam præferente, non solum sanctæ Ecclesiæ Tribunali se, sed & cujuslibet majoris prudentiæ Viri sensui, suum judicium subjiciens, cum expressè pronunciet, se non arrogare sibi in hac causa plus, quàm *quantum presentis vite constitutio patitur*; qualis profectò approbatio cancellos cujusunque Confessarij, aut Patris spiritualis non excedit, præsertim si agatur cum homine scrupulis afflicto, quem nisi spiritualis Director assecuret, imò sæpe nisi quasi juramento confirmet, se esse certum de veritate doctrinæ, quam illi homini scrupuloso proponit, nunquam quietum reddit.

VII. Plus dico, etiamsi revelationes hæc uspiam deprehenderentur falsæ & illusoriæ, nec tunc quidem posset adhuc præsumptionis, aut temeritatis, vel imprudentiæ Venerabilis Vir argui, quia dum dicit: *quantum presentis vite constitutio patitur*: ostendit se, & diligentiam extremam, *quam presentis vite constitutio patitur*, & quâ majorem nemo cordatus possit ab ullo mor-

mortali exigere, adhibuiſſe: & inſuper oſtendit ſe memoſum fragilitatis humanæ, humillimè de ſe ipſo ſentire, inſinuando non propterea ſe judicare, certitudinem ſuam eſſe tantam, ut à nemine penitus poſſit adhuc ad Examen revocari, ſed omnia intelligi fide humanâ. Quod ſi nec hoc cum ab imprudentia excuſat, tunc omnino Sanctorum Patrum & Doſtorum nævi & lapſus exagitantur, & imprudentiæ inſimulantur, præſertim cum haud dubiè ſæpe nec triginta annorum prævium examen, nec ſemper omnem *quantum præſentis vitæ conſtitutio patitur*, diligentiam adhibuerint. Et ſic tollemus Eccleſiæ ſanctæ hoc Divinum Privilegium, quod in ea, pro omni caſu occurrentis neceſſitatis, extra & ante deciſionem Summi Pontificis, inveniantur ſufficientes Viri tantæ virtutis, ſcientiæ, prudentiæ, diligentiæ, & cauteliæ, ut ſint capaces ſinè nota temeritatis regulas diſcretionèſque ſpirituum intelligere, & juxta illas ſententiam (quantum præſentis vitæ conſtitutio patitur ac fide humanâ) certam ferre, cum tamen Sanctus Paulus aſſerat inter Fideles Chriſti dari etiam diſcretionem ſpirituum. 1. Cor. 12.

Imò modestia Venerabilis Patris eò proceſſit, ut expreſſè defectus omnes, ſi qui in hoc ſint opere, ſibi eſſe adſcribendos ultro profiteatur capite totius primæ partis ultimo, ſeu Lib. 6. cap. 21. ubi hæc tanta ejus modestia non ſolùm, ſi qui eſſent, defectuum, mereretur ~~non ſolum~~ ab omni temeritatis ſuſpitione eximi, verùm etiam tantò eſſe pretioſior, quòd ipſe jam ſciverit ingens præmium, quod cum exſpectaret in Cælo ob laborem, quem in revelationibus his diſponendis inſumpſit; & quia caput illud compendium quodammodo etiam continet elogiorum ſcientiæ myſticæ Venerabilis Marini, ideo judicavi omnino etiam hic adducendum.

CAPUT XIX.

*Sensus Ven. P. Ludovici de Ponte de mystica & experimentalis Scientia Spiritus Venerabilis
Marinae de Escobar.*

I.

Sublimes suas de hac cogitationes magnus iste mysticæ Doctor explicat in sua Parte 1. lib. 6. cap. 21. his verbis :
Extraordinarijs gratijs, quas DEUS suæ famulae, per decursum longævæ ejus vitæ præstitit, & istud accenseamus, quòd ipsi fuerit unà cum illis communicata scientia spiritualis, quam communiter vocamus Theologiam mysticam, & scientiam experimentalem, de qua loquens Divina Sapiencia, ait, quòd ostenderit justo Jacob regnum DEI, & dederit illi scientiam Sanctorum; quia ductu Divini Luminis est ingressa ad percipienda arcana regni cœlorum, quæ nimirum sentiebat, & experiebatur in se ipsa, quod est proprium Sanctorum. In hoc mirè excellebat ista famula DEI, cui Divina Majestas sensim communicavit quinque admirabiles experientias, quæ complectuntur universam scientiam spiritus.

IL Primò: Quia imprimis experta est, ac attigit omnia, concernentia Infantiam, Passionem, ac Mortem Salvatoris, ac reliqua ipsius sacratissima Humanitatis mysteria, quibus interfuit, ac si tunc executioni denuò mandarentur, ità ut sentiret in se dolores ac tormenta Redemptoris usque ad participata ejus vulnera pedum, manuum, lateris & capitis.

Secundò. Hinc est progressa ulterius ad cognoscendam & experiendam immensitatem DEI *Trini ac Unius*, cum suis Attributis, quæ beatos reddit Angelos, ac Sanctos, participando in se ipsa, ac degustando istam Beatitudinem, videndo aliquid de eo, quod ipsi vident in suo DEO, pro sua capacitate; idque

interdum eâ claritate, quâvis momentaneâ instar relucescentis fulguris, ut possimus dubitare, an non fuerit visio clara, qualem nonnulli per speciale privilegium concedunt S. Paulo.

III. Tertiò. Experta est omnes modos Familiaritatis, & Communicationis inter DEUM & Animam per alloquia, per inspirationes, per species & visiones, mille modis, jam in fundo sui cordis, jam in Cœlo empyrio, jam commorando ibi quasi stabiliter secundum spiritum, jam idem percipiendo in suo cubiculo.

Quartò. Ad hæc accedit experientia dolorum, cruciatuum, molestiarum, ac tormentorum internorum & externorum, quæ est passa partim ex divina dispositione, partim propter perfectiones diabolorum, DEO permittente, ita ut experiretur, dolores esse scalas ad gaudium; & crucem, esse viam pro adeunda cœlesti gloria.

IV. Quintò. Denique experta est, & probavit actus heroicos omnium virtutum, in quo consistit perfectio Evangelica, cum summa prudentia, circumspectione, & cautela in vijs extraordinarijs, quibus ducebatur, nè deciperetur. Unde factum est, ut esset adeò plena hæc Divinâ Scientiâ, ut posset esse excellens illius Magistra; & Anima ipsius, ac modus vivendi, esset instar libri vivi, ubi infinita Sapientia DEI descripsit atq; expressit omnia mysteria nostræ sanctæ Fidei Catholicæ, admirabili artificio adjunctis duobus raris privilegijs, quorum unum erat, quòd etiamsi Revelationes interdum essent admodum diuturnæ, & continerent multa, ac minutissimas circumstantias; tam fixè tamen illas imprimeret suæ memoriæ, ut illarum non oblivisceretur. Alterum autem quod illi DEUS suggererit verba convenientia, quibus posset declarare, quod viderat, & fusè referre, etiamsi aliquando esset res tam sublimis, ut illi non suppeterent verba pro ea exprimenda. Et quia omnes istæ experientiæ ac res, quæ illi accidebant, fiebant arcanè, & mo-

modo invisibili, manebantque in ipsius spiritu, quasi in libro clauso & signato, voluit Majestas nostri Magni DEI, ut iste liber aperiretur, omnesque prodirent in lucem, præcipiendo illi frequentius (sicut fusè dictum est, in Prologo istius historię) ut conscriberet omnes gratias, quas illi præstiterat per decursum ipsius vitæ, eò quòd eas ipsi non communicavisset pro illa sola, sed etiam in commodum multorum.

V. Hoc fuit primum, quod DEUS præcepit Venerabili Marinæ, & comprehendit generatim id, quod Divina Majestas extraordinariè in illa est operata: voluit tamen simul, ut observarentur consuetæ leges Ecclesiæ, utque examen rerum publicandarum, & earundem coordinatio, ac dispositio fieret, secundum judicium, prudentiam, & scientiam Confessarij, Magistri, ac Directoris, quem habebat in Societate, eò quòd non omnia, quæ DEUS secretò suis servis revelat, velit publicari, imò non expediret quædam propalare. Propterea cum germanus meus frater Andreas de Ponte ex Ordine S. Dominici conscripsisset ea, quæ Venerab: Marina ipsi dicebat, vel dictabat, ut illa mihi traderet, ut dictū est in Prologo, retinuisset autem ipsorum apographa, mandavit DEUS, ut illa ab eo peteret, mihiq; traderet, & ego ex ipsis decernerem, quod judicarem non convenire, ut publicetur.

VI. Deinde §. 3. narrat Ven: Marina visionem de magno præmio, quo DEUS remuneratus est laborem P. Andreæ de Ponte Dominicani fratris Ven: P. Ludovici, eò quòd juverit scribere ea, quæ Ven: Marina de cœlestibus his Revelationibus exponebat.

Actum §. 4. subjungit se Angelis dixisse: Dicant mei Domini Angeli, quid meo Confessario, qui non solum hoc obsequium præstitit, sed tantopere laboravit, & hac de re, deque toto meæ Animæ regimine fuit sollicitus, dabit DEUS, cum multum mereatur? Responderunt, magni, id quod ipsis dicebam,

facientes: Isti seruo DEI dabit Dominus ingens præmium, quia non solum est Secretarius ipsius mysteriorum, sed etiam Magister & Artifex ejusdem operis, quod DEUS in te peragit. Etiam si enim illi dentur præcipui sumptus, & requisita pro exstruendo ædificio, solvaturque & labor, ipse tamen impendit operam ei, laborem suarum manuum, ac proinde in coelo pro mercede habebit suum meritum & insigne: sicut dum egregius Magister & Architectus exstruit sumptuosum & elegans ædificium, etiam si ipsi ædificij Dominus solverit, dederitque pro eo necessaria, inscribit tamen illi, pro suo honore & insigni: talis me fecit. Et hoc dicto mihi valedicentes abiverunt.

VII. Hanc Revelationem volui referre, ut intelligatur, quantum placeat hoc opus DEO, quod est totum ipsius demptis defectibus, quos habet profectos ex ignorantia Artificis, ejus est operâ usus. Quemadmodum enim aliquis Princeps desiderans exstruere sumptuosum templum, vel palatium, dat Architecto vel perito Magistro multa præclara requisita, ligna & lapides pretiosos, ut ipse omnia designet ac elaboret, demendo superflua, ponâtque singula suo loco; ita mihi Princeps Coeli, per hanc suam Famulam, dedit abundantiam necessariorum, & rerum mirabilium, quas illi communicabat: quia tamen mihi tradebantur à foemina, erântque omnia dissipata, absque ordine aut connexionem, necesse fuit ea limare, ac demere, quæ videbantur superflua, & in ordinem digerere, singulis suo loco repositis. Omnium porro simul combinatio, juxta ordinem, quo est facta, vocari potest *Synopsis Theologiae & scientiae mysticae spiritus*, seu scientiae experimentalis ac practicae universarum virtutum, quæ disponunt ad internam cum DEO familiaritatem, ac ad assequendam Divinae Contemplationis & Perfectio- nis Evangelicae sublimitatem.

VIII. Haëtenus Ven: P. Ludovicus. Ubi satis mirabile est, quod etiam si tunc temporis necdum emanaverit Urbani VIII. con-

constitutio, de non edendis similibus libris in lucem, nisi appositâ initio & fine protestatione, narrationes illas non excedere fidem humanam; ipse tantò antè, constitutionem hanc prævenerit, eodem haud dubiè spiritu, quo constitutio illa postea constituta est; nempe quòd statim initio in ipsa introductione operis apposuerit, se de his non esse certum, nisi *quantum præsentis vite constitutio patitur*: & in fine in ultimo capite iterum ultro suos defectus, & ignorantiam humillimè ingesserit, quasi ultro sensum, & ultimum judicium ab Ecclesia implorans.

CAPUT XX.

Historia mortis Domini Roderici Calderon Marchionis Septem Ecclesiarum.

I.

Quia in hac mirabili Tragœdia & Sanctitas & Prudentia Ven: Virginis Marinæ elucet, ideò toti huic Tractatui coronidem aptè imponet, tanquam Compendium plurimorum, quæ dici adhuc possent, plenum pulcherrimis coelestibus luminibus & documentis. Fuit Dominus iste, Rodericus de Calderon & Varga, Comes Olivæ, Marchio Septem Ecclesiarum, Ven: Marinæ addictissimus, & beneficijs in eam profusus, à qua etiam precibus suis extorsit, ut quod de sepultura corporis sui in Templo Domûs Professæ Societatis Jesu Vallisoleti constituerat, mutaret, statueretque, solo corde Templo illi, in quo spiritum suæ sanctitatis hauserat, relicto, reliquum suum corpus sepeliendum esse in magnifico Templo, quod Dominus iste extruxerat juxta Monasterium Sanctimonialium à se ibidem fundatum. Quamvis postea, dum Catholicus Rex Hispaniarum Bona Domini hujus supplicio affecti, fisco addiceret, rursus prior Ven: Marinæ constitutio revixerit, corpusq; totum sit sepultum in eo Societatis Jesu Templo.

II. Magnificus hic Dominus bona à Ven: Marina sibi data monita pro suo spiritali profectu, accipiebat quidem; nihilominus quodam ambitionis æstu, negotijs mundanæ excellentiæ se ità implicuit, ut præterquam quòd conscientiam fauciaverit, etiam apud Aulam Hispanicam nigro calculo notatus, captivitati fuerit destinatus. Hoc suo periculo animadverso adiit ipse, consuluitque Ven: Marinam, fugiendùmne, an moriendum, aut quid demum factò opus esset. Illi, si Animæ suæ bonum quæreret, ut nihil ageret, respondenti; ipse generosâ erga ejus sanctam prudentiam fiduciâ penitus acquievit, atque in Divinam Voluntatem piè resignatus, incarcerationem expectavit.

III. Missus ad eum mediâ nocte comprehendendum Dominus Ferdinandus Ramirez Farinias Supremus Auditor Consilij Regiæ Catholicæ Majestatis, cum ei causam sui adventûs exposuisset, atque ut se vestiret, chartas suas extraderet, secumque abiret, dixisset; ipse cum tanta humilitate & submissione, atque conformitate cum Divina voluntate iectum hunc sustinuit, ut Judex, & qui ipsi erat à secretis, obstupuerint, quòd illis videretur non posse ab aliquo sancto Religioso amplius expectâri. Chartas, quas habebat in sacculis, sinè mora exemit omnes, etsi essent secretissimæ, usque ad libellum examinis, in quo conscribebat sua peccata pro Confessione Sacramentali, & omnes ipsi tradidit: prout hæc omnia ab ipsomet prædicto Domino Ferdinando Ramirez sibi narrata refert Ven: P. Ludovicus de Ponte, P. I. l. 5. c. 18. ubi §. 1. Vener: Marina sic prosequitur: Hoc casu mea Anima supra modum cruciabatur, summè desiderans salutem Animæ ejus cum magno auctario gratiarum, idque primo loco: tum, ut si Divinæ Majestati placeret, ac illi expediret liberari cum honore ex carcere, id propter bonitatem suam faceret. Incepi hoc à DEO quàm enixissimè, & ardentissimè petere, quasi absque intermissione noctu diuque per tres an-

annos, demptis quatuor mensibus, quamdiu duravit captivitas. Quod ad primum attinet, quotiescunque commendabam DEO istam personam, videbam eam in manibus alicujus Judicis æquissimi & benigni, ac dirigentis totam istam causam ad salvandam ipsius Animam cum magno meritorum incremento. Unde mea Anima summum capiebat solatium. In reliquis, quem exitum essent habitura temporalia, etsi me DEUS non contristaret ex sua pietate; timebam tamen semper, ideoque non poteram consolari ipsius cognatos, qui hac de re mecum loquebantur. Erant magnæ disceptationes Animæ meæ disputantis cum DEO de isto negotio, quas, eò quòd sint usqueadeò subtiles & mysticæ, non refero.

IV. P. I. l. 5. c. 19. §. 3. de eodem casu sic habet Ven: Marina: Dum essem afflictissima, & existimarem, quòd fortè Divina Majestas meritissime & justissime propter mea peccata nolisset exaudire meas imperfectas & miseras preces; inter has cogitationes me amanter & fixè est intuitus meus Sanctus Angelus Custos, dixitque mihi: Anima mea, quid agis? quales sunt istæ cogitationes, quas habes? significo tibi, tuas orationes comparuisse coram Tribunali Sanctissimæ Trinitatis, ibique fuisse exauditas, & placuisse illas Divinæ Majestati. Verumtamen adverte Anima, quod infinita Sapiencia DEI, ac Divina, ipsius Bonitas, ex suis altissimis & secretissimis judicijs decreverit à sua æternitate, in illo suo secretissimo arcano sui immensi Esse, & secundum arbitrium ac modos constitutos in Consistorio Beatissimæ Trinitatis, vias ac rationes convenientissimas, utilissimas summèque necessarias, pro deducendis animabus ad suam salutem: ideoque etsi Potentia ipsius sit infinita, & possit quidquid vult, ac postulat Sanctissima ejus Voluntas; dirigit, tamen res suarum creaturarum ad hunc finem. Quod cum ita sit, frequenter potest contingere, ut etiamsi servi DEI & amici ab ipsomet moti, & quidem seriò ac ardentè ab eo petant quædam

dam peculiaria pro solatio & subsidio, ac remedio aliquarum creaturarum, quamvis id faciant cum vera intentione ac desiderio, ut omnia cedant ad maiorem ipsius gloriam; non obtineant tamen illa à Divina ipsius Majestate, propter dictas causas, & quia non expedit, ut mutet suas divinas dispositiones. No-
veris præterea, Decretum Domini DEI nostri Omnipotentis esse terribile, fortissimum, tam potens ac immensum, quàm est ipsemet DEUS, neque ullum posse penetrare vel perscrutari altissima illius judicia. Omnia hæc dixit Sanctus Angelus, meque reliquit plenam solatio, & illuminatam, atque admirandam.

V. Præmiserat §. I. Dum aliquando commendarem DEO hunc Dominum, quando adhuc vivebat incarceratus, & non multò ante illius mortem, quia optabam magno affectu, præcipue ipsius salutem, ac tum etiam bonum successum, quoad temporalia: rogabam DEUM, ut illum dignaretur liberare ex carcere, cum victoria & palma: atque cum huic orationi vacarem, antequàm audirem Sacrum, vidi ingredientes meum cubiculum, eo tempore, quo eram Divino Epulo reficienda, plurimos Angelos, gestantes palmas in manibus & præcedentes Sacerdotem, qui mihi adferebat Augustissimum Sacramentum. Obstupui vehementer, viso eo mysterio, neque tunc potui intelligere, quidnam esset, quamvis intellexerim, esse aliquid concernens Marchionem. Et licet semper essem valde certa & secura de ipsius salute, nihilominus quoad successum ipsius negotiorum temporalium versabar, & DEUS me detinebat in magno dubio. Postquam obivisset, declaravit mihi DEUS hoc mysterium, dixitque mihi, eo significatum fuisse, quàm solenniter essent Angeli cum palmis in manibus, in signum victoriæ, excepturi in coelo Animam illius Domini, sicut re verâ deinde factum fuit: adimplevitque DEUS mea desideria, concedendo mihi quod petiveram, imò longè ampliùs.

V. Alià

VI. Aliâ vice orans pro ipso ferventissimè, semperque primo loco petens illius salutem, postea verò libertatem temporalem, etiam concepi certam spem de ejusdem salute, cum magno tamen dubio de eo, quod concernebat temporalia. Et quamvis mihi DEUS dixerit, non solum semel, sed sæpius: Ego tibi satisfaciam, ego te consolabor: semper nihilominus manebam in eo dubio. Postquam illum vidissem mortuum, dixi ad meum Dominum: quomodo egit Tua Majestas? quomodo mihi satisfecit? Dominus mihi respondit: optimè adimplevi, quod promiseram. Nónne tibi modò satisfactum est, quòd tibi ipsum, ostenderim in mea gloria felicem ac beatum? nónne hoc est melius, quàm si mansisset in perpetuo carcere, cum periculo suæ animæ? Tum ego respondi: Ità profectò mi Domine, est mihi quàm maximè satisfactum. Atqui hoc tibi promisi, inquit Dominus, quando tibi dixi, me tibi satisfacturum.

VII. Ibidem §. 2. Aliàs, cùm DEO commendarem istum Dominum, dicebam Divinæ Majestati, ut, si commisisset aliqua peccata, puniret illum propter ipsa in Purgatorio, neque permetteret, ut cum dedecore egrederetur ex illo carcere. Post mortem, quasi respondens huic meæ petitioni, mihi quodam die dixit, cum magna gravitate & authoritate: Ego permisi mortem hujus hominis, ut ipsum per illam adducerem ad salutem, cum magno gloriæ auctario, propterque alios fines meorum arcanorum judiciorum. Et indè intellexi, DEUM mihi nolle dicere, commiseritne iste Dominus delicta, digna hac morte, an verò non commiserit, quia Divina Majestas mihi nunquam revelat aliena peccata: sed solummodò mihi manifestare solet præcipuam hujus suæ permissionis causam, quæ est prædicta; præterito illo altero, tanquam eo, quod scire meâ non intererat.

VIII. Ibidem §. 4. Alio die vidi, exlaqueari mei cubiculi decidentem crudelè quendam diabolum, qui habebat manus

Ccc

post

post tergum revinctas. Sequebatur ipsum gloriosus Sanctus Michael, splendide ornatus, habens in manu lanceam, quâ illum feriebat. Ruit diabolus ad pavementum mei cubiculi, cum tam magno strepitu, quàm si caderet caput æneum. Lamentabatur vehementer, ejulabat, ac dicebat mihi: Compatere mihi, patior enim gravissima tormenta. Sanctus Angelus impetebat lanceâ ipsius humeros, cum magna indignatione, & mille illum laceſſebat opprobrijs, dicebâtque: Hic est ille infelix, qui propter suam superbiam cecidit de cœlo; hic est ille Draco septiceps, princeps tenebrarum, accusator Sanctorum Fratrum; iste est ille spiritus malignus superbiæ, qui gravissimè persecutus est illum hominem (quem nominavit) in ejus prosperitate, provocavitque ipsum, & incitavit ad superbiam, atque nunc in ejusdem adversitatibus eundem persequitur, ac tentat gravissimè; iste mundum commovit contra illum, ac incitat omnes creaturas, ut eum persequantur, & condemnent, additq; animos ipsius adversarijs. Quia id audiveram, dixi: Angele Sancte, etiâmnè modò in ipsius adversitatibus induxit, ut laberetur? Sanctus Angelus respondit: non, Anima; etiâmnè enim effecerit, ut titubaret, non tamen ut caderet, quæ est misericordia DEI. Et hoc dicens Sanctus Angelus verberabat diabolum, donec illum compelleret descendere sub terram: atque tum alij milleni diaboli prodibant, & cruciabant ipsum, usque dum omnes unâ in momento absorberentur, nec illos ultra viderem.

IX. Quantam autem senserit Dominus Calderon difficultatem ab hoc dæmone, atque etiâmnè à sua natura, in vincenda illa tentatione, atque in resignatione suæ voluntatis in acceptanda illa infami morte, patet ex revelatione apud Ven: Marinam ibidem cap. 18. §. 1. Aliquot mensibus ante ipsius mortem mihi DEUS in spiritu ostendit hoc mysterium. Vidi istum Dominum duci ab Angelo ipsius Custodè, qui constituens illum ante quandam Crucem magnam, duram ac terribilem portatu, ob-

tulit

tulit illam ipsi amplectendam, acceptandam, amandamque ex corde, nomine DEI, dicendo illi: Anima, Crux illuminat, ac dirigit, & vivificat. Videns ea creatura horribilem terribilitatem illius Crucis, quam ipsi Angelus offerebat generose tolerandam, naturaliter valde horrebat, & contremiscens illam subterfugebat. Angelus autem suâ inspiratione illum potenter urgebat, ut se submitteret, atque consentiret & amplecteretur, ac suscipere crucem. Verum, naturâ præstante suum officium, etiamsi tentaret ipsam suscipere, & amplecti, nihilominus cum magno timore reluctabatur, ac tergiversabatur. Dum ita confligerent inspiratio Angeli, ac timor humanæ naturæ illius creaturæ, tota ea Crux fuit obscurata, à summo usque deorsum, & procidens humi, quia steterat erecta, paulatim mirabiliter descendebat, ac intrabat in terram, donec ab illa penitus tegeretur. Videns hoc ille Dominus, consternatus est ac terrefactus, & redactus in magnam angustiam, fuitque afflictus, quia videbatur sibi fuisse temerarius, tepidus & incircumspectus, eò quòd restitisset inspirationi Angelicæ, noluissetque complecti Crucem; & prostratus humi, multa infigebat oscula ei loco, in quo fuerat Crux, & adorabat illum, ac venerabatur & cupiebat, ac desiderabat ex corde amplexari Crucem. Dum esset ista creatura tam bene disposita, Crux illa admirabilis, quæ fuerat cooperta à terra, atque sepulta, incepit resplendere, & prorumpens foras ac super terram, emittebat ex se radios splendidissimos, & tota apparebat esse conflata ex auro purissimo, ac ardens igne vehementi & comburente. Videns Dominus istud tantum mysterium, motus inspiratione Angeli, magno affectu suæ animæ amplexatus est illam admirandam Crucem, & adoravit, suscepitque ex corde, transfundens voluntatem suam in Divinam, paratūque se exhibens ad omnia, quæ de ipso vellet facere, juxta suū sanctissimum beneplacitum, & conducere ad ipsius animæ salutem. Viso hoc mysterio, cum magno solatio, mea

anima fuit abrepta, ac unita suo DEO, & quando mihi sum red-
dita, gratias egi Divinæ Majestati pro tanto favore præstato il-
li creaturæ.

X. Propterea ibidem prius narrabat Ven: Marina, quòd
dum offerret DEO suam vitam in manus Justitiæ, cum omnium
admiratione & solatio, propter magna indicia, quæ in sua capti-
vitate & morte edidit, Pœnitentiæ, Conformitatis cum Divina
Voluntate & veræ Resignationis, quâ acceptavit mortem ac
decollationem amore tui DEI, & in satisfactionem pro suis pec-
catis, fuerit ingens fortitudo ipsius animi, quam præfetulit in
illo tam terribili actu. Prænotaverat autem ibidem Vener:
P. Ludovicus. Proculdubio obtinuit ille Dominus à Divina,
Misericordia tam admirabilem dispositionem ad moriendum
& evolandum ad Cœlum, multis eleemosynis & bonis operi-
bus, quæ Ven: Marinæ præstitit in vita, & per ferventes pre-
ces, quas ipsa pro eo fudit, dum esset comprehensus, donec mo-
reretur: atque etiam quia ipse rectè fuerat usus bonis consilijs,
quæ ista Famula DEI ei suggererat, præveniente ipsum ac dis-
ponente DEO, pro eo quod illi erat venturum.

XI. Triduo vel quadriduo ante mortem hujus Domini,
scribit Ven: Marina Part. 1. l. 5. c. 18. §. 2. mihi illum DEUS ex-
hibuit spectandum in spiritu, sequenti modo: Cùm nihil minùs
cogitarem, quàm, eventurum mihi aliquid tale, eîsemque in-
tenta consuetæ meæ orationi, vidi ipsum quasi obambulantem,
cum magno gaudio & solatio, per cœlestem Curiam, ac si lu-
straret illam cœlestem Patriam, & adiret ipsius possessionem,
in qua, ex Divina Misericordia esset æternum victurus. Præfe-
rebat magnam lætitiâ, & vestis illius erat pretiosissima, ac
elegantissima toga, ad pedes usque protensa: aureus hujus to-
gæ pannus erat gratosè usquequaque concisus, perque aper-
turas apparebat quædam velut suffultura tam pretiosa & splen-
dida, ut videretur purissimo esse referta auro, ac gemmis. Hæc

to-

toga præbuit meæ Animæ occasionem magnæ considerationis, unde dicebat: DEUS bone, quare pannum tam pretiosum & pulchrum, qualis est hujus togæ, ita conciderunt? nonne præstitisset illum esse integrum & inconcisum? Dum ita mea Anima hæreret attonita, manifestavit ipsi DEUS mysterium dicendo: Considera, Anima mea, istas scissuras, quas vides in hac veste tam jucundas aspectu. Repræsentant enim & significant peccata hujus creaturæ, quam sic vides obambulantem, ac defectus, qui, propterea quod de illis doluerit, egerit poenitentiam, atq; ab illis resipuerit, tantum abest, ut defædaverint ipsius animam, ut potius per hanc suffulturam, ita gratiosam & pretiosam, sicut vides, poenitentia & resipiscentia, efficiant, ut tota hæc vestis sit figura & symbolum animæ ipsius tam gratiosæ, pretiosæ, & exornatæ. Mea anima fuit vehementer recreata, & mirata est id, quod ipsi dixit DEUS, atque attollens oculos vidit illum Dominum habere in capite pretiosam coronam, instar diadematis, & in suo collo monile ex pretiosis lapidibus, statimque ac DEUS ostendit meæ animæ hoc mysterium, fui rapta in ecstasim. Quando ad me redij, magnas egi DEO gratias, pro omnibus operibus ipsius ac misericordijs.

XII. Postquam advenit dies, quem Divina Majestas in suo supremo Consistorio decreverat, ut iste Dominus migraret ex hac vita mortali, ad fruendum vitæ æternæ, per terribilem mortem decollationis, & naturæ adversissimam, quod contigit quodam die Jovis, post meridiem, vigesimâ primâ Octobris, Anno millesimo sexcentesimo vigesimo primo, in festo undecim milium Virginum, eadem horâ & momento, quo ista creatura conscendit locum, ubi illi erat subeundum supplicium mortis, & consedit in sella ejus loci; fui ducta in spiritu ab Angelo ipsius Custode, comitantibus me illis Angelis, quos attribuit Dominus meæ animæ, permodum somni cujusdam spiritualis, ad illum miserabilem locum, ubi adfui præfens illi actui, acsi re ipsâ

& verè ibi effem cum corpore & anima, fuitque mihi manifestum, quod ad gloriam DEI recensebo. Vidit mea anima advenientem quandam formosissimam, gravissimam & modestissimam Virginem, in vestitu honesto, quam comitabantur quasi pedisequæ, aliæ Virgines. Venit ad locum, in quo erat ille Dominus, & cum eum perquam affabiliter, amanter, ac benignè intueretur, is ipsam vicissim aspexit, & assurrexit ex sella, in qua federat ac defixis in eo theatro genibus, salutavit illam affectu humillimo; amabiliter & humanè, dicendo ipsi: Bene veneris, dilecta mihi, Domina mea dilectissima, quam ex corde meo desideravi: tu es chara sponsa mea, atque ut talem te æstimo, & suscipio, amo ac veneror. Et apprehendens blandissimè ac modestissimè formosissimas ipsius manus, osculatus est illas dicendo: Dissaviabo tuas sanctas manus, & tu eris gloria mea: tu es numeris omnibus absolutum bonum meum, & meus honor. At cum hoc dixisset, illa mystica Virgo, quæ erat forma & figura Crucis, quam erat subiturus, ipsum elevavit, collocavitque in sella, & evanuit: ac tum subito fuit peractum illud supplicium; ego verò sum reducta ab Angelis, qui me cò adduxerant, ad meum angulum. Postquam ad me redij ex illo raptu, & quasi somno, reperi me afflictissimam, ac animam meam gravatam, mærore, & compatiens morti illius Domini; quamvis summum habuerim solatium in DEO, quòd vidissem talia mysteria, & illum complexum atque desponsationem, quâ sibi anima ipsius desponsavit Crucem in hora mortis. DEUS sit benedictus.

XIII. Ibidem §. 3. Biduo à supplicio hoc elapso, manè mihi cum DEO agenti, locuta est spiritualiter anima istius Domini, quin tamen ipsum more humano viderem, dixitque mihi admodum jucundè: DEUS sit tecum, mea Mater, & rependat tibi semetipso beneficium, quod mihi contulisti. Audiens eam loquelam spiritualem, subito ipsam agnovi, illuminata à DEO, &

re-

respondi illi cum solatio : Bene veneris Anima DEI : dic mihi, rogo te, amore ipsius , si id meo DEO placet , estque illius sanctissima voluntas, quo sis loco, & an fruaris DEO tuo? vel commoreris in pœnis Purgatorij. Respondit mihi cum magho gaudio : Mater mea, fruor summo Bono, ex divina bonitate & misericordia, atque propter tuam intercessionem. Significo autem tibi, pro majori meo bono , & gloria DEI , voluisse Divinam Majestatem, ut, quando mea anima egressa est ex meo corpore, à Sanctis Angelis, qui ipsam ducebant ad cœlestem Jerusalem, duceretur proximè Purgatorium, ut videret terribiles pœnas, ex quibus illam DEUS per suam misericordiam liberaverat, & quarum loco acceptaverat, molestiam ac tormentum carceris, & mortem mei corporis ; quod tamen totum comparatum vel cum atomo eorum, quæ illic tolerantur, fuit instar picturæ, comparatæ cum re viva & vera, tantumque mei quædam humiliatio, quam sustinui in transitu. Unde ut hoc agnoscerem, absque ullius ferè sensu pœnæ , me edocuit, ita se rem habere. Dego in summis gaudijs & quiete æterna, quam non possum exponere, neque ulla lingua est, quæ ipsam valeat explicare. Benedictus sit DEUS in æternum, qui tam abundanter remuneratur dolores temporales: ideoque te rogo, Mater mea , amore DEI, ut bono sis animo, & magno tibi sit solatio tua crux , ac tua patientia, quia pateris pro tuo DEO, manentque te tanta ac æterna præmia & quies: atque nunc vale. Et hoc dicto cessavit, desinitque communicatio cum illa Anima ; ego verò fui rapta in ecstasim, ex qua ad me rediens cum ingenti solatio meæ animæ, agebam magnas gratias DEO pro tantis favoribus ac miserationibus, quas exhibuerat illi creaturæ. DEUS sit benedictus.

XIV. Post unam abhinc diem, dum manè agerem cum DEO, venerunt ad me Domini mei Sancti Angeli, & postquam me induissent quadam mysticâ veste, coloris quasi cœlestis & lucidi, imposuissentque coronam meo capiti; in momento me
tu-

tulerunt ad coelestem Jerosolymam, constitueruntque me in conspectu Divinae Majestatis: ubi vidi venientem ad me Animam istius Domini defuncti, de quo loquor. Veniebat autem in humana specie, referente ipsius vultum, ac personam genuinam; & erat tam subtilis ac transparens illa materia ejus figuræ, ut per ipsam apparuerit lumen & splendor Animæ, quæ eam assumpserat, dixitque mihi humillimè & peramanter: Bene veneris ad hanc coelestem Aulam, Mater mea ac Domina mea, bene veneris in nomine Domini, qui tibi rependat tantum beneficium, quod mihi præstitisti, tuis precibus per bonitatem DEI, cui ego infinitas ago gratias, quòd voluerit ipsique placuerit, pro tuo solatio & tua gloria, ut esses testis oculata gloriæ ac beatitudinis æternæ, quam possideo, atque id manifestares viventibus in mundo meis cognatis, ad eorum solatium, & gloriam DEI. His dictis disparuit illa species & figura, quæ erat instar nubeculæ lucidæ ac subtilis; remansitque Anima ipsius gloriosa & splendidissima, in specie columnæ conflatæ ex auro purissimo, & igne potenti ac splendidissimo, quæ tota erat circumdata à Sole pulcherrimo summi splendoris, cujus radij videbantur pertingere ad Divinum Esse, unde illi Animæ communicabatur & conferebatur omnis beatitudo, quâ fruebatur, quamque possidebat.

XV. Elapso post iterum biduo, vidi iterum istam creaturam, quæ me est allocuta dicens: Venio, ut te soler & animem, adferamque tibi bonum nuncium, quòd non sit diu differenda tua migratio: atque ecce, quando venerit tempus tuæ mortis, quod DEUS constituit, cum ijs, qui pro te venient ex cœlo, veniam & ego. Audiens hoc ab ipso dici, fui recreata & confortata, dixique illi: Benedictus sit DEUS, atque etiam tu Anima DEI. Dicis te venturum pro me cum tuo collo resecto à corpore? nescio, quid me moverit ad hoc dicendum. Ipse verò respondit: ita Anima, & certam te reddo nomine DEI, ac assero istam

istam veritatem, ut videbis in die Judicii, quod propter enssem, quo fuit resectum meum collum, sit habiturum tam elegantem & pretiosum torquem, tamque coeleste vellus aureum, ut valiturum sit plus, absque comparatione, quam omnia imperia & regna mundi, & exornaturum magis meum collum, quam clarissimus ac splendidissimus Sol, quod est certissimum.

XVI. Part. 2. l. 1. c. 19. pag. 84. patet, quam saepe sit Dominus ille solitus è Coelo eam visitare: nam cum Vener: P. Ludovicus de Ponte ei Anno 1625. die 15. Januarij apparens dixisset: modò Anima libenter cum DEO ires ad coelestem Patriam: ego te ducam, veni mecum: Omnino (narrat ipsa se respondisse) omnino libenter eò pergerem fateor: nolo tamen, Sancte Pater, ut à te ducar. Quare autem? quæsiuit ipse. Quia es vir, aiebam ego, & non soleo comitari viros. Quamprimum id protuli, comparuit Marchio septem Ecclesiarum admodum hilaris, dixitque: Etiam ego illam pari ratione aliquoties invitavi, & noluit ire. Subjunxit tum P. Ludovicus: Nónne verò Sancti DEI, qui te visitaverunt, & interdum duxerunt, sunt Viri, quales nos? Ità est, respondi, sed quia illos in hac vita mortali non noveram, non me reddiderunt ità perplexam. Si DEO placet, ut proficiscar ad coelestem Patriam, ducent me, Sancti Angeli mei, sicut plerumque solent. Sancti approbaverunt meam tergiversationem.

XVII. Quantum autem Divina Majestas desideraverit, ut hoc terribili exemplo calamitatis & infortunij hujus Magnatis, proficerent, ac sapere discerent Magnates alij Christiani, ostendere dignatus est mirabili Visione, Parte 2. lib. 2. cap. 19. pag. 290. hoc modo: Feriâ quintâ, die 2. Aprilis An. 1626. mihi Dominus dixit: Veni Anima, & videbis, quod tibi volo ostendere. Fui subitò, quin possem resistere, ducta in spiritu ad ripam fluminis, cujus aquæ erant similes crystallo, & pulchræ, longèque pellucidiores, quam quidquid isthuc videre est. In-

terluebat amœnissimum campum, ubi in una ipsius parte, seu ripa vidi crescentes multas pulcherrimas arbores, quarum aliquæ erant ornatae venustissimis & gratiosissimis floribus, aliæ unâ cum talibus floribus præterea habebant elegantissimos & copiosissimos fructus. Licet verò omnes istæ arbores essent speciosissimæ, multum tamen discrepabant ab invicem non solum proceritate, sed etiam obstupescendâ elegantia. Conjeci deinde oculos in ripam alterius partis, & vidi ibi loco arborum esse infixos palos instar perticarum, non solum siccos carentes folijs, & omni virore, verum etiam quodammodo exustos ac arefactos, ut nunquam amplius viderentur posse immutari, vel revirescere. Eram quasi attonita, considerando admirandam diversitatem tam dissimilium riparum ejusdem fluvij, & paulatim progrediens contemplabar ripam, in qua stabant pali aridi; notabam illorum formas, quæ plurimum differebant. Aliqui erant vehementer alti, alij valde parvi, atque tandem alij mediocres: unum eorum specialiter consideravi, qui erat instar informis trunci, altissimus multumque crassus, & longè magis arefactus, quàm omnes reliqui. Substiti modicum, contemplan- do illum, tanquam abrepta in ecstasim, atque tunc mihi Dominus dixit: Quid aspicias? iste est insignissimus titio inferni.

XVIII. Interea vidi Marchionem septem Ecclesiarum, Dominum Rodericum Calderonium, in habitu glorioso pulcherrimum, qui aspectui Animæ apparebat generosissimus, & magnis præditus viribus: ferebat in collo illud pretiosissimum monile, quo ipsum exornatum toties conspexi, & in manu baculum, qui speciem gerebat grallarum, qualibus consveverunt uti homines debiles ac delicati; & accedens ad illos aridos palos, nescio quid eo baculo circa ipsos fuerit molitus. Significatum mihi est, conatum fuisse, proficuum illis reddere irrigationem ejus crystallini fluvij, ut transformarentur in tam floridas & frugiferas arbores, quàm erant illæ, quæ alteram ripam oc-
cu-

cupabant : sed quantumcunque laboraret, suamque impenderet diligentiam, ut id efficeret, permancebant nihilominus aridi & exsucca, sicut antea.

XIX. Omnia ista spectabam pari cum attentione & stupore, quando disparentibus mihi omnibus audiui Dominum, qui me interrogabat : Marina, intellexistine mysterium, quod tibi ostendi ? Respondi : Mi Domine, aliquid mihi ex eo video affecuta, non fuit tamen à me satis penetratum. Ego itaque volo tibi illud declarare, dixit Divina Majestas. Adverte autem, me non loqui de Animabus vulgarium ac plebejorum hominum, neque etiam de Animabus privatam vitam agentium, sed eorum tantummodo, qui funguntur officijs Regijs, muneribus publicis, dominantur, & autoritate pollent in Republica Christiana. Omnes hæ Animæ irrigantur ab Ecclesia, omnes fruuntur Sacramentis, suntque eorundem participes : quod tamen attinet ad ipsarum dispositionem, & opera, reperitur tanta inter has, interque alias differentia, quantam vidisti intercedere inter arbores unius ripæ, & aridos stipites alterius. Alij producant flores bonorum desideriorum, & vix progrediuntur ulterius : alij his floribus adjungunt etiam fructus sanctorum operum habentque suas animas fertiles & exornatos : in alijs propter malam illorum dispositionem nihil penitus operantur, seu Sacramenta, seu divinæ inspirationes, seu exempla, & non tantum non progerminant fructus spirituales, sed nec etiam eorum producendorum desideria. Per representationem, quam vidiisti, illius, qui conabatur efficere, ut sacræ ejus mystici fluminis aquæ prodesse illis aridis palis, eorundemque sterilitatem, redderent fertilem, tibi indicare volui, quod ipsis, quanquam, ex multis antiquis exemplis possent ac deberent proficere, nihilominus istud recentius ob oculos ponam, ut illius memores ad se redeant, & non confidant falsæ præsentium temporum securitati, non metuendo futura, sed ut bene utantur meis miseri-

cordijs, & faciant fructus dignos pœnitentiæ. Etiam si verò modernum hoc exemplum sit adeò efficax, ut detegat mundi & honorum ipsius fallaciam, nihil tamen ipsis prodest, quia nolunt aperire oculos, ut videant lumen, quod se illis ingerit. Hæc intellexi à Domino, cujus Majestas nos dignetur disponere, ut ex ejusdem misericordijs proficiamus. Amen.

XX. Denique ut Judices etiam discerent misericordiam, erga sibi commissos reos, præsertim criminum suorum pœnitentes, pulcherrimum documentum DEUS præbere voluit, per revelationem, quam Ven: Marina ibidem eodem anno sub finem Decembris sic describit: Quadam die mihi DEUS ostendit duas Animas ex divina dispositione colloquentes. Una beata & ad sublimes gloriæ provecta gradus, erat cujusdam Domini (nempe Roderici de Calderon) quem videbam in specie magni Ducis, splendide elegantissimo torque exornatum, pendente ex collo instar torquis, quo uruntur Equites aurei velleris: & hæc omnia mihi repræsentabant, quàm eminentem gradum obtineret in Cœlo. Altera erat alterius personæ, nullatenus inferioris conditionis, quæ afflictissima degebat in Purgatorio. Vidi deinde hanc flexis genibus & junctis manibus cum magna humilitate & submissione petentem ab Anima gloriosa, ut pro ipsa apud DEUM intercederet, quò illam dignaretur liberare ex pœnis, quas patiebatur. Anima gloriosa illam intuebatur perbenignè & benevolè, multùm ei condolendo, & dicebat ipsi: faciam id omnino quàm libentissimè, & certò te scire velim, me, si possèm reverti ad mundum, rursùmque pati, quod sum passus, ac sustinere mortem, qualem sustinui, quamvis toleranda forent millena alia tormentorum genera, promptissimè omnia à me suscipienda, ut te in his pœnis sublevarem: quæ dubio procul fuerint gravissimæ, quas ibi hæc persona perferebat. Et cognovi illuminata à DEO, causam earum esse, quòd, cum utraque Anima degeret in hac vita mortali, ista, quæ nunc tanto
pere

pere cruciatur, addiderit, licet bonâ intentione, & existimans se bene agere, stimulos ad afflictiones & mortem, quam altera persona, tantâ nunc fruens gloriâ, fuerat perpeffa: siquidem, præter illam intentionem, quæ videbatur bona, aliquid, imò verò multum se admiscuerat naturalis propensionis, dum se abripi permisit à passionibus, quas debuisset moderari.

XXI. Convertit se postea hæc afflicta anima ad me, dixitque mihi, se esse damnatam ad septem annos illarum terribilium poenarum, quas tum tolerabat, atque addidit: Famula DEI, jube conscribi, quod vidisti, & audivisti, ut homines, præsertim autem Judices, discant, quomodo suis proximis jus dicere, seq; gerere debeant, dum eos videbunt pati; & sapiant meo exemplo. Indolui supra modum ob afflictionem & angustias hujus personæ, quia illam impensè in Domino amaveram, multumq; ipsi eram obstricta, dum viveret. Itaque recurri ad Divinam Majestatem, rogavi instantissimè, ut ipsius misereretur, eamque liberaret à tam acerbis tormentis. Volui idcirco statim dicere coronam, cui habeo attributas Indulgentias, atque has ipsi applicare; verum subito vidi Dominum, qui mihi modo quodam gravissimo signum dedit, acsi (ut more nostro ruditer loquar) imponeret labijs digitum, indicando mihi, nè sic orarem, cò quod nollet, ut tunc uterer Indulgentijs, sed tantum illi Animæ applicarem preces communes modo consveto Ecclesiæ.

XXII. Postea decimâ septimâ Decembris mihi, nihil tale cogitanti, hæc afflicta Anima rursus comparuit, & quamvis illam internoverim, non tamen plenè, quia habebat faciem obfuscata obscurâ quadam umbrâ, quasi vultum manu obtexisset. Allocutame est, & interrogavi ipsam, quænam esset? Non me novisti? agebat, & cum eam velut umbram abstulisset è vultu, ut mihi totus appareret, respondi: Ità Anima, jam te optimè nosco. Scito, dicebat illa, gravissimas esse poenas, quas sustinco, & sententiam hæctenus perseverare in suo vigore, ut durent

septennio. Obsecro te per ipsum DEUM, & per magnam meam æstimationem tui, ingensque desiderium, quod in vita habui tibi gratificandi, ut me commendes eidem magno Domino, illumque roges, ut mei misereatur, qui ideò quòd mea severitas non fuerit miserta peccatorum poenitentium, neque ipsis simul compassus, iustissime patior hæc tormenta. Promisi ei prorsus ex animo, me id facturam, dixique illi: Anima, esto bono animo, & confortare in Domino; licet enim sit verum, te nunc tam multum pati, finietur id tamen, & frueris DEO in æternum. Locuta sum ipsi alia huiusmodi, quia mihi indè videbatur percipere solatium. Postquam abiit, confugi denuò ad DEUM, & rogavi illum, quàm optime potui, ut misereretur Animæ in tantis constitutæ angustijs. Divina Majestas autem, quasi interrumpendo meas preces, mihi dixit: Marina, judicia mea sunt altissima & arcanissima, atque iustitia mea non minùs suum obtinet locum, quàm misericordia. Ora pro ipso more usitato, quo solet orari pro Animabus Purgatorij. Ergone, replicui ego, mi Domine, tot Missæ, quæ pro eo fuerunt dictæ, & Sangvis tuus, qui illi fuit applicatus, non sufficiunt? Dico tibi, respondit Dominus, quòd longè graviores toleraret poenas, nisi id factum fuisset. Hoc mihi evenit. Nihilominus spero DEUM miserurum hujus Animæ. Atque per DEI misericordiam his festis Natalitijs, quibus pro illa oravi, intellexi multum mitigatas poenas, quas patitur. DEUS ipsam penitus liberet. Amen, Amen.

CONCLUSIO

ad benevolum Lectorem.

Aliqua mihi visus es sub finem hujus Tractatùs monendus, amice Lector. Primò me in 1. Parte hujus Tractatùs in describenda Sanctitate Vitæ Venerabilis Virginis Domine Marinæ de Escobar ea omnia conatum esse præterire, quæ non nisi ex ipsiusmet Re-

ve-

velationibus & Assertis constant. Cum enim dubiæ sint aliquibus ejus Revelationes, & Visiones, si certitudinem & veritatem earum voluissem, per illas ipsasmet Revelationes firmare, Sisyphi saxum casso labore volvissem. Alioquin si etiam ex ijs, quæ in Revelationibus ejus extant, liceat argumenta Sanctitatis adducere, næ illa altissimum supremæ cujusdam inusitatissimæ Sanctitatis apicem conscendisse dicenda sit, ad omnium seculorum admirationem. In secunda verò hac Parte, Prudentiam & Scientiam mysticam Venerabilis Marinæ, clarum est non oportuisse probare, nisi ex ipsiusmet dictis, scriptis, & dictatis.

II. Cum ergo scopus meus sit Revelationibus ac Visionibus Ven: Marinæ fidem conciliare, nec non Ven: Patrem Ludovicum de Ponte à nota remeritatis in approbandis ijs, quæ Parte 1. mirabilis Vitæ ejusdem magnæ Servæ DEI ipsemet conscripsit, vindicare; pro quo secundum mentem sapientissimi Episcopi Giennensis, necesse fuit ostendere primò, qualisnam Vir, & quantus Sanctitate & Prudentiâ fuerit P. Ludovicus de Ponte Confessarius, ac Rector spiritûs ejusdem Mirabilis Virginis: deinde quæ & quantæ Sanctitatis & Prudentiæ fuerit ipsamet illa Persona, cui Revelationes illæ cœlestes factæ sunt, Venerabilis Marina; spero me his duobus verarum, & non illusoriarum aut fucatarum Revelationum signis satisfacisse per hos duos, secundum & tertium, Tractatus; ut propterea apud quemlibet moderati animi, & Prudentiæ Christianæ Virum, securè dixerò: *Hac Revelatio, etiamsi eam non satis ego assequar, est vera, quia eam habuit tantæ Sanctitatis & Scientiæ mystica Virgo, & quia eam probavit tantæ Sanctitatis, & tantæ Sapientiæ, Vir in mystica Theologia incomparabilis.*

III. Superfunt adhuc nihilominus duo ab eodem laudatissimo Episcopo assignata Discretionis spirituum signa, nempe à *Materia*, quam Revelationes illæ tractent, & contineant, atque à *Modo* quo contigerint. Quæ duo argumenta exactè propositurus sum Tractatibus sequentibus, nempe Quarto, in quo exponam, quantum lucis & firmitudinis mysterijs Fidei attulerint hæ Revelationes: Quinto verò quantum momenti, ac Documentorum moralium pro vita christianè ac sanctè instituenda. Sexto, modum quo Revelationes hæ contigere: immenso nimirum amore DEI erga suos Sanctos, ac præcipuè blanditijs inexplicabilibus Sponsi cœlestis erga hanc suam Sponsam singularem; ubi quibusdam ille ipse excessus tam teneri amoris, parit difficultatem, ut cum S. Davide exclament: *Nimis, nimis honorati sunt Amici tui, DEUS!*

IV. Quo in genere mihi opportunum interea videtur advertere, quod habet Conscriptor Revelationum Sanctæ Mechtildis, lib. 5. cap. 21. seu ultimo, ubi postquam admirabilem Sanctitatis Sanctæ Mechtildis altitudinem compendio retulisset, eamque omnibus Sanctorum Angelorum Choris, ac ipsis Seraphinis, ac demum omnibus Sanctis comparasset, sic concludit: *Sed nulli absurdum videatur, si nostri temporis, in quos fines seculorum, imò faces omnium vitiorum, & tadia omnium bonorum devenerunt, unum (seu unam Personam sanctam) omnibus Sanctis communicavimus, seu comparavimus, cum B. Gregorius super Ezechielem dicat, quod DEUS de die in diem majorem homines cognitione illustrare, secreta sua illis amplius revelare dignetur, & processu temporis scientiam spiritualium augeri, introducens auctoritatem Danielis Prophetæ de ultimo tempore dicentis: Pertransibunt pluri mi, & multiplex erit scientia. Dicit etiam sic: Moyses plûs quàm Abraham, Prophetæ plûs quàm Moyses, Apostoli plûs quàm Prophetæ cognoverunt. Sicut David de se testatur dicens: Super omnes docentes me, & super Senes intellexi. Legitur etiam in vitis Patrum: qui Sancti Patres de ultima generatione prophetabant dicentes: Homines tunc temporis fore negligentes: sed tamen qui inter eos perfecti fuerint, super nos & Patres nostros meliores erunt.*

V. Hæc Conscriptor Vitæ Sanctæ Mechtildis, quibus pulcherrimè congruit, quod eadem Sancta Mechtildis ipsa habet lib. 1. cap. 35. de Ascensione Domini, qui omnes Sanctos antiqui Testamenti ex limbo educatos secum deduxit ad cælos, ubi illa sic narrat: *Magnus etiam Sanctorum exercitus ibi visus est, inter quos Joannes Baptista, & Joseph Nutritus Domini, & Simeon, qui Christum Dominum suscepit in templo, erant Primates. Nempe hi tres erant alijs tempore posteriores, in quos ultima Synagogæ tempora devenerunt. Neque per hoc volo concludere Sanctiores quospiam fore in fine Ecclesiæ tempore Antichristi, quàm fuerint Sancti Apostoli*

Fundatores Ecclesiæ, quia plures hîc occurrunt circumstantiæ, ob quas potest hîc supponi ab hac regula exceptio, ut propterea

DEO sit hoc judicium relinquendum.



TRACTATUS QUARTUS.

Quantum ex mirabili Vita Venerabilis Virginis Marinæ de Escobar confirmationis accipiat Sancta Fides Catholica.

PROLOGUS.

QUæ ad declarandam, probandamque veritatem Revelationum Venerabilis Marinæ de Escobar hætenus juxta monitum Sapientissimi Episcopi Giennensis à Sanctitate, Prudentia, sacræque eorum Scientia, quorum operâ Revelationes hæ conscriptæ sunt adduximus, quasi ab extrinseco petita fuere argumenta: nunc ad interiora quasi ex visceribus causæ eruenda conversi, pretiosos exponemus thesauros, quibus Revelationes hæ, tam in prima à Venerabili Patre Ludovico de Ponte collecta, quam in secunda post felicem ejusdem Venerabilis Virginis obitum edita Parte abundant, idque seu ad confirmandos Sanctæ Catholicæ Fidei articulos, seu ad vitæ Christianæ saluberrima practica documenta: ut sic appareat cœlestes has Revelationes non admodum egere subsidijs extraneis, cum ijs applicari possit elogium, quod Psalm. 118. Sanctus David de omnibus, quæ ab ore DEI procedunt, eloquijs protulit: *Judicia Domini vera justificata in semetipsa.*

Ecc

In

In hoc ergo Quarto Tractatu selectiora comprehendam, quæ ad Sanctam Fidem nostram Catholicam confirmandam, aut declarandam pertinere videbantur; practica moralia Tractatu Quinto daturus.

Dividam autem Tractatum totum in Partes quinque:

PRIMA continebit ea, quæ ad Librorum S. Scripturæ tam antiqui, quàm novi Testamenti, & aliquorum specialium locorum ac textuum seu elucidationem, seu confirmationem, seu imitationem, ac expressionem pertinent.

SECUNDA: Quæ ad DEUM, & ad SSS. Trinitatem in Personis distinctam spectant, adeoque comprehendet ex Symbolo Apostolorum Articulos tres, nempe primum, secundum, ac octavum; qui sunt: Credo in DEUM Patrem Omnipotentem, Creatorem cœli & Terræ. Et in JESUM Christum Filium ejus unicum Dominum nostrum. Credo in Spiritum Sanctum. Ubi tamen ea, quæ sunt Filio DEI, ut est incarnatus, propria, nempe quòd sit Jesus Christus Dominus noster, adeoque quidquid est de Incarnatione, differretur usque ad Partem Quartam, in qua explicabitur Vita Christi Domini. Et quia in primo Fidei nostræ articulo comprehenditur DEI omnipotentia foras in ordine ad creaturas, id est Creatio cœli & terræ; ideo sicut Divus Thomas ad primam partem revocavit Tractatum de Angelis, ita & hic subjungetur

TERTIA PARS, quæ complectetur Revelationes de Angelis tam bonis, quàm malis.

QUARTA PARS exhibebit totam Vitam Christi Domini, ut & omnia ad Sanctissimam ejus Matrem, ac Verbum incarnatum, quocunque modo spectantia, adeoque complectetur ex Symbolo Apostolorum articulos sex, nempe tertium, quartum, quintum, sextum, ac septimum; qui sunt: Qui conceptus est de Spiritu Sancto, natus ex MARIA Virgine; Passus sub Pontio Pilato, crucifixus mortuus & sepultus; Descendit ad inferos, ter-

tiâ

riâ die resurrexit à mortuis; Ascendit ad cœlos, sedet ad dexteram Patris omnipotentis; Inde venturus est judicare vivos & mortuos. Quibus accedet, ut dictum est, quæ ex articulo secundo sunt huc de Incarnatione dilata: itémque articulus undecimus: Credo Carnis Resurrectionem, quia articulus ille non potest separari à septimo, de Judicio universali.

QUINTA PARS colliget reliqua Myſteria ex theſauris Verbi Incarnati in genus humanum derivata, adeoque complectetur ex Symbolo Apostolorum residuos tres; nempe nonum, decimum, ac duodecimum, qui sunt: Credo sanctam Ecclesiam Catholicam, Sanctorum Communionem; Remissionem peccatorum; & Vitam æternam. Unde huc pertinebit quidquid ad Sanctos, eorumque cultum spectat, ut & ad omnia Sacramenta, Indulgentias, Purgatorium, Cœlum, ac Infernum.

PARS PRIMA.

*Quæ ad libros Sacræ Scripturæ
confirmandos pertinent.*

Sæpius Divina Majestas in Revelationibus Venerabilis Marine Sacram Scripturam in communi tanquam librum à se generis humani salutis datum commendat, ut & promittit Duces spirituales non erraturos, si in Animabus dirigendis eam sequantur. Nos in particulari quosdam locos & textus speciales proferemus.

CAPUT I.

*Loci & textus in Libris Moysis, qui ex Revelationibus Veni. Marine de Escobar confirmantur,
vel illustrantur.*

Ecc 2

I. Ge-

I.

GENESCOS c. 18. v. 1. Abraham in symbolo Sanctissimæ Trinitatis tres vidit, & unum adoravit. Ità Ven: Marina Parte 1. lib. 3. c. 8. §. 1. de se refert: Anno 1611. agens cum DEO horâ secundâ noctis, vidi tres Beatos Spiritus, qui, ut mihi videbatur, erant Angeli DEI, & stantes coram me aliquantùm ex parte, dixerunt mihi modo admirabili & valde gravi: Soror, venimus, ut tibi annuntiemus nova nomine DEI. Neque mihi tunc plus sunt locuti. Ego admirabar admirabilem modum loquendi, quo utebantur: nam loquentibus tribus, loquebatur tantùm unus, & loquente tantùm uno, loquebantur omnes tres; per quod DEUS vehementer illuminavit meam Animam, ut cognoscerem altissimum mysterium trium Divinarum Personarum, & unius solius veri DEI, adeò, ut habito hoc lumine potuerim dicere, verum esse, quod confitemur de hoc mysterio.

II. Genesis 29. v. 18. Jacob servivit septem annis pro Rachele, loco cujus data est illi lippa soror ejus Lia. Pulcherrimè hoc exprimitur apud Ven: Marinam Parte 1. lib. 4. c. 4. §. 3. ubi ipsa sic habet. Post toleratas quasdam afflictiones ac molestias dixerunt mihi isti Sancti Angeli, se mecum mansuros totâ eâ nocte, & unus ex ipsis, ut me distraheret dixit: Volo tibi modò recensere historiam ex Sacra Scriptura, quæ contigit ante adventum Christi Domini in mundum. Illo tempore erat quidam Vir nomine Jacob, qui servivit septem annis cuidam homini diviti ac potenti, ut sibi desponsaret unam ipsius filiam, quæ erat præter morem formosa. Audito principio hujus historię, quum illam recenseret Angelus, modo gravi, svavi, & cœlesti, unde capiebam solatium, dixi illi: Angele DEI, per DEUM te rogo, ne mihi referas, neque commemoras antiquas historias, quarum ego non habeo magnam noticiam; cùm etenim sum obnoxia timoribus, vivamque semper cum metu, nolo sume-

sumere promea imbecillitate occasionem ex eo, quod dicis, aliqujus inquietudinis. Angelus se aliquantum continuie, ac deinde dixit. Soror nostra, nos Angeli DEI non possumus referre, neque quidquam dicere aliud, quàm ipsius veritates, ideoque nè timeas, nec dubites. Et hoc dicto redijt ad historiam, quam inchoaverat dicendo: Servivit hic Jacob septem annis, ut sibi desponsaret filiam sui Domini, sicut dixi, & ijs elapsis illam ipsi non dedit ejus Pater, allegans pro excusatione, in ea regione non esse consuetum nuptui dare filias minores prius, quàm majores. Desponsavit illi igitur filiam majorem, quæ erat lippa, dixitque ipsi: quòd si vellet Sponsam habere filiam minorem, quæ erat formosa, serviendum illi esset alijs septem annis. Hoc ità evenit Anima. Sed volo tibi narrare aliquid aliud sublimius & excellentius, atque accommodatum meæ intentioni. Noveris etiam, quòd quando Filius DEI venit in mundum, & assumpsit carnem humanam, ut subveniret omnibus hominibus; venerit ad suum dilectum populum, in quo sibi complacuerat, ut iniret mirabilem illum contractum cum Synagoga, seu ipsam sibi desponsaret; & postquam illi inservivisset tot annis, præstitissetque ipsi tantam gratiam, & favorem; exceperunt illum valde malè & inhumanè, neque ei dederunt Sponsam, ac proinde accepit ejus loco, pro eo tempore sororem lippam, quæ fuit Gentilitas. Considera felicitatem hujus, & miseriam illius. Quid tibi de hoc videtur? Ego eram adeò turbata propter meos solitos timores, ut vix intelligerem, quid mihi loqueretur in sua illa cœlesti conversatione, quam nihilominus Angelus prosecutus est, dicens: Noveris quoque Anima, quòd Dominus DEUS Majestatis ordinariè, licèt sit infinitæ bonitatis, & misericordiæ erga suas creaturas, sit etiam omnipotens; terribilis & justissimus in suis pœnis, ideoque sæpe propter peccata & culpas sui populi, illum derelinquat, abeatque eo, ubi meliori cum dispositione recipitur ab animabus, quemadmodum

fecit cum suo proprio ac dilecto, & æstimato populo, de quo tibi modò locutus sum. Scias præterea, ut tangaris commiseratione, & plores ac postules à DEO misericordiam, quòd Divinà Majestas vehementer sentiat, se offensam esse à quodam populo, illique indignetur propter ejus gravia peccata, & vilipensiones suæ Divinæ Majestatis, & propè constituerit illum deferere, & derelinquere, & transire ad alium populum, ubi melius recipiatur majori fide adoretur & honoretur. Cogita Soror, quis sit iste dolor ac afflictio, & quàm dignus compassionem sit status illius populi derelicti ac deserti à suo DEO & Domino, quæ est summa ipsius poena, ac tanta, ut si nos Angeli ejus possemus dolere & flere, summè præ commiseratione fleremus, implorantes pro eo DEI misericordiam. Adverte similiter quanta felicitas, quàmque immensa, & quam beata sit celestis fors illius populi, quem Dominus ex altissimis suis judicijs & magna misericordia disposuit, ut reciperet, crederet, ac amaret Divinam ipsius potentiam & Majestatem. Hujus misericordiæ figura fuit historia Liæ lippæ, quam tibi retuli, non solum ut te distraherem, ac diverterem à tua afflictione & doloribus, sed etiam ut videres, agnosceres, ac ponderares opera DEI, altitudinem judiciorum ipsius, immensam ejus sapientiam & bonitatem, ac dominium, quod habet super omnes creaturas suas exhibendo ipsi pro sua divina voluntate clementiam & misericordiam, quæ semper relucet in omnibus ejus operibus. Oportet tantum clamare & petere à DEO misericordiam cum charitate, humilitate, & confidentia, quia hac ratione placatur DEUS.

III. Genes. 28. v. 12. Vidit Jacob scalam stantem super terram, & acumen ejus tangens Cælum. Angelos quoque DEI ascendentes & descendentes per eam. Venerabilis Marina Parte I. l. 3. c. 4. §. 1. refert: Dum versarer quâdam nocte coram DEO in Martio Anni 1621. videbam interruptè quendam magnum

gnum & pulchrum campum, in quo stabat valde alta & mirabilis scala, pertingens à terra usque ad Cœlum, & descendebant ac ascendebant in illa Angeli DEI, dicebantque mihi: hæc est scala Jacob. Ego, quia agebam cum DEO modo meo ordinario, neque memineram talis scalæ, attribuebam totum, sicut poteram, imaginationi: sed in momento me inveni ad pedem ipsius cum nonnullis sanctis Angelis. Contemplabar illam à summitate deorsum, & ab infima parte sursum, vidique juxta ipsam magnæ autoritatis Personam, indutam vestibus valde pretiosis, & ejus coloris, quem habet ardens ignis. Videbatur mihi esse magnus aliquis Sanctus, & optabam scire, quisnam esset; tum accessit quidam Angelus ad meam aurem, dixitque mihi: Iste est quidam Sanctus Propheta. Mirabar hoc audiens, & dicebam tacite: quid ad rem facit, videre Prophetam cum scala Jacob? Tunc mihi dixit Sanctus, manifestans se mihi quis esset per speciale lumen: Anima, ego sum Propheta, nè dubites, & veni huc jubente DEO, ut te docerem, quo modo hæc scala conscendatur, animarémque ad ipsam conscendendam, ac proinde inchoabis ascensum: & quamvis videatur arduus ac difficilis: nè timeas, ego enim & hi Sancti Angeli, hic præsentés, te juvabimus in nomine Domini. Atque hoc dicto Sanctus & Angeli me constituerunt in primo gradu scalæ, ac incepi illam unà cum ipsis conscendere. Ascendebam lentè cum magno timore, quantòque progrediebar ulteriùs, tantò timebam ampliùs illius altitudinem: videbar enim mihi posse ruere, nisi à comitibus meis sustinerer. Hoc modo perveni usque ad Cœlum.

IV. Genesis 32. v. 24. Jacob luctatus est cum DEO. Complures similes inter DEUM & Venerabilem Marinam luctæ referuntur: ut Parte 1. l. 2. c. 9. §. 3. & l. 3. c. 4. §. 1. Cum essem ad Cœlum adducta cum quopiam sancto Propheta, & ab eo corroborata & animata, ut ingrederer in Majestatem Divinam sub specie ignis apparentem dixi: Sancte mi, quid quæso mihi facien-

faciendum est in hoc ingressu, ecce enim jam eo. Respondit Sanctus: Ingredieris ad tūm DEUM, & statim illum fortiter amplecteris, stringesque ac dices: DEUS mi, ad te venio, & in te volo manere, neque te unquam dimittam, nisi benedixeris mihi: Tecum luctabor mi DEUS, sicut Jacob, donec mihi benedicas. Et si tibi dixerit in hac lucta: Quid vis Anima, quid à me petis? relinque me ac dimitte ex tuis brachijs; noli propterea, desistere à tuo proposito, vel concidere animo & esto constans; hoc namque vult DEUS tuus, & dic illi, quod tibi dixi, sunt enim verba ipsius. Atque cū hoc diceret ille benedictus Sanctus, introduxit me svari quādam violentiā in illam immensitatem mei DEI, & in illum ignem comburentem, intra quem fui fortiter unita illi summo Bono, quod sum arctè complexa, ibique mihi evenerunt ea, quæ Sanctus dixerat, in illis colloquijs DEUM inter ac meam animam, & in divino illo certamine, quod diu duravit; tandēque victus à sua bonitate, & misericordia, magnus ille DEUS mihi dixit: Anima bene certavisti, pro obtinenda meā nova benedictione, quā tibi ego libenter volo dare meo nomine, & mei Filij ac Spiritus Sancti; fuisse ipsam. Et dedit mihi suam sanctam benedictionem, dicendo: Benedicta eris Anima in cælo & in terra, & in omnibus tuis operibus ac desiderijs, ac in quovis loco, & ubicunque fueris in omni eo, quod toleraveris, & possederis, totāque eris in me benedicta. Summo me solatio affecit hæc admiranda misericordia mei DEI ac Domini, & occupata fui à quodam somno spiritualissimo, ac si quiescerem post luctam, & fortem unionem, quam habueram. Deinde me Angeli reducerunt per scalam ad cujus finem iterum vidi Sanctum Prophetam, ac humi prostrata petivi ab illo sanctissimam ipsius benedictionem, quam mihi peramanter est impertitus, & inde fui ducta ad meum angulum.

V. Parte I. l. 3. c. 4. §. 2. Aliam luctam cum suo DEO
fimi-

similem præcedenti, habuit sequenti anno hunc in modum: Cognoscebat mea Anima DEUM, habito speciali ipsius lumine, amabatque ipsum, ac magnâ vi ac fervore volebat amplecti, atque comprehendere totum illud summum Bonum, ac DEUM suum, & ita ei uniri. Luctabatur cum his affectibus, & quia ingentia experiebatur bona, virtutem ac solatium, nolebat ipsum ullo modo dimittere, dicebatque suo DEO: Non dimittam te, Dilecte meæ Animæ, neque te debeo dimittere, nisi benedixeris mihi. Tum Dominus magni cujusdam & ferventis amoris præferens indicia: Quid petis, aiebat, à me Anima? dimitte me jam, & noli mihi vim inferre. Iterumque dicebat Divina Majestas cum ejusmodi amore: Quid à me vis Anima? videsne me hic? amplectere me, & quantum potes, reple tuam vacuitatem, Jam hoc dicebat, jam illud, & anima adhærebat suo DEO, cum quo luctabatur, dicebatque: Non te relinquam, neque dimittam ex meis brachijs, DEUS meus, nisi benedixeris mihi. Dominus autem respondit: Cave tibi Anima, dimitte me, alioquin te sauciabo, & transfigam cor tuum. Fiat licet, aiebam ego, ita mi Domine DEUS, fac, quidquid volueris, de me, quia ego te non dimittam, neque enim aliud scio, vel possum facere. Post hoc se mea anima sensit transfixam, & vulneratam à suo DEO affectu amoris, quasi quadam sagittâ, fuitque continuò cum ingenti solatio, sopita somno quodam spirituali, ac unita suo DEO, & quando evigilavit ex hac divina communicatione, atque illa lucta, vehementer admirabatur talia divinæ bonitatis opera.

VI. Commentatur ibi Venerabilis P. Ludovicus de Ponte, sequentibus verbis: Benedictio, quam Anima petit, dum ita luctatur, & certat cum suo DEO, est plenitudo cognitionis, & amor, quem tam avidè exoptat, & assequi conatur, tametsi nequeat comprehendere omnia, quæ veller.

Item habetur l. 5. c. 8. §. 5. Ducta sum ad conspectû SS. Trinitatis,

Fff

aspe-

aspexit me Dominus, dixit mihi : & tu vermicule quid hic agis? quid vis? Ego magno animo dixi: Domine mi, quamvis sim vermiculus, adrepam ad radicem arboris vitæ, rodam illam (utpote orando) atque sicut Jacob tecum luctabor, donec te vincam, & ignoscas peccatoribus. Respondit Dominus: Bene est, bene dicis. Faciam id. Et præterea tibi dico, quòd si quis existens in malo statu ad te confugerit, ut pro ipso ores, sim illi propter te condonaturus peccata, eumque ad me conversurus.

VII. Cùm non posset Ven: Marina Parte 1. l. 5. c. 9. §. 1. exorare An. 1590. ut pestis cessaret, dolens maximè propter perditionem Animarum, quia salus unius Animæ (ait ipsa) redemptæ sangvine Christi JESU, æstimabilior est, quam omnium facultates & vita, exclamavit: Ah mi Domine, miseram me? quid facient infelices? væ miseris, quid facient? non, propter tuam bonitatem mi Domine, non fiat id amplius! non pereant Animæ redemptæ tuo pretioso sangvine. Hoc enim erat, quod comminabatur illa poena DEI, & mihi cor præ dolore disrumpebat; unde ei dicebam: Non, non Domine. Et Divina Majestas respondebat: ità, ità. Ego repetebam: non, non Domine, propter bonitatem tuam. Divina Majestas dicebat: ità, ità. Ego rursus reponebam: consideret verò tua Majestas per infinitam misericordiam quomodo id possit esse: incundum enim est aliquod pactum, nec ità fieri oportet mi Domine. Et urgebam perseveranter ego miserabilis meum Dominum magnum, ac omnipotentem, qui me tolerabat. Offerebam illi meam vitam libentissimè pro salute cujuscunque Animæ. Tandem conclusi cum Domino, quòd non essent tot mala eventura, sed solum aliqua.

VIII. Exodi 3. v. 2. apparuit Moyse DEUS in rubo ardenti. Venerabilis Marina Parte 1. l. 2. c. 6. §. 1. narrat: Dum vacarem orationi, meditando Nativitatem Domini, mei Domini sancti Angeli me duxerunt ad quendam parvulum hortum,

tum, peramœnum tamen, concinnum, s̄vave olentem, & jucundissimum, ibique me in medio ipsius collocaverunt in quodam sedili, referente speciem sellæ, ubi me sensi flammis vehementis & s̄vavis ignis circumdatam, quibus mea Anima ardebat, neque comburebatur, quia ipse DEUS erat in igne. Ibi fui plurimum confortata, & Dominus mihi revocavit in memoriam Rubum Moysis, qui ardebat, & non comburebatur, atque cum in modum fui toto illo tempore valde unita DEO, donec ad me rediissem ex raptu. Benedictus sit DEUS.

IX. Exodi 3. v. 14. Interrogavit DEUM Moyses, quod est nomen ejus: dixitque DEUS ad Moysen: Ego sum qui sum. Similiter Ven. Marina Parte 1. l. 3. c. 20. §. 3. dixit Domino DEO: DEUS & Domine mi, quod est nomen ejus? Dicat mihi: An Rex Regum, & Dominus Dominantium? omnes tituli sunt inferiores ejus dignitate; neque inveniebam, quomodo illum compellarem. Tum mihi respondit Divina Majestas: Ego sum, qui sum, & hoc est nomen meum. Solus ego à me, & ex mea essentia habeo, quod sim.

X. Exodi 33. v. 23. dixit DEUS ad Moysen: Videbis posteriora mea, faciem autem meam videre non poteris. Simile quid refert de se Ven. Marina lib. 3. c. 1. his verbis: Vidi clarissimè Majestatem DEI, ut ità dicam à tergo, adeò ut fuerim vehementer consternata, contemplando tantam gloriam, qualis mihi ibi apparuit. Erat ea res inusitatior, quàm quæ mihi unquam acciderit. Neque verò ego miserabilis ausim aliud dicere, quàm fuisse à me visam totam DEI Majestatem. Unde quisque intelligat, quidnam viderit, quæ id vidit

XI. Numerorum 21. v. 9. Fecit jussu DEI Moyses serpentæneum, cujus aspectu Filij Israël sanabantur. Venerabilis Marina Parte 1. l. 2. c. 16. §. 7. sic scribit: Mihi manè agenti cum DEO spectandam Divina Majestas exhibuit in loco alto, & veluti in aëre speciem ac effigiem JESU Christi Domini nostri

stri crucifixi. Crux hujus mysterij erat fusca, & species Domini ex illa pendentis erat quasi fusa ex ære solido, terribili, & inflammato, coloris ignei. Viso hoc mysterio fui valde mirata, & timens vehementer, nè esset imaginatio, vel aliquid simile, celeriter ab eo averti oculos, meque distraxi, quamvis difficulter, quòd quàm sæpissimè interdum obversaretur meæ memoriæ, ut mihi illud viderer habere ante oculos. In hac diversione ac pugna permansi tribus diebus, quia mihi per illas Divina Majestas quovis matutino tempore secum agenti exhibebat istam effigiem, ac tandem ultimâ die, cum idem spectaculum meæ Animæ objiceretur, neque sciret, qualenam esset, mihi dixit Dominus: Anima iste est serpens ille æneus, quem Moyses erexit in deserto Filijs Israël, ut ipsum aspicientes liberarentur ac sanarentur à moribus serpentium. Istud est mysterium, quod tibi ostendi his diebus quòdque tu tantopere refugiebas, ac timebas. Dum audirem illud dici à meo DEO & Domino fui vehementer consternata, eò quòd similium Scripturæ locorum minimè recorderer: quia tamen habui sublimissimum lumen, quod mihi tunc Divina Majestas communicaverat, intellexi internè magnâ vi & efficacîâ veritatem ac valorem rei repræsentatæ ab illo serpente æneo, quem crexerat Moyses, utpote Sacrosanctum Mysterium Crucis Christi JESU Domini nostri, & valorem & pretium mortis ejus ac pretiosi Sangvinis, quem in illa profudit pro salute nostra, & remedio omnium: quod ipsum atque unâ ingentia bona, quæ nobis provenerunt ab isto Domino, & à Sacrosancta ipsius morte ac Passione, nobisque etiamnum ab hoc eodem Domino conferuntur, & communicantur, clarissimè agnovi illuminata à DEO, idèoque ipsi sæpissimè & cum ingenti affectu amoris, necnon æstimatione tam eximij beneficii & gratiarum actione dicebam: O divine Serpens! quem cum amore, fide, & confidentia intuentes omnes creaturæ sanantur, & liberantur, à veneno, ac moribus serpentis infernalis multò me-

melius, quàm Filij Israël aspiciendo illum serpentem æneum, sanati fuerint à suis morsibus. Tu es mi Christe ac Domine noster Salus & Vita, ac Medicus noster, & nostra Medicina, nostra Virtus & Fortitudo, nostra Lux, & Dux noster. In te mi DEUS ac Domine habemus omnia bona; per te salvati sumus & redempti ex captivitate diaboli, nostri adversarij. Hæc frequenter repetebat Anima, & cum magno lumine atque affectu, ut non posset eorum oblivisci. Sed dixi deinde ad DEUM meum: bene video & intelligo ex tua illustratione, quid mihi dixeris Domine de hoc mysterio: quæro nihilominus etiam modo cum tua venia: quare mihi ostendisti hunc divinum Agnum mansuetum, amabilem, humilem, & benignum, & benefactorem nostrum, in tam terribili specie, & fortem instar æris ac adeò accensum, ut referret colorem ignis? Anima (dixit Dominus) quamvis omnia sint vera, sicut vidisti & intellexisti ex mea illuminatione; noveris, quòd in hoc Domino Filio meo ac DEO & Homine vero, ut est Homo & Redemptor mundi, habeatis universa ista bona, quæ commemoratis & agnoscitis; ob quam causam illum vobis donavi, ac tradidi in manus peccatorum. Ut tamen est DEUS, antequam ingrederetur in uterum suæ Matris, erat terribilis, & erat fortis, erat vindex, erat DEUS ultionum: ac proinde ita volui, ut à me illuminata videres, intelligeres, & cognosceres omnes has veritates pro solatio ac bono tuo.

CAPUT II.

*Textus, qui ex Libris historicis Veteris Testamenti
in Vita Venerabilis Marine confirmantur.*

I.

Secundo Regum c. 11. v. 7. David mensæ suæ adhibuit. claudum Miphibosethum, filium dilecti sui Jonathæ. Hoc

Divina Majestas expressit apud Venerabilem Marinam Parte 1. l. 2. c. 6. §. 5. Ipso festo Ascensionis mane mihi locuta est Divina Majestas, dixitque amanter: quid agis Anima? jamne affluit solatio tuus affectus? scias velim, quod tibi sim præstiturus novam gratiam, antequam abeam, quemadmodum tu dicis; quæ est, ut te prius invitem ad convivium, mecumque comedas ad meam mensam ex meo divino pane. Audi, quod mihi à Domino erat dictum, & admirata sum ipsius bonitatem, obrulitque se statim meæ memoriæ magna molestia & afflictio, quam patiebatur quædam persona, & tentationes ac pericula salutis, quæ fortè esset incurfura, nisi illam Dominus specialiter adjuvaret, ideoque dixi Divinæ Majestati: Domine mi & DEUS mi, cum mihi velis exhibere hanc misericordiam, de qua loqueris, ex mera tua bonitate; obsecro te, præsta mihi & istam, ut convivij, quod mihi vis instruere, unâ sit particeps hæc persona afflictâ, & in necessitate constituta. Audivit Dominus, quod illi dixi: visa verò est ejusdem Majestas id dissimulavisse, neque mihi respondit. Quod ego advertens iteratò idem petivi à Domino & majore affectu. Adhuc tamen tacebat Dominus, quasi quoad id sentiret difficultatem, vel illam præferret. Rursum tertio idem à Domino postulavi, longè vehementiore affectu denuò supplicando, ut per viscera suæ clementiæ & misericordiæ mihi faceret eam gratiam & misereretur illius creaturæ. Tum Dominus videns meam pertinacem importunitatem, dixit: Volo tibi præstare hunc favorem & gratiam, quam à me tam seriò petis, ac tanta cum charitate.

Cum enim David adhibuerit suæ mensæ claudum, eò quòd esset Filius sui magni amici Jonathæ, æquum est, ut ego idem suo modo faciam propter animam, quam amo. Interea diabolus coram Domino comparuit vehementer iratus & furens, dicens Divinæ Majestati, quomodo & quare facturus esset, ac faceret rem hujusmodi permittendo accedere ad suam divinam men-

mensam tantum peccatorem, quantus esset ille homo, & tam perversum? non oportere id fieri, ideoque nè id ullâ ratione Divina Majestas faceret. Videns magnus Dominus noster ac DEUS audaciam ac temeritatem diaboli, cum maximâ majestate, & modo terribili ei dixit: Apage nefarie proditor; tunc audes & præsumis comparere coram me, cum tu sis causa tantorum malorum? apage abominabilis mendax ac deceptor. Animadvertens diabolus vocem Domini, verborumque ipsius majestatem, incepit tremere, & cum ingenti metu ac timore evanuit.

II. Tertio Regum c. 19. v. 11. Elias in monte Horeb Dominum non in vento vehementi, sed in sibilo auræ tenuis percepit. Simile habetur apud Ven. Marinam Par. 1. l. 2. c. 9. §. 3.

Quarto Regum c. 6. v. 16. Elisæus perterrito suo famulo ob adventum hostium dixit: *Noli timere, plures enim nobiscum sunt*: ostenditque illi montem plenum equorum & curruum, igneorum in circuitu Elisæi. Sic contigit Venerabili Marinæ adhuc juniore prout ipsa narrat Parte 1. l. 4. c. 2. §. 1. sequentibus verbis. Quâdam vice, vidi in meo cubiculo multos demones congregatos, qui mihi cum ingenti rabie vehementer optabant nocere, ita ut noctu non auderem in illud ingredi, nè cohabitarem tam malis socijs, neque audirem ipsorum blasphemias, & nequitias; unde confugi ad DEUM, ut me ab ipsis liberaret; ille verò mihi dixit: Nè te affligas, quia sunt sine comparatione multò plures, qui te juvant ac defendunt, quàm qui tibi intentant malum, teque oppugnant. Quidquid autem tecum tam amici, quàm inimici egerint, totum cedit in tuum bonum. Ità fui confortata, & attollens oculos, vidi assistentes multos Angelos, quod mihi attulit magnum solatium. Postridie cum legerem ad fenestram ejusdem cubiculi, adverti in eo committi quoddam quasi prælium adeò vehemens, ut omisâ lectione me verterim visura quid esset, ac vidi à quibusdam sanctis

Crus Angelis ejici inde dæmones ex mandato DEI; quamvis illi se defenderent; & quando sibi ipsos videbantur ejecisse omnes, redibant aliqui per rimas portæ, quos tandem etiam abegerunt.

III. Job 1. & 2. Petijt Satanas, ut probaretur varijs afflictionibus Job, spondens eum fore DEO perfidum, & blasphemum, si seriò vexaretur. Similia sæpius Venerabili Marinæ acciderunt, Parte 1. l. 1. c. 22. §. 2. sic narratur. Quadam nocte sum passa magnam ecstasim, in qua me ipsam in spiritu vidi in angulo palatij cujusdam præcipuæ Dominæ, cui eram plurimum obligata: ubi etiam videbam Christum, Dominum, præbentem indicia indignationis, qui mihi infixit aliquot ictus, ad eum modum, quo vendentes & ementes flagello ejiciebat ex templo. Fui propterea afflictissima, quòd ignorarem causam, nec dubitarem eum, qui me castigabat, esse ipsummet Christum, etsi illum non fuerim ausa aspicere in facie. Angeli qui me comitabantur, erant nonnihil remoti condolentes mihi: fui summe pudefacta. Redij ad me & cogitans de eo, quod videram, petebam à DEO illuminari, ut cognoscerem ipsius veritates, neque deciperer. Dum sic essem constituta, dixit mihi Dominus: Vidistine quid acciderit, & scisne cur? Dux sunt causæ. Primò quia diabolus dicebat, ut, si te seriò vellem probare, ipse ego te probarem aliquâ indignatione; tunc enim fore, ut appareret, an sis fidelis. Secundo volui, ut hæc probatio perageretur in eo palatio in pœnam negligentix, quam commisisti in orando pro illa Domina, cui tantum debes. Fideliter tamen te gessisti in experimento.

IV. Item Lib. 5. c. 11. §. 2. Obruli me Domino DEO ad tolerandum aliquid acerbum, ac difficile pro bono cujusdam Animæ magnæ authoritatis. Istâ occasione diabolus sciens aliquid de ijs, quæ agebantur (ut deinde intellexi à Domino) dixit Divinæ Majestati: etsi istam creaturam, quæ se tibi promptam exhibuit ad patiendum aliquid pro juvanda illa anima, quam

quam novisti, verum sit multis jam diebus pati graves dolores morborum, nunquam tamen mihi tam amplam facultatem tribuisti ipsius affligendæ, quàm ego vellem. Nunc tibi decernendum reliquit, quid eam velis tolerare pro bono illius animæ. Cum libenter velit pati, quidquid Tu volueris, & quævis anima sit tam pretiosa, tantòque Tibi Domino majestatis constiterit, æquum est, ut pro ista creatura, quæ petit bonum hujus animæ, si illi præstiturus es hanc gratiam & misericordiam, deligas ac decernas graves dolores & cruciatus, atque ego sim executor illorum ac minister, ut ità tua magna Majestas videat, quomodo se gerat in majoribus afflictionibus, crucibus ac tormentis, & utrum etiam, si à te derelinquatur, agat fideliter, tēque amet, ac tuæ voluntati se submittat, sicut in alijs hætenus fecit. Audivit Dominus dicta à diabolo, qui solet fusè admodum loqui, & multum blaterare, quando aliquid proponit, id quod facit fraudulenter, ac malitiosè; & interdum videtur proferre grandia oracula, postea verò prolata confundit, ac destruit, ut videatur nec se ipsum intelligere, neque dicere intelligibilia. Iste solet esse ipsius modus loquendi. Divina verò Majestas illi respondit uno verbo, tantumque dixit cum magna auctoritate: Abi & perge: ecce enim concedo tibi, quod à me petivisti. Hoc audito abiit diabolus ex conspectu Domini contentissimus. Ego autem quæ hac de re nihil sciebam, sicut dixi, nihilque tale cogitabam, incepti quodam die Veneris sub vespere sentire dolores acerrimos, præsertim in tribus corporis partibus, qui usque adeò intendebantur, ut hora secundâ noctis mihi videretur intra corpus meum inclusus esse hostis quispiam armatus fodicans aliquo telo, ac vulnerans dictas partes, unde vehementissimè discruciabar, ut me putaverim disrumpendam, ac si immersa essem aquæ; neque potuerim jacere, vel me erigere ullo modo in lecto, quia mihi videbantur in ipso & supra illum, ac ubique esse quædam quasi acutissimæ cuspides, com-

pungentes, & affligentes totum meum corpus. Testes hujus rei fuerunt meæ sociæ, quæ propterea quòd tantus esset cruciatus, mihi adstiterunt totâ nocte. Hæc enim res duravit usque ad meridiem Sabbathi; alij verò immanes dolores duraverunt circiter quindecim diebus, non tamen absque aliquanto majori lenimine. Sustinui illud tormentum, conformando me cum Divina Voluntate, quæ erat ipsiusmet DEI bonitas ac misericordia, etiamsi multos committerem defectus, quos quavis occasione committo. Et quia ignorabam quemadmodum jam dixi dispositionem divinam, quidve actum fuisset cum diabolo, attribuebam partem ejusdem cruciatus causis naturalibus; quamvis etiam animadverterem à diabolo magis exacerbari dolores, quos patiebar, ipsumque adlaborare, & cooperari, ut eos sustineam.

V. Post elapsos quatuor vel sex dies ab his vehementioribus doloribus quodam die nihil minùs quàm tale quid cogitans, conspexi diabolum in specie nigri ac deformis pusionis, qui se exhibebat valde humilem, & provolutus erat in genua ac tristis coram Christo JESU Domino nostro; hic autem Sacratissimus Dominus quodam gravissimo modo, ac terribili, & cum magna majestate illi dixit: Ades inimice; quid tibi nunc videtur de illa mea creatura, quam me permittente tantopere afflixisti, & excruciaxisti? reperistine quidquam in illa, quod optaveras, animoque tuo conceperas? responde, dixit Dominus. Et diabolus respondit timidâ ac tristi voce: Magne Domine, non reperio, quid dicam tuæ majestati: nihil inveni culpabile, neque potui quidquam efficere, quia ista creatura à te adjuncta in his cruciatibus, quibus ipsam te permittente fui conatus affligere se gerebat eo modo, quo tua Majestas se gessit in oratione & agonia horti, spiritu prompto, & resignato in divinam voluntatem, quamvis infirma esset caro. Tum dixit Dominus: ita fuit, proditor; vade, apage, & aufer te ex meo conspectu.

pectu. Hoc audito diabolus se inde proripuit vehementer pudectus, & confusus, atque tunc rescivi à Domino, quod dixi, de facultate, quam diabolus occasione illius animæ ab ipso petiverat, & quomodo eam ipsi concefferit, necnon quid tum acciderit.

VI. Item Parte 2. l. 1. c. 16. pag. 75. col. 2. Per sex Quadragesimæ hebdomades gravissimos sum passa, & extraordinarios dolores, atque martyria tam terribilia, ut quando nunc illorum reminiscor, existimem mihi impossibile fore, ut eâ rursus salvâ vitâ sustinerem: omnia verò proveniebant à diabolo, quia illi DEUS indulserat, ut me non aliter exerceret ac Jobum, sicut ipse diabolus minas mihi intentando est fassus. Cumque ego ipsum appellarem patrem mendaciorum, & irriderem, respondit mihi: Non credis mihi? videbis id autem. Quod reverâ sum experta, etiâque ij, qui mihi aderant ad me curandam & consolandam, adverterunt, ideoque vices meas dolabant. Affligebar verò tunc, discruciar, sentiebâque ingentem internam angustiam & tristissimam solitudinum, quoad operationes divinas. Quando enim hæc fiebant, licet superior pars meæ animæ semper sit suo DEO unita; inferior tamen illius portio, natura, & ejus potentiæ patiebantur derelictiones, tantumque in ipsis remanebant quædam desideria continuæ in DEI voluntatem resignationis, quod equidem durantibus his afflictionibus facere conabar.

CAPUT III.

Textus Librorum Prophetiarum S. Scripture illustrati.

I.

Super Psalmum 44. versiculum 8. habuit gratiosam revelationem Venerabilis Marina, Parte 1. l. 4. c. 1. §. 3. Præfente Christo Domino signavit me triplici Cruce Angelus

0882

plu-

plumulâ aureâ, unâ in fronte, alterâ juxta os, & tertiâ in pectore, quæ remanserunt expressæ in ijs partibus splendentes instar auri purissimi, adeoque quodammodo insculptæ, ut non possent deleri. Deinde advenit alius sanctus Angelus, & abstulit mappam, quæ mihi fuerat applicata. Admiranti mihi id, quod fiebat, neque scienti, quid hoc mysterium significaret, declaravit illud Christus Dominus dicendo: Nunquàmne audivisti, referri locum quendam Scripturæ: *Unxit te DEUS, DEUS tuns oleo letitie?* Hoc ipsum est, quod modo tibi accidit. Gaude & esto contenta, quia modò denuò uncta es meâ gratiâ, & confortata virtute meâ.

Parte 1. l. 4. c. 1. §. 2. dixit ipsemet Dominus DEUS in ea impleri illud Psalmi 90. *℣. 11. Angelis suis mandavit de te, ut custodiant te in omnibus vijs tuis, in manibus portabunt te, ne forte offendas ad lapidem pedem tuum.*

II. Canticorum 1. *℣. 3. dicit Sponsa: introduxit me Rex in cellaria sua.* Supra hoc gratiosum habuit alloquium Venerabilis Marina, Parte 2. l. 1. c. 9. pag. 38. Anni 1625. die 18. Januarij: Vacabam orationi vehementer optans videre magnum nostrum DEUM, eoque frui, eliciendo tam amanter ardentes affectus, ut indè quali tota conflagrarem, & colliquescerem; aliunde verò mea anima avidissimè inhiaret scopo, quem inquirō. Dixi, quia me non poteram refrænare, Divinæ Majestati: mi DEUS, & mi Domine quousque mei oblivisceris, & avertes vultum tuum à me? Dominus audivit meos clamores, responditque mihi benignissimè: Cur id dicis Anima & cur ita loqueris? Quando sum ego tui oblitus, aut quando vultum meum à te averti? sed bene est: ebria es mei amore, quia te introduxi in cellam meorum cælestium vinorum: mereris veniam, dic licet quidquid volueris. Annotavit P. Andreas Pintus Ramirez, Parte 2. l. 1. c. 5. p. 27. maximos affectus, qui exoriebantur ex fervore benedictæ hujus Animæ existentis in co gradu,

du, qui à SS. Patribus vocatur: *sobria ebrietas charitatis*, de qua multa dicuntur in Canticis.

III. Specimen hujus afferamus ex loco citato pag. 26. col. 2. Colliquescebat mea anima raris affectibus, quos illi DEUS communicaverat, amoris erga ipsum & erga proximos. Desiderabam ardenter me in omnibus & per omnia unire DEO, prout ipse mihi inspirabat, cumque deficerem viribus ex intimo animo illum invocabam dicens: Quousque, mi Domine, me dereliquisti? quousque à me recessisti? Hoc sæpe iterabam, atque tam vehementi ardore illum deprecabar, ut existimem me fuisse disrumpendam, nisi DEUS responderet. Exaudivit me pro sua misericordia & infinita bonitate, dixitque mihi: Anima quid habes? quid vis? Ego te non desero, neque à te recedo: dic age, quid velis. Domine mi, aiebam, ego nihil volo præter te, & ecce Domine, quod volo est, ut te magnâ vi complectar, teque comprehendam, & arctè meis brachijs stringam. Tum Dominus cum magna respondit affabilitate dicendo: Quid loqueris Anima? an ignoras me esse magnum, me esse immensum, te verò vermiculum, & nihilum? quomodo igitur me vis complecti? Omnino mi Domine, perseverabam ego, volo te complecti, teque inducere intra viscera mea, intra me. Adverte. Anima reposuit Dominus, non poteris id præstare, non me capies. Ità mi Domine, dixi, ità potero. Altercabar sat diu & Divina Majestas me cum suavissima mansuetudine tolerabat: videbat enim ardorem meorum desideriorum, quæ mihi ipse inspirabat, atque tum mihi dixit: Fiat licet Anima, experire, quid possis. Et cum id dixisset, datum mihi fuit ingens lumen, cum quo agnovi infinitum ipsius Esse, & immensam ejusdem magnitudinem. Obstupui & demersa in cognitionem meæ miseriæ, atque exiguitatis, flexisque genibus procumbens humi manibus junctis, & fronte affixa terræ dixi: Ah mi Domine, quàm es magnus! fateor meam miseriam & vilitatem. Atque

itā non fui ausa attollere oculos, aut ullum præterea proferre verbum: sed adorabam in silentio immensitatem magni DEI nostri & Domini, ac pudefiebam in pulvere meæ vilitatis. Tantum subinde dicebam: non est jam Domine, quod ultrā hac de re agatur. Tunc me Dominus jussit elevari, & peramanter subjunxit: eja Anima, experire tuas vires, & amplectere me. Hac mihi à Domino concessā facultate tentavi, cæpique conari, ut caperem quantum possem. Comprehendi quantum patiebar mea capacitas, & fui itā repleta DEO, ut amplius nequiverim; instar cujuscumque vasis, dum in magno fonte impletur aquā, ut plus capere non valeat. Hac vice fui satiata ac impleta meo DEO, & quievi in illo per fortem ac arctissimam unionem, quæ diu duravit. Eā cessante me reperi in meo angulo, advertens etiam dolores meos multum esse mitigatos. Ipse sit benedictus. Amen.

IV. Aliud habet perquam elegans hujus *sobria ebrietas sanctæ* specimen eādē Parte 2. l. 1. c. 9. pag. 39. col. 1. A. 1626. feriā quintā, 20. Januarij. Exarserunt vehementer affectus in mea anima facti initio ab ardenti desiderio perfectè implendi in omnibus DEI voluntatem, ut nullum in ejus obsequiomitterem defectum. Augebantur tantopere, ut cor videretur è pectore exilire, & abrepta violento hujus desiderij imperu, clamaui ad DEUM postulando ipsius gratiam. Divina Majestas mihi respondit cum magna suavitate & exhibitione amoris dicendo: quid vis Anima? quid petis? quiesce. Tum ego illi dixi: da mihi quidquid habes, omnia, omnia. Hoc tamen protuli, quia dum anima sic est constituta, lingua animæ magis regitur affectu, quàm ratione. Quod dicere volebam, erat, ut mihi Divina Majestas præstaret gratiam implendæ suæ voluntatis in omnibus & per omnia, utque misereretur sui populi Christiani, & eorum, quos illi soleo commendare. Divina Majestas pro sua immensā charitate ostendit sibi placere, ut annueret meis
pre-

precibus. Et statim interrogavi : mi Domine , quomodo id exequeris ? Responditque mihi : ego id imprimam tuo cordi , ut , quod dixi , in eo conserves. Conspexi subito duos Angelos , qui manibus utrinque tenebant parvam pelvim , in qua erat cor. Postea vidi Personam Christi Domini nostri , qui se hætenus non exhibuerat spectandum , tenensque manu parvulum , subtilissimum calamum inscribebat cordi quasdam literas. Attendi sollicitè , ut viderem , quidnam scriberet , & vidi fuisse scriptum : *Fiet , quod desideras.*

V. Sapientiæ 4. v. 14. dicitur : *Consummatus in brevi explevit tempora multa* , Quod elegantissimè declaratur apud Venerab: Marinam , Parte I. l. 4. c. 3. §. 4. Vidi Majestatem JESU Christi Domini nostri , qui tenebat in suis sacratissimis manibus coronam , quam Angelus abstulerat ex meo capite , & ipse attentè contemplabatur , ac versabat in omnem partem considerando illam undique cum ea attentione. Deinde dixit suo Æterno Patri : Ista corona est elegans & pulcherrima , & vehementer mihi placet Domine ; designansque locum digito , addidit : hîc tamen aliquid deest , ut eam obtineat perfectionem , quam tu , mi Domine , decrevisti jam indè à tua æternitate : sed ego supplebo defectum virtute , & pretio meorum meritorum , ac sanguinis , quem profudi , applicabóque illi talem virtutem , & eam dabo gratiam ipsius operibus , ut quod peragendum & complendum erat longiore tempore , fiat citius , atque ità acceleretur illius emigratio , aiebat Dominus DEUS Majestatis. Cum ego audivissem meum DEUM dicentem hæc tam mirabilia , egi ipsi infinitas gratias.

Ad idem spectat locus pulcherrimus itidem Parte I. l. 6. c. 19. §. 5. Reperi me intra ipsummet DEUM , & cum in illo manerem , vidi , quod Divina ejus Majestas contemplans se ipsam , & quasi ingrediens suum Divinum secretum , voluerit , meæ animæ denuò præstare misericordiam , ipsique hoc modo
my-

myſtico declarare gratiam, quam illi exhibebat, & dixit mihi: Benefecero, ſi abbreviavero per meam miſericordiam, potentiam, & ſapientiam dies tui exilij; ità tamen, ut non perdas gradus tuorum meritorum, quos tibi conferre decrevi, neque tibi hoc brevior tempore dem plures cruces, ut ad illos pervenias, ſed diſponam res tuas alijs modis, quod mea ſapientia poteſt facere, ut pertingas ad id, quod dictum eſt.

VI. Jeremias cap. i. v. 6. dixit ad DEUM: *A, A, A, Domine DEUS! ecce nescio loqui, quia puer ego sum.* Simile planè contigit Ven: Marinæ prout ipſa refert Parte i. l. i. c. 23 §. i. Dum aliquando manè pro more agerem cum DEO, dixit mihi Divina Majeſtas, eſſe ſuam voluntatem, ut aliquot diebus agam & converſer cum quibuſdam ex ordine S. Dominici, pro aliquo ipſorum ſpiritali emolumento; id quod ego exiſtimo factum eſſe petente ac urgente glorioſo S. Dominico. Et quia initio DEUS ſe ſolet inſinuare ſuaviter, quando ejus Majeſtas ſimilia animæ inſpirat, non inferendo illi propterea magnam vim, ego id diſſimulabam. Sed cùm mihi iteratò diceret, ſe hoc velle, retuli illo die meo Confeſſario (is erat Pater Petrus de Leon) quod acciderat, qui mihi dixit, ut rem DEO commendarem, & videremus, quomodo ea inſpiratio ulterius progrederetur. Præterierant aliquot exinde dies, & DEUS ſemper meæ animæ inſpirabat, quod mihi dixerat, vehementerque me ad id impellebat, quamvis ego ſemper deſiderabam, ſi eſſet voluntas DEI, non egredi ex meo angulo, & ibi ſola agere cum Divina Majeſtate, ſicut conſueveram, ideòque continuè conquerebar Divinæ Majeſtati, & ſæpe illi dicebam cum lacrymis: Mi Domine, & Bonum meum, quò me vis ire? quid eſt hoc, quod me jubes facere? adverte per bonitatem tuam, me eſſe mulierculam ſimplicem, imbecillem, & inhabilem ac deſtitutam viribus, atque ità meticuloſam, & puſillanimitatem ex mea naturali propenſione, ſicut tu Bonum meum ac Domine ſcis, quòdque nunquam ſola
egc-

egerim nisi tecum, & cum meo Confessario, ut me instrueret ac duceret per viam tuæ sanctæ voluntatis. Quid ergo modò me vis facere, si est verum, ut est, quod tibi dixi? Respondit mihi Divina Majestas & Bonitas peramanter affabiliter, & suaviter: Perge Filia, fac, quod tibi dico, esto bono animo, & noli angere, ego enim te juvabo, ac docebo.

CAPUT IV.

Sanctos Evangelistas describit Ven: Marina.

PArte 1. l. 2. c. 20. §. 2. Vidi Majestatem Christi JESU Domini nostri admirabiliter jussu Patris sui, post acceptam ipsius benedictionem, consedisse in quodam angusto throno, referente speciem currus triumphalis, magnæ majestatis, ac magnificentiæ. Is incipiebat moveri, & videbatur trahi à quatuor sanctis candidissimis ac purissimis animalibus, quibus immixti unà ibant multi Angeli DEI. Atque licet hæc sancta animalia moverint ac traxerint mysticum currum, quo vehabatur magnus ille Rex Gentium; regebat illum tamen idem Rex Majestatis, suis illum premens pedibus, & movebant ipsum ac trahebant virtute ab eo acceptâ. Hunc in modum processit iste Dominus, comitantibus ipsum ritu supplicantium, laudantibusque illum, & inservientibus ei omnibus illis Spiritibus beatis, ac Palatinis coelestibus, donec reverteretur ad locum, in quo prius fuerat ad dexteram sui æterni Patris. Inspiravit mihi Dominus aliud internum desiderium, rescindi, qualia essent ea sancta animalia, quæ trahebant illum currum, seu thronum; & subito mihi fuit dictum, per lumen & communicationem divinam: hæc sancta & mystica animalia, quæ vidisti, sunt quatuor sancti Evangelistæ, qui describendo, assistente ipsis virtute Spiritus Sancti, passionem & mortem divini Agni, promeruerunt tantum honorem, tamque sublimem dignitatem, ut ipse DEI Filius

H h h

lius per illos veller manifestari populis, utque illi essent calamus & lingvæ ipsius Mysteriorum ac Magnalium, propter quæ adoraretur, honoraretur, crederetur, & coleretur ab omnibus Fidelibus, qui sunt, & erunt in mundo; ut sic videantur Regem Majestatis ferre in suis humeris, quo manifestetur, & agnoscat a populis: verumtamen idem Rex est author, & prima ac principalis causa hujus illuminationis & agnitionis, quam habet mundus.

CAPUT V.

Loci quidam Sancti Evangelij declarati.

I.

Matthæi c. 4. v. 19. dixit Christus Dominus eis, quos ad Apostolatum vocabat: *Venite post me, faciam vos fieri pisces hominum.* Hunc textum habemus eleganter declaratum Parte 1. l. 4. c. 22. §. 2. Agens cum DEO in Augusto, Anni 1622. vidi venientem quempiam Beatum ex Ordine S. Dominici, qui graviter & paulatim introivit in meum cubiculum. Consedit in quadam sella mystica, & post ipsū stabant circiter duodecim Religiosi ejusdem Ordinis, ex etiamnum viventibus in mundo, exhibentes indicia magni honoris, quo ipsum prosequerentur. Ego illos non agnovi, neque sum intuita eorum vultum. Fui turbata, more solito. Postquam me Sanctus vidisset quietam, tunc dixit Religiosis: Filij procedite ulterius, & attendite, quid sim quæsiturus ex hac DEI famula, ac audite, quid sit responsura. Duodecim ij Religiosi, appropinquaverunt quàm humillimè meo lecto, inclinantes se profundè, & præ reverentia coram Sancto prosternentes, quos Sanctus jussit surgere. Cùm ità illi, unàque ego sedulò attendere-remus, vidi Sanctum ponentem manus ad latus sellæ, quasi habiturus esset ad nos sermonem. Cæpit autem sic loqui: dic sor-

ror,

ror, famula DEI, mihi, & his ejus servis, quomodo bene applicabimus Ordini S. Dominici verba dicta à Domino, quando vocavit quosdam è suis discipulis ad suam scholam, & Apostolatatum: *Venite post me, faciam vos fieri piscatores hominum*; quæ est interpretatus lingvâ vernaculâ. Ego istâ interrogatione fui pudentia, & dixi: Quomodo, sancte Pater, id ex me queris, cum sim rudis muliercula? tu certè scis melius applicare, quod dicis? Sanctus autem respondit: Noli verecundari, soror nostra, neque recusa dicere, quod te interrogo, quia DEUS frequenter eligit infirma munda, ut confundat fortia; & quod dicēs, non erit tuum, quia DEUS te docebit, quid tibi sit dicendum. Ità fui animata, ac dixi: existimo sancte Pater, quod sequi Christum Dominum, sit ipsum imitari, insistendo ipsius vestigijs, & viæ crucis ac humilitatis, atque contemptus mundi. Ubi id factum fuerit, statim sequitur, quod Dominus promittit: *faciam vos fieri piscatores hominum*. Hoc mihi Dominus inspiravit, priusquam responderem. Audivit meum responsum Sanctus, dixitque: optimè profectò locuta es. Et vertens se affabilissimè ad Religiosos, agensque cum ipsis, tanquam cum filijs, dixit illis: hoc vos oportet facere, & mandare executioni. Itē in mundum universum, ac loquimini in aurem omnibus nostris, imbuendo ipsos hac doctrinâ, & Dominus vos faciet piscatores animarum. Tum replicui: Quomodo verò debent isti Patres perambulare totum mundum, ut hoc dicant in aurem omnibus suis fratribus, qui sunt per illum dispersi? Sanctus reposuit: optimè, si id dixerint omnibus, qui ipsis occurrerint, & conati fuerint ità vivere, atque relucere tali exemplo, sanctitate, ac imitatione Christi Domini, ut fama virtutis ipsorum perveniat ad aures absentium.

II. Lucæ 8. v. 5. habemus parabolam de semine, quod in variam terram incidit, quam Christus Dominus declarare dignatus est apud Ven: Marinam, Parte 1. l. 4. c. 5. §. 4. Vidi in

Hhh 2

Mar-

Martio Anni 1623. omnes sanctos Angelos Custodes comparuisse coram Majestate JESU Christi Domini nostri, qui erat indutus vestibus aureis & subnigris, mirè splendentibus. Omnes se prostraverunt ac adoraverunt suum DEUM, & Dominum. Jussit illos Divina Majestas surgere, & interrogavit Angelos Custodes Fidelium: Quomodo vobis succedunt ea, quæ agitis cum meis fidelibus? Quidam ex sanctis illis Angelis responderunt, contrahendo humeros: Domine, totâ nocte laboravimus, & non cepimus ullum fructum. Dominus autem ipsos est solatus, dixitque: ite modò, ac in nomine meo projicite retia, & referetis ingentem fructum. Deinde interrogavit Angelos Custodes infidelium: & vestra, quem sortiuntur successum? illi responderunt: Domine, omnis noster labor est inutilis. Quibus Dominus dixit: nolite affligi; nōne scitis, quòd semen seminantis aliud ceciderit supra petram, aliud inter spinas, aliud in viam, & totum perierit, tantumque illud, quod cecidit in terram bonam, protulerit fructum? ac tum Christus Dominus stans coram Æterno Patre, monstravit ipsi sua vulnera manuum & pedum, ac lateris, dixitq; illi: obsecro tuam Majestatem, Pater Æterne, per hæc vulnera, quæ passus sum pro hominibus, & per meam mortem ac passionem, ut illorum misereris, & ignoscas ipsis eorum peccata, desque illis lumen & cognitionem tui ipsius. Pater Æternus respondit: Fili mi, fiat quidquid petis, juxta divinam sapientiam tuam, & prout scis convenire ad meam gloriam, ac secundum tuam divinam dispositionem.

III. Luca 15. & 10. Christus Dom: retulit, quantum sit gaudium Angelorum in cœlis super uno peccatore poenitentiam agente. Gratosè hoc expressum habet Ven: Marina, P. I. l. 6. c. 14. §. 1. Absolutâ quadam musicâ omnium meorum decem Angelorum, duo parvi Angeli tulerunt in suis pallijs, magnam copiam florum, valde fragrantium, suavissimèque olentium, Ne-

Nescio quales fuerunt, præterquam, quòd illorum odor fuerit admirabilis. Erant autem multi flores accumulati, quos ego opprimè olfeci, ut magnopere confortaverint meam naturam: accipientesque ad manus istos flores, quasi plenis pugnis, consperferunt illis quàm reverentissimè, gradus aureos, qui tendunt à portula aurea ad meum cubiculum, & ijs conspersis exhibebant magnam reverentiam Domino, qui ibi aderat, quasi occultus. Paulò pòst, cum eadem reverentia, ijdem duo parvi Angeli omnes illos flores rursus collegerunt ad suas manus, & distribuerunt suis sanctis quatuor Angelis, singuli suo quaterioni, ac deinde permutatis officijs hi ipsi parvuli Angeli, transeuntes ad alios quatuor Angelos, dederunt ijs plures flores quàm suis, uti & meo Custodi, quos illi intrà se ipsos servaverunt. Obstupefacta, cò quòd viderem tale mysterium, dixi sancto meo Angelo Custodi: mi Domine videat; mihi non dederunt ullos flores. Sanctus autem Angelus respondit: nè propterea doleas, Soror, dederunt enim illos mihi, quos ego tibi servabo. Fui vehementer refocillata, & recreata isto amœno spectaculo. Intellexi autem illis floribus fuisse significata gaudia, & gloriam accidentalem, quam habent in cœlo Angeli, quando convertuntur peccatores, & DEUS confert favores, atque gratias suis electis.

IV. Joannis c. I. v. 21. Martha fratre suo Lazaro defuncto venientem Christum Dominum allocuta, dixit: *Domine si fuisses hic, frater meus non fuisset mortuus.* Hoc eleganter habemus applicatum P. I. l. 5. c. 5. §. 4. Habebam in manu quoddam album parvum Rosarium, & rogavi Divinam Majestatem, ut illud benediceret. Dixitque Dominus, se quàm libentissimè benedictionem impertiturum tam mihi, quàm etiam omnibus meis vestimentis, omnibusque Rosarijs quæ haberem. Tum ego cogitavi in animo meo: quomodo benedicet Dominus Rosaria, quæ ego habeo in meis cistis? Dominus autem mihi

respondit: esse similis Marthæ, quæ mihi dixit, quòd si adfuisset, non fuisset mortuus ipsius frater? nonne ego potero benedicere Rosaria absentia? Surrexitque Dominus, ac dixit: Benedictio mei Æterni Patris, & mea, ac Spiritûs Sancti, sit tecum, atque cum omnibus tuis Rosarijs ac vestibus.

V. Joannis 14. v. 14. dixit Christus Dominus: *si quid petieritis in nomine meo, hoc faciam.* De hoc habetur pulchra declaratio, P. I. l. 5. c. 30. §. 2. Dixi humiliter DEO: mi DEUS, procul dubio miserales & indignæ meæ preces carent conditionibus requisitis, siquidem sæpe, ut mihi videtur, cum id non merear, non obtineo quod à te peto. Non bene dixisti Anima, respondit Dominus: certum enim est, te nihil à me petivisse, quod tibi non concesserim. Atq; si aliter est, dic mihi nunc, unde, quod à me dicitur, intelliges. Si quidquid à me petis, id petis cum resignatione in meam voluntatē, utq; in omnibus fiat, quod cedat ad majorem gloriam, & ad majus obsequiū meum, ac bonum animarum; & bene petis, sicut oportet petere, atque etiam petis cum dictis conditionibus, etiamsi interdum patiaris nonnihil naturalis fragilitatis in confidentia, atque ego omnia facio, sicut à me petis, quomodo his suppositis, dicis, à me non exaudiri tuas orationes? adverte, quòd me offendas, quòdque id sentiam.

Audivit mea anima, quod illi à DEO erat dictum, fuitque vehementer pudefacta & humiliata, quamvis non desolata: cum autem occultè desiderat plura reponere, intelligeretque illam ipsius DEUS, dixit ei amanter ac benignè. Dic, age, Anima, interroga me, quidquid volueris, ego enim tibi respondebo & satisfaciam tuis dubijs. Quo dicto fuit mea anima recreata; ut ipsum idcirco interrogaret, ac diceret: dic igitur mihi, mi Domine, quando à te peto & postulo, ut aliquid bene succedat, quod à te rescivi cessurum in tuum honorem, & bonum animarum, vel salutem multorum, & video id non fieri, neque man-

dari

dari optatæ executioni, quænam potest esse hujus rei causa? Respondit Dominus quàm gravissimè: animadverte Anima, semper petis quemadmodum dixi, ut fiat in omnibus, & ante omnia, quod cedat ad majorem meam gloriam, prout fieri oportet: propterea, & propter liberum arbitrium, quod dedi homini, cum omnibus necessarijs & sufficientibus auxilijs, ut ijs bene utatur, faciâtque quod est melius, & perfectius; ordinariè hoc modo, quasi ab invicem non discrepamus, quamvis meâ infinitâ potentiâ possim amplius & amplius facere, & quidquid volo, quod est magnum meum secretum, in quo includuntur diversæ & gravissimæ causæ. Et cum hoc sit verum, debeatûrque Divinæ Justitiæ suus locus, ac veneratio & honor, sicut Misericordiæ & Clementiæ, omnibûsque cæteris divinis Attributis, offenderetur Divina Justitia, si ei auferretur ipsius honor ac potentia. Jam verò postquam Bonitas & Misericordia multum præstitit, imò plurimum homini, tribuendo illi liberum arbitrium, ille & ejus tepiditas, pigritia & malitia, & passiones inordinatæ, noluerunt amplecti auxilia divina, & gratias ac beneficia: sed potius omnia hæc abominati sunt homines, ac spreverunt hæseruntque in abyssu iniquitatum ac miseriarum: alij verò sequendo suas occultas & vanas inclinationes, præposterè judicant de veritate, & errando cogitant, se agere bene valdeque ac quiescunt suis erroribus. Dic mihi igitur Anima, spectato hoc duplici hominum statu, annon tibi videatur, fore contra DEI, ipsiusque Majestatis ac Divinæ ejus Justitiæ gloriam, istos relinquere impunitos? cum suâ propriâ voluntate ac deliberatè velint damnari, & ruere ad infernum: alios autem, eò quòd non aspiciant oculis puris, neque res expendant absque passione & affectu, ideòque errent in agendo? Quòd verò ego ità fieri permittam, est æquissimum, siquidem nolunt uti meis auxilijs & consilijs.

VI. Quod de S. Thoma Apostolo post Resurrectionem
Chri-

Christi Domini incredulo habetur Joannis 20. v. 27. aliqualter expressum apud Ven: Marinam extat P. 1. l. 2. c. 17. Quodam die sancto Veneris Anno 1616. mihi comparuit Christus Dominus defunctus, in specie lamentabili, ut vehementer obstupescerem, & consternerer, quod illum viderem tantâ dignum commiseratione; conabar ab eo avertere oculos, & recurrere, ad DEUM, petitura ab ipso lumen, nè deciperer. Cùmque aliquamdiu ita fuisset comparata, intulit mihi Divina Majestas suavem vim, ut aspicerem illud exanime corpus, ac tum Persona Christi Domini, quæ erat unita illi corpori, mihi dixit: Marina, quare me averfariis? quare me spernis? respondi: Domine, tu scis, quod te non averfer, multoque minus spernam, sed reluctor, quia timeo, nè decipiar in rebus adeò inusitatis. Dominus mihi dixit: accede huc, & tange vulnus mei lateris. Accessi & tetigi illud, statimque sensi prodeuntes ex corde Christi Domini per idem vulnus quosdam radios, quasi igneos, divini amoris, pertingentes usque ad meum cor, quod amore ipsius incendebant. Postquam autem ita aliquamdiu fuisset affecta, dixit mihi Dominus: noli esse incredula.

VII. Joannes 21. v. 25. suum Evangelium his verbis clausit: *Sunt autem & alia multa, quæ fecit JESUS: quæ si scribantur per singula, nec ipsum arbitror mundum capere posse eos, qui scribendi sunt, libros.* Hæc verba videntur quædam enormis hyperbole, nec ad literam strictè accipienda. Verumtamen quod apud Ven: Marinam simile quid legitur, multum eisdem addit luminis. Narrat ipsa P. 2. l. 1. c. 41. Anno 1625. die Transfigurationis Domini se habuisse Revelationem de admirabili mysterio Divinæ Incarnationis tam sublimem, ut hæc subdiderit verba: nequit autem intra millenos annos explicari, quod in ijs verbis denuò intelligitur, quæ hîc tam facîle pronunciamus, & quod concipitur de scientia, potentia, & infinito amore DEI, deque immensa ejusdem erga homines elementia. Denique, ut

ex hoc Sancto, qui me illuminabat, intellexi bona in nos per Incarnationem Filij DEI derivata, nunquam fuerunt cognita, aut audita, qualia in se sunt, neque plenè intellecta & percepta, præterquam ab ipsomet DEO, qui ea est operatus. Et Parte 2. l. 2. c. 7. de mysterio Incarnationis loquens sic concludit: Quàm rudibus & paucis id refero verbis! cùm omnia totius mundi verba non sufficiant ad explicandam vel atomum ex multis, quæ tunc Anima intelligit de altitudine hujus mysterij.

VIII. Si ergo Ven: Marina propter speciale lumen sibi per Angelum communicatum, tam multū de unico mysterio Incarnationis intellexit, ut judicaverit nec millia annorum, nec omnia verba mundi ad ea explicanda sufficere, quid mirum si Sanctus Joannes Apostolus, lumine divino longè ultra Ven: Marinam illustrior, advertit tanta esse, quæ scribi oporteret, si universa, quæ Filius DEI in carne egit, essent congruè explicanda, ut plurima millia annorum non sufficerent, adeò, ut tandem libris scribendis nec locus in mundo sufficeret. Nempe ostendere voluit infinita esse, quæ de mysterijs nostræ sanctæ Fidei restant intelligenda, siquidem Ven: Marina de unico folius Incarnationis mysterio asserit, illius bona in nos derivata, nunquam hætenus adhuc ab omnibus Angelis & Sanctis in cælo & in Terra, fuisse cognita, qualia in se sunt; imò nec plenè percepta, nisi à solo ipsomet DEO. Ergo nihil obstat, quo minus ad literam intelligatur locus ille in fine Evangelij Joannis, nempe quòd gesta Filij DEI in carne sint materia infinitorum librorum, nunquam exhaustibilis ab ullis creaturis.

Jam quoque minùs mirabile videbitur dictum S. Ignatij de Loyola, fatentis se nec millesimam partem divinitus in se collatorum donorum potuisse suis Socijs Patribus exponere, eò quòd capacitatem eorum intellectus excederent. Sic Ven: Pater Gaspar Druzbiczky è Societate JESU Poloniæ bis Provincialis, dicebat se in cælo post adoratam SSS. Trinitatem Hu-

manitatemque Christi Domini nec non Virginem Beatissimam, millionem annorum impensurum in investigandis admirabilibus modis, quos DEUS adhibet in directione cordis humani.

CAPUT VI.

Textus ex Epistola Sancti Judæ Thadæi.

SANCTUS Judas Apostolus in sua Catholica Epistola v. 9. scribit, inter S. Michaëlem Archangelum, & inter diabolum fuisse altercationem de corpore Moyſis. Hæc historia lumen à similibus casibus accipit, qui apud Ven: Marinam, referuntur Parte 1. l. 5. c. 6. §. 5. pag. 476. col. 2. Post paucos dies vidi Angelum candido equo insidentem, qui vibrabat quandam lanceam, unde nonnihil extimui: sed dixit mihi: tu non habes, quod meruas: DEUS me mittit ad destruendos & præcipitandos ad infernum multos peccatores, qui id promeruerunt. Interrogavi illum: suntne Mauri? Non, inquit, sed hæretici, & mali Christiani: verum & in hoc relucet divina misericordia, quòd eripiendo ipsis vitam, eos liberet à majore inferno. Subitò Angelum utrinque præterivit turba dæmonum, qui illum antecedeabant, & Angelus mihi dixit: ora DEUM, ut me confortet in hoc opere. Ego autem dixi: ergone S. Angele, potes timere diabolum, maximè cum sis missus à DEO? Respondit: non recordaris, te audivisse, altercatum esse diabolum cum S. Michaële, de corpore Moyſis? diabolus enim cupit impedire opera DEI. Ego vado, vale.

P. 1. l. 6. c. 18. §. 2. Post toleratos in Novembri A. 1623, multis diebus maximos dolores & cruciatus, ut tantum non morerer, venerunt ad me in festo sancti Martini manè Domini mei Angeli, qui mecum manent in aurea aula, & cum charitate ac amore mihi dixerunt: Scias declarandum tibi à nobis mysterium, quod in te peractum fuit his diebus, quoad tuos tam acerbos

bos dolores. Valde altercatus est sanctus Michaël Archangelus cum diabolo his diebus, quia te volebat conficere, & privare vitâ, præ rabie & odio, quo te prosequitur; id quod ita ardentem conatus est efficere, sicut advertisti. Archangelus autem te iisdem diebus defendit usque dum tandem illis elapsis, ipsi imperavit, in nomine DEI, ut te relinqueret.

PARS SECUNDA.

Complectens ea, quæ de Divinitate, & Divina Trinitate ad Sanctam nostram Catholicam Fidem spectantia in mirabili Vita Venerabilis Marinæ habentur.

IN hac Parte explicabuntur ex symbolo Apostolorum articuli tres, nempe primus, secundus, & octavus, qui sunt: Credo in DEUM Patrem omnipotentem Creatorem cœli & terræ. Et in JESUM Christum Filium ejus unicum Dominum nostrum. Credo in Spiritum Sanctum.

CAPUT I.

De DEO.

I.

Sancta nostra Fides Catholica credit DEUM esse Ens sperans omnem nostram capacitatem, esseque incomprehensibilem infinitum in omni genere. Huic nostræ de, DEO

DEO sanctæ Fidei congruit profunda Revelatio facta Vener: Marinæ, Parte 1. l. 3. c. 1. §. 3. Post permolestè transactam in Martio A. 1615. noctem unam ac diem propter oppressionem à doloribus, quasi horâ 6. vespertinâ, Domini mei Angeli appropinquantes meæ Animæ abstraxerunt illam à sensibus, quæ se reperit ante cœlestem Jerosolymam, ubi circa illam vidit vastissimum pellucidissimum, pulcherrimum fluvium, cujus littus erat valde umbrosum, & amœnum, ac repletum sanctis Angelis, qui adhibitis instrumentis musicis admirabiliter canebant: Gloria in excelsis DEO. Fui momento abducta ab ijs Angelis, & collocata in littore magni illius & mystici fluvij, in quem me derepentè quàm profundissimè immerferunt, ubi mihi fuit communicata magna & extraordinaria cognitio divinæ Magnitudinis, Omnipotentiae, Sapientiae, & Immensitatis.

II. Illi verò Angelici Spiritus mihi subitò dixerunt voce aliquantum altâ & concitatâ: nōne est ampliùs, quàm hoc? Tunc mea anima denuò illuminata, ut cognosceret illud modicum de Immensitate DEI, respectu infinitorum, quæ illi restabant cognoscenda, ità ut tota absorpta prorsus oblivisceretur omnium, quæ cogitaverat, respondit: ampliùs est, quàm hoc. Et cum summa admiratione similiter altâ, & acceleratâ voce iteratò dicebant: ampliùs est, quàm hoc. Immerferunt me deinde paulò ulterius in illum fluvium, ubi mihi fuit collatum majus lumen, & cognitio illius divinæ Essentiae, ejusdemque divinæ caliginis. Et fui statim interrogata sicut priùs, ab ijsdem Angelis altiori voce: estne ampliùs quàm hoc? Respondi, ut priùs eodem modo, postquam longè plura cognovi, magisque fui illuminata: ampliùs est quàm hoc. Immerferunt me tertio usque ad fundum ac abyssum illius mysterij, fuique continuò interrogata ab Angelis, attollendo semper aliquantò magis vocem: estne ampliùs quàm hoc? mea verò anima magis ac magis illustrata, ampliùs cognoscens illud divinum Esse, non secus ac initio,

tio, quasi nihil eorum nôisset, quæ cognoverat, propter infinita quæ videnda supererant, & cognoscenda, respondit: amplius est quàm hoc.

III. Tum Angeli extraxerunt meam animam, ex illo profundo & mystico mari, elevatamque in altum tribus adhuc vicibus & quavis vice altius, quæsiverunt eo modo arcano: estne amplius quàm hoc? mea quoque anima semper lumine & cognitione majore prædita, jam quasi perdita, & submersa in illo divino Esse, reposuit: amplius est quàm hoc; tertio verò respondit: quàm maximè amplius est quàm hoc. Tandem ipsam magis elevaverunt ad quandam infinitam & incomprehensibilem magnitudinem luminis & claritatis, ac immensitatis bonorum, quæ nulla satis potest lingua explicare, aut eloqui, ibique Dominus Majestatis ostendit meæ animæ momentaneè, quasi mihi illucesceret fulgur vel amotâ cortinâ spectandi exhiberentur maximi thesauri, eadèmq; subito reductâ rursus subducerentur oculis, infinitam ac incomprehensibilem immensitatem illius divini Esse nostri magni DEI ac Domini Majestatis, adeò ut cum exigua meæ animæ capacitas non posset sufferre tanta bona, quanta in eo momento vidit, & cognovit, viribus deficeret atque adeò totum meum corpus contremisceret. In eo verò puncto temporis Angeli me apprehenderunt & confortaverunt in mea debilitate ac deliquio, collocaveruntque in meo angulo. Haftenus Ven: Marina.

IV. Credimus DEUM esse simul benignum ac suavem, ad quod pertinet gratiosa Revelatio Parte I. l. 3. c. 4. §. I. Perveni usque ad cœlum cum quopiam sancto Propheta, & apparuit in ea Jerosolyma cœlesti quidam magnus, vehemens, potens ignis & comburens, ut tota illa cœlestis Patria videretur ardere & conflagrare divino, terribili, admirabili, immenso, infinito ac potenti igne, in quo aderat ipse DEUS, & tota Beatissima Trinitas, se in ea specie ignis comburentis ostendens meæ

animæ, quæ maximo correpta timore, tremebat. Subitò mihi fuit ab eo Sancto dictum : Anima, intra in gaudium Domini tui, & confide in illo, ac noli timere. Audiens hæc ejus verba, incepti magis timere, & tremere, ac dixi : quid mihi dicis? quomodo intrarem ego, quæ sum debilis ac miserabilis, exiguæque capacitatis, in illam summam Majestatem, in eum ignem infinitum & comburentem, in illum DEUM fortem & potentem? nōne animadvertis à me nequaquam sustinendum tantum, DEUM, meque interituram, consumendam & in cinerem redigendam, in ipsius conspectu? Anima, aiebat Sanctus, noli turbari, noli langvere, vel pigrescere: licet enim verum sit, DEUM esse fortem, terribilem, omnipotentem & infinitum; est tamen ità benignus, mansuetus, & suavis, ac infinitè bonus & misericors, humiliavitque se, & factus est parvulus, ut ipsum, anima posset complecti, & eo replere suam exiguam capacitatem.

V. Parte I. l. 3. c. 7. §. 2. pròlixè describit Ven: Marina, quomodo viderit creaturas accipere à DEO omnem valorem, lucem, gloriam, & beatitudinem. Item quomodo viderit Apothecam cœlestem, in qua ex infinito valore ac pretio Sangvinis JESU Christi pro nobis effusi accipiant virtutem omnes medicinæ & sancta Sacramenta in remedium animarum nostrarum; ac denique quomodo omnes Medici spirituales & Ministri Evangelij, accipiant virtutem, valorem & sapientiam ad sanandas omnes infirmitates animarum, etiam ad resuscitandas mortuas.

VI. Parte I. l. 4. c. 20. §. 2. Invisit me cum alijs Sanctis gloriosus S. Dominicus, & mota à DEO habui desiderium aliquid interrogandi, & obtentà ab eo facultate, dixi : quid est hoc mysterij, quòd dum hic estis gloriosi Sancti, sicut vos vido, sitis unà beati, & versimini in præsentia Divinæ Majestatis, quæ semper replet vestras animas semetipsà & vos reddit

Bea-

Beatos? Respondit Sanctus: noster magnus DEUS ac Dominus immensæ Majestatis, suâ infinitâ potentiâ omnia replet, & universa complectitur, totûsqne est ubivis operando in qualibet creatura secundum ipsius indigentiam, & capacitatem, ac merita juxta suam divinam dispositionem, sapientiam, & bonitatem. Quapropter Animæ beatæ, quæ jam æternum possidemus immensum mare hujus divini Esse, in quocunque loco, ad quem nos divinus iste Dominus destinat, ac mittit, ut peragamus aliquid concernens ipsius gloriam, permanemus semper in eodem immenso mari, obtinentes æternâ possessione omnem gloriam & participationem DEI, cujus est capax quævis nostra anima, juxta sua merita, & magnam bonitatem DEI Domini nostri, qui est instar fontis copiosissimi, profluentis ex Oceano immensæ magnitudinis, semperque effundentis venas & rivus aquæ vivæ, quâ universi quantumcunque ampla, replere possent vasa, pro eorum capacitate suâmqne sitim extinguerent, ac mederentur suis necessitatibus, quin illis posset quidpiam uspiam deesse; quia virtus illius aquæ esset tanta, ut se ad hæc omnia extenderet, & qui cam biberet, non sitiret ultra. Sic suo modo se habet, ut aliquantum est explicabile nostrum magnum mysterium, de quo quærivisti.

VII. Parte 2. l. I. c. 2. Spiritus Sanctus cooperiens me, splendidissimo velo mihi infudit cognitionem similem illi, quam aliàs percipio, quando anima quodammodo submergitur in divina Essentia, ubi nihil aliud repræsentatur, aut videtur, quàm quædam perfectionum, & attributorum divinorum abyssus, præsertim verò Æternitatis, Immensitatis, & Infinitudinis, atque dum plurimum de illis intelligit pro suo capto, nescit tamen tunc anima (minùs verò postea) aliud dicere, quàm: amplius est quàm hoc, amplius est. Etiam si namque plurimum cognoscat, simul tamen illi indicatur superesse infinities plura cognoscenda, & anima submersa in hac infinitudine se perdit, ut sibi ipsi cripiatur.

CAPUT

CAPUT II.*De Attributis Divinis.***I.**

PRæclaram habuit de divinis Attributis Revelationem Ven: Marina in Majo An. 1617. quam refert Parte 1. l. 3. c. 6. §. 2. Fui deducta per meos sanctos Angelos ad Aulam cœlestem, quæ erat immensæ magnitudinis, & in medio ejus erat quoddam magnum Castellum, in cujus summitate lucebat Sol splendidissimus, qui suis radijs illuminabat omnes Beatos, illósque beatificabat. In circuitu hujus magni Castelli erant alia illi adhærentia, in quorum uno, quod apparebat valde præclarum, fuit patefacta porta, per quam introspiciens vidi in abstrusissimo & remotissimo loco Sanctissimam Trinitatem, quasi in secretissimis penetralibus suæ divinæ Naturæ. Postquam hoc spectaculo aliquamdiu me oblectavissem, duxerunt me Angeli ad aliud Castellum huic vicinum, ubi mihi videbar videre Divinitatem DEI, & hunc in modum me duxerunt per omnia alia. Interrogantibus me Angelis, an scirem, quidnam id esset, dixi, quod in singulis eorum Castellorum viderim DEUM. Illi autem mihi hoc magis explicuerunt, dicentes per illa Castella repræsentari divina Attributa, quæ sunt, ipsemet DEUS. Vicinissimum illi excellentiori, erat divina Bonitas; alterum in altera parte divina Misericordia; postea sequebantur alia, divinæ Fortitudinis, Justitiæ, & reliqua, viderique mihi vidisse, quomodo DEUS in sinnulis Castellis operetur aliquid in suis creaturis juxta illud Attributum divinum, quod ibi mihi repræsentabatur. Deinde vidi, quòd Persona Patris æterni, in specie humana, etsi valde diversa ab illa, quam habet Filius, quem video verum esse Hominem, ascenderit ex eo minore Castello intus ad aliud maximum usque ad summitatem,

tem, conjunxeritq; caput cum illo Sole, qui erat divinum Verbum Incarnatum, indicando mihi se propter merita hujus Domini benefacere omnibus Beatis, ac reliquis hominibus. Et cum eadem viâ descenderet, quâ ascenderat, vidi eundem magnum DEUM descendentem usque ad Infernum damnatorum, & ibi per attributum suæ divinæ Justitiæ illos punientem, licet quodammodo illibenter, & quasi coactè, quòd id nollet facere, nisi exigeret ipsius Justitia, ac proinde adverti etiam ibi aliquid operari ejus Misericordiam, & abstraheram me ab hoc videndo: quia non intelligebam, quomodo id fieret.

II. Venerabilis P. Ludovicus de Ponte ibi subdit: Ego illi dixi id esse, quod docent Theologi, nimirum DEUM punire juxta condignum, minùs, quàm illos posset punire, & in eo reperiri aliquid misericordiæ: statimque intellexit hoc ipsum esse, quod viderat, neque sciebat exponere. Prosequitur Venerabilis Marina: Vidi præterea infinitatem istius punitiois in æternitate poenarum, quod me reddidit attonitam, & adverti, quàm infinita esset culpa, eò quòd adversetur DEO infinito, qui tali poenâ & modo illam punit per suam Justitiam. Postea vidi eundem DEUM Patrem transeuntem ad purgatorium, & per suam Justitiam ibi infligentem animabus illam poenam; sed suaviore modo & quasi illarum vicem doleret. Deinde ascendit ad locum, in quo priùs fuerat, cumque me abripuisset in ecstasim, inveni me in meo lecto, sicut soleo.

§. 3. narrat iterum in Julio Anni 1619. se vidisse divina attributa, & ait: Pervenì ad magnitudinem divinæ Bonitatis, nec non Misericordiæ, Justitiæ ac Sapientiæ, in quibus Attributis contemplabar, & cognoscebam divinum Esse. Visâ autem ejus Justitia fui consternata atque exterrita.

III. Maxima DEI erga suas creaturas Bonitas & Dignitas, quantam in Angelis pariat admirationem describit Parte 1. l. 1.

c. 14. §. 2. Conspexi adstantes quosdam sanctos Angelos pul-

cherrimos, vehementer stupentes & admirabundos quod demonstrabant, & manifestabant in situ corporum, in quibus comparebant meæ animæ, nec non in divinis suis ac speciosis vultibus. Causam aurem hujus admirationis intellexi esse, quod viderent majestatem illius magni DEI ac Domini sui (in cujus divino conspectu prosternitur omnis creata & eminentissimi Seraphini se reputant quasi vermiculos) tanto amore prosequi suas creaturas, tantæque esse erga eas bonitatis, ut propter illam dignetur agere cum iisdem suis miserabilibus creaturis, ac terrenis, plenisque corruptione naturæ humanæ, & se eo modo ijs communicare. Ità attoniti illi Angeli se invicem intuebantur, semel ac iterum attollendo suos oculos ad cælum.

IV. Clementiam DEI commendat Revelatio Parte 2. l. 2. c. 10. An. 1616. cùm essem afflictissima propter multas adversitates, quæ his diebus, ut mihi referebatur, obvenerant in hæc Regna Hispanica, quantumcunque me resignarem in divinam voluntatem, non poteram me tamen componere. Tum mihi Dominus dixit: conquiesce anima, sic enim fieri conveniebat, ut punirentur qui sunt mortui, & superstites emendarentur. Adverte: nōne vidisti magistrum aliquem puerorum, dum hi sunt negligentes in legendo, & garriunt, surgentem ex sella, & duorum triumve ex ipsis capita ac aures scuticā aliquoties verberantem atque sic terrefacientem omnes, qui metu perculsi se applicant lectioni? ità verò ego nunc egi.

V. Hanc eandem clementiam commendat Revelatio P. 1. l. 6. c. 16. §. 5. Venit ad me sanctus Angelus Custos, elevavitque me, apprehensam in humeris, erigens me in lecto, ac dixit: Anima aspice DEUM, ecce pergit ad mare, & videtur esse iratus. Elevavi oculos & vidi meum Dominum stantem inter cælum & mare, quasi imperantem ventis ac mari, ut conturbarentur, valde offensum peccatis, quæ contra ipsius Majestatem, committunt navigantes (ego verò vehementer condoleo, & com-

compatior navigantibus, propter ingens discrimen, quod ordinariè subeunt, tam vitæ quàm animæ) & postquam vidissem DEUM, ità sicut dixi iratum, mota commiseratione proripui me, & constituta coram DEO inter ipsius Majestatem ac mare, expansis brachijs dixi: noli mi Domine, noli mi Domine, per tuam clementiam te obsecro, noli id permittere, nè submergantur isti homines. Dominus præferens gravem indignationem, mihi dixit; Quid facis, anima? permitte me agere. Noli mi Domine, reposui ego, per tuam infinitam bonitatem, noli hoc facere. Dominus mihi dixit: recede anima, adverte, quòd etiam tu possis submergi. Tum ego subjeci cum magna confidentia: non debeo te derelinquere mi DEUS, etiamsi submergar; licèt me occidas, non intermittam confidere in te. Hoc audito DEUS fuit mutatus, quasi in mansuetum agnum & non punivit illas astimas, dicens mihi: fiat, sicut tu vis & veni huc, Anima, perge mecum ad cœlestem Jerosolymam, volo enim, ut hodie assideas meæ mensæ, & bibas ex meo poculo. Atque in momento me univit secum Divina Majestas, & reperi me in illa cœlesti Patria, vidique paratam quandam mensam, cui assidebant omnes Beati comedentes, seque satiantes divinâ visione. Jussit me DEUS assidere mensæ. Videns autem ego illos Sanctos, ac illas species corporum, quæ habebant admirabilia, & considerans me, erubesceram, ac timebam assidere cum ipsis, dixique meo Domino: non mi Domine, non decet, ut ego assideam huic divinæ Mensæ cum istis sanctis Beatis, quæ vivo in carne mortali: hîc sedebo sub mensa & comedam. Dixitque Dominus: non Anima, non ità oportet fieri, asside mensæ. Assedi cum Sanctis, & incepti me reficere, ac frui illâ beatitudine, pro meo captu, idque brevissimo tempore, sicut pertransit fulgur, & eram ibi valde confusa ac pudefacta. Obstupui ac passâ sum ecstasim videns talia mysteria: & quando ad me redij deduxerat me jam DEUS ad meum angulum. Sit ipsius Majestas benedicta.

VI. Eandem Clementiam videre est Parte 2. lib. 2. c. 10. p. 254. col. 2. Mense Martio ducta Vallisfoleti versùs fluvium. Vidi turbari à dæmonibus aquam, & vehementer intumescere; quod agentes illi infernales spiritus volebant omnia in ea vicina destruere & inundare. Incepi id videndo exclamare ac dicere: adjuro vos, mali spiritus, in nomine DEI, ut relinquatis has aquas & non conturberis, neque damnum fidelibus inferatis. Et hoc sollicitè ac frequenter iterabam. Tandem coacti ac furentes abiverunt, & aquæ conquieverunt. Fui statim reducta à SS. Angelis ad meum angulum, ubi dixi: cur verò, mi Domine, sic fecisti? bene tu potuisti imperare dæmonibus & aquis, atque omnia fuissent sedata, quin ego illuc irem, quemadmodum ivi. Verum quidem est, respondit Dominus, me id facillimè potuisse; non volui autem, sed mittere te nomine meo, ut hoc exequeris. Ecce nunquid non vidisti, quod dum aliquis manet in cubiculo, & audit subrus excitari tumultum in gallinatio, quia ibi infrà comparet rapax quæpiam avis; advocet puerum, illique dicat: curre deorsum, & incute illi avi timorem. Ità verò ego nunc feci, & videns dæmones eâ licentiâ, quàm à me his diebus habent, velle conturbare fluvium, ac nocere isti civitati, præ commiseratione, quâ mea Clementia fuit permota, misi te, ut ires ad illos terrendos, & nolui id ipse facere, tanquam pertæsus vestrarum negligentiarum atque exiguæ emendationis vitæ, post tot beneficia, quæ accepistis. Hæc omnia mihi dixit Dominus.

Ad eandem Clementiam spectat ibidem mox sequens revelatio sic relata: Alio die mihi DEUM pro his præsentibus, & totius regni necessitatibus oranti, ut nostri misereretur, dixit Divina Majestas: penes te sit arbitrium pacis & belli: tu esto iudex inter me & populum meum: quid vis amplius à me fieri?

VII. Severitatem DEI declarat Revelatio, Parte 1. lib. 5. c. 9. §. 4. An. 1599. jussit Divina Majestas admoneri Judices

ac.

ac Prælatos Civitatis Vallisoletanæ ob ingratitude[m] pro gratia accepta à liberatione à peste : sed ipsi omnes & singuli seorsim eam culpam à se rejiciebant allatis excusationibus, quæ illis videbantur sufficientes; verùm DEUS, qui illà re fuerat offensus ostendens mihi non esse sibi satisfactum ipsorum excusationibus dixit mihi: Ego illos puniam propter istud exorbitans delictum, & in pœnam hujus defectus ipsis auferam personas convenientes ac necessarias eorum reipublicæ.

CAPUT III.

De Providentia DEI, & Prædestinatione.

I.

PLurimis in locis referuntur pulcherrima, & sublimissima de admirabili DEI erga creaturas suas Providentia, præsertim circa æternam hominum salutem planè conformia nostræ sanctæ Fidei, ex quibus proinde declaratur, quantum fieri potest, sublimissimum hoc mysterium.

Parte 1. l. 3. c. 6. §. 4. narratur. In Augusto An. 1615, vidi Christum Dominum confidentem in quodam throno, circumdatum ab Angelis, ibi correpta spiritali somno cognovi specialiter illuminata à DEO de subtilitate divinorum Judiciorum, ac variorum arcanorum divinæ Providentiæ: etsi non, scirem, neque possem id exponere, sicut vidi ac intellexi. Tantùm stupebam, & eram attonita, atque etiam timebam, videns quomodo prolabantur res exaltatæ, & exaltentur res prolapsæ, nec non occulta DEI arcana, quoad varias vias, per quas ambulant homines. Occurrit parti superiori meæ animæ exemplum, quo id possem explicare & est, considerare altissimum montem, in quo est reperire varias semitas, ac vias inter ingentia, præcipitia; & imaginabar mihi multos illum perambulantes; bonos quidem insistentes semitis tam arduis ac angustis, ut vi-

derentur præcipites ruituri, qui tamen superatâ hac difficultate, & molestiâ devenirent ad viam planam & amœnam, magisque securam: alij verò incederent viâ, in speciem planâ, & amœnâ cum magna prosperitate, in cujus termino prolaberentur, in præcipitium ac perirent. Hoc exemplum mihi incidit, sed non explicat adhuc bene id, quod vidi. Cognovi etiam & experta sum, quomodo DEUS adsit tribulatis ac afflictis; videorque, mihi hoc vidisse.

II. Parte 1. l. 3. c. 20. §. 3. Divina Majestas me eduxit ad altitudinem valde eminentem, ubi mihi per specialissimum suum lumen ostendit res tam admirabiles, ut illas cor humanum non capiat, neque possint exprimi, nisi dicendo: est aliquid amplius, quàm hoc. Licet verò essem intra hoc summum, adeoque divinum Bonum, nihilominus quando me vidi tam elevatam, timui, dixique in animo: si me DEUS hinc dimitteret, quid fieret? annihilarer. Et Dominus respondit meæ cogitationi: bene dixisti; universæ creaturæ à me dependent, & omne ipsarum esse pendet à mea Providentia; ita ut, si illas defererem, redigerentur in nihilum: verum tu noli timere, quia te non deferam. Addiditque Dominus: aspice illuc versùs. Conjeci oculos ad eam partem, quam mihi Dominus designaverat, ac aspexi procul. Et cum mihi appareret maximum quoddam spatium, quod quàm longissimè extendebatur, & erat admirabilis cujusdam coloris, vidi quasi in quadam æternitate divinam mei Prædestinationem, quâ me ab æterno DEUS prædestinaverat. Rursumque mihi dixit: noli timere, quia te non deferam. Et datâ mihi suâ sanctâ benedictione disparuit.

III. Parte 1. l. 4. c. 6. An. 1620. in Febuario vidi duodecim Angelos DEI, qui deinceps interdum me visitarunt, & aliquando vidi, quòd tres ex ipsis formaverint singuli quendam thronum mysticum. Aspexi primum, qui licet mihi initio videretur esse instar admirabilis altaris, & imaginis, alia ex parte

ta-

tamen crescebat, vidique illum evasisse quasi in altum & excelsum montem, valdeq; pulchrum & pretiosum, ac plenum grandi thesauro. In hoc monte erant multæ viæ & semitæ: prima erat plana, lata & spatiosa; aliæ angustæ & arduæ, fursumque tendentes intercedentibus infinitis semitis longis & brevibus per alias vias, ac vergentibus ad alias partes, & latera, ut in his non videretur aliud, quàm quidam labyrinthus, & quoddam rerum diversarum ac veluti invicem intricatarum infinitum: erant quoque ibi quidam quasi gradus in una parte, valde difficiles ascensu. In vertice tandem hic mons habebat jucundissimam & pulcherrimam planitiem, Angelus se collocavit ad radicem istius montis, dixitque mihi: accede anima, & videbis diversitatem viarum, quas DEUS habet pro deducendis ac dirigendis animabus ad earum salutem: aspice quali viâ ambula- verit quædam anima, quam Dominus meæ curæ commisit, ut illam juvarem & custodirem. Constitui ipsam initio in hac via lata & plana, quàm hic vides, quæ est figura & repræsentatio Legis DEI, ac sanctorum ipsius Præceptorum (designabat autem mihi quasi digito, velut eminus id, quod ostendebat) incessit, ajebat, ea anima hac viâ facilè, & cum solatio, donec attingeret & conscenderet superiorem illam angustam semitam, quæ significat ac repræsentat Consilia Evangelica. Illæ progressa est aliquamdiu, aliquantùm molestè & difficulter, & nonnunquam impingendo ac cespitando. Demum descendit per illud latius deorsum, quod ibi vides. Continuo autem illam, DEO juvante, arripui prout potui, & eduxi ad priorem viam latam, quâ illam deducebam; sed dæmon illam tentabat varijs rebus, & inquietabat ac turbabat, ut mihi tandem evaserit è manibus, & intraverit in illam lacunam, quam ibi vides; & sic incidit in magnam miseriam ac fæditatem. Ego tamen, cum DEI auxilio eam indè extraxi, & mundavi: atque dum illi inspirarem dolorem de peccatis, & pœnitudinem, ipsamque ma-
nu-

nuducerem hac viâ, contulit illi Dominus tantam virtutem & fortitudinem, ut cum ea conscenderit illos arduos gradus, quos ibi vides, non absque labore ac molestia, quæ significat magnam illam difficultatem, quæ sentitur, quantum est ex parte animæ, dum ascenditur ex statu imperfectiore ad alium perfectiorem. Indè illam DEUS deduxit ad semitam vehementer angustam & altam, quæ significabat ac repræsentabat viam orationis & contemplationis, quam tenuit valde cum magno & insigni profectu ac spiritu. Postea ipsam DEUS perduxit ad illas vias tam extraordinarias, quas illic vides, & solus DEUS, ipsiusque sapientia intelligit, ac scit, quò vergant & tendant. In hoc statu, & in ista via ultra modum profecit, mansitque in illa cum magna pace & quiete, in admirabili quadam ac divina solitudine DEI & sui spiritûs. Hinc eadem anima fuit deducta à DEO, me ipsam comitante, ad illam viam altam ac divinam, quam ibi vides, ubi in altissima contemplatione, & cum sublimissima cognitione DEI, ipsiusque perfectionum, ac speciali unione tradidit suum spiritum DEO: quo fruitur æternum. Volui tibi jussu DEI ostendere hoc mysterium, & viam admirabilem atque extraordinariam, quâ DEUS duxit istam animam, pro tuo solatio, utque conquiesceres in operibus DEI, & recrearetur tua debilitas. Noveris autem, quòd nos duodecim Angeli DEI, qui te aliquando pro tuo solatio, ex DEI mandato visitavimus, Custodes fuerimus duodecim animarum, ex quibus tantum tres sunt salvatæ, sicut vidisti in tribus illis facellis, & novem damnatæ: atq; ita ordinariè res eveniunt. Commenda id totum DEO, & esto bono animo, ac habe solatium in tuo DEO. Rogo autem te, amore Domini DEI nostri omnipotentis, ut evulges id, quod vidisti: cedit enim ad gloriam DEI, & utilitatem ac solatium animarum; atque nunc vale.

IV. Parte I. l. 5. c. 8. §. 1. Quodam die præ dolore & commiseratione, quòd viderem tantas Ecclesiæ necessitates, atque mul-

multitudinem hostium nostræ sanctæ Fidei Catholicæ, dixi Divinæ Majestati: Mi Domine, potens & magne ac misericors, siquidem nos tantopere amas, & tantum fecisti nostri causâ, ac pro nostra salute, habesque potentiam infinitam, quâ potes, quidquid vis, nonne esset fortè conformius tuæ magnæ misericordiæ ac bonitati, ut converteres ad tuam sanctam Fidem Catholicam istos paganos & infideles, qui vivunt in tenebris, & umbra mortis? est enim res vehementer dolenda ac digna, commiseratione, considerare, quòd videantur quodammodo plura esse opera tuæ justitiæ, quàm misericordiæ; cum tot damnentur, & pauci sint electi. Postquam hoc dixissem, respondit mihi Dominus: modò non es bene locuta, quia multò plures, sinè comparatione sunt miserationes meæ, & bona quæ præstiti hominibus, dum descendi de cœlo in terram, & factus sum homo, ac mortuus pro ijs, redemique illos meo pretioso sanguine, & reddidi participes meorum meritorum, vel in ipsis pœnis, quibus eos addixi propter gravia illorum peccata. Dic age an beneficia comparanda sint pœnis? nonne existimas magnum intercedere discrimen inter bona, quæ ipsis contuli, & pœnas, quas ab illis exegi? & nonne præterea scis me non solum esse misericordem, & bonum ac potentem, & justum, verum etiam sapientem; ideòque sicut magnitudini misericordiæ meæ, ac bonitati competebar conferre gratias, & bona hominibus, justitiæ autem punire malos, & rebelles, ac violatores meæ legis, meorumque præceptorum; ità magnitudini meæ sapientiæ convenire, ut non salvem omnes, quamvis possim, neque eos cogam, ac traham ad beatitudinem: siquidem ego creavi hominem, ut esset beatus, atque ut consequeretur hunc finem, dedi ipsi multa & maxima auxilia; creavi quoque illum liberum ac Dominum suiipsius, ut possit eligere pro suo arbitrio bonum vel malum, quod maluerit: & cum talem condiderim hominem, non erat decens, ut ipsum cogerem traheremque ad cœlum violentè.

V. Parte I. l. 5. c. 9. §. 1. An. 1599. dum pestis affligeret Hispaniam, rogabam Divinam Majestatem, & tandem illi dixi: Ergone mi Domine, tui servi debent pati, & puniri cum peccatoribus? Respondit Divina Majestas: nonne verò scis, quòd ego possim formare vestem, quæ omnibus conveniat? Hoc Dominus Venerabili Marinæ dixit, quia communibus afflictionibus ità puniuntur mali, ut simul perficiantur boni.

Parte I. l. 5. c. 10. §. 1. An. 1619. in Decembri dixit mihi Dominus: Anima mea, video te afflictam & contristatam, ac mærentem propter vehementem dolorem, quem percipis ex eo, quòd videas vilipendi & offendi gloriam meam, ac honorem, quantum est in hominibus, atque propter tam multas animas, quæ versantur in statu æternæ damnationis. Plurimum mihi id placet, & compatior tibi. Verumtamen gaude in me, & bono esto animo ob id, quod tibi dicam. Scias, velim universam humanam naturam esse unum corpus, cujus Anima & Vita sunt mei Justi, & mei Sancti, quos mihi elegi jam inde à mea æternitate. In ista anima & hac vita istius corporis defixos habeo oculos, & obtutum: atque hi sunt, qui manent in meo corde, quòsque ego in illo gero, & quibus oblector, glorior, ac recreor. Ablatà verò istà animà ac vità ejusdem corporis, quæ est formosa, & sponsa mea ac subsistit, habetque gratiam in oculis meis, omnia reliqua membra putrida, & vitiata hujus corporis naturæ humanæ; non curo, nec mihi displicet, quòd cum sint talia, propter suam malitiam & culpam, abscindantur in ignem, quamvis non sinè dolore & afflictione animæ. Ità facit bonus & sapiens Medicus, qui attendens ad id, quod præcipuè prodest infirmo, estq; maximum ac optimum, nimirum ad vitam hominis & ipsius substantiam; cæterum non curat, quòd abscindantur, vel adurantur quæcunque membra putrida, & vitiata illius corporis. Quocirca anima mea, noli consternari, vel animo concidere, sed quiescendo in meo corde &

& mente mea divina, habe solatium in me & in operibus meis ac judicijs altissimis, & secretissimis meæ Justitiæ, in quibus omnibus relucet ac resplendet mea Bonitas & Misericordia, quem admodum dixit Moyses, quando me vidit.

VI. Parte 1. l. 5. c. 10. §. 2. An. 1622. in Martio deducta fui ad cœlum, ubi mihi Divina Majestas dixit: pete quod tibi placet, quia id faciam. Ego avidissimè ex divina inspiratione respondi. Mi Domine salutem omnium hominum peto; quod petebam iterando inter ardentia desideria & affectus identidem: salutem omnium hominum, salutem omnium hominum peto Domine. Hoc dicto fui summo impetu projecta ad meum locum, ac si aliquis projiceret gravissimum lapidem, qui rueret ad suum centrum. Ego tamen non solum non fui consternata, neque concidi animo, ut potius videns me in meo loco, animosius ac ardentius repetierim: Domine salutem omnium hominum à te peto; & attollebam vocem repetendo eandem petitionem: quin imò etiamsi deturbarer ad infernum, peterem salutem hominum. Interea mihi comparuerunt duo sancti Angeli ex superioribus, & gravissimis, interrogaveruntque me: Anima quid vis? ego dicebam: salutem omnium hominum. Illi mihi dixerunt: ducemus te iterum ad Dominum diversâ viâ & facili, ut progrediaris absque defatigatione; ibi pete quod volueris. Duxerunt me quâdam viâ tam pulchrâ, amænâ, & gratiosâ, ut absque ulla molestia pervenerim ad conspectum DEI. Divina Majestas me suscepit peramantèr, dixitque mihi: Anima dic mihi, quid velis? ego respondi: mi Domine, ut salventur omnes homines. Dominus autem reposuit: multum petis; adverte me, licet sim omnipotens, & possim omnes salvare, nihilominus operari juxta mea divina decreta, relicta hominibus libertate, ut pro sua voluntate disponant de sua salute. Non cogo ipsos; dedi illis liberum arbitrium, & multi sunt, qui nolunt bene uti meâ misericordiâ, nec respondere meis voca-

tionibus, suntque mihi refractarij. Fieretne bene, si aliquis Rex ignosceret omnibus suis subditis rebelibus, qui contra ipsum conspiravissent abutentes ipsius benignitate? certè non. Tempera tibi, pete aliquid aliud. Ego respondi: quod peto, Domine est, ut salves millena millia millium. Adhuc non bene petis; est mulum; pete aliquid speciatim, dixit Dominus: accede, nonne tibi sufficiet, si salvem tot homines, quot potest capere aliquod regnum? Huic dicto divino me oportebat acquiescere. Et Dominus mihi pollicitus est se id facturum: quo fui contenta.

VII. Parte 1. l. 5. c. 10. §. 5. An. 1622. in Julio allocutus est Dominus meam animam peramanter & benignè compatiensque mihi propter meos dolores dixit: Considera quid à me velis, & pete à me quod volueris. Audiens mea anima hæc divina verba fuit repleta summo solatio, & incepti alta voce dicere: DEUS mi, & Domine mi, ac omne Bonum meum, quod mihi à te peto dari, quodque mihi debes concedere, est, ut impartiaris tuam sanctam Benedictionem ex tua infinita bonitate omnibus qui se mihi commendaverunt: neque aliter ullo modo fieri oportet, sed necesse est, ut ipsis bene preceris. Et cum eo fervore & affectu expandebam mea brachia, valdeque procul in altum elevata clamabam & dicebam: Filij mei, animæ meæ (quod aliàs nunquam dico) venite huc quàm citissimè, nolite morari (& advocabam illos manibus) ut suscipiatis benedictionem, vestri magni DEI, ac Domini. Ad hanc invitationem & vocem meæ animæ veniebant omnes celeriter, cum suis Angelis Custodibus, qui ipsos adducebant. Agnovi quosdam ex illis, qui advenerant, & simul sumpti erant plures, quàm ut possent locum habere in aliquo magno templo. Cùm viderem omnes illas animas circa me, & coram Christo Domino affluebam ingenti solatio, & prostrata ante ipsius Majestatem repetebam meam petitionem, ac dicebam: videſne eos hic mi DEUS ac

Do-

Domine, da illis benedictionem. Audivit me Dominus perquam amabiliter, ac amænum exhibendo suum divinum vul-tum & amantissimè, gravissimeque his meam animam est allo-cutus divinis verbis: quid est hoc Anima? quis te huc adduxit cum ista vehementia tam ferventium affectuum? quid vis & petis? quiesce jam, neque sis ita præceps, & attende bene quid petas: volo enim tibi dare tempus loquendi. Ad hæc dicta tam divina & mirabilia, quibus DEUS meam animam fuerat affatus, ipsa pro suo fervore respondit: DEUS mi, & Domine mi, ego bene scio, quid petam: est enim ut pro tua infinita bonitate, & misericordia, impertiaris tuam sacram benedictionem omnibus istis animabus, quæ hic adsunt in divino tuo conspectu. Bene dicis, Anima (ajebat Dominus) ego quæro, an fortè scias, ipsas omnes habere dispositionem requisitam, ut illis præstem istam gratiam & misericordiam, quam tu petis? Mea anima respon-dit: mi Domine non habes, quod opponas meæ petitioni, hanc enim gratiam hodie infallibiliter à te præstari oportet propter tuam bonitatem & misericordiam. Tum mihi dixit Dominus: Visne forsitan, ut transgrediar leges, jam inde à mea æternitate consignatas in tabulario meæ Sapientiæ, ac Divinæ Justitiæ, quas nequeo præterire? nimirum, creaturam debere esse dispo-sitam meâ gratiâ & auxilio, ut ipsi conferam novas gratias ac misericordias, & illa easdem à me suscipiat? Etiam si enim mea potentia sit infinita, quâ possum facere omnia quæ volo; leges tamen meæ stabilitæ sunt, quales esse dixi. Quid respondes ad hoc? quando mea anima audivit ista dicentem suum DEUM, prostravit se & obmutuit, nesciens quid diceret, atque ut erat attonita ac obstupefacta, aspiciebat quaquaversum, ubi essent ipsius sancti Angeli, sed ipsi tacebant, & nihil loquebantur. Interea mea anima abruptit silentium, & cum magno fervore ac vehementia dixit suo DEO: Domine mi & DEUS mi, bene, omnia dixisti; verumtamen ego me ijs non implico, neque illa

cupio intelligere, & nolo aliud facere, quàm conjicere oculos in tuam infinitam bonitatem, potentiam & sapientiam ac misericordiam: cæteroquin potes facere quicquid vis, quòdque est conforme tuæ sanctissimæ voluntati. Hoc ego arripio, & huc recurro, neque aliud quidquam scio: Domine mi, rogo te per te ipsum, ut in mei gratiam preceris omnibus istis humilibus; & interea vocabam omnes celeriter dicendo: venite citò filij mei, ad suscipiendam benedictionem nostri DEI. Audivit Dominus hos meæ animæ ardores diu, & cum summa complacentia atque gravitate dixit: verè es valde fervens, Anima mea, & convicisti me ideòque quàm promptissimè & libenter volo facere, quod à me petis. Statim autem atq; hoc dixit Dominus, omnes illi sancti Angeli præsentés inchoaverunt quandam divinam & coelestem musicam, atque paulò post cessaverunt, ac tum Majestas JESU Christi nostri Domini DEI & Hominis veri cum summa autoritate dedit tres benedictiones omnibus ijs animabus quæ aderant, dicendo latine: Benedicat vos omnipotens DEUS Pater, & Filius, & Spiritus Sanctus. Et omnes illi beati Spiritus suo coelesti cantu responderunt: Amen. Deinde surrexerunt omnes eæ creaturæ, quæ se prostraverant, ut susciperent benedictionem sui DEI, & fuerunt abductæ à suis Angelis Custodibus, qui ipsas adduxerant ad suscipiendam illam gratiam DEI. Ego manñi in magno raptu, & quando ad me redij, reperi me plenissimam solatio, agebámque magnas gratias DEO, pro omnibus operibus ipsius ac misericordijs. Ipse sit benedictus in æternum. Amen.

VIII. Parte 1. l. 5. c. 22. §. 1. Postquam cognovissem aliquid de sacratissimis Libri Sapientiæ DEI mysterijs, vidi venientem per illa coelestia tabernacula quandam processionem ordinatissimam Beatorum coeli incolarum, quam sequebatur Majestas Christi JESU, ac Sanctissima ipsius Mater; & cum procederent prætergredebantur suo ordine illum coelestem Librum.

Pri-

Primus ex ijs Sanctis advenientibus accessit, & conversus reverenter ad Librum, qui erat apertus, substitit tantisper valdè attentè ipsum intuendo, intelligensque in tot illis divinis mysterijs plura indicari, quàm ut eorum posset assequi, aut penetrare magnitudinem, contraxit humeros & progressus est ulterius. Deinde suo ordine reliqui sequentes, idem faciebant quod primus; quorum alij percipiebant plus, alij minùs pro rata sapientiæ sibi communicatæ ab illo divino fonte. Postquam multi transivissent mihi ignoti, advenerunt alij, quos agnoscebam, quia illos à me DEUS volebat agnosci. Primus fuit Gloriosus S. Laurentius Martyr, à quo ubi cum magna reverentia accessisset ad sacratissimum Librum, & ipsum aspexisset per attentè, adverti percipi multò ampliùs ex illis divinis Mysterijs, quàm ab alijs Sanctis, qui transiverant tametsi contrahens suos humeros sicut alij, indicaverit se non posse assequi incomprehensibilem altitudinem eorum, quæ contemplabatur. Prætergresso sancto Laurentio, venit S. Apostolus Petrus, & post præstitam suam reverentiam detinuit se ibi modicùm, aspiciendo Librum cum magna attentione, intellexitque longè plus, quàm ullus reliquorum Sanctorum, qui præterierant, adeò ut ego mirarer tam sublimem ejus sapientiam, & modum intelligendi illa divina Mysteria: sed nihilominus & ipse contractis suis humeris quemadmodum cæteri Sancti processit ulterius, significans se non assequi omnem ipsorum sublimitatem. Postea venit Sacratissima Virgo Domina nostra, & appropinquavit cum profundissima reverentia sacro Libro aspiciendo illum aliquamdiu quàm attentissimè, & cognovit divina mysteria multò sublimiùs quàm omnes simul sumti Sancti, qui transiverant, quamvis & suo modo humeros contrahens, quasi non comprehenderet omnem illorum amplitudinem, processit ulterius: venitq; Majestas JESU Christi Domini nostri, qui se convertit ad sacratissimum Librum, & illum aspexit, statimque intellexit, & com-
pre-

prehendit perfectissimè omnia mysteria in eo contenta ac transivit, non contrahendo humeros, neque ullum præbendo signū, quod non comprehendisset integrè omnem illorum incomprehensibilem magnitudinem; imò significabat ea à se comprehendendi, tanquam ab eorundem Domino ac Authore, in cujus divino pectore & Sacratissima Persona essent peracta & continerentur. Postquam Christus Dominus transivisset tota illa sacra Sanctorum pompa abivit ad suum locum pacis, quietis & gloriæ æternæ cum Beatissima Virgine, & Majestate Sacratissimi ejus Filij, DEI ac Domini nostri.

IX. Parte 2. l. 2. c. 21. An. 1626. Dum affligerer, ac dolerem ob allatum nuncium de inundationibus, quas est passa Hispalis, & Salmantica, deque tot facultatum & hominum jactura, tenerè proximis meis compatiens, totòque affectu illos DEO commendans vidi Dominum, qui me benignissimè vocabat. Et utens suâ potentiâ me duxit ad cœlestem Jerosolymam, ostenditque mihi nonnullas Animas, quæ paulò antè fuerant ingressæ in eam cœlestem Civitatem, & erant illorum, qui in prædictorum locorum inundationibus fuerant submersi. Erant pulcherrimæ & contentissimæ, utpote fruentes eo summo Bono. Tunc mihi dixit Dominus: ecce noli cogitare, nihil aliud fuisse, quàm rigorem, siquidem etiam exercui clementiam. Animæ, quas hic vides, fuerunt hâc viâ salvatæ, & versatæ fuissent in gravi periculo damnationis, si diutius in mundo mansissent. Æterna mea Providentia junctæ meæ Clementiæ prævenit hanc malam sortem educendo illas ex vita mortali, constitutas in mea gratia. Quin & eorum quoque sum misertus, qui sunt damnati: nam si vixissent diutius, multiplicavissent sua peccata, quibus fuissent promeriti majorem pœnam eâ, quam nunc patiuntur. Audivi, quod edocebar à Domino, & venerando altissima ipsius judicia, laudavi immensam ejusdem misericordiam.

X. Par-

X. Parte 2. l. 2. c. 38. Dum aliquando manè orarem, accendit DEUS meam animam, ut ardentissimè desiderarem salutem animarum. Audivi DEUM cum incredibili benignitate mihi dicentem: postula à me, quidquid volueris, quia tibi omnia concedam. Dum hoc audirem dici à DEO, visa est mihi mea anima non esse sui compos, & nesciebam, quomodo mihi esset petendum, quod adeò ardentè desiderabam, salutem nempe totius mundi. Nihilominus cum jam vellem durante meâ turbatione loqui, conspexi Dominum, qui gravissimo gestu, acsi digitum apponeret labijs, mihi dixit: Expecta Anima, tace, quid vis petere? nunquid ignoras non debere, nec posse fieri, quod dicis, nisi suo tempore? Quia autem jam meo affectu tantopere extra me rapta fueram, statim respondi: ah mi Domine DEUS, noli mihi id dicere: noli mihi ità loqui mi Domine. Si namque tu ista expendis tanquam DEUS, ac ad libellam altissimorum tuorum judiciorum; ego tamen ea non aliter considero, quàm ut misera creatura cupida salutis animarum, ideòque præsta mihi, quod promissisti mi DEUS: ego enim plus nescio, neque amplius intelligo. Expecta anima, reposuit Dominus, expecta; implebo, quod tibi sum pollicitus, sed non aliter, quàm petiveris in exordio tuæ orationis; quia re verâ nihil aliud petebas, quàm auxilia & subsidia pro omnibus animabus Fidelium, præfertim autem illorum Catholicorum, qui degunt inter Infideles, & eorundem Infidelium, qui exoptant lumen Evangelij. Hoc à me ab initio postulabas, revoca id tibi in mentem, hoc tibi à me præstabitur.

XI. His divinis verbis fu. • mea anima recreata, & velut absorpta in suo DEO; atque in hoc statu vidi subito Infidelium, iisque immixtas aliquas Fidelium Animas ità ad infernum descendentes, sicut quando ningit, ac densissimi flocci decidunt ad terram. Sensi vehementissimam angustiam & afflictionem, videndo horribile spectaculum, & cum incredibili dolore in-

cepi dicere : quid est hoc mi DEUS, quid est hoc ? estne possibile ut sic disperdatur, & malè impendatur pretium & fructus sanguinis JESU Christi ? Noli affligi anima, noli affligi, respondit DEUS : siquidem fructus & valor hujus pretiosissimi sanguinis non potest disperdi, & malè impendi. Non diceretur perdi thesauros mundi, si omnes congererentur ad pulchram aliquam grandem & munitam urbem : non perduntur itaque etiam fructus illius sanguinis, eò quòd ipsos, tanquam in munita urbe, recondiderim in Catholica Romana Ecclesia. Bene est, mi DEUS, aiebam ego, optimè est : verum quandoquidem es infinite bonus, sapiens, & potens, quare permittis tot animas damnari, prout nunc vidi, cum absolutè omnes possis salvare ? Anima, respondit Dominus, quando creavi hominem, condidi illum mei ipsius capacem, dedi ei liberum arbitrium, unà cum omnibus necessarijs, & sufficientibus ad salutem auxilijs, majoremque profectum : ad omnes suo modo pervenit lumen Evangelij : atque hæc auxilia meæ gratiæ sunt adeò sufficientia, ad finem, ad quem illos destinavi, ut nemo de me possit conqueri. Neminem creavi ut damnaretur, sed unumquemque ut salvaretur, dummodo ipse sibi non defuerit. Adverte Anima, quando ampla & nitida civitas ædificatur, non sufficit ut extruantur palatia regia, & formentur plateæ ac sumptuosæ fabricæ, relinquantur quoq; & adornentur amæna fora una cum alijs hujusmodi operibus, sed necesse est pariter, reperiri in ea cloacas & meatus pro educenda sordium colluvie, qui quidem sunt utilissimi ad conservationem urbis, & munditiem. Ità in mea Ecclesia, quæ est mea civitas, & regitur à Spiritu Sancto, necessariae sunt, ac debent esse cloacæ, quibus devehantur sordes ad infernum, ut purgetur mundus & Respublica Christiana, quæ totius mundi intelligitur nomine, purificetur. Nunc te consolabor Anima, conferendo omnibus Fidelibus existentibus in gratia nova auxilia, ut magis proficiant & peculiarissi-

ma

ma dona ijs, qui fuerint dispositi ad suscipiendas meas misericordias.

XII. Mea anima multum recreabatur eo, quod audiebat dici à suo Domino; præ desiderio tamen, quo tenebar, ut omnes salvarentur, me non potui continere, quin dicerem: sit ita mi DEUS; sed quid dabis constitutis in peccato mortali, & expertibus tuæ gratiæ? da illis aliquid boni mi Domine, per temetipsum te obsecro. Bene est Anima, dixit Dominus: verum videtur tibi fore bonum, si quispiam dives ac potens Princeps vilipendendo suos thesauros, & lapides pretiosos eos obiceret canibus, ut illos bestiali suo fætoe inficerent, & confringerent, atque inutiliter & abominabiliter deglutirent? bonumne esset, ut eximius aliquis Doctor conscendens cathedram, & perspectos habens auditores, sciens esse simplices, ac instar bestiarum incapaces discendi, ipsis sublimia & subtilia scientiæ argumenta, cum prodiga jactura, exponeret? fieretne id bene? non profecto. Atqui ita suo modo fieret, si ego mea dona & misericordias effunderem in dura & inepta corda, in animas surdas & cæcas, ad audiendas mearum inspirationum voces, & videndum lumen mearum veritatum. Mi Domine replicui ego, quæ dicis sunt infinitæ authoritatis & Veritatis; sed rogo te, quam demississimè possum, ut cum tua bonitas sit tam immensa, sisque præditus sapientiâ & potentiâ pro disponendis iisdem istis animabus, illas efficaciter juves tuis inspirationibus, & nova tua dona ipsis concedas. Verè Anima, respondit Dominus constringis me tuis affectibus, nè intermittam te exaudire, ut acceptem tuam petitionem, teque consoletur: ac proinde dico te à me exaudiendam in eo, quod petis. O mi magne DEUS & mi Domine, subjunxi, noli id dicere, noli sic loqui: scis enim me non esse eam, quæ te constringam, atque convincam; sed hoc facit tua immensa bonitas & amantissimum desiderium, quod habes, ut nobis præstes misericordias. Unde fit, ut effica-

citer tangas ac penetres animam, quam eligis, & accendas charitate ac amore tui, suorumque proximorum; quò sic à divina manu tua disposita vim habeat & efficaciam in suis ad te precibus. Sis semper benedictus propter tantas miserationes.

CAPUT IV.

De Sanctissima TRINITATE.

I.

PLena est vita Venerabilis Virginis Mariæ augustissimo hoc mysterio, quod etsi sit ob altitudinem suam ineffabile, adeoque Ven. Marina innumeris vicibus protestetur se illa, quæ de hoc mysterio rescivit, effari non posse; nihilominus quæ nostro captui poterant accommodari, non pauca, eleganter ad nostrum solatium & illuminationem, ac in Fide Catholica confirmationem protulit, ex quibus aliqua, tanquam gemmas pretiosas seligemus.

Parte I. l. I. c. I I. §. 3. Dixit mihi DEUS: veni mecum, & quiesces modicum: docebo te quoddam secretum cordis mei, ob quod in me recreaberis: atque dum hoc diceret, univit me secum invenique me in pectore Patris æterni, ubi mihi ostensum fuit clarissimè & manifestissimè pro meo captu, mysterium Beatissimæ Trinitatis, ac æterna processio Verbi Divini quâ procedit à Patre, & quomodo ab istis duabus personis Patre & Filio, per amorem quendam infinitum, quo se amant, procedit Divina Persona Spiritûs Sancti! Mansi satis diu in ista cogitatione cum extraordinaria admiratione: magis tamen stupebam, quomodo Pater intelligendo & comprehendendo seipsum produceret Verbum Divinum.

II. Parte I. l. 3. c. 3. §. 3. Agendo quâdam vice cum DEO, vidi tria elegantissima specula; in duobus erant duæ facies & in tertio Sol splendidissimus, in quo mihi Dominus per specialissimum

lum lumen manifestavit mysterium Sanctissimæ Trinitatis. In duobus speculis cognovi, quomodo Pater generet Filium, communicando illi totam suam Divinitatem, ita ut sint unus DEUS. In tertio, quomodo Pater & Filius producant Spiritum Sanctum, qui est unus DEUS cum ipsis, deditque mihi ejusdem Majestas specialissimam secum unionem in his tribus Divinis Personis, durantem multis diebus, quibus continuo intra DEUM manebam.

Subjicit huic Visioni suam explicationem Venerabilis P. Ludovicus de Ponte: Ista visio trium speculorum, quæ significabant distinctionem trium Divinarum Personarum, magis declaratur in hoc addito, quod duæ facies repræsentaverint Filium per æternam generationem, esse quasi imaginem & similitudinem sui Patris in sua Divina Essentia, quæ est beatissima, facies DEI; Spiritum Sanctum verò spectata ejus processione, non procedere tanquam imaginem Patris & Filij, sed tanquam infinitum ignem amoris, repræsentatum per Solem, quamvis sit idem DEUS cum utroque & habeat eandem cum ipsis faciem.

III. Parte 1. l. 3. c. 9. §. 2. Cum audirem dici in templo versum Gloria Patri; illuminata à DEO vidi illius divinas tres Personas, & intellexi Patrem non esse Filium, nec esse Filium, Patrem, neque Spiritum Sanctum Patrem vel Filium. Contuli me ad sumendum Christum Dominum, atque cum illum sumerem, dedit mihi Divina Majestas, singulare lumen & cognitionem ejusdem mysterij, propter quam quando coram illo versor, contremisco, vellémque me intra terram abdere: & nihilominus amo toto corde meo infinitam bonitatem ac sapientiam tanti Domini.

IV. Parte 2. l. 1. c. 14. Postquam ardentissima mea sancta desideria varia proposuissém, inveni me in conspectu DEI, ubi Dominus Majestatis coniectis in me suis oculis dixit: de ijs, quæ tanto affectu postulas, videbimus. Et postquam se ille Domi-

nus Gloriæ, ac Pater æternus convertisset ad sacratissimas Personas Verbi Divini & Spiritûs Sancti præsentē Majestate JESU Christi Domini nostri DEI & Homini veri, Divinæ eæ Personæ quasi inter se conferendo dicebant: verè hæc anima & tota ista creatura est quantum ad ipsam attinet tam bene disposita, ut illi, quod petit, interveniente gratia, quæ illi negari nequit, concedatur. Et subito, quasi idcirco se ille Dominus Majestatis ad me convertit, dixitque: audivimus, anima, tuam humilem & ferventem petitionem, atque propter bonitatem nostram, atque misericordiam, tuamque bonam dispositionem tibi libenter & amanter, quod à nobis petivisti, in perpetuum concedimus. Quamobrem quodque ita sit futurum, accipe, Anima, nostram benedictionem; simulque mihi illam Divina Majestas impertita est.

V. Parte 2. l. 1. c. 20. Anno 1631. 27. Junij jussu accedere ad convivium in mensa quadam mystica, ubi ad caput mensæ consedit Beatissima Trinitas, atque ad ejus dextram Majestas JESU Christi Domini nostri veri DEI & Homini. Itémque Sanctissima Virgo Domina nostra cum glorioso S. Joachimo, S. Anna, & S. Josepho, multusque ex SS. Patriarchis & Prophetis, aliisque Sanctis ex supremis. Cibus in ea mensa appositus erat admirabilissimus ac divinus, & quantum mea anima assequitur ipsemet DEUS, qui est sustentatio & vita (ut sic dicamus) sui ipsius propter suum Esse à nemine dependens, & Sustentatio ac Vita nostra, Principium & Finis nostri Esse, motuum & actionum tam naturalium, quàm supernaturalium. Et observavi, quòd tres illæ Divinæ Personæ se meæ animæ interdum spectandas præberent, instar trium sublimissimorum Angelorum. Verùm advertebam quoque me pariter, cum se mihi repræsentarent quasi Angelos, in iisdem agnoscere id, quod erat, hoc est unam in tribus realiter distinctis Personis Divinitatem. Quocirca etiam illas in illa specie Angelorum adorabam

rabam modo ut unum DEUM, aliàs ut tres Personas. Ex ijs tribus supremis Angelis, qui repræsentabant, ut dico, Sanctissimam Trinitatem, is qui medium occupabat locum, distribuit cibum, imprimisque singulos porrexit bolos sibi utrinque assidentibus, ac deinde Sacratissimæ Humanitati JESU Christi Domini nostri, quo, ut ego intelligo, indicabatur, qualiter Pater æternus sit origo & fons, à quo Divina Essentia communicatur Filio & Spiritui Sancto, quodque Christus Dominus noster quæ homo (quia est Divino Verbo unitus) obtineat primum locum, & præ omnibus creaturis in gradu incomparabiliter perfectissimo participet dona DEI. Postea dabat suo ordine omnibus convivis, quod juxta cujusque capacitem singulis conveniebat. Adverti, quod ille Angelus medius repræsentans sicut dixi, Personam Patris æterni, dum dispensaret cum divinum cibum, duobus ipsum tantummodo digitis sumeret ex quadam velut patena: & intelligo per hos duos digitos fuisse significatas reliquas duas divinas personas, quæ unâ cum Patre impertiuntur hæc mystica dona suis creaturis, & patenam fuisse figuram divinitatis, ac divinæ naturæ communis omnibus tribus Sacrosanctis Personis, quæ in ijs est principium operum, unde tanquam ex causa procedunt effectus, quos DEUS in suis creaturis operatur. Mysterium præ cæteris meæ animæ manifestarum illud erat, quod sublimi cognitione percepim, qualiter DEUS se comprehendendo semet amet, seque ipso fruatur, sine dependentia ab ulla creatura, eò quod sit supremus DEUS & Dominus universorum, à quo omnia creata in suo Esse dependent & in conservatione: atque omnia summa & amabili providentiæ secundum ipsius bonitatem ac misericordiam, & uniuscujusque indigentiam justissimè ac perfectissimè gubernentur.

CAPUT V.*De Divinis Personis in particulari.***I.**

PArte 1. l. 2. c. 21. §. 4. Feriâ quartâ ante Pentecosten, horâ tertiâ matutinâ 20 Maij An. 1617. vidi tres Divinas Personas quasi viderem aliquam imaginem cooperatam delicato velo. Inter Angelos erant quatuor, qui tenebant vestem pretiosissimam, & quodammodo divinam, in qua vidi tria insignia seu notas Sanctissimæ Trinitatis, & erat Sol, Castellum, ac Palma. Castellum repræsentabat Patrem, Sol Filium, & Palma Spiritum Sanctum. Postea me est allocutus Dominus cum magna Majestate, dixitque mihi hæc verba: dic Anima, an te mihi ex toto tuo tradas corde, & cum firmo proposito me nunquam deserendi? Ego tremebam, & respondi animosissimè: ita Domine. Divina Majestas autem dixit: itaque te suscipio in perpetuum in meo nomine, & in nomine mei Filij ac Spiritûs Sancti. Deinde id ipsum Dominus dixit secundò, & ego similiter respondi. Atque tum tertiò dixit loquens nomine omnium trium Personarum: dic Filia mea & Sponsa, ac Amica mea tradisne te mihi ex toto tuo corde, & cum firmo decreto de me nunquam deserendo? cui ego: ita Domine: intellexiq; nomen filiæ referri ad Patrem, sponsæ ad Filium, amicæ ad Spiritum Sanctum. Tandem dixit Dominus: itaque te suscipio in perpetuum in meo nomine, & mei Filij, & Spiritûs Sancti: atque ad singula ea nomina mihi impertiebatur suam benedictionem. Et post hæc omnia venerunt quatuor Angeli, qui me induerunt illâ veste eleganti cum maxima solennitate ac musicâ: & intellexi eâ veste immortalitatem significari atque gloriam animæ. Imposuerunt etiam capiti meo coronam seu sertum, & plerisque digitis inseruerunt annulos pre-

pretiosissimos, videbanturque mihi calceamenta pedum splendere instar auri.

II. Parte 1. l. 3. c. 9. §. 3. In Januario Anni 1622. fui lata ab Angelis ad conspectum Domini DEI, nullâ velati imagine, ubi mihi sunt ostensa magnalia Bonitatis ac Essentiæ Divinæ Trinæ ac Unius. Tulerunt me deinde ad Personam Patris Æterni, & posuerunt me intra ipsius Esse Divinum, ubi cognovi illam Divinam Personam ut distinctam à reliquis, & in ea illius Divinum Esse. Deinde sum lata ad Personam Verbi æterni, constitueruntq; me intra divinum ejus Esse. Et postea ad Personam Spiritus Sancti, similiterque me introduxerunt intra ipsius Esse divinum, ut cognoscerem, in quavis persona divinam naturam & Esse divinum, quantum conceditur capacitati creaturæ, & quidem tam clarè, ut mihi viderer non habere Fidem, quâ creditur hoc divinum mysterium, tametsi illam haberem. Post hoc vidi sanctissimam Humanitatem Christi Domini, qui ascendit ad quoddam Castellum ex purissimo constructum auro resplendens undique, clausum & altum, quamvis non adeò latum, atque Angelis adjuvantibus ascendi post Dominum. Postquam venisset ad locum eminentem Castelli, dixit mihi ipsius Majestas: Anima aperi oculos, & aspice. Incepi aspicere, ac vidi immensam altitudinem: obstupui, fuique consternata ac attonita videndo magnalia, quæ mihi fuerunt ibi ostensa, cum singularissimo lumine, quod mihi Dominus contulit pro cognoscenda Divinitate, Magnitudine, Potentiâ, Pulchritudine, & Sapientiâ DEI Infiniti, Immensi, Omnipotentis. Multò mihi ampliùs hîc fuit manifestatum, quàm priùs. Omnia erant DEUS & ampliùs DEUS; & hîc fui ità absorpta, ut non essem mei compos latis diu. Dominus descendit per quosdam quasi gradus ex Castello, quod jam erat apertum, & Angeli me per eisdem deduxerunt: & Dominus se contulit ad priorem locum, me verò collocaverunt ad ipsius pedes, & coram Bea-

tissima Trinitate. Ibi mihi dixit Dominus : jam est tempus Anima, ut redeas ad tuum angulum, sed nolo te reverti vacuam. Pater æternus dignatus est mihi dare quoddam cimelium, imposuitque illud quasi intra cor meum, quod videbatur esse apertum. Fuit autem quædam Potentia ad resistendum tentationibus diaboli, & ad ferendam crucem, atque afflictiones, quas mihi Dominus esset oblaturus cum pace, gaudio, ac fructu meæ animæ. Et Verbum æternum etiam mihi dedit cimelium, quod inferuit pectori; & fuit donum Sapientiæ ad eundem effectum. Spiritus verò Sanctus mihi dedit donum Amoris ad accendendam magis meam animam amore DEI. Fui summo repleta solatio, plurimumque confortata, ob hæc tam pretiosa cimelia.

III. Parte 1. l. 5. c. 8. §. 5. Die Sanctissimæ Trinitatis, in Majo An. 1617. fui rapta in Aulam cœlestem, ubi tantum vidi meos quatuor Angelos, & beatos, quasi eminus confidentes in suis thronis. Dixi meis Angelis: ubi est magnus Rex DEUS Majestatis, quod ipsum non videam? responderunt mihi: est in Tribunali suorum divinorum ac arcanorum Judiciorum. Et derepente vidi quasi reducto quopiam velo Sanctissimam Trinitatem more solito: atque JESUM Christum Dominum nostrum, intercedentem apud illam pro peccatoribus, allegantem ipsi obtinuit à se pro illis facta. Et Spiritus Sanctus gratiam sibi esse ejus orationem ostendebat, sed Pater æternus dicebat, tribuendum esse lotam divinæ Justitiæ.

IV. Parte 2. l. 1. c. 16. pag. 68. An. 1625. 24. Julij, vidi derepente parari à meis Sanctis Angelis magnâ celeritate mensulam eandemque nitidissime instructam repleri odoriferis floribus, & parvis variorum fructuum. Deinde vidi, quod ad mensule caput gravissima cum Majestate affederit Sacratissima Persona Spiritus Sancti, speciem gerens humanam, in qua tamten erat observare illam subtilitatem, de qua alias dixi ac diversitatem, quâ (& verò maxime) differt à corporibus, quæ
allu-

assumunt sancti Angeli & Animæ beatæ, ut converfentur cum hominibus. Siquidem umbratile corpus, in quo se, DEUS exhibet videndum, est absq; comparatione subtilius & deliquius. In eadem figura mihi etiam comparuerunt aliæ duæ personæ, repræsentantes mihi quodam arcanissimo, sed aptissimo modo, dogma sanctæ Fidei de Unitate Essentiæ in Trinitate Personarum. In hoc tamen opere, quia DEUS illud specialiter attribui voluit Spiritui Sancto, magis se manifestabat hæc Divina Persona, quam reliquæ duæ.

CAPUT VI.

De Spiritu Sancto.

I.

PARTE 1. l. 2. c. 24. In Martio Anni 1623. audiui meos Dominos Angelos colloquentes ac dicentes: Magnus DEUS Majestatis venit ad suam Sponsam, disponamus nos. Aliquantò post audiui ingentem strepitum tympanorum, ac tubarum, & musicam coelestem omnibus absolutam numeris, ac auditu jucundam, vidique aperiri cœlos, & omnem illam coelestem Angelorum, ac Animarum Beatarum Aulam descendentium ad terram, versùs meum cubiculum, quasi se paulatim dimitterent cum gravitate & authoritate. Alij veniebant splendidissimè, & elegantissimè ornati, alij armati lucidissimis armis, habentes in manibus lanceas; alij ferentes evaginatores gladios: alij apparebant sapientissimi, alij clementissimi, alij ardentissimi amore DEI; uno verbo, omnes portabant quædam quasi insignia divinorum Attributorum, quæ relucebant, & ego videbam in DEO. Omnes sequebatur Sacratissima Persona Spiritus Sancti, cum maxima Majestate. Et semper, quando me visitat, venit cum magno tumultu, ac svavi strepitu. Antequam ad me veniret Divina Majestas, mei Domini me crexerunt

runt in pedes, & induerunt veste eleganti albâ, *cujus manicæ* erant cæruleæ, texeruntque pallio pretioso cæruleo. Advenit Dominus, & salutavit me quàm amantissimè, dicendo: *benetibi* sit Sponsa, & Anima mea. Ego adeò stupebam, videndo tantam magnificentiam, ut illam tantùm fuerim contemplata, nihilque responderim. Divina quoque Majestas circumspectabat assistentes sibi duos Angelos cum duobus calathis, in quibus erant multa pretiosa cimelia. Accessit ad me Dominus, ac tum vidi comparentem quasi quandam manum, quâ ipse Dominus imposuit torquem meo collo, & pectori pretiosissimum cimelium, nec nò septem annulos manibus, coronam capiti, & in aures auriculis. Omnia sunt facta spiritualiter, cum magna gravitate & autoritate; atque ad singula, quæ mihi imponebat, dicebat Divina Majestas verba Latina, quæ ego non intelligebam, sed tantùm audiebam. Stupebam spectando talia mysteria, & sancti Angeli recreabantur videntes id, quod in me DEUS operabatur, qui se mecum subito arctè univit, & sic unitam me duxit secum ad cœlestem Jerosolymam, ascendente simul totâ illâ cœlesti Aula, eodem modo quo descenderat, & omnibus mirantibus ac stupehntibus, dum viderent talia opera DEL. Postquam eò pervenissemus, ostendit mihi Dominus totam illam cœlestem Civitatem. Fruita sum pro meo captu divinâ illâ Essentiâ, cum qua eram unita satis diu, & quia fueram sopita quodam somno spiritualissimo, quando fui expergefacta, seu redij ad me ex rapto, inveni me in meo angulo.

II. Parte 1. l. 2. c. 24. §. 2. Vidi patefieri cœlos, & omnem illam cœlestem Aulam descendentem ad terram, venientemque Dominum cum comitatu plurimorum Angelorum, qui erant nitidissimè ornati modis diversis, ab ijs, quibus ipsos exornatos fuisse dixi aliàs. Et Divina Majestas progrediebatur in specie lucidissimi Solis, qui habebat quasi duas facies, & mittebat divinos radios, alios quidem directos, alios autem latera-

terales; in medio verò veniebat spiritualissima imago Sacratissimæ Personæ Spiritûs Sancti. Radijs lateralibus feriebat adstantes Angelos, irradiando eorum pectora, & ibi illis imprimendo suam divinam Essentiam, ac divina Attributa, speciatim verò alijs insigne suæ misericordiæ, alijs clementiæ, benignitatis, bonitatis, amoris, potentiæ, pulchritudinis, sapientiæ, & justitiæ. Cùm hac pompa mihi appropinquabat Sol iste divinus, constititque duabus vel tribus circiter ulnis à loco, in quo ego eram, & inde radijs directis, quos evibrabat, attingit meam animam, posseditque me fortiter & suaviter.

III. Parte I. l. 3. c. 14. §. 4. In Vigilia Pentecostes, in Junio An. 1623. audiivi in cœlo ingentem strepitum, sicut soleo, & vidi descendentes plurimos Angelos, totamque Beatissimam Trinitatem, peculiariter verò agnovi Sacratissimam Personam Spiritûs Sancti, qui ad me veniens univit me secum, duxitque ita unitam ad cœlestem Patriam. Postquam illuc pervenissem, fui constituta in quodam loco eminenti, & cæpta est magna, quædam solennitas, quæ celebrabatur in cœlo in honorem totius Sanctissimæ Trinitatis, ac præsertim Spiritûs Sancti, cò quòd esset ipsi dicatus dies. Resonuit ingens strepitus campanarum, & multi Angeli dispergebant per pavementum illius cœli igneas lingvas splendidissimas; alij parvas fulgidissimas cruces, alij jactabant stellas & soles ad eum modum, quo hic ejiciuntur ignes artefacti in solennitatibus Sanctorum. Post hoc instituta fuit musica suavissima & divinissima Angelorum, concinentium hymnos in laudem totius Sanctissimæ Trinitatis, & speciatim Spiritûs Sancti. Tota illa cœlestis Aula videbatur ardere igne ac divinis splendoribus charitatis & amoris. Omnia denique collucebant, & ex illo divino Domino DEO, Trino & Uno, prodijt quidam Sol, qui erat figura Spiritûs Sancti, emittebatque ex se multos radios, quos ad me dirigebat, feriendo me ipsis, & per illos quasi intimè sum ingressa in illum divi-

num Solem, ibique fui veluti oppressa à Majestate DEI, & submersa in ea magnificentia, ut non sciverim de me, fruerer tamen illo summo Bono, pro meo capto. Hæc res satis diu duravit. Deinde dixit Dominus Angelis: accipite Angeli mei, istam creaturam, & reducite ipsam ad ipsius angulum. Verum pars superior meæ animæ mansit ibi, & huc deducta fuit pars animæ necessaria ad vivendum & operandum, ac patiendum.

CAPUT VII.

De septem donis Spiritûs Sancti.

I.

PARTE 1. l. 2. c. 22. §. 1. Feriâ secundâ ante Pentecosten, dum agerem cum DEO inter primam & secundam matutinam, me illuminavit ejusdem Majestas, ut agnoscerem misericordiam, mihi ab illa exhibendam; imprimenda videlicet intrâ meum pectus septem signa, & parvula vulnera; perque eam impressionem communicandam mihi virtutem septem donorum Spiritûs Sancti. Post tres quatuorve horas, vidi in cœlo, terram versûs, comparentes infinitos Angelos DEI, qui cum magno gaudio laudabant & benedicebant suum Creatorem. Inter cœlum & terram erat lux quædam clarissima, & gratissima nec non ventus suavis & quasi aureus, quamvis aliquantùm perstrepens. Intra istam lucem, & suavem ventum, apparuit quidam divinus, splendidus, & pulcherrimus Sol, qui ex se emittebat quasi coruscando radios igneos & aureos. Appropinquans mihi iste divinus Sol (cujus speciem assumpserat Sanctissima Persona Spiritûs Sancti) penetravit meum pectus cuspidè unius sui radij, afflictâ ac vulneratâ illâ parte, itâ ut vehementer sentirem tam internum, quàm externum dolorem; deinde idem divinus Sol mihi appropinquavit, quoadusque ilaberetur in meam animam & cor, attemperando hac ratione par-

partem molestiæ ac afflictionis, quâ fueram affecta ex ea impressione, unâque per arctam unionem meæ animæ cum suo DEO. Dum anima esset in hoc raptu, expergefecit illam sanctus ejus Angelus, fuitque per hanc divinam misericordiam repleta solatio ac illustrata; vehementer autem afflictâ & confRACTA natura, præsertim ob dolorem pedum, ac manuum & cordis: quia ex illa parva plaga pectoris procedebant quidam radis doloris, & afflictionis, qui excruciabant illas partes.

II. Subsequente postea Feriâ tertiâ, horâ octavâ matutinâ, agens cum DEO, vidi in cœlo; terram versùs sicut priori vice, infinitos Angelos, laudantes cum magno gaudiò Dominum. Et Dominus Majestatis Trinus in Personis, ac Unus in Essentia, se subito spectandum præbuit oculis meæ animæ, in hac specie. Sanctissima Persona Patris in forma humana, Persona verò Filij qualis ordinariè comparet, DEUS & Homo verus. Ex pectore & corde utriusque personæ prodibat divina Columna ignea inaurata, vehemens ac resplendens, quæ erat symbolum & figura Spiritus Sancti. Hæc divina Columna coruscabat ac emittebat ex se, cum forti ac suavi strepitu scintillas illius ignis comburentis. Videns id mea anima, valde timebat, cumque ita timeret, in momento attigit meum pectus una earum divinarum scintillarum, quæ illud vulneravit cum ingenti dolore, relicto ibi secundo signo, & parvo vulnere, juxta prius; statimque per modum unionis cum Spiritu Sancto attemperavit illam molestiam ac dolorem, quam in meo pectore & corde senseram ex ea impressione.

III. Sequenti Feriâ quartâ manè, dum agerem cum DEO, postquam præcessissent in cœlo eadem admiranda indicia, quæ reliquis vicibus, Angelicæ nempe laudes DEI, & lux clara ac resplendens, strepitus vehemens, & ventus suavis; vidi in specie candidæ & splendidæ nubeculæ Sacratissimam Personam Spiritus Sancti. Hæc divina nubes incepit instar pluvie emit-
tere

tere ex se infinitatem granorum, quasi margaritarum, & pretiosorum lapidum, qui diversorum erant colorum, & coruscare atque ejaculari parvos radios ignis, instar lingvarum, quorum, alij cadebant ad terram, & alij remanebant in aëre. Cum mea anima id valde admiraretur, & propterea esset vehementer afflicta, decidit unus ex illis mysticis radijs, & contingens me suâ extremitate in pectore, reliquit ibi tertium signum, seu parvum vulnus, juxta reliqua, ex quo ego tota percipiebam specialissimum dolorem, sed magis in manibus, ac pedibus & latere. Post hoc autem sensit mea anima blandum & suavem ventulum, qui refrigeravit, atque confortavit illas partes dolore affectas, & sic mansit abrepta in unione cum DEO, donec ad se rediret.

IV. Feriâ quintâ subsecutâ manē, agente me cum DEO, vidit mea anima sacratissimum mysterium Beatissimæ Trinitatis in ea specie, in qua alias, & quod ex pectore atque corde Christi Domini, ut est DEUS, prodiverint quidam veluti radij lucis, ac splendoris, qui erant symbolum & figura Spiritus S. Unâ istorum divinorum radiorum cuspidulâ tetigit ille Dominus meum pectus, relinquendo ibi impressum signum quartum juxta cætera, ac efficiendo in me eadem, quæ alias, & fui suavi animæ cum DEO unione recreata, desinitque mysterium.

V. Immediatè sequenti Feriâ sextâ manē agens cum DEO, conspexi divinum quendam Solem resplendentem, qui apparuit inter cælum & terram cum omnibus & singulis mysterijs, quæ videram primâ vice: tantum jam Sol in medio suæ maximæ lucis & claritatis habebat crucem flavam, & ex eadem mystica cruce prodibant scintillæ cujusdam divini ignis: atq; dum illum contemplerer cum summo stupore, insiliit in pectus una ex illis scintillis, in eoque impressit quintum signum juxta reliqua: unde mea anima & corpus notabiliter fuit debilitatum. Lenita est tamen ipsius molestia ac dolor, per specialem unionem Divini illius Spiritus, & meæ animæ.

VI. Po-

VI. Postero die Sabbati manè, dum agerem cum DEO, sicut aliàs, essetque afflictum pectus ob illa stigmata, seu vulnuscula, quæ in eo DEUS impresserat, audiui tumultum, ut mihi videbatur, grandem, cujus sonus erat tanquam militum venientium cum tympanis: quod admirans, vidi advenientes, bipertito ordine, homines admodum graves, fortes, ac potentes, omnes armatos, & gestantes in suis humeris hastas: appropinquabant mihi magis, vidique inter ipsos, & quasi in fine venientem, cum maxima & extraordinaria Majestate totam DEI Potentiam, omnem ipsius Magnitudinem, omnem Majestatem, omnemque Sapientiam, Bonitatem, Misericordiam, ac Justitiam, ac totam ejusdem Infinitam Divinam Essentiam. Quando mea Anima vidit rem tam stupendam & immensam, fuit quasi perterrefacta, & magno perculsa timore. Interea verò vidi accedentem ad me totam eam pompam, ac Divinam Majestatem, donec denique quàm suavissimè venerit totus ille Dominus ad meam Animam, illamque intimè pervaderet, ac totam occuparet, abriperet, & secum uniret tam forti amplexu, ut se ipsam non agnosceret. Dum mea Anima esset in hoc Paradiso sui DEI, vidit intrà se, & in illo Domino, cum quo erat unita, quandam manum aliquantum tectam, quæ per speciem parvi digiti accessit ad meum pectus, illudque tetigit in medio quinque stigmatum ex dextera parte, ubi reliquit sextum signum, seu vulnusculum, cum ingenti afflictione meæ Animæ, & confractione naturæ; paulò verò post suaviter mitigavit dolorem. Sed obstupefcebam, & cogitabam intrà me, quid mysterij esset in illo strepitu, & militibus, qui comitabantur Divinum Spiritum, ac DEUM omnipotentem, & quare id fieret. Dum hoc versarem animo, dixit mihi Sanctus Angelus: Anima, si Rex quispiam suæ alicui parvæ filiæ traderet maximos thesauros & opes, ut illas possideret, eisque frueretur, & illas conservaret, attribueret illi simul custodes ad eam defendendam,

dam, & protegendam, ut nè ullus ipsam auderet molestare, vel ei auferre thesaurum, quem Rex ipsius Pater illi dedisset, ac tradidisset : similiter tibi magnus DEUS noster voluit præstare gratiam, & postquam tibi communicavit tantos thesauros, ac opes suorum donorum per decursum vitæ tuæ, voluit attribueret modò novos Custodes, nè ullus tibi audeat auferre thesauros, quos ab eo accepisti. Magnum cæpit solatium mea Anima ex eo dicto Sancti Angeli.

VII. Postea describit Venerabilis Marina quanto apparatu ad eam venerit ipso Sancto die Dominico Pentecostes CHRISTUS stipatus Sanctis quatuor Patriarchis Bernardo, Dominico, Francisco, & Ignatio, & eam spirituali sacra Communionem refecerit. Fuerunt extraordinarij affectus, & motus, quos in mea Anima excitavit hæc Divina misericordia : quia dum ista agerentur, vidi intrà me ipsam totum mysterium Beatissimæ TRINITATIS cum magno meo stupore, non enim recordor me vidisse simile mysterium intrà me. Hic Divinus Dominus Trinus in Personis, Unus in Essentia, ibi mihi ostendit mysticam quandam manum, quasi non nihil coopertam, quæ erat figura & Symbolum Sacratissimæ Personæ Spiritûs Sancti : qui Dominus extremitate digiti illius Sacræ manûs tetigit meum pectus in altera parte sinistra, relicto ibidem septimo signo, & vulnuscule, fuitque efformata Crux ex illis septem stigmatibus, quorum quinque erant sita secundum longitudinem, & duo transversim. Misericabile verò corpus remansit valde afflictum, & confractum per multos dies.

VIII. Post hoc Majestas CHRISTI JESU Domini nostri abivit, datâ mihi prius suâ benedictione, & illi Sancti Patriarchæ me sunt amanter alloquuti, valedicentes mihi, ac dicentes, ut eorum nomine precarer felicia festa ipsorum filijs, quos essem conspèctura. Postridie mihi dixit Sanctus meus Angelus, opus illud misericordiæ à Domino in me per impressionem

eorum septem stigmatum ideo peractum fuisse, ut in me confirmaretur virtus septem donorum Spiritûs Sancti, quæ jam mihi communicaverat, ac pro novo augmento, Lumine, & cognitione Divinarum ipsius & excelsarum virtutum, addiditque fore, ut in me experirer veritatem ipsius verborum; & intuens cum gaudio pectus, mihi dixit: Anima mea, inter omnes misericordias & gratias, quas tibi DEUS præstitit, per decursum vitæ tuæ, hæc est admirabilissima meis oculis, de quo summè lætor. Benedictus sit DEUS!

CAPUT VIII.

De Pentecoste.

I.

PARTE I. l. 2. c. 21. §. 1. Hac die intellexi, etiam in cælesti Jerosolyma agi maximum festum singulari lætitiâ, propterea quodd Spiritus Sanctus se communicaverit tanta cum gratiæ abundantia Apostolis, & exinde omnibus fidelibus, qui se disponunt ad suscipienda ipsius munera, dum se illis donat cum adeò immensâ charitate, & ardenti amore. Vidi ab hac Divina Persona, & ab ipsius infinita virtute, prodeuntes ac descendentes quosdam Divinos radios, qui accendebant, inflammabant, & clarificabant animas, iisque conferebant vitam gratiæ. Quod advertens dicebam ad DEUM: Mi Domine & dilecte Animæ meæ, ego vellem, essetque suum meum solatium, ut multa essent festa hujus tui Sanctissimi Spiritûs. Divina verò Majestas mihi respondit: sunt utique multa, quia semper descendit, & existit iste Sanctus meus Spiritus in Animabus, in quibus habitat per gratiam, ac proinde pro illis semper est Festum Sancti Spiritûs.

II. Anno 1614. quadam die festorum Pentecostalium vidi quomodo aperti fuerint cæli, descenderintque milleni An-

geli, ac Majestas DEI Domini nostri in pulcherrimo throno, qui appropinquando terræ, quasi concutiens suas alas, emictebat ex se, instar grandinis, innumerabilem copiam & varietatem pretiosorum lapidum, significantium gratias ac dona, quæ communicat justis. Apprehenderunt me Angeli, & collocaverunt ibi subitus, ut colligerem aliqua ex illis pretiosis cimelijs, & quia tunc recordabar meorum Benefactorum, ac aliorum in gravibus constitutorum necessitatibus, qui se mihi commendaverunt, dicebam cum magno fervore ad DEUM: Ibi, Domine; ibi; designatis locis, in quibus intelligebam morali tales personas, & ipeiatim unam, quæ se exhibebat valde rebellem Divinæ inspirationi. Dicebam autem tam instanter: Ibi, ibi; ut Angelus meus Custos dixerit: Paulatim, Soror, attende, quid dicas. Sed Dominus illi dixit: Relinque ipsam, hoc enim proderit. Non intellexi bene, profuturumne id esset mihi, an alteri personæ, pro qua orabam, an verò mihi simul & illi; adverti tamen copiosam alibi cadere cælestem grandinem, alibi verò non ita; quod factum fuerit juxta dispositionem eorum, qui ipsam suscipiebant, & secundum misericordiam, quam illis Dominus volebat exhibere. Aliàs vidi Personam Spiritûs Sancti in specie inaurati radij lucis, pleni lingvis, cum tanta magnificentia, potentia & bonitate, ut nullus intellectus vel lingua id possit intelligere, ac declarare. Significabat hac ratione radios lucis, ignis & amoris, quem Spiritus Sanctus infundit cordibus justorum, ut loquantur quasi lingvis igneis ipsius magnalia.

III. Ibidem §. 2. Alio Anno, die octavâ Junij 1615. quæ erat ejusdem solennitatis, agens cum Domino, vidi ac adverti sub quodam pretioso velo, simili ijs, quæ ponuntur super Calicem, Divinam quandam Columbam, candidiorem nive, totam refertam ac plenam pretiosis, valdeque instar solarium radiorum, resplendentibus lapidibus. Intellexi esse Personam

Spi-

Spiritus Sancti, qui me in illa specie *Columbæ* dignabatur visitare... Incepit subito suavissimè, blandissimèque concutere suas pretiosas alas, & ejicere ac spargere quàm copiosissimè illos Divinos thesauros ac gemmas supra meam Animam, unde me sensi plurimum ditatam, ac adornatam, & vehementer unitam Divinæ Majestati, atque accensam, ac inflammata Divino ipsius amore. Post duas circiter horas fui ducta à meis Dominis Angelis ad quendam veluti hortum jucundissimum & floridissimum, qui propter suam pulchritudinem & abundantiam suaveolentium florum, & fontium, videbatur esse Paradisus. In medio hujus Paradisi erat mensa, & ad ejus caput thronus Regius, ubi sedebat Majestas nostri DEI ac Domini Trini & Unius. Fui collocata ad inferiorem illius mensæ partem, è regione Domini, ubi mea Anima est ditata & repleta mille bonis cælestibus; datum etiam mihi fuit speciale lumen & cognitio mysterij Sanctissimæ TRINITATIS, vidique clarissimè, quomodo, cum DEUS noster sit unus DEUS, ac Dominus, una Essentia, ac Divinitas, sit nihilominus trinus in Personis. Præstitit mihi quoq; aliam extraordinariâ gratiam, præbendo mihi degustandum illum Divinum cibum, quo pascit animas, & de quo loquitur DEUS dicens, se cœnaturum cum anima, & ipsam cœnaturam cum illo. Qualis fuerit hæc esca, & ista Divina refectio, solus potest exponere Dominus, qui illum præbet, ac præparat conformiter suæ infinitæ magnificentiæ, & amoris, Divinæque Sapientiæ. Erat quasi Divinum manna, habens in se omnem suavitatem, gloriam, solatium, divitias, ac thesaurum absconditum & reliquâ bona, quæ obtinentur in Cruce, atque dum pro DEO tolerantur afflictiones, ut proinde contineret omnem saporem, longè melius, quàm illud manna filiorum Israël. Similiter alio Divino modo communicavit DEUS meæ Animæ, mihiq; dedit delibandas illas Divinas delicias, quas se dicit habere cum filiis hominum, conditas

afflictione crucis, quæ etsi videatur esse sal insipidus, & mordax, tamen reposita in manu DEI, reddit jucundio rem, & sapidiorem cibum, ac delicias, quas Divina Majestas sibi agit esse cum ipsis.

IV. Alijs Festis Pentecostalibus conspexi eundem Divinum Spiritum in specie Columbæ, ut soleo, atque dum concuteret suas alas, decidentia ex ipso in primis multa quasi grana margaritarum, ac deinde alia majora, instar pretiosorum lapidum. Cucurri quàm velocissimè, ut me ponerem sub Columba utque me contingerent illi pretiosissimi lapides, quorum multi ceciderunt supra meum caput, & complures alij ad terram. Desiderabam ipsos colligere, nè res adeò pretiosa perderetur, cùmque me ad id accingerem, dixerunt mihi Angeli: Relinque illos, non enim sunt pro te, sed pro alijs.

V. §. 3. Alio die Pentecostes in Junio Anni 1620. postquam mihi Dominus promississet in festo suæ Ascensionis, quòd esset missurus Spiritum Sanctum, qui me consolaretur, ac ditaret, dum agerem cum Divina Majestate horâ sextâ matutinâ, vidi mysticè nonnullos Sanctos Angelos, quasi impedimentis amotis adaptantes quoddam palatium, amplitudine par civitati, idemque postea adornantes multis & magnis thesauris, quo quidem modo rem peragebant usque adeò mirandam, ut illud Palatium videretur esse terrestris Paradisus. Deinde in ejus medio vidi comparentem Divinum quendam Solem splendidissimum, cujus radij coruscabant instar purissimi auri, & vehementis ignis. Intrà circulum hujus Solis comparebat quædam species candidissimæ & purissimæ Columbæ, quam cooperiebat tenuis nebula, quæ tametsi esset lucidissima, mihi propè Columbæ illius eripiebat aspectum. Discernebam verò clarissimè, atque cognoscebam in eo Divino Sole, & in illa specie Columbæ, quandam infinitam Majestatem, & immensam magnitudinem, ac DEUM, & Divinam Personam.

Spi-

Spiritu sancti, adeò, ut exigua capacitas Animæ non posset complecti seu comprehendere tantam magnitudinem, & maiestatem. Assistebant eidem magno Domino, & serviebant in illo Paradiso plurimi sancti Angeli.

VI. Dum mea Anima spectaret tantum mysterium, incepit quasi turbari & metuere, & se ab eo spectaculo avertere, ideòque confugit ad DEUM, more solito, petendo ab eo Divinum ipsius lumen, ad cognoscendas & intelligendas illius veritates, utque id faceret ardentius, abstrahendo se à mysterio, cæpit recitare suo DEO quàm attentissimè totam Dominicam orationem: sed quidquid ageret, non poterat oculos penitus cohibere à videndo illo Sole, siquidem ipsam DEUS ad eam visionem diu impellebat, ac tandem idem magnus Dominus illam disposuit, adeòque urisit, ut jam non potuerit non videre & agnoscere dictum Solem, ac intelligere illam immensitatem magnitudinis & maiestatis, fueritque interim absorpta & abrepta ab ea Divina visione. Subitò incepit ille magnus Dominus in ea specie Solis extendere suos Divinos radios, qui videbantur incendere universum mundum, quasdam tamen provincias, regiones, & personas ijs non contingebat, à quibus illos videbatur retrahere; alias verò provincias, regiones & personas irradiabat, & inprimebat ipsis suam virtutem. Deinde se Divina Majestas cæpit movere quasi ex uno loco ad alium cum summa gravitate & videbatur paulatim mihi appropinquare; unde ego incipiebam turbari, & vehementer timere, ideòque circumspiciebam, petendo à meis sanctis Angelis gratiam, opem, & subsidium in ea occasione, quia Dominus jam quàm proximè ad me accedebat. Sancti Angeli cum magna charitate videntes meum timorem, & imbecillitatem ad me venerunt; sed Dominus quadam potenti vi rapuit meam Animam, intimèque secum univit, ità ut tam illa, quàm miserabile ipsius corpus, cum magno sensu ac dolore, orto ex ea vehementia, eruperit in notabi-

tabiles gemitus, inveneritque se correptam ab illo Divino igne, instar ferri, quod prodit ex ustrina totum ignitum, participato calore ac virtute ignis.

VII. Dum ita esset suo DEO unita mea Anima, Divinus ille Dominus se elevavit, ducensque me secum eo modo, quo dixi, ascendit cum maxima majestate, & cum toto illo comitatu Angelorum ad cælos, & ibi, quostquam nostro modo loquendi convenit duas Divinas Personas Patris & Filij, præsentavit illis meam Animam, quam in se ipso adferebat. Erat verò in ea unione res notabilis, videre admirandum modum, quo ille Divinus Dominus, Trinus in Personis, & unus in Essentia suscepit Animam. Duæ Divinæ Personæ Patris & Filij illam exceperunt suis Divinis manibus, singulæ seorsim, deinde magno affectu, defixis in ipsa amanter oculis, dixerunt omnes tres Personæ, loquentes tanquam unus DEUS: Anima mea, in me manes, atque ego maneo in te; & jam non vives tibi, sed in me, semperque poteris dicere cum Paulo: Vivo autem jam non ego, vivit verò in me CHRISTUS. Et replens meam Animam summis bonis, quæ ipsa sensit, ter mihi suam sanctam dedit benedictionem. Fui admirabiliter reposita in manibus sex Angelorum, qui me susceperunt cum magna lætitia, & gratiarum actione, atque Dominus illis mandavit, ut specialem mei gererent curam, meq; adjuvarent & protegerent, ac reponerent in meo loco ita, ut avulsa ab illa tam magna & admiranda unione non sentio rem debilitatem, molestiam, vel desolationem, sed recreata illius visione ac societate, fruerer quiete & pace, ac solatio: quod sunt exequuti.

VIII. Parte I. l. 2. c. 21. §. 5. In festo Pentecostes venerunt mei quatuor Domini Angeli, dicentes mihi: Veni nobiscum Soror, & videbis locum ac modum, quo fuit peractum hoc mysterium. Derepente me adveriti esse in quodam campo, juxta quandam domum, in qua & extra quam erant aliqui ho-
mi-

mines, & elevans oculos vidi cælum apertum, ac milliones Angelorum valde lætantium. Eratque etiam ibi pulcherima Crux, quam omnes adorabant. Vidi præterea subito Majestatem Spiritûs Sancti, qui totum illud spatium summè replebat. Non vidi ipsum in specie Columbæ, sed alio modo inexplicabili; & statim incepti advertere, quòd Divinus iste Spiritus se quasi moveret, quòdque immineret magna aliqua tempestas. Cœpi angere, & quasi vehementer sudare. Accessit ad me Angelus meus Custos, ut me confortaret, & absterisit celeriter linteo sudorem, quo madebat facies. Vidi me indutam pretiosâ illâ veste, de qua jam dixi, & Spiritum Sanctum concutientem quasi alas, spargentemque plurimos pretiosissimos lapides, qui cadebant supra domum, & erant velut igniti. Appropinquavi magis ac vidi illos pretiosos lapides cadentes supra me, fuitque illis repleta vestis. Allâ vice in eodem mysterio videram depluentes lingvas igneas super illam domum, quarum una supra me ceciderat.



PARS TERTIA.

De Creatione mundi & Angelis.

Quia Divus Thomas in prima parte suæ Summæ post Quæstiones de DEO Uno & Trino statim subjungit Quæstiones de Creatione & Angelis, ideo & hic aptè subjunguntur.

CAPUT I.

De Creatione Mundi.

Ppp

I. Par-

I.

PArte 1. l. 3. c. 13. §. 2. Narrat VEN. MARINA id, quod nos Sancta Fides edocet, nempe creata esse omnia hominis causa. Sic ait: Exaltavit me Dominus ad montem, qui apparebat imensus, & ibi mihi exhibuit, ac ostendit omnes Caelos & Terram ac totum Mundum, dixitque: Aspice, Anima, omnia hæc, quæ propter te creavi: vide ista, & fructuere illis. Contemplata sum istam creaturarum infinitatem miræ pulchritudinis.

II. Ostendit etiam Divina Majestas VEN. VIRGINI MARINÆ Mundi hujus materialis constitutionem, & numerum sphaerarum cælestium pro aliquali etiam lumine Philosophorum, & confirmatione Doctrinæ Astronomicæ. Parte 1. l. 4. c. 16. §. 1. Quodam die Sabbati in Majo Anno 1623. summo manè me præmonuerunt mei Domini Angeli dicendo: Anima, Dominus vult tibi præstare gratiam ostendendo tibi Caelos materiales sicut illos visura es, quando te DEUS hinc auferet. Atende & noli turbari: Postea mei Domini Angeli me duxerunt ad cælos, ostenditque mihi Dominus omnes illas cælestes sphaeras, quæ fuerunt novem vel decem. Fuit aspectus mirabilis illorum cælestium Corporum atque tanta distantia unius ab altero, ut appareret infinira; & nisi me confortavissent & animavissent, impossibile fuisset ibi progredi. Magnitudo autem cujuslibet Cæli videbatur esse quædam Immensitas, omnia mihi Dominus valde diu explicuit, & postea me deduxerunt ad meum angulum mei Domini. DEUS sit benedictus.

CAPUT

CAPUT II.

De Angelis.

I.

Cum tota mirabilis vita VEN. MARINÆ sit plena conversatione cum Angelis, ut videatur posterioribus 40. Annis plùs conversata cum Angelis, quàm cum hominibus, non videtur ad modum necessarium multa hìc de sanctis Angelis adducere, præsertim cum etiam Tractatu tertio Parte 1. c. 2. aliqua sint dicta. Nihilominus ut appareat clarè, quàm præclarè omnia hujus felicissimæ Virginis visa & gesta Sanctæ Fidei Catholicæ consentiant, & quantum etiam mysteria de sanctis Angelis Ecclesiæ proposita lumen accipiant, aliqua paucula hìc seligentur, ex quibus etiam natura Angelorum, eorùmque erga nos benevolentia, aut ex adverso dæmonum malitia nobis magis innotescat. Parte 1. l. 4. c. 1. §. 2. In quadam gravi molestia, & afflictione, in quam me redegerant dæmones, dum me putarem esse solam, ideóque affligerer, dixit mihi Dominus: Noli affligi, quia non es sola: hìc sunt, qui te juvabunt, tibi que subministrabunt omnia necessaria. Subitò elevavi oculos Animæ, & vidi illic adesse quatuor vel quinque Angelos, fixè intuentes meum vultum, ut viderent, quid vellem, & quam re indigerem, recreâruntq; me in ea afflictione: ideò apprehenso lecti tegumento, elevaverunt illud aliquantum, ut me refocillarent; atque ità cessavit meus vehemens sudor. Attonita, quòd viderem curam, quam habebant Sancti Angeli, qualem habere posset famulus fidelis, ac sollicitus de præstando obsequio, Domino suo in simili molestia, dixi illis: Sancti Angeli, attendite ac advertite, me, cui exhibetis istum favorem, esse vilissimam & miserabilissimam creaturam omnium, quas habet DEUS, atque vos esse Aulicos Cæli & Spiritus

Beatos. Illi responderunt : Noli consternari, neque mirari , id quod vides : nos enim sumus servi communis omnium Domini, qui est tuus Pater, ideoque non est mirum, quod servi Domini, in rebus necessarijs, serviant ijs, qui sunt filij ejusdem Domini, cui famulantur. Aliâ vice cùm in lecto decumberem, solito afflictior, licet mei quatuor Angeli confveverint, me in surgendo juvare, vidi venientem quendam Seraphinum in curru igneo, qui totus ardens, ubi descendisset ex curru, apprehensus meis humeris, nullo negotio me erexit.

II. Lib. 4. cap. I. §. 4. Vidi quodam die Anno 1615. quinque vel sex Angelos DEI, qui admirabiliter ferebant quoddam elegans & pretiosum scrinium, mediocris magnitudinis, perlucidum itâ, ut forinsecus conspiceretur thesaurus, qui intus ferebatur. Erat ex nitidissima crystallo, & ornatum auro obryzo. Mei Sancti Angeli exceperunt cum magno gaudio eos, qui advenerant cum isto scrinio, & statim illud collocaverunt, ac aperuerunt mysticè, cæperuntque exponere gemas & thesauros, qui in illo adferebantur, ponentes singula illa pretiosa cimelia, in manibus singulorum illorum sanctorum Angelorum, qui obtulerant mysterium, coram reliquis adstantibus, & sancto meo Angelo Custode. Tunc illi sancti Angeli, servi magni Regis Majestatis, & sanctus meus Angelus Custos, mihi dixerunt : soror nostra, attende & cognosce misericordias, quas tibi DEUS præstat, ac dona, quæ suâ divite ac pretiosissimâ manu tibi elargitur. Aspice illa, & suscipe, cum gratiarum actione. Tunc mea Anima defixit oculos meos in mysterio illo intentissimè, quia jam non poterat aliter fieri, & vidit in manibus illorum singulorum SS. Angelorum, singula cimelia pretiosa ac admiranda, ex purissimo ac splendidissimo auro, nec non gemis elegantissimis, quasi cælestibus; sed unumquodque diversimodè efformatum. Unus habebat in suis manibus annulos, qui mihi videbantur esse septem, repræ-

sentantes & significantes septem dona Spiritûs Sancti; alius habebat inaures, quæ significabant auditum purum, & attentum animæ obediens DEO suo; alius habebat velum pretiosissimum, distinctum varijs coloribus, & umbris, quod significabat virtutem silentij ac prudentiæ, pro occultandis & abscondendis donis, quæ anima accipit à suo DEO, usque ad tempus & occasiones, dum DEUS manifestaverit se aliud velle; alius habebat armillas, & brachia significantia oblivionem, & contemptum omnium rerum temporalium, & creatarum præter DEUM; alius cingulum significans puritatem, & castitatem; alius torquem, & alius denique coronam; repræsentantes finem & præmium, quod DEUS ex sua bonitate & misericordia dabit Animæ, quæ bene fuerit usa donis acceptis ab ipsius misericordia, & ex Divina ejusdem manu.

III. Visis his omnibus thesauris, mea Anima obstupuit & vehementissimè fuit confusa. Interea meus Sanctus Angelus Custos, accedentibus ad me istis sanctis Angelis, mihi imponebat singula illa cimelia, suo loco, quod ego vix videbam, vel intelligebam, si quidem mea anima erat notabiliter afflicta, timens, ne in aliquo erraret. Mansi in eo statu aliquandiu, & idem meus sanctus Angelus Custos mihi subitò omnia rursus abstulit suo ordine, posuitque illa dona in manibus sanctorum Angelorum, à quibus ipsa acceperat, & illi ea receperunt, ac reposuerunt in suo scrinio, quod cum magno gaudio omnium ibi præsentium dederunt, ac tradiderunt Sancto Angelo meo Custodi, qui acceptum servavit in se ipso, cum demonstratione singularis gaudij ac lætitiæ in Domino; cui cum ipse magnas ageret gratias pro tot misericordijs & auxilijs, quæ conferebat animæ sibi commissæ, ut illam custodiret, regeret, atque gubernaret ipsius nomine, ego stupebam, mirabar, atque confundebar sicut antea, ideoque non dicebam ullum verbum amplius, quasi nihil horum accidisset. Et cum viderem sanctos

Angelos, qui attulerunt illum thesaurum non abeuntes, acsi aliquid expectarent, quod mihi non incidebat; tandem meus Sanctus Angelus Custos, & quatuor mei Domini, videntes me ita abstractam, mihi dixerunt, quasi me vellent expergefacerere: Soror, quid agis? qualem te exhibuisti erga Dominum, & non meministi, neque tibi in mentem venit, ut illi significares, quòd agas ipsi gratias, & illum benedicas pro tantis misericordijs, quantas tibi præstitit per hos Dominos Principes, quorum manibus tibi misit sua dona. Nónne vides esse inurbanitatem, quod illos permittas expectare & hic detineas? Hoc audito videbar mihi veluti expergisci ex somno, & conjectis seriò ac fixè oculis in eos sanctos Angelos, qui advenerant cum thesauris dixi illis: Principes Legati Cælestes per Dominum quem adorant & cui serviunt, ignoscant mihi meam tepiditatem, & dicant Domino DEO nostro Majestatis, quod indigna ipsius serva illi significet, se ei agere infinitas gratias, illúmque laudare pro eo, quod est in se ipso, & pro infinita ejusdem omnipotentia, Majestate, ac magnificentia, próque eo, quod est ac fuit erga nos suas pauperes creaturas exhibendo omnibus suam misericordiam, præbendóque singulis speciatim auxilia & subsidia necessaria ad suam salutem ac majorem profectum, & præsertim huic suæ ancillæ indignæ, ac miserabili, quæ non utendo illis, quemadmodum tenetur, ea dissipat, tanquam vas argilaceum malè excoctum. Et cum Divina Majestas sit tantus Rex ac Dominus, & Monarcha Cæli ac terræ, sicque tam infinitè bonus, per istam tantam gratiam & misericordiam, quam nunc denuò mihi præstitit, peto ab ipso aliam, quæ est Divina ejusdem gratia & favor, ut utar secundum ejus acceptabilissimam voluntatem, omnibus ejus misericordijs ac donis, nè perdam meâ culpâ, & negligentia thesauros ac divitias, quas ex ipsius Divina manu suscepi. Hoc ab ijs peto, & rogo, ut dicant, meo nomine Domino Majestatis.

IV. Illi Sancti Angeli audiverunt attentè meum nuncium, & responderunt mihi, se ità facturos: quod mihi vehementer placuit, quia videbar mihi pro mea paupertate, & exiguitate retribuisse, quantum poteram, nostro magno DEO ac Domino, à quo acceperam illa dona. Sed iidem sancti Angeli dixerunt subito: Soror nostra, & præter hoc, quod significas Domino Majestatis, quale donum illi offers, ut gratam te exhibeas pro magnis, quæ ipse tibi modò per nos misit? & hoc dicto unus ex illis Dominis, qui primariò aperuerat scrinium, ut inde exponeretur thesaurus, ac postea illum in eo reposuerat & clauferat, protulit quandam elegantissimam & pretiosissimam pelvim, dixitque: Soror nostra, da nobis huc aliquid, & pone, hic quodpiam donum tuâ manu, ut illud feramus, ac præsentemus magno Regi, nomine tuo: æquum enim est, ut qui aliquid accipit, respondeat pro suis viribus illi, cui est obligatus: Noli nos dimittere ità vacuos, cum solo nuncio. Quando mea paupercula Anima audivit hoc dici, propter apprehensam suam tam exaggeratam miseriam, ac paupertatem & vilitatem, incredibiliter indoluit & fuit afflicta, dixitque: Mei Domini, sciant, me esse pauperrimam & miserabilissimam creaturam omnium, quas habet Dominus DEUS noster Majestatis, ac proinde nihil habere offerendum meo Domino, quod non acceperim ex ipsius manu, & hoc ipsum, quantum in me est, dilapidavi & impendi perperam: ideòque nescio, quid illi offeram, quod ipsi placeat, sitque gratum, & quod ei etiam non obrulerim. Hæc omnia audiebat attentè S. Angelus meus Custos, qui erat mihi valde vicinus, & secretò alloquens arcano quodam modo meam animam, dixit illi: Soror, offer nunc denudò tuo magno Regi ac Domino tuum cor, & tuam animam. Tunc ego ex illa admonitione mei sancti Angeli, cepi solatium in Domino, quia mihi admirabiliter placebat, quod dicebat, eratque maxime conveniens voluntati meæ ac indigentiae,

tiæ, unde illis dixi: Legati cælestes, mei Domini, nescio quid possim offerre Domino Majestatis, quod ipsi jam non obtulissent, sicut dixi: sed nunc denuò offero Divinæ Majestati meam Animam & cor; ut Divina Majestas per suam bonitatem ac misericordiam illud destruat ac innovet, creëtque in visceribus meis spiritum novum & humilem. Vehementer nobis placet, Soror, tuum munus (dixerunt illi Sancti Angeli) nos illud acceptamus DEI nomine.

V. Aspexit me tunc meus Sanctus Angelus Custos, unde cognovi, quod veller auferre meum cor pro munere, sicut fuerat promissum; & propter illam meam apprehensionem, naturaliter incipiebam deficere meis viribus naturalibus. Videns id Sanctus meus Angelus Custos, accessit ad me, dixitque mihi: Eja; Soror, noli animo concidere, quia munus, quod das Domino, non est cor carneum, sed spirituale, & cor cordis, quod sunt affectus vehementes ac ardentes erga DEUM, quos iste Dominus infudit Animæ, per suam infinitam bonitatem. Atque istud est cor, quod nunc offer DEO; nè igitur exanimemur. Et cum hoc ultimum diceret, posuit manum ad meum latus sinistrum, absque meo dolore; imò potius cum maximo levamine; & quando illam amovit, vidi quod in ipsa haberet quandam figuram cordis, instar carbonis igniti, & habentis colorem rubini pretiosissimi, ac splendidissimi tribus auri purissimi zonis circumdati, videbaturque summi esse pretij, & valoris. Meus Sanctus Angelus illud cum maximi gaudij & stuporis indicij dedit ac obtulit ijs sanctis Angelis; quod ipsi pariter servaverunt, cum majoribus demonstrationibus admirationis ac lætitiæ, posueruntque in pelvi, quam in hunc finem habebant; & postquam mihi valedixissent quam amantissimè; atque egissent admirandis verbis gratias (qua ratione, consolati sunt meam animam) abiverunt, valedicentes etiam meo Sancto Angelo, & quatuor meis Dominis.

VI. Lib. 4. c. 4, §. 6. Anno 1620. Jussu DEI discesserunt ab ea quatuor illius Angeli, remanente apud illam solo Angelo Custode cum Angelo Paranympo in Paschate. Deinde sequentis septimanæ feriâ quartâ manè dixit ei Divina Majestas: Brevi redibunt, ut apud te maneant; & quia obtinuerunt victoriam adferunt spolia tanquam boni milites, quæ tecum partirentur, sicut æquum est, cum sint tui fideles amici & auxiliiatores. Postea feriâ quintâ manè venerunt & accedentes ad me interrogaverunt peramanter, vultu hilari, quomodo valerem: quàmque ex voto mihi res cesserint ipsis absentibus. Tunc dederunt mihi auream catenam, armillas & annulum, dicentes: adferimus spolia virtutis gratiæque Divinæ, ut tibi possimus applicare virtutem ac donum, puritatis amorem perfectum ac Divinum, atque suavitatem & pacem cordis. Cæpit me autem desiderium sciendi, quare Dominus fuerit dignatus ablegare istos Dominos Angelos potius, quàm alios, cum habeat tot, ad eam expeditionem, id quod ex illis quæsiui; qui mihi amanter respondentes dixerunt: Soror, fuimus missi à Domino ad hoc opus gloriæ ipsius & obsequij, quia nos concernit ex officio propter nomina, quæ gerimus, & virtutem, quam nobis contulit pro ejusmodi operibus. Illuminata à Domino intellexi istos Sanctos Angelos profectos fuisse ad terram & locum sanctum, ubi est Sacrum Sepulchrum. Fuerat nimirum à diabolis suscitatus, DEO permittente, ingens tumultus inter illos infideles, contra DEI servos Religiosos Ordinis Sancti Francisci, quos vehementer cruciabant & affligebant. Sed isti sancti Angeli virtute & fortitudine Divinâ debellaverunt diabolos, mitigaverunt illos rigores, atque omnia pacaverunt.

VII. Parte. 2. l. 2. c. 13. Dum mihi Sanctus Angelus meus Custos quædam loquebatur, fui distracta, memor quorundam mihi à Ven. Patre Ludovico in Visione paulò antè di-

ctorum. Ob hunc defectum fui vehementer afflicta, obnixé-
que rogavi Sanctum Angelum, ut illum puniret. Ipse tacebat;
ego verò magis instabam, nè istam culpam relinqueret impu-
nitam, quia me illius commissæ pudebat. Precibus itaque meis
victus, tres dorso meo ictus inflixit, præsentibus alijs sanctis
Angelis. Videbatur autem his meis Dominis Angelis displi-
cuisse, quòd sic ab illo fuisset castigata. Tum sanctus meus
Angelus Custos, quasi stringendo humeros, dixit: Ipsa id vo-
luit, fuitque mihi importuna.

VIII. Lib. I. c. 46. Anno 1626. In festo Sanctissimæ
TRINITATIS, dum in Oratorio celebraretur Missa (quam
dicebat Dominus Præses Franciscus Marquez) vidi in cælo
magnum nostrum Trinum DEUM, ab infinitis circumdatum
Angelis, ex omnibus novem hierarchijs. Mea Anima obstu-
puit præter morem, quòd videret Seraphinos assistentes DEO,
licet tantâ sint præditi Majestate & gloriâ (comparebant verò
mihi tunc admirabilissimi) nihilominus gloriæ, majestati illius
immediati DEI comparatos, tantò esse inferiores, ut nequeat ex-
plicari: videbantur mihi longè minores, quàm sit formica col-
lata altissimæ Turri.

CAPUT III.

De Angelis Custodibus.

I.

PArte I. lib. 3. c. 14. §. 1. Descendebat ad me CHRI-
STUS Dominus, ferebátque aliquid in suis brachijs,
quasi Animam, vidi enim illam eminus: & cùm perve-
nisset ad medium viæ, substitit Divina Majestas, jussitque in-
termitti musicam, & fieri silentium, atque attendi; ac deinde
dixit Dominus Custodibus Animarum unâ venientibus: An-
ge-

geli mei attendite quàm diligentissimè, quomodo custodiatis homines; impendite isti custodiæ omnem sollicitudinem & operam, siquidem illos tantopere æstimo, ut eos, qui me ex animo amant, mihiq̃ue serviunt, feram in meis brachijs & manibus, quemadmodum ferri videtis hanc animam; ideóque magni illos facite, ista enim est mea voluntas.

II. Lib. 4. c. 3. §. 2. Pridie festi Sancti Angeli Custodis, quod Vallisoleti celebratur 1. Martij, vidi stantem juxta me, & à dextris meum Angelum Custodem pulcherrimè ornatum, vestitum eleganter ac festivè, coopertum auro & lapidibus pretiosis variorum colorum, demonstrabátque & exhibebat in se oculis meæ Animæ magnam potentiam, quâ videbatur posse debellare totum infernum. Erat quasi intrinsecus armatus, ac sub cingulo habebat adaptata arma exteriora, quendam quasi parvum acinacem, convenientem corpori, in quo apparebat & aliud simile telum bellicum. Cùm illum eo modo vidissem, fui vehementer rei novitate attonita, eóque ampliùs, quando conspexi reliquos socios præsentis non esse ità instructos, ideóque illi dixi: Mi Angele, ac Domine, quomodo es sic ornatus, ac taliter vestitus? Dum id interrogarem, audivi in Cælo inchoari magnam solennitatem, & resonare multa instrumenta, musica, ac bellica diversi generis, qualia sunt tympana ac tubæ, aliáque hujus modi, ut totum Cælum videretur exhilarari illo tam svavi ac dulci & sonoro strepitu, quem simul edebant omnia ea instrumenta quàm ordinatissimè. Tum dixit meus Angelus: Anima mea, audisne quid agatur in nostra Cælesti Jerosolyma? Noveris ex mandato Domini Majestatis celebrari magnam solennitatem in illa Divina Aula, in honorem omnium Angelorum, qui sunt Custodes animarum: cui proinde adsumus omnes, cum his vestibus, & armis, quæ in me vides, & significant nostram gloriam, ac splendorem, & virtutem, atque fortitudinem datam nobis à nostro DEO, & Cre-

atore, contra potentiam infernalem dæmonum pro defensione animarum, quas jussu DEI custodimus. Unde & ego pergo ad illam solennitatem: bene vale, & noli affligi, non enim manes absque me. Statimque abiit ad illud festum cæleste, in conspectu meæ Animæ, quæ vidit, quidquid ibi fiebat, & quasi infinitos Custodes Animarum, prædicto modo vestitos, summo ordine, & quàm aptissimè distributos in duas partes quasi in duas maximas cohortes gloriosorum Principum. Obambulabant circumquaque totum cælum, cum omni ea cælesti musica, de qua sum loquuta, & præcedebant illos, instar Ducum, gloriosi Archangeli, Sanctus Michaël & Sanctus Gabriël, comitabanturque omnes istos Principes, & Spiritus Angelicos alij infiniti Angeli DEI, qui unà obibant illam cæli amplitudinem Divino quodam & cælesti circuitu. Collocaverunt se deinde ordinatissimè coram throno Divinæ Majestatis, ibique omnes suo ordine se aliquamdiu detinuerunt cantantes admirabiliter: Gloria in Excelsis DEO. Tunc Dominus Majestatis aperiens clavi suæ Divinæ voluntatis murum magnæ gloriæ, ostendit se potentem, cum extraordinaria magnificentia & gloria, universis illis Spiritibus Angelicis; quibus in ipsius conspectu prostratis; dedit omnibus suam sanctam benedictionem; quâ acceptâ, subito se erexerunt cum summo gaudio. Postquam jam Dominus clausisset illum sacrum murum, discesserunt omnes modo quodam mystico.

III. Lib. 4. c. 5. §. 2. Vidi nomine DEI convocari & congregari sanctos Angelos Custodes Hominum, qui obediētes in momento se contulerunt ad Cælum, & prostrati dixerunt: adsumus Domine noster Omnipotens, & venimus, ut sciamus quid nobis mandes. Dominus illos suscepit perbenevolè, & jussit surgere, dixitque ipsis: vocavi vos, mei Angeli, ut vos admonerem, diabolum novâ sollicitudine his diebus urgeri & magnâ rabie agi contra homines: datâque illis suâ sanctâ

Etâ benedictione illos dimisit. Cogitabam metuendo, ut soleo, quem in finem id fecisset Dominus, ac dicebam: Nunquid Angeli sunt capaces culpæ & incuriæ, ut illos admoneat denuò DEUS? & dæmon potestne plùs, quàm illi DEUS sit permissurus? Hoc modo me conabar operosè abstrahere, ab eo, quòd videram, & audieram. Interea mihi dum ità essem abstracta, Dominus loquutus est, dixitque: Soror, bene diois. Sed ego subinde soleo dare novas inspirationes hominum per me ipsum, vel per meos Angelos, & Angeli superiores illuminant inferiores, pro meo beneplacito; dæmon quoque à me petit interdum facultatem tentandi homines, quam si illi concedo, dum mihi videtur, & expedit pro bono & exercitio meorum electorum, moneo de novo meos Angelos, quòd dæmon sit solutus, ut majorem impendant curam custodiendis Animabus.

IV. Lib. 6. c. 13. §. 1. Conspexi sanctos quatuor Angelos & videbantur mihi colere quendam elegantissimum, & gratiosissimum, ac fragrantissimum hortum, atque evellere quædam herbas, alias verò plantare, nec non efformare pulcherri-
mas areas. Hoc aliquamdiu duravit & intellexi esse symbolum officij; quòd sancti Angeli Custodes exercent, curam habendo hominum, dum evellunt vitia & plantant virtutes.

V. Lib. 2. c. 1. Initio Anni 1625. Agebam aliquando istis diebus manè cum DEO recitando nonnullas preces, quas ab ejusdem Majestate fueram docta, & audivi illum cum quadam festinatione, quamvis gravissima, mihi dicentem: Veni huc, Anima, veni, & videbis quod tibi volo ostendere. Respondi illi humiliter: Statim ibo, mi Domine, statim ibo, postquam persolvero has tuas preces. Et mea Anima persistebat in ijs finiendis. Dominus autem mihi denuò dixit: Age Anima, veni mecum: volo namque ut quamprimum videas, quod tibi repræsentabo. Non potui obniti, & antequam comple-

r em preces, Divina Majeſtas mihi exhibuit ſpectandas quaſdam Regiones multum ab eo loco, in quo eram, ut mihi videbatur, diſtantes, dixitque: *Aspice, Anima, hanc multitudinem meorum Angelorum, qui obeunt omnes iſtas Provincias, & Imperia Regum Catholicorum. Mea Anima aſpexit, ſicut fuerat juſſa à Domino, & vidit infinitos Angelos mirum in modum ſpecioſos, armatos inſtar generoſorum militum, ſclopis & bipennibus peragantes omnia illa regna. Ibant tanquam valde procul profecturi, explodendo ſuos ſclopas, quorum ſonus etſi eſſet terribilis & vehemens, aliunde nihilominus erat ſvavis, & jucundus auditui Animæ. Intellexi eſſe ſymbolum benignitatis & miſericordiæ Divinæ. Sic procedentes ſeſe collocaverunt in medio eorum omnium regnorum, exprimentes figuram crucis, ſtatimque ſummo ordine bini ſunt progreſſi, rectà tendentes ad locum ubi ego eram, & illuc pervenientes eodem ordine me præteriverunt, atq; aſcenderunt in altum, per quodaſdam quaſi gradus demiſſos, & colorem referentes velut cæleſtem, donec pertingerent ad cæleſtem Jeroſolymam.*

Deinde vidi eminus tanquam obſervantes hoc ſpectaculum, multas horribilium, & crudelium dæmonum turmas, quæ ſuos à fronte habebant duces. Stabant diſpoſiti in ordines, velut invicem colligati: pedes eorundem erant vincti compedi-
bus, & corpora catenis, atque agitabant ſe cum ingenti confuſione, & rabie: apparebant quaſi ſclopis armati, quos gerebant in humeris; conabantur procedere, & pergere ulterius, ac jaculabantur. Verum fuerunt adeò conſtricti, ut, ſi progredierentur ad quatuor paſſus, tantundem ſtatim retro cederent evaneſcentibus velut in aëre ictibus, abſque ulla vi, aut effectu. Tum in rabiem acti indignabantur, mordebant ſe mutuò confuſè; exprobrabant ſibi vecordiam: maxime verò omnes furebant, inſultando ſuis ducibus. Infernale ipſorum propoſitum erat, ut animos Catholicorum inſicerent hæreſi.

Sed

Sed videntes denique se non posse prævalere, præcipites ruerunt usque ad abyssum. Post hoc illos vidi valde procul in quibusdam regionibus infidelium otantes & quasi quiescentes. Omnia ista exhibebantur meæ Animæ, absque comparatione longè vivaciùs, quàm si spectarentur oculis exterioribus. Quamquam autem illuminata à DEO aliquid de hoc mysterio conjicerem, non poterat tamen à me sufficienter percipi, & agnoscebam, mihi multum deesse ad illud penetrandum.

VI. Tum mihi Dominus gravissimè, & perquam dolenter, ob magnum amorem, quo erga nos fertur, dixit: Ecce, Anima, oportet te scire, universum infernum conspiravisse, & occupatis, me permittente, infidelium cordibus ac animis, ingenti furore ac rabie instare, ut omnes junctis viribus, quantum in ipsis est, honore priverent & vitâ meum Filium JESUM CHRISTUM, conviciantes suis sacrilegis lingvis Divinam ejusdem Personam, purissimam illius Incarnationem, & Sacramentum Evcharistiæ. Hæc est significatio eorum, Anima, quæ tibi ostendi. Quid tibi hac de re videtur? Mea Anima, propter audita ista verba, & modum, quo à Domino proferébantur, fuit summè afflicta, & indoluit, atque respondens ejus Majestati, dixit: Cùm ità se res habeat, mi DEUS & mi Domine, nōne expediret, ut Reges & Principes Catholici, priusquam hostes Sanctæ Fidei prodeant, proficiscerentur, eoque aggrederentur, ac pessumdarent? Non expediret id nunc, Anima, dixit Dominus, non expediret. Dic mihi, an bene fieret, si existentibus in foro tribus ferocibus tauris, debilis quispiam nanus, & imperitus diceret: Melius mihi erit invadere hos tauros, quàm firmare theatrum, illudque conscendere? Satis clarè apparet huic erraturum. Nōne verò tu mi Domine, & mi DEUS, ajebam ego, es potentior toto inferno? Nōne facillimè potes omnes hostes nostros destruere, ac dare victoriam tuis Fidelibus? Ità prorsus est, sicut dicis,

re-

respondit Dominus, me esse potentem, ut faciam, quæ volo, ac misericordem: unde, prout vidisti, tot misi Angelos meis Fidelibus, ad defendendas veritates Fidei, ac destruendū mendacium, & fraudes diaboli: verum tamen ij, qui sunt mei, non ita me sibi, ob sua peccata, & malam dispositionem, devinxerunt, ut inter illos & meam Justitiam statuam aliquam aniculam, quæ ipsos defendat, neque, si impendens casus eveniret, permittam fieri, quæ fert cursus rerum, & sunt conformia legibus ordinarijs. Mea Anima audiens id dici à suo Domino, & assumens nonnihil velut generositatis, atque incitata vehementi affectu, qui tamen fuit magnæ commiserationis, tum respondit: Profectò, mi Domine, si id fieret, me, ad averte-dos ab ipsis, & suscipiendos in me ictus, interponerem inter illos, & tuam Justitiam. Non facies id, dixit Dominus, non facies Anima: quia ego hoc à te fieri non permittam: atque si multum iustares, & occasio eveniret, auferrem te è medio eorum, & abducerem ad me. Quid dicis ad id? quid tibi videtur? Fui quasi consternata, & obstupui ob ea, quæ à meo Domino dici audiebam, dum mea Anima partim metueret Divinam Justitiam, partim verò confideret in DEI Misericordia & Benignitate; atque hæcenus in tali mei Domini versor præsentia. Reputo hunc eventum tanquam aliquid à Divina Majestate superpositum meis debilibus humeris, ut clamem, & à DEO absque intermissione postulem misericordiam, in his Ecclesiæ necessitatibus. Ipse nos dignetur respicere tanquam Pater, sitque semper benedictus. Amen.

VII. Parte 2. l. 2. c. 7. Anno 1627. 25. Martij. Vidi advenientes ad accipiendas gratias, distribuyente eas Beatissima Virgine, homines omnis statûs & conditionis, etiam ex diversis regionibus, quas DEO commendabam, tametsi eos non noverim, & multos Infideles. Singulos comitabatur Angelus ipsorum Custos, sed aliqui ex Infidelibus veniebant quasi co-acti;

acti; quosdam illorum Angeli adferebant impositos humeris, alios trahebant, arrepto eorum brachio; nonnulli comparebant minùs inviti.

VIII. Parte 2. l. 1. c. 18. Anno 1626. 2. Aprilis. Vidi quendam Sanctum Angelum, qui ad me veniebat festinanter & vultu quasi inflammato præ indignatione. Adducebat animam manu apprehensam in specie parvi pueri, quem coram me constituens, seque ad eam animam convertens, dixit illi voce iracunda & vultu terribili: *Flecte hîc genua* (quod quidem cum magno meo rubore dico, Sanctus tamen Angelus re verâ sic fecit) atque deprecare isti famulæ DEI hoc & illud; insinuando ipsi duo vel tria, quorum venia esset illi petenda. Anima respondit valde obfirmatè: nolo quidquam tale petere, nolo; & cæpit vim adhibere, trahendo suam manum, ut eam ex manu Sancti Angeli eriperet, ac elaberetur. Detinebatur ab Angelo, & sicut hîc fieri consuevit, dum puer est obstinatus & refractarius, nolens obtemperare, Sanctus Angelus elevavit alterum brachium, atque impegit illi Animæ colaphum, ut eam prostraverit ad terram, ac destituerit usu sensuum. Ego fui afflictissima, & intimè condolendo aspiciebam, quem iste casus esset habiturus exitum: vidi autem, quòd ipsam Sanctus Angelus vultu irato, sicut antea, violentè elevaverit, & brachio arreptam abduxerit, ità ut à me non fuerit ultrà conspecta. Hæc, Pater, est Anima illius personæ, quam ego sum tuita instar scuti, ut imminentes ipsi Divinæ vindictæ ictus & plagæ in me derivarentur, atque ei non nocerent. *Est autem hoc advertendum, quod persona illa persequabatur Venerabilem Mari-*
nam.

IX. Parte 1. l. 1. cap. 4. §. 1. Aliquando ex peculiari DEI illuminatione intellexit esse tantam potentiam sui Angeli Custodis, ut ipsi videretur sufficere, ad evertendum mundum. Unde usque adeò fuit consternata, ut multis diebus aliud

R r r

non

non ageret, quàm intrà se ipsam diceret: Si unus Angelus præditus est tantâ potentiâ, quantâ iste, quem vidi; qualis erit potentia Domini Angelorum? Cùm autem aliâ vice ipsi comparuisset eleganter vestitus, atque illa præ modestia, nollet ipsius vultum intueri, dixit ei: Siquidem me non vis aspiceré, DEUS te illuminabit, ut videas meam fortitudinem. Et subito illi apparuit instar muri cujusdam fortissimi, quem nulli globi possent perrumpere, non secùs quàm si forent straminei: talis, dixit tum Angelus, est nostra potentia, pro custodiendis hominibus, ac defendendis contra dæmones.

Lib. I. cap. 4. §. I. Cum hac potentia, & non minori sollicitudine, atque cura adveniebat, ut ipsam custodiret, ac tueretur, modo peculiari, & alio, quàm reliqui Angeli, qui ordinariè cum ipsa agebant quodam modo humano, sicut amici, aut socij solent secum conversari, ille verò cum imperio, & tanquam hospes domûs ingrediebatur, & egrediebatur, exequabaturque universa pertinentia ad salutem Animæ ipsius, docendo illam, dirigendo, exhortando, objurgando, nec non castigando, quando opus erat, & peragendo cætera omnia, quæ prudens aliquis, amans ac sollicitus pædagogus, potest ac debet agere cum puero, cujus curam gerit: ipse quoque specialiùs erat quasi minister & instrumentum DEI in extraordinarijs gratijs quas illi conferebat; eratque præterea tanquam depositarius, in cujus manibus & sinu deponebantur spiritualiter cimelia, quibus illam DEUS donabat, gratiarum, virtutum, ac meritorum, quæ per ea cimelia significabantur. Atque ut intelligeret antiquam esse hanc ipsius curam, quamvis illud usque ad tempus eam gessisset invisibiliter, incepit illi quadam vice enumerare pericula, ex quibus ipsam liberaverat ab infantia eo quòd illam diabolus jam tum persequeretur: Non meministi, aiebat, quando adhuc puella volebas aliquid extrahere, quod tibi ceciderat inter grandes lapides, unum illorum ruisse, qui

qui supra te labebatur? Scias velim ipsum fuisse motum à diabolo, ut te mactaret, sed esse à me detentum, quamvis tibi læserit digitos, cujus rei signa etiamnum in illis habes: neque recordaris, te, cum aliquando conscenderes quædam præcipitia, fuisse proximam casui? Ecce ego te erui ex eo discrimine. Atque hunc in modum illi recensabat beneficia, quæ ei præstiterat postea in provectiore ætate, in qua plerumque, dum ipsa pateretur persecutiones & molestias, quas ipsi dæmon procurabat, magnâ virtute pro ejus defensione aggrediebatur istum potentem hostem, donec illam eriperet ex illius manibus.

Denique (inquit illa) præbitis aliquando indicijs magni gaudij, mihi dixit: Ecce, mihi incumbit, Animam tuam adducere ad conspectum DEI. Cum autem ego perpenderem lætitiâ, quam præferebat, & modicum illud, seu nullum à me præstitum DEO obsequium, nec non multa à me commissa, peccata, respondi ipsi: Quomodo tam indigna creatura comparebit coram suo DEO?

X. Lib. I. c. 30. §. 6. Die Gloriosi Apostoli S. Andreæ, mihi apparuit idem Sanctus, ut me solaretur ac animaret; sed dæmon mihi id invidens, collocaverat se post illum, me non advertente, dixitque mihi quædam verba, quasi illa diceret. Sanctus, quodammodo me acriter reprehendens. Expertus sum in Anima tantam turbationem, prorsus diversam ab ijs affectibus, quos verba DEI, & Sanctorum ipsius excitant, idque cum quodam tumultu, ut me statim ab illo averterim, & quasi consternata me converterim ad meos sanctos Angelos, qui me sunt consolati & mihi manifestarunt, quid fuerit. Quando me denuò verti, ut aspicerem sanctum Apostolum, jam abiverat. Et significaverunt mihi Angeli, ipsum abivisse, eò quod tunc non essem disposita ad eum audiendum; rediturum tamen post quatuor vel quinque horas; atque unâ dixerunt: Bono animo esto, Soror, quia affigeris cruci inverso capite. Ex-

horruī naturaliter, sed Angelus meus Custos me animavit dicens, ne timerem, se enim mihi adfuturum in Cruce. Ego illi dixi: Sancte Angele, cum ipse non possit pati, nihil est speciale, quod adsit mihi crucifixæ. Angelus autem mihi respondit: Etiam si non possim pati, possum te juvare, ut subleveris in tuis cruciatibus. Subito me adverti affixam cruci, totam à pedibus ad caput, quàm decentissimè coopertam pallio cæruleo, & capite deorsum converso, pedibus verò sursum, sicut fuerat crucifixus Sanctus Petrus. Postquam aliquamdiu mansissem in eo situ, Angelus meus Custos in momento invertit crucem, & crexit, ita ut superiore parte spectaret cælum, sensique me ab illo deponi ex cruce, & extrahi mihi manus, quasi ex quibusdam ferreis annulis, quibus fuerant insertæ. Tum mihi imposuit coronam, quam ipse asservaverat, velut in deposito, cujus est superius facta mentio; ut significaret quid fuisset promerita eo cruciari. Quando ex isto raptu ad me redij, passa sum gravissimos dolores in toto corpore, capite, pedibus, ac manibus, quasi re ipsâ, & verè sustinuissem illud tormentum; & Gloriosus Apostolus Sanctus Andreas adfuit his omnibus, quem ego rogavi, ut ageret meum Advocatum, ac Patronum, juvarerque etiam alios; ad quod ille se mihi exhibens promptum, discessit à me, datâ mihi suâ benedictione.

CAPUT IV.

De SS. Archangelis Michael & Gabriële.

I.

PArte 1. lib. 3. c. 13. §. 1. Dum audirem Sacrum in festo Sancti Michaelis, ostendit mihi illum Dominus, & cognovi in hoc sancto Archangelo, tantam fortitudinem ac potentiam, ut eâ videretur posse evertere mundum, &

mo-

movere sùsque deque omnia ; omnesque creaturæ, quæ sunt super terram , mihi comparebant coram ipso instar formicarum. Vehementer sum mirata hanc apparitionem. Dominus autem mihi dixit : Expecta parumper , & videbis alia mysteria admirabiliora. Dum audirem quòd me vellet elevare ad res valde supernaturales , vehementer expavi. Tunc venit Beatus Michaël, & conferendo vires ac vigorem meæ Animæ, corroboravit ipsam, solatùsque est, dicendo mihi : Noli timere, quia ego te juvabo, & comitabor.

II. Lib. 3. c. 13. §. 4. In festo Sancti Michaëlis manè vidi Sanctum Archangelum, splendidissimè & elegantissimè vestitum. Salutavit me quàm amantissimè , solatùsque est , & confortavit vehementer in meis continuis doloribus. Atque dum conversarer cum ipso, vidi quatuor Angelos , qui paulatim conficiebant & elaborabant mirabiliter vexillum ex purissimo auro , quod absolutum obtulerunt sancto Archangelo Michaëli, & ipse id benedixit , jussitque illos cum eo abire, ad peragendum certum mysterium. Acceperunt illud Angeli, & sustulerunt in altum , atque vibraverunt. Prodibant autem ex eo tanti splendores luminis & claritatis , ut viderentur totum mundum illuminare. Tulerunt idem vexillum inter cælum ac terram ad regionem aëris , ibique denuò erectum agitabant, colligebant & expandebant, quod ab illis fuit factum ter aut sæpius ; & quotiescunque hæc faciebant , proficiebant ex ipso novi splendores luminis & claritatis decidebantque ex aëre ad infernum multi deformissimi diaboli, tot tamque agminum, quàm quando vehementer grandinat. Finito hoc mysterio , venerunt cum vexillo ad locum, in quo erat mecum sanctus Archangelus, quod ille accepit ad suas manus, & cum eo, tum ipse, tum sancti quatuor Angeli, atque alij innumera- biles, omnes discesserunt ad cælum. Ego fui ducta post illos à meis sanctis quinque Angelis, & non vidi meum Custodem.

Ingressa autem ad Cælestem patriam mansi intus è regione portæ cum meis socijs, & Archangelus cum reliquis intravit ad conspectum Divinæ Majestatis. Cùmque essent prostrati, & agitant vexillum, idémque colligerent, & explicarent, prodibant ex ipso tanti splendoris lucis & claritatis, ut illuminarent illam Divinam Aulam. Omnes ità provoluti adoraverunt Dominum, reverentes ipsum, ut Creatorem ac Authorem omnis sui boni & gloriæ. Dominus illis bene precatus est, jussitque eos surgere, & aspiciens me, quàm amantissimè ac affabilissimè, dixit: Esne tu hic Soror? Veni & fruire festo mei Archangeli. Præcepit omnibus Angelis, ut celebrarent magnam solennitatem in honorem Sancti Michaëlis. Instituta est sollemnis processio per circuitum Cæli. Sanctus Archangelus tulit vexillum: tota Aula Angelorum ipsum sequebatur, decantantium ipsius laudes, ac dicentium: Tu es, Sancte Angele, qui defendisti in Cælo honorem nostri magni DEI ac Domini, dicendo: Quis ut DEUS? Tu ejecisti ex Cælo Angelos malos, eosque vicisti; Tu es Patronus & Custos Ecclesiæ militantis; Tu illam tueris contra illius hostes: & alia hujusmodi dicebant, quàm lætissimè & jucundissimè. Ego affixa pedibus mei Domini, spectabam illam solennem pompam, eaque recreabar, donec reversi ad Dominum omnes denuò se prostravissent coram Divina Majestate, iterumque ipsam adoravissent, sicut antea. Tum Dominus illis secundo benedixit: atque adducens me ad se, etiam mihi dedit suam benedictionem.

III. Lib. 4. c. 2. §. 2. Dum agerem cum DEO, tempore quodam matutino, in Martio Anno 1615. comparuit mihi aliquis dæmon valde procerus, atrox & niger, ac abominabilis. Præseferebat magnam nequitiam. Hæc visio mihi attulit gravem afflictionem ac horrorem. Et licet mihi videretur ad stare sanctus quidam Angelus, subito averti prorsus oculos. Verum

rùm coacta à Domino, illos iterum ad ipsum converti, & notavi, esse Angelum maximæ Majestatis ac potentia, ut videretur posse debellare totum infernum. Hic mihi dixit: Creatura DEI, & Anima redempta sanguine JESU CHRISTI, ego sum Archangelus Gabriel: agnosce me, & scito, me venire in nomine Domini, ac propter officium, quod mihi injunxit, ut te custodirem. Adduco autem tibi istum dæmonem (cùmque verteret manum, & ipsum tangeret, prostavit se, & extendit dæmon humi) quē noveris illum esse, qui te maxime vexavit & afflixit, maleque tractavit; unde tu illum modò judicare debes: est enim in tua voluntate & potestate pæna illi injungenda, propter ipsius nequitiam. Cùm hæc audirem, fui afflictus, dixique illi: Archangele DEI, ego vivo juxta Divinam dispositionem, & quidquid patiar, respicio DEUM, qui suâ manu omnia metitur atque definit, ideoque id meâ nihil interest, neque me quidquam concernit, solum desidero exequi voluntatem DEI. Sanctus Archangelus mihi reposuit, dixitque: Ego Soror, ideo huc veni; considera quid velis facere. Ego verò illi rursum dixi: Angele DEI, tu es præditus sapientiâ, ac fortitudine Divinâ, neque potes ulla in re errare; fac quod scis velle DEUM; tibi credo, ac transcribo meum jus, & quidquid præterea dicis ad me in hoc negotio pertinere; ego enim nihil amplius scio, quid agam. Tum gloriosus Archangelus aspexit Angelum meum Custodem, stantem juxta me, cum alijs quatuor, & dixit illi: Angele DEI, cui Divina Majestas commisit custodiam hujus animæ, bene audivisti, quid contigerit. Dic age, quid tibi videatur ac tuis socijs, ut hoc fiat. Angelus meus Custos respondit valde reverenter, ac venerabundè: Archangele DEI, hæc Anima, quam Dominus mihi tradidit custodiendam, nunquam est passa damnum vel jacturam ullam, propter molestias, afflictiones ac tormenta, quæ ex Divina dispensatione sustinuit à dæmone: quin imò
illi

illi profuerunt ad augmentum meritorum & coronam. Ego desidero majus bonum hujus Animæ, & gloriam DEI, ac proinde nescio, quid tibi dicam. Aspiciensque socios, vidit illos quasi indifferentes in hoc casu. Tunc Sanctus Archangelus. Gabriel pede premens corpus illius bestię crudelis, & evaginans, quem habebat applicatum cingulo gladium, quasi ignem valde vehementem, coiburentem, & nimium horribilem, folam illius cuspidem admovit capiti dæmonis, qui subito evanuit ac descendit circiter ad unam orgiam sub terram, ejulando & lamentando horridissime, ac si nova tormenta pateretur; Sanctus verò Archangelus illi dicebat: Apage proditor, cum his mortalibus doloribus in abyssum inferni; atque ille post hoc dictum se precipitavit per quosdam terræ hiatus, & formidabilissima precipitia, cum majoribus ejulatibus, & angustiis infernalibus. Per hæc precipitia ruit ad infernum, inspectante semper Sancto Archangelo Gabriele, qui suâ illâ magnâ virtute ac fortitudine, suâque illâ terribili voce, ipsum urgebat, dicendo: Apage proditor, in abyssum inferni. Ac deinde clausa fuit terra, & Sanctus Archangelus Gabriel ibi remansit propè me, illósque sanctos Angelos præsentés, quos est alloquutus, dicens: Beati Angeli, profectò Dominus noster Majestatis vos bene occupat in eo, quod assistatis isti ipsius creaturæ & Animæ, eamque custodiatís, quæ tanti constitit JESU CHRISTO Domino nostro, & pro qua dedit tantum pretium, quantum fuit pretiosus ipsius sanguis.

IV. Et conversus postea ad me, dixit mihi: Creatura DEI, & Anima redempta sanguine JESU CHRISTI Domini nostri, multum omninò es passa ab isto dæmone infernali, quem hic vidisti. Sed propter DEI benignitatem & fidelitatem ac ipso adjuvante, tibi omnia bene cesserunt, atque ad tuum emolumentum, & gloriam magni DEI ac Domini nostri, qui tibi munus hoc per me mittit (tum protulit ramum palmæ, valde spe-

speciosum & preciosum, in quo erat crux non admodum magna, habens in summitate impositam coronam, elegantissimam ex auro & gemmis lucidissimis, qualis fuit ipsa quoque crux) & accedens ad me, dixit mihi peramanter: Accipe, Soror. Sed ego obstupescens, quòd viderem tanta mysteria & miracula, atque etiam pudefacta & confusa respondi: Nequaquam Domine, quia non mereor tantum donum; non possum. Et humi prostrata non audebam præ verecundia assurgere, neque, intueri illud pretiosum donum. Videns id Archangelus, dixit mihi: surge, Soror nostra, suscipe hoc donum. Tunc venit Dominus meus Angelus Custos, tangensque me quasi mihi daret signum, iussit me surgere. Surrexi, & provoluta in genua, aperui meum animum illis duobus Angelis, dicendo: me prohiberi pudore, nè suscipiam tam magnum donum; cum, verò sic oporteat fieri, & DEUS velit, desiderare me, ut tradatur meo Angelo Custodi, qui bonam ipsius rationem esset redditurus, eò quòd ego non auderem acceptare tantum munus. Dum id videret Sanctus Archangelus Gabriel, dixit meo Angelo Custodi, ut susciperet illud donum pro ea creatura, quam custodiebat; quod Angelus locò ipsius suscepit reverenter, & cum demonst ratione gaudij, statimque servavit in se ipso.

V. *Cum mea Anima talia videret & à DEO illuminata, cognosceret virtutem potentiam ac fortitudinem illius Archangeli, fuit quasi attonita, & vehementer obstupescens, illi incepit dicere: Beate Archangele DEI Gabriel, Fortitudo Domini Majestatis, fortunata, felix, & beata est sors tua, eò quòd Majestas nostri magni DEI ac Domini, totaque Beatissima TRINITAS te elegerit in Legatum nuntij omnium Divinissimi & admirabilissimi, quæ unquam commissæ fuerit, aut committentur ulli puræ creaturæ. Tū Sancte Angele attulisti hoc nuncium maximæ Reginae ac Dominæ, & purissimæ ab omni macula, Divinissimæ, & cælestibus exornatæ gratijs præ omni*

pura creatura. O te felicem & Beatum! Si enim esse Legatum alicujus terreni Regis, est tanta dignitas, censeturque tam honorificum, eò, quò repræsentet Personam Regis & tantam gratiam illi Rex præstat, cui adfert nuncium; quantò potiores & majores gratiæ ac privilegia fuerint, quæ acceperis à Divina Majestate, à qua fuisti missus, ad tam magnum tantique momenti negotium: quales etiam honores erunt, & quantum nomen, quod in oculis illius summæ Reginæ, ad quam fuisti ablegatus, fueris adeptus? Magnas es consecutus gratias à Domino Majestatis: Ipse sit benedictus millies, & tu sis benedictus à Domino, qui te creavit. Audiens Angelus, quod ego illi cum hoc fervore dicebam, respondit mihi: Creatura, DEI & Anima Domini, omninò verum est, quod dixisti. Sit benedictus noster magnus DEUS in omnibus operibus suis & miserationibus, quarum una ex maximis mihi ab eo præstitis, quàmque ego æstimo, & quâ supra modum glorior, est, quod ab instanti purissimæ conceptionis hujus præcellæ Virginis Matris DEI, semper illi inserviverim, ac adfuerim per decursum illius Sanctissimæ vitæ, quoadusque cum corpore & Anima est assumpta ad Cælos. Et propter hunc favorem, ac privilegium Divinum, proptérque suam immensam bonitatem, mihi contulit tantas tamque veras gratias, sicut dixisti. Tu verò Soror nostra, cogita nunc, quid velis, ego enim te visitabo, quàm diu vixeris in isto exilio, donec adveniat hora, quam DEUS constituit ad te ex illo educendam, ac transferendam, pro sua bonitate & clementia, ad æterna tabernacula, ubi ipso fruaris perpetuò nobiscum, & cum omnibus Beatis; vale; & valedicens Angelis, qui mihi aderant, discessit, cum comitatu multorum aliorum ad Cælum.

CAPUT

CAPUT V.

De Diabolis.

I.

PArte I. l. 3. c. 13. §. 4. Feriâ sextâ post festum Sancti Michaelis, manè me Dominus sopivit quodam somno mystico, ex quo expergefacta, vidi in meo cubiculo aliquantum remotum à meo lecto quendam sanctum Angelum valde gravem. Finito Sacro, & peractâ à me Sacrà Communionem accessit Sanctus Angelus, de quo loquor, & prostravit se coram me, adorans Sanctissimum Sacramentum, quod susceperam. Dominus ipsum jussit surgere, dixitque illi: posse cum redire ad suum locum. Audito hoc, interrogavi meum Dominum: Domine mi, humiliter obsecro tuam Majestatem, ut mihi dicat, quid iste sanctus Angelus hic fecerit? Et Dominus mihi suâ solâ benignitate respondit: Custodiebat te ac defendebat à diabolo, qui tibi volebat nocere & inferre damnum. Ergone, Domine mi, reposui ego, potest diabolus inferre damnum creaturis absque tua facultate? Si tu illam ei non concedis, quid ipse potest facere? Ità, est verum, ajebat Dominus; sed ego, sicut in naturalibus permitto res eo ordine currere, quæ jam aliàs decrevi ac disposui in mea æternitate, absq; ulla immutatione; ità in supernaturalibus permitto dæmonem uti facultatibus, quas ipsi concedo, sed operâ meorum Angelorum illi sæpè impedio earum executionem, pro ut expedit meis electis.

II. Lib. 4. c. 2. §. 1. Anno 1600. 14. Junij dum agerem cum CHRISTO Domino, & Sacratissima Virgine, venit quidam Angelus magnæ Majestatis, quem sequebantur plurimi dæmones, cùmque CHRITUS Dominus ostenderet se velle abire, petij ab ipso sanctam benedictionem, quam mihi Dominus negavit, significando, quòd si mihi ipsam daret, dæmones

in momento fugerent. Postquam Divina Majestas abivisset, suscitaverunt adversum me grande prælum, ac tumultum cum monstrosis vultuum distorsionibus, suffumigationibus & alijs adinventionibus. In his certaminibus mihi fuit dictum, magnum illum Angelum ibi præsentem esse Sanctum Michaelē, qui venerat ad me defendendam, mēque quasi circumibat, repellendo illos manu, & in gravi quodam ipsorum insultu exhibuit quandam lanceolam, cum suo vexillulo, quā dum terram percussisset, omnes fuerunt separati & prostrati, erepseruntque paulatim sub porta. Et quia ego eram vehementer fatigata ac debilitata ex hac pugna, quasi corporaliter peracta fuisset, Sanctus Angelus accepit thurbulum aureum, & circumivit me ter, ut abigeret fætorem, quem ibi reliquerunt dæmones; ac certo loco se inclinabat. Existimo illum id fecisse coram CHRISTO Domino. Cūque remanērem valde debilis, dixerunt sancti Angeli, qui mihi assistebant, opus esse pluribus remedijs; & accedens Sanctus Archangelus propius, formavit signum Crucis in mea fronte. Quia verò nihilominus sentiebam debilitatem, afflavit me, quasi me vellet confortare halitu suæ respirationis, quo fui magis corroborata. Et illo die mihi exhibuit alium favorem, comitando me, quando ibam ad templum, ut more solito interesssem Sacro, & communicarem.

III. Lib. 4. c. 4. §. 6. Vidi aliquando meos sanctos Angelos sollicitissimè obambulantes in superiore domus parte, ac si lustrarent parietes; quemadmodum lustrari solent ab Architectis, vel Fabris lignarijs; & conspexi subitò dæmonem in specie magnæ simiæ, qui extrahebat dentibus quendam clavum, quo conjungebantur duæ trabes. Angeli illum percutiebant, ne ad faceret; ipse verò vociferabatur, & prosequabatur opus ceptum, atque reverà, illum extraxit: sed statim ipsum coegerunt, quamvis indignantem, reponere clavum ad priorem locum.

eum. Non intelligebam tunc quidnam id significaret, donec postriedie comparuisset una trabs revulsa, quæ minabatur ruinam. Quare fuit advocatus Artifex, qui illam lustravit, unaque vidit parietes supernè esse jam sejunctos, & pronos ad casum, ac proinde statim est actum, ut occurreretur damno.

IV. Lib. 5. c. 6. §. 4. In Decembri Anno 1620. reperi me cum Domino DEO meo, Sanctisque meis Angelis, in sacro loco, in quo est sanctum Sepulchrum Domini, quod adorabam, & iteratis venerabar osculis, humi prostrata, cum summo affectu ac devotione, & solatio meo. Indè fui ducta ad Palatium Regis infidelis earum Regionum, ubi mihi ostensus est ille Princeps. Erat nox & decumbebat solus in lecto extensus, præsentè maximo quodam dæmone & robustissimo, qui à pedibus usque ad caput erat armatus; & gerebat grandem bipennem in manu, perambulabat conclave cum magna furia, & quàm impetuosissimè, videbaturque illum infelicem Regem habere subditum suæ voluntati, ac magis dominari isti creaturæ, quàm ullus Dominus mancipio empto suâ pecuniâ. In Angulo illius magnæ aulæ, vidi Angelum, qui præferebat valde tristem vultum.

Indè me duxerunt ad Palatium alterius Regis hæretici, ubi illum vidi in ejus lecto circumdatum à multis, circa ipsum vehementer tumultuantibus, & vociferantibus diabolis. Indolui vehementer hæc videndo, quòd tam multi homines subditi sint diabolo, & tam pauci præditi luce Evangelicâ, atque hi ipsi tam sint tepidi in servitio & amore DEI. Sed consolatus est me DEUS plurimùm, lumine mihi dato, quo vidi Divinam ejus Majestatem opulentissimam gloriosissimam, & unde quaque ornatissimam cum suis illis paucis; dæmonem autem cum tam multis hominibus miserabilem, contemptum, & majora inferni tormenta perpetientem. Dixitque mihi Dominus, àt qui omnia optimè agit, ac permittit, estque idcirco omni-

bus contentissimus: Animadvertite, Anima, ego reponam in meo horreo triticum purum & mundum, paleam verò tradam ignibus infernalibus. Vehementer obstupuit Anima mea, quæ vidit ac audivit dici à suo DEO, & magnas illi pro omnibus egit gratias,

V. Lib. 6. c. 17. §. Sancti Angeli in Aprili Anno 1613. me sustulerunt & collocaverunt in quadam quasi sella, tuleruntque ad cælestem patriam cum comitatu multorum Angelorum DEI, qui venerunt ad me comitandam, alij armati, alij eleganter ornati, alij cum hastis, alij cum gladijs, sicut quando Satellites comitantur Regem; alij me præcedebant, alij sequebantur. Et Sanctus Angelus meus Custos mihi dixit: Ecce Anima, cum tali custodia, qualem tibi Dominus submittit, cur times, ac te affligis? Dum ita procederem ad Cælum, manifestavit mihi DEUS, in inferno esse magnum tumultum; & vidi, quòd Princeps diabolorum, videns me ità ascendentem, ringeretur præ dolore ac rabie, imperaretque diabolis, ut citò pergerent, ad impediendum mihi transitum, & ingressum ad cælum. Illi verò volebant ipsi obedire, & dicebant: Frustra ibimus, quia est magna potentia illorum, quos adducit, ad suæ defensionem. Timebant; ille verò urgebat, ut irent, vocando illos vecordes, canes, & impetendo illos mille convicijs; sed actum agebat dixitque ipsis: Ego ei intercludam viam. Hoc non, reposuerunt illi: quia cederet in tuum dedecus. Ac tandem quidam se proripuerunt, quasi quatuor, qui me aspiciabant eminus, neque sunt ausi accedere, videntes ingens robur satellitij; quod me comitabatur.

VI. Parte. 2. l. 1. c. 21. p. 93. Anno 1628. 16. Martij in mea ad DEUM oratione, cæpi subito dubitare an non fortasse optarem res extraordinarias? unde statim dixi magno fervore: non mi Domine, non volo, nec desidero quidquam præter te, nihilque magis cupio, quàm tibi servire, ac te quæ-
rere,

rere, quâcunque ratione volueris. Quodsi mihi dæmon ingesserit aliquam imaginationem, ut secerit viam quampiam singularem, nullo modo illâ admittam: non habet ille quod hac super re mecum agat: alioquin ipsum comburam & concremabo. Dominus me benignissimè audivit, dum id dicerem, responditque mihi suavissimè: Anima, quid dicis? quomodo poteris comburere & concremare dæmonem? Omnino mi Domine, aiebam ego, dico, quòd ipsum sim combustura, & concrematura, si mecum hac de re egerit. Adverte quid dicas, reposuit Dominus. Omnino mi Domine, rursus dixi: jam enim scio, qualiter me id oporteat facere. Debebo nempe, mi Domine, illum exsibilare ac deridere, & nihili facere, quidquid mihi fuerit locutus: nam nihil magis urit dæmonem, quam dum se videt despici, & vilipendi.

VII. Lib. I. c. 4. p. 17. Descendi ad profundissimum puteum per gradus, comitantibus meis Angelis, & statim vidi prope me gregem deformium canum ac molossorum, diversas præferentium figuras. Hi diabolico vultu in me coniecerunt oculos, & pari furore stridentes dentibus me sunt aggressi. Alij me videbantur velle devorare, alij impetebant manus, alij brachia, alij pedes, ità ut nulla esset pars corporis, quam non apprehenderint: alij arreptas vestes conabantur discerpere, latrantes interdum ac terribiliter ululantes. Mirum erat, quòd in omni hac vexatione prope nullam sentirem afflictionem: quia illis negabatur à DEO facultas, ut tam vesanè furentes quidquam mihi inferrent nocumenti. Aspiciebam interea, meos Dominos Angelos, qui cum magna pace ac dissimulatione nihil movebantur, & nullâ videbantur rangi curâ eorum, quæ spectabant. Ità me illi crudeles molossi reliquerant, & huc atque illuc diffugerunt, formidabiliter ululantes & furentes. Paulò tamen post rursus congregiebantur, mordentes se invicem ac dilanantes. Deinde dissipati recedebant, omnium

um rictibus cruore manantibus. Hæc verò ipsorum congregatio, mutua dilaniatio ac dissipatio fuit tertio eundem in modum iterata. Indicabatur autem mihi, repetitas illas corrosiones, quibus in se mutuò exacerbabantur, provenisse ex rabie, & indignatione, cum in me exequi non possent, quod optabant, donec tandem sunt ingressi quoddam rapax flumen, cujus pestilentes aquæ caloris erant atri, & abominabilis odoris.

VIII. Par. 1. c. 13. §. 3. Astutus deceptor mihi volebat, persuadere eam cogitationem, quâ me conabatur retrahere à frequenti communione, provenire à bono spiritu, siquidem me quodammodo illuminabat, sicut solet illuminare DEUS; quod tamen nesciebat imitari, neque omnino similiter præstare, quia relinquebat sui quædam vestigia, ex quibus incepti nescio quid suspicari de malo genio; licet enim videretur esse verum, quod dicebat, veniebat tamen cum interno quodam tumultu, perturbando, inquietando, & contristando Animam, contrà quàm faciant, lumen & reprehensiones Divinæ, quæ adveniunt cum pace & quiete interiori. Verùm tametsi haberem istam suspicionem, stringebant me rationes, quas mihi dæmon oggerebat, petitas ex mea indignitate. DEUS autem videns periculum, in quo versabar, nè succumberem illi illusioni, dixit mihi quodam die celerrimè: Dic, age, quid facis? adverte, esse diabolum, qui te vult decipere & abducere à Sacra Communione: relinque illum, nè ipsi credas. Tum ego agnovi vocem, & inspirationem mei DEI, ac plena gaudiò & amore ardentissimò, illum laudabam, & glorificabam, propter specialem curam, quam habebat de me præservanda à fraudibus diaboli, non quidem in rebus gravibus, sed in ijs quæ retrahunt ab eo, quod est utilius, & cum magna fiducia illi dicebam: Domine mi, & bonum meum, si tam fidelis amicus es in protegendis ac defendendis nobis in eo, quod videtur exiguum,

um, aut non tantum, quanta sunt alia graviora; quis dubitat, quin id sis facturus in re gravi, & nobis valde noxia? cum ergo ita sit, ut est, quis poterit tibi diffidere, qui es tam bonus Pater, Dominus, & fidelis amicus, ac securus protector te quærentium? Postquam Dominus protulisset prædicta verba, au- fugit diabolus, & nunquam amplius de hac re est locutus.

IX. Lib. I. c. 15. §. I. Vidi Diabolum vehementer furentē & indignantem ac simulantem otium, ut videretur nihil agere, atque tabescere dolore, & confici. Et in hac simulatione, quam fingeat, se gerebat instar alicujus pueri, qui dum non permittitur agere malè, & pro suo libitu, dissimulanter exerit manum, & petit alium ex improvise lapillis, ita ut non possit, advertere à quo projiciantur, ac licet quam primum vertat caput, ut videat, quis se molestat, videt illum petulantem, tam simulatè modestum, ut vix possit credere, ipsum esse, à quo impetatur. Ità mecum agebat dæmon, in tentationibus & molestiis, quibus me vexabat. Hinc deprehendebam duos modos, quos observat in tentandis Justis. Tentat imprimis manifestè, quando incitat ad ea, quæ apertè mala sunt, impellendo ingenti furia, & impetu ad illa sectanda: deinde tentat occultè quando incitat ad quædam quæ videntur bona, vel sub specie boni, desiderando, ut attribuatur bono spiritui, cum tamen proveniant ab eo, qui est tam malus.

X. §. 3. Dæmon illam crudeliter cruciabat, quia hoc illi DEUS permittebat, quod quidem faciebat adeò fucatè, ut quemadmodum dicitur fieri in raptibus, quod interdum nesciatur, contingatne in corpore, an tantum in spiritu; ita difficulter posset percipi, an ijs cruciatibus impeteret corpus, an verò tantum vexaret vivā illorum repræsentatione, excitatā in imaginatione, perturbaretque humores, ita ut inde orirentur veri dolores, & convulsiones membrorum.

Lib. I. c. 30. §. 5. Dixerunt mihi mei sancti Angeli: Sor-

T t t

ror,

ror, Dominus vult, ut ingrediaris & transeas magnum ignem. Extimuit natura, dixique ipsis: sum semiconsumpta à vehementibus internis ignibus, quos patior, sed si vult Dominus, fiat voluntas ipsius. Illi videntes meum timorem, dixerunt: si nos tecum fuerimus ingressi, nonne libenter ingredieris? Ego dixi, ità, certè, Domini. Duxerunt me ergo ad quendam locum, ubi erat ingens rogi; vehementer ardens, quem sancti Angeli sunt ingressi, neque ignis illos tetigit, & dixerunt mihi, ut intrarem. Duxit me sanctus meus Angelus Custos, & ingressa sum usque eò, ubi ipsi erant: quamvis senserim, flammam in faciem involantes, exiguus tamen fuit dolor, quem sum passa. Cum ibi aliquamdiu fuisset morata,educta sum ad extremitatem rogi, & vidi ex altera parte stantes duos demones irritantes ignem, quia cogitabant, me esse intrà illum. Dum autem circumirent, & me viderent extrà, pudefacti evanuerunt. Ego dixi sanctis Angelis quòd parùm senserim illum ignem: qui mihi responderunt, id propterea accidisse, quòd Dominus mei fuerit misertus ob multa, quæ patior; voluerit, tamen, ut sustinerem etiam hoc genus supplicij.


XI. Lib. 5. c. 11. §. 2. Cum me obtulisset DEO pro quadã persona in honore & facultatibus adjuvanda, ad tolerandum aliquid acerbum ac difficile, quidquid Divinæ Majestati placeret, istà occasione diabolus dixit Divinæ Majestati: Etsi istam creaturam, quæ se tibi promptam exhibuit ad patientiam aliquid pro juvanda illa Anima, quam novisti, verum sit, multis jam diebus pati graves dolores morborum; nunquam tamen mihi tam amplam facultatem tribuisti ipsius affligendæ, quàm ego vellem. Nunc tibi decernendum reliquit, quidnam velis tolerari pro bono illius Animæ. Cum libenter velit pati, quidquid tu volueris, & quævis Anima sit tam pretiosa, tantòque tibi Domino Majestatis constituerit, æquum est, ut pro ista creatura, quæ petit bonum hujus Animæ, si illi præ-

sti-

ſtiturus es hanc gratiam & miſericordiam, deligas ac decernas graves dolores & cruciatus, atque ego ſim executor illorum ac miniſter, ut ità tua magna Maieſtas videat quomodo ſe geret in majoribus afflictionibus, cruciatibus ac tormentis, & ſi à te derelinquatur, utrùm etiam agat fideliter, teque amet, ac tuæ voluntati ſe ſubmittat, ſicut in alijs hætenus fecit. Audivit Dominus dicta à diabolo, qui ſolet fuſè admodum loqui, & multum blaterare quando aliquid proponit, id quod facit, fraudulenter ac malitioſè, & interdum videtur proferre grandia miracula; poſtea verò probata confundit ac deſtruit, ut videatur nec ſe ipſum intelligere, neque dicere intelligibilia. Iſte ſolet eſſe ipſius modus loquendi. Divina verò Mejeſtas illi reſpondit uno verbo, tantùmque dixit cum magna authoritate & majeſtate: Abi, & perge: Ecce enim concedo tibi, quod à me petiviſti. Hoc audio abivit diabolus ex conſpectu Domini contentiſſimus. Ego autem, quæ hac de re nihil ſciebam, ſicut dixi, nihilque tale cogitabam, incepi quodam die Veneris ſub veſperum, ſentire dolores acerrimos, præſertim in tribus corporis partibus, qui uſque adeò intendebantur, ut horà ſecundà noctis mihi videretur intrà corpus meum incluſus eſſe, hoſtis quiſpiam armatus, fodicans aliquo telo, ac vulnerans dictas partes, unde vehementiſſimè diſcruciabar, ut me putaverim diſrumpendam, ac ſi immerſa eſſem aquæ; neque poterim jacere, vel me erigere ullo modo in lecto, quia mihi videbantur in ipſo, & ſupra illum, ac ubique eſſe quædam quaſi acutiſſimæ culpides, compungentes & affligentes totum meum corpus.

XII. Pro coronide apponamus quod habet Ven. P. L. de Ponte ad finem libri primi ſequentibus verbis: Denique aliquando ſub prætextu commiſerationis oſtendit diabolus, quantopere cuperet videre iſtam ſuam ininiam, reductam in nihilum. Dixit ipſi quodam die Divina Maieſtas: Anima,

quid faciam ut te subleves in tuis molestijs & afflictionibus? Respondit diabolus qui adstabat: Domine in quo potes sublevare istam Animam, est, ut illam liberes ab afflictionibus, quia jam diu patitur. Ut ut sit, tu ipsam tamen assumes ad te, melius ergo est, ut id fiat statim. Dominus autem illi respondit, præferens magnam indignationem: O proditor quis te constituit consiliarium Omnipotentis? Pluris ego facio unam horam, quâ hæc Anima patitur, atque ut executioni mandentur omnia, quæ statui cum illa facere, quàm istos favores acceleratos, de quibus loqueris. Usque adeò invidabat diabolus isti famulæ DEI multa merita, quæ sibi accumulabat, suâ patientiâ ac resignatione, & affligebatur, eò quòd non posset contra illam prævalere.



PARS QUARTA.

Vita CHRISTI Domini & Be- atissimæ Virginis.



Uia commodius est videre sub uno obtutu omnia, quæ ad Salvatorem nostrum CHRISTUM Dominum pertinent, ideò superius ad partem secundam hujus Quinti Tractatus præmonui, me ex secundo Symboli Apostolici Articulo, quæ ad Dominum JESUM CHRISTUM Filium DEI inquantum est Homo, spectant, ad hanc Quartam Partem dilaturum. Hic ergo adducentur quæ per sex Symboli Apostolici articulos proponuntur nempe
per

per Articulum, Secundum Tertium Quartum, Quintum Sextū, ac Septimum, qui sunt: Credo in JESUM CHRISTUM, qui Conceptus est de Spiritu Sancto, natus ex MARIA Virgine, passus sub Pontio Pilato, Crucifixus mortuus & sepultus, Descendit ad inferos, tertia die resurrexit à mortuis, ascendit ad Caelos sedet ad dextram Patris Omnipotentis, inde venturus est judicare vivos & mortuos. Quibus accedit Articulus undecimus. Credo Carnis Resurrectionem: Nempe quia Judicium extremum, quod credimus in Articulo septimo non potest bene separari à Carnis Resurrectione.

CAPUT I.

De Incarnatione Filij DEI.

I.

PArte I. l. I. c. 5. §. 4. Quodam die dum considerarem Filium DEI ad dextram Patris humanā vestitum naturā ab eo assumptā, ingens fuit meæ Animæ lætitia: & conversa ad Spiritus Angelicos dixi illis, ut aspicerent ibi Redemptorem nostrum, & viderent, assumpserintne fortè ipsorum naturam an nostram? Et utrūm descenderit ex sinu sui æterni Patris in uterum Sanctissimæ Matris, vixeritue triginta ac tribus Annis inter homines sustinendo tantos labores, persecutiones, & mortem Crucis pro ipsis, an pro me?

II. Lib. I. c. 14. §. I. Anno 1597. Cū quodam tempore matutino essem collecta more solito, vidi ante me confidentem Majestatem CHRISTI Domini, quasi in quadam sella, cum illa sua Sanctissima gravitate tam magna & sublimi, ut non suppetant verba ad ipsam exprimendam, aut extollendam neque reperiatur intellectus, qui illam possit comprehendere: quia Divina Majestas, dum Animæ, ex sua infinita bonitate, comparet in sua Sanctissima Persona, exhibet illi quoddam lu-

men & radios suæ Divinitatis, suæque infinitæ Essentiæ ac Virtutis, & Omnipotentia, ita ut rapiatur extra se, & obstupesciat propter id, quod videt & cognoscit de Majestate ac amplitudine illius omnium rerum creaturarum Domini. Cum ita Divina Majestas consideret sicut dico, & ego miserabilis illam aspicerem cum omni reverentia, quam poteram, atque etiam cum magno amore quo mea Anima illum prosequitur, vidi quod eadem Majestas acceperit chartam & calamum, atque tenente quodam Angelo quam reverentissimè atramentarium, cæperit scribere, ita ut non viderem intingi ab eo Domino calamum, in illo atramento: sed Majestas, Magnificentia & Gravitas, quam demittebat suos oculos ad scribendum, & movebat suum brachium, ac Sacratissimam manum, est res tam sublimis, tamque excelsa, ac ita apta ad exhibendam Animæ Magnitudinem & Potentiam atque Essentiam infinitam ipsius Domini, ut eo modo ipsum cognoscat, clarissimèque illi appareat hæc veritas, quam credimus & confitemur, quod **CHRISTUS JESUS** Dominus noster sit non solum verus Homo, sed unà verus **DEUS** ac Dominus noster. Sumptâ verò penâ ad manum incepit Divina Majestas scribere, & scripsit valde parum, statimque mihi monstravit, quod scripserat, & fuit quædam subscriptio in folio vacuo, cujus hæc erant verba: **JESUS CHRISTUS DEUS ET HOMO VERUS**, scripta Divino charactere, utpote Sacratissimo ipsius chirographo, quia nihil ampliùs quam hoc dici potest, ut intelligatur qualis esse poterit.

III. Lib. I. c. 12. §. 3. Quodam die intenta meæ orationi conspexi **CHRISTUM** Dominum inordinario ipsius gravi ac modesto habitu: ad ejus latus dextrum erat alia quædam persona valde gravis & magnæ Majestatis, cujus vestitum nescirem describere, neque etiam vultum, quem tantum meminisse valde candidum & gravem. Quia etsi mihi videretur ho-

homo propter figuram & formam, nihilominus etiam videbam clarè corpus illud & vultum, quem præseferbat, non esse verè humanum, neque ipsum constare ex carne & ossibus, qualis est, & qualem video, atque agnosco re ipsâ, ac verè esse CHRISTUM Dominum, quem ego intuebar cum magno solatio; & similiter aspiciebam alteram Sacratissimam Personam, quæ stabat ad manum ipsius dexteram. Erat autem quiddam mirabile, quod mihi Dominus ostendebat, ut non nihil intelligerem de eo mysterio; esse videlicet unum solum DEUM & duas Personas, quas videbam distinctas. Quia cum intuerer unam solam, videbam in illa utramque neque aliud in iisdem videbam, quàm unum Esse Divinum. Statim autem mihi dedit Dominus lumen quo illustrata cognovi unam earum personarum esse Patrem æternum; alteram vèrò CHRISTUM JESUM Dominum nostrum Filium ejus. Atque licet sint ab invicem distinctæ, utramque tamen simul esse unum solum DEUM ac Dominum nostrum, unam Majestatem, unam Potentiam, & unum Esse Infinitum. Dum vehementer obstupescerem contemplando hoc mysteriũ, vidi ante illas duas Divinas Personas, quendam vultum elegantissimum instar vultus Angelici, qui Divinis & perspicacissimis oculis magnam præse ferens Sapientiam, attentissimè & fixissimè intuebatur pectora illarum duarum Divinarum Personarum, ita ut in solo intuitu penetraret, videret, atque cognosceret altissima mysteria, quæ erant recondita, in earundem pectoribus. Videns istum vultum stupebam cogitando intra me, ipsum esse Angelum quempiam magnæ sapientiæ, dicebámque tacitè: Quis potest esse iste Angelus tam sapiens? Cum ita stupere, dixit mihi Dominus: Non intelligis hoc mysterium, neq; enim est Angelus, quemadmodum cogitas, sed est Sapientia, quam habuit CHRISTUS, ut Homo, quâ affecturus est, & sublimissimè ac divinè intellexit omnia mysteria Divina ac cælestia.

Di-

Divinæ Majestatis & Magnitudinis. Ego plena stupore, & amore DEI, se cum tanta bonitate communicantis huic miserabili Creaturæ, cucurri & abjeci me ad pedes JESU CHRISTI Domini nostri, quos sum osculata cum summo honore & reverentia. Fuit autem res mira, quod cum oscularer, ut mihi videbatur, solos illos Divinos pedes CHRISTI Domini, fuerim in ipsis osculata pedes Sanctissimæ Personæ Patris, cum sit distincta à Persona Filij.

IV. Lib. 3. c. 12. §. 1. Vidi in Cælo thronum Majestatis DEI Trini in Personis, & Unius in Essentia, quasi per quoddam velamen: quem Dominum dum Sacratissima Majestas CHRISTI Domini quæ est Homo, demissè veneraretur, suscepit sibi ab illa magna Majestate datum Divinum quendam, & mysticum amplexum, quo repræsentabatur & significabatur potestas ac Dominium, quod illi Sanctissima TRINITAS contulit super omnes Creaturas.

V. Par. 1. l. 2. c. 4. §. 1. Dum quodam die orarem, contempsi CHRISTUM Dominum adstantem in suo talari & modesto vestitu, sicut illum videre consuevi. Vidi quod haberet in suis manibus quoddam elegantissimum vas artificiosè elaboratum ex purissimo & cælesti auro, instar pretiosissimæ & ornatissimæ ac magnæ cujuspiam hierothecæ, cujus pes erat affabrè efformatus. Ex hoc Sacro vase circumquaque & undique prodibant purissimi radij aurei instar radiorum solarium. Quamvis autem id intuerer, non poteram intelligere quid esset, donec DEUS meam Animam illuminavit, ut cognoverim ac intellexerim in hoc sacrario seu theca inclusum esse Sacratissimum mysterium Incarnationis JESU CHRISTI Domini nostri; sed tum adhuc non percepi, quale esset, donec paulò post vidissem momentaneè aperiri reliquiarium, & ex speciali Divina illustratione vidi ac intellexi, quomodo fuerit peractum istud Divinum mysterium, quasi re verâ tum perageretur.

tur. Et postquam hoc inspectante meâ Animâ fuisset factum, etiam rursus in momento est clausum; unde fui itâ obstupescens & consternata, ut dicerem intra me, quid est hoc, quod vidi? Istud mysterium non contingit nisi semel, quomodo illud vidi peragi? itâ confusa hærebam, nec plura indagabam, quia nihil de magnalibus istis scio, quàm quod me DEUS docet. Sed cum Divina Majestas videret, quid ageretur in mea Anima, dixit mihi quàm amantissimè: ne consterneris, neque itâ confundaris, quia istud mysterium non est modò peractum, sed ostenditur tibi, quâ ratione contigerit. Sic mea Anima fuit repleta solatio & amore, propter tantam bonitatem, quâ iste Dominus nobis afficitur. Atque ut redeam ad ea, quæ vidi concernentia hoc mysterium, & modum quo fuit peractum, non est lingua à qua possit explicari, neque intellectus, qui id sciat intelligere vel assequi, idcòque ignoro, quid dicam: sed sicuti, quando præclarus quispiam & peritus Magister alicujus artis, & valde subtilis, ac delicati operis, conficit opus illud, quod scit ac potest conficere pro sui acumine, ingenij, & singulari scientia, inspectantibus alijs, qui nihil de eo sciunt, neque quod coram se peragi vident, intelligunt, admirantur & obstupescunt tantum ipsius ingenium ac scientiam, nec tamen sciunt dicere, ac vixdum intelligere, quomodo perfecterit tam mirabile opus, & si verè dicturi sint, se vidisse dum fieret: itâ etiam ego dico de hoc altissimo Mysterio quòd viderim uniri in momento Verbum Æternum DEI, & Filium ipsius cum nostra natura humana in uno supposito Divino, & in Uno CHRISTO, Bono ac Domino nostro, intra viscera Sacratissimæ Virginis Domine nostræ, quodam subtilissimo Divino, ac cælesti, digno solâ potentiâ, Sapientiâ, & bonitate illius magni ac potentis Artificis, infinita præditi Sapiëntia, quamvis nesciam dicere vel intelligere quomodo vel qua ratione fuerit istud admirabile opus peractum.

VI. Ibidem §. 2. Postquam unam circiter horam impendisse orationi, elevavi oculos Animæ, & vidi, adesse quandam valde venerabilem personam, ac magnæ Majestatis indutam vestitu candido gravissimo, ad cujus latus conspexi puerulum, nonnihil coopertum, ita ipsi vicinum, ut mihi videretur illum tenere ac stringere manu; alteri verò lateri Pueruli adstabat quædam Domina. Neminem tamen novi, neque illum volui aspicere, sed statim ab illis averti oculos. Quia verò mihi apparebat vir, dubitabam, essetne CHRISTUS Dominus, nihil certi sciebam. Videbatur mihi persona grandæva, dicebámque intrà me ita dubitando: CHRISTUS Dominus habet puerulum in brachijs, quid hoc erit? sic hæsi quasi mediâ horâ; quâ elapsâ, dignatus est mihi Dominus eximere dubium, nè adeò tergiversarer aspicere mysterium, quod à me videri volebat Divina Majestas, mihi que ita proponebatur, ut fuerit impossibile, non videre illam Sacratissimam Personam, quæ confidebat in sublimi throno, cum magna Majestate, habebátq; vultum valde gravem, & venerabilem: animadverti tamen vultum & corpus, quod exhibebat non constare ex humana carne & osse, quemadmodum constar, & ego constare agnosco in CHRISTO Domino nostro. Dum ita illum intuerer vehementer attonita, non agnoscens ipsum quis esset, vidi quòd in suis manibus haberet elegantissimum Pupulum, & splendidiorem sole: utramque autem circumdabant multi Angeli. Et mea Anima accepit speciale lumen, quo illustrata, videbam illam Majestatem Magni Domini esse, DEUM Patrem Domini nostri JESU CHRISTI, primam Sanctissimæ TRINITATIS Personam, unâque intellexi; quomodo ab æterno generaret, atque ab eo procederet ille, Sanctissimus Dominus Filius ejus, quem tenebat in manibus, tanquam infantem jam incarnatum, ac vestitum nostrâ humanâ naturâ. Et cum majorem in modum stupерem, afflueremque

que solatio propter tam clarum lumen, quod mihi communicabatur, vidi quod illa Domina quæ aderat esset Sacratissima. Virgo quòdque procubuisse in genua, junctis ac elevatis manibus, coram eo magno Domino: erat autem quasi abrepta in altissimam sublimissimi Mysterij, Incarnationis Filij sui, ac Filij DEI, contemplationem, expendens magnitudinem Bonitatis ac Sapientiæ DEI, quem habebat præsentem, & summam gratiam, quam ipsi præstabat, dando ei in Filium unicum illum, quem Divina Majestas habet ac generat ex sua natura, tam magnum bonum & potentem, quàm est ipsius Pater. Contemplanti mihi hæc mysteria, dixit Sacratissimus ille Dominus ac Pater Æternus, ostendens magnum amorem, quo amat ab æterno suum Sacratissimum Filium: Ecce hic est Filius meus plurimum dilectus, in quo mihi summè complacco, & propter quem mihi placent homines in terra degentes.

VII. Par. 2. l. 1. c. 42. p. 174. feriâ quintâ, Decemb. die 19. Sub diluculum matutinum vidi magnam Angelicorum Spirituum ex Cælo ordine descendantium & canentium multitudinem: atque postremo loco Patrem æternum humanam præferentem speciem cum pretiosa patena, ac Divino Puerulo in manibus. Postquam Divina Majestas advenit, omnes Angeli se prostraverunt, terram facie attingentes, seque suis alis, velut tegentes (quales enim hic pingi consueverunt, tales se mihi exhibent videndos) ob reverentiam Mysterij quod adorabant. Tum Pater æternus alloquens coram me speciosissimum illum & admirabilissimum Puerulum, quædam tanta autoritate, & majestate dixit, ut quamvis mihi manserint impressa, modum tamen quo sunt pronunciata, reverentiam & alios affectus, quos ijs auditis mea Anima sentiebat, sit impossibile explicare. Fuerunt autem ad verbum ista: Fili mi dilectissime, mitto te in mundum, ut redimas, dirigasque & illumines genus humanum. Eo momento fui edocta, quòd ille

Sacro-Sanctus Puerulus elicuerit actum obedientiæ, & resignationis in voluntatem sui Patris tam heroicum, omnique ex parte perfectum, ut Pater æternus sibi in eo super omnia, quæ dici possunt, vel cogitari complacuerit. Progressus est deinde Dominus loquendo ad Puerum his conceptis verbis quæ appono: Tu es Filius meus, mea dextera, meum potens brachium; te ego Regem & Dominum constituo omnium creaturarum atque Judicem Vivorum & Mortuorum.

VIII. Lib. I. c. 41. p. 169. Anno 1625. Die Transfigurationis CHRISTI Domini delicij nostri, sum ducta à meis Dominis Angelis ad cælestem Jerosolymam in cujus altissimo loco vidi speciosissimam quandam, obstupescendam & plenissimam Divinis splendoribus aulam, atque in eadem omni ex parte innumerabiles Angelos. In superiore illius Extremitate erat erectus thronus ad stuporem gloriosus, in quo residebat Beatissima TRINITAS. Observavi autem quod secunda Persona Verbum Divinum se mihi non exhiberet spectandam, sicut aliàs, quoad Esse tantummodo Divinum, sed tanquam verè unitum Sacro-Sanctæ Humanitati suæ, eadèmq; ut nos loquimur, vestitum. E regione hujus sublimis throni & in ea eadem aula, erat subsellium instar admirabilis scamni, eleganter ornatum & magnificum, ubi confidebant novem Angeli ex eminentissimis & excellentissimis supernæ illius Curie. Nequit ulla explicare lingua lumen mihi repræsentatum, & venustatem, quæ inerat ipsorum vultibus, atque splendorem & pretium vestium. Vidi subitò, postquam modicum resonuit cælestis musica, Dominum DEUM Trinum, gravissimo infinitæ authoritatis & majestatis gestu velut indicantem ijs novem supremis Angelis, quæ esset sua Voluntas, quidque ipsis esset agendum. Tum assurrexit, qui medium occupabatur locum, & majorem præferebat dignitatem, seque coram DEO prosternens, & accepta ab eo benedictione se erigens, atque manum

num sinistram tenens admotam cingulo, ac summâ gravitate movens dexteram, dixit ad omnes cælestes Spiritus ibi præsentés (modo tali, ut exponi non possit) hæc verba: Postquam advenit tempus, quo Divina Triunus DEI Domini nostri Majestas, in suo Divino Consistorio constituerat, ut unigenitus ipsius Filius humanam carnem in visceribus MARIE Virginis, Reginæ ac Dominæ nostræ assumeret, pro redemptione, & remedio totius generis humani, descendit ex sinu Patris fuitque Divino operante Spiritu, in purissimis illius visceribus Incarnatus.

IX. His dictis se denuò prostravit (unâque cæteri Angeli) ob reverentiam eorum verborum ; iterumque assurgens, affectus est admirabile, & supra modum sublime lumen, quo agnovit magnitudinem, & æstimabilitatem ejus maximi mysterij. Tum admirabilissimâ & ineffabili ratione aliud prodidit ex ipso lumen, simile illi, quod acceperat, atque istud irradians omnes Angelos, qui aderant, eandem ipsis infudit notitiam, adeò ut iste magnus Angelus videretur esse Divinus. canalis Domini Majestatis, à quo immediatè conceptæ tantæ sublimes cognitiones, postea per ipsum reliquis communicabantur. Mæ pauperi animæ obligit aliqua particula illius luminis. Nequit autem intrâ millenos Annos explicari, quod in ijs verbis denuò intelligitur, quæ hic tam facile pronunciamus, & quod concipitur de scientia potentia ac Infinito DEI amore, deque immensa ejusdem erga homines clementia. Denique ut ex hoc Sancto Angelo qui me illuminabat, intellexi, bona in nos per Incarnationem Filij DEI derivata, nunquam fuerunt cognita aut audita, qualia in se sunt, neque plenè intellecta & percepta præterquam ab ipsomet DEO, qui ea est operatus. Idcirco quando ingens illa Beatorum Spirituum multitudo, luminè sibi communicato ab Angelo Superiore penetravit ea verba, vidi ipsos in arcana communicatione tan-

quam attonitos, & ecstáticos, propter bonitatem hujus magni DEI, sibi denuò revelatam, gratias eidem agentes infinitas, ipsūque ob tam excelsum opus laudantes. Tum Dominus Majestatis ostendens sibi multū placere, quòd magnus iste Angelus bene suo fuerit functus munere, dedit illi suam benedictionem, quam ipse suscepit prostratus, ac deinde rediit ad suam sedem.

X. Hoc ordine, & servatis omnibus circumstantijs, quas de primo hòc Angelo retuli, consequenter assurgebant cæteri octo Angeli suam agentes personam, ideòque hic nihil quoad substantiam referam diversum de ijs, quæ singuli, toti cælesti Angelorum multitudini, & meæ pauperi animæ revelabant, de mysterio singulis seorsim revelato à DEO. Prodiit igitur secundus, eadēque majestate, quā primus dixit: Atque natus est ex hac Virgine & Domina nostra, fuitque reclinatur in præsepio & cum hominibus conversatus spatio triginta trium Annorum, patrando admiranda opera.

Tertius recensuit Adorationem, admirabiliter ipsam expendendo, Sanctorum Regum, & beneficium, quod mundus in eo mysterio est consecutus.

Quartus dixit quomodo hic Dominus fuerit à sua Sanctissima Matre præsentatus in templo. Declaravit miros actus Resignationis, quibus ista Domina æterno Patri suum obrulit Filium pro hominis redemptione.

Hactenus aliqua adhuc possent exquiri verba, quæ aliquatenus dicta ab his Sanctis Angelis explicarent, quamvis ea omnia solum summarim attingam; nullo autem modo suppetunt, quibus aliquid exprimat de sublimissima ponderatione, quā Quintus Angelus declaravit gesta in Passione & morte Domini, atque immensum profusi illius preciosissimi Sanguinis pretium.

Sextus egit de Gloriosissima Resurrectione, explicando my-

mysterium tam Divinis encomijs, ut excedant cujusvis captum intellectus.

Eundem in modum Septimus exposuit miracula magnificentissimi ipsius triumphi in Ascensione.

Octavus dixit mirissima de Adventu Spiritus Sancti, & de Divinis incendijs infiniti ipsius amoris.

Conclufit ac absolvit solennitatem hujus cælestis repræsentationis Angelus Nonus, explicando sublimissimè deliciosum mysterium Sanctissimi Sacramenti Altaris, infinitum ipsius pretium, ejusdem convenientiam in salutem nostram & remedium, solatium animarum nostrarum in eo nobis relictum. Significavit mihi Dominus ea, quæ videram, & illud lumen, quòd immediatè istis singulis Angelis Supremis largiebatur, esse symbolum revelationis, quam hi Angeli habuerunt, ut ab iisdem communicaretur alijs. Ipse sit in æternum benedictus Amen.

XI. Parte 2. l. 2. c. 1. p. 208. Anno 1624. in Septembri. Vidi prodeuntem velut ex dextro latere Patris æterni Sanctissimum ipsius Filium CHRISTUM JESUM Servatorem nostrum, circumdatum ab innumeris Angelis, adorantibus illum & comitantibus. Veniebat hic Dominus demonstrans majestatem veri Regis, tum vestitu, tum pretiosâ coronâ, quam in Sanctissimo suo capite gerebat. Idem Dominus descendit per duos quasi gradus gloriosissimos, & comparens coram suo Patre Æterno, sese in ijs prostravit, exhibendo ipsi, in quantum est Homo, hanc profundissimam reverentiam. Saceratissimus ejus Pater illi quàm amantissimè est bene precatus, dixitque continuò toti illi cælesti Aulæ: Hic est Filius meus dilectissimus, in quo mihi multum complacui: adorete ipsum: adorete ipsum & honorate, tanquam Regem ac Dominum vestrum. Simul ac id fuit à Divina Majestate dictum, omnes ij Beati Spiritus se prostraverunt, exequentes magnâ veneratione & voluptate, quòd ipsis mandabatur.

XII.

XII. §. 2. c. 7. p. 237. in fine. Anno 1620. Vidi tres Divinas Personas Divino & ineffabili modo converſantes, & quaſi invicem ſibi complacendo dicentes : O quàm admirabile arcanum ac Divinum opus peregrimus in Verbi Incarnatione ! quàm nobis dignum ! quàm eſt inæſtimabilis ejus valor ? Res eſt magna, altiffima & ſublimiffima. Deinde Beatiſſima eadem TRINITAS ſibi plurimùm complacbat in Sacratio Virginali, ubi obſtupescendum illud opus fuerat mandatum executioni. Quàm rudibus & paucis id refero verbis ! cùm omnia verba totius Mundi non ſufficiant, ad explicandam vel atomum ex multis, quæ tum anima intelligit, de altitudine hujus myſterij eò quòd ſibi DEUS ineffabiliter in illo complaceat.

CAPUT II.

De SS. Progenitoribus CHRISTI Domini.

I.

PArte 1. l. 4. c. 7. §. 3. Quodam Feſto Paſchatis me viſitavit Sanctus Rex David cum noſtro primo Parente, Adamo, qui præſeferebant tantam authoritatem, ut ſatis demonſtrarent, qui eſſent, quive fuerint, & ſpecialiter Sanctus Adamus ostendebat ſe eſſe dignum Patrem omnium hominum. Cùm tamen illum viderem, erupit mihi ex ore, quaſi non advertenti quid dicerem : O Sancte Pater, quantum mali nobis attulit tuum peccatum ! Et Sanctus Rex David mihi dixit ; tace hac de re, modo enim non eſt tempus. Sed Sanctus Adamus reſpondit : Ut ut ſit, habetis JESUM CHRISTUM Dominum noſtrum descendantem ex mea carne. Quasi diceret : Si meum peccatum vobis attulit grande malum, memineritis idem occaſionem fuiſſe, ut haberetis talem Redem-

demptorem, qualis est DEUS, factus Homo pro redimendo homine. Dum hi Sancti essent apud me distantes ab invicem & nonnihil à me remoti, visitavit me CHRISTUS Dominus, & cum per medium illorum trasiret, adverti, quòd in transitu inclinaverit aliquantum caput, quasi ipsos veneraretur. Cumque ego id tacite considerarem, Divina Majestas mihi dixit: Quid ergo? Nonne vides quòd fuerint mei Patres, & Progenitores secundum carnem? ut agnoscerem qualem reverentiam DEUS velit à nobis exhiberi nostris Patribus ac Progenitoribus cum eam ipse voluerit exhibere suis.

II. Ibid. Anno 1615. Vidi in meo cubiculo duos Viros gravissimos, quorum alter erat ornatus vestibus Regijs, habens coronam auream in capite; alter indutus vestitu Sacerdotali, magni pretij, more antiquo. Illis adstabant quidam Angeli quos alloquebantur. Ego fui afflicta & confugi ad DEUM, ut peterem ab ipso lumen, prout soleo. Sancti videntes quid ageretur in mea anima & meam confusionem ac timorem, paulatim cum tenerrimo amore mihi magis appropinquabant atque unus dixit: Quid habes Amica & Soror nostra? Noli timere; conquiescat ac solatio repleatur animus tuus & cor: non enim habes quod timeas, ego namque sum Rex David, & iste Beatus socius quem hic vides est Sanctus Zacharias. (Pater Sancti Joannis Baptistæ) venimus nomine nostri magni DEI ac Domini & ipso volente ac jubente, ut te visitemus, nosque tibi promptos exhibeamus ad te juvandam ac defendendam, ubi opus fuerit.

III. Lib. 3. c. 11. §. 1. Ducta ad cælum ad conspectum Majestatis magni nostri DEI, posteaquam impetravi, ut pro Eleemosyna auferrem inde aliqua bona ac divitias pro mea paupere Anima, in eodem momento quàm velocissimè (quasi dicerem: properandum mihi est priusquam me hinc expellant) circumspexi & perlustravi illam cælestem Jerosolymam,

ac vidi gloriosum Sanctum Franciscum, subitoque petij à DEO, ut mihi daret modicum humilitatis, quam iste Sanctus habuit. Vidi deinde gloriosum Sanctum Dominicum & rogavi Dominum DEUM ut mihi daret modicum obedientiæ, quam iste Sanctus habuerat. Deinde aspexi & vidi Patriarcham Abrahamum & rogavi DEUM ut mihi daret modicum illius magnæ fidei & obedientiæ quâ fuit præditus iste Sanctus Patriarcha. Et postquam ita collegissem, ac petivissem à Domino has virtutes, habui ingens solatium, fuitque mihi satisfactum.

IV. Lib. 6. c. 5. §. 2. Ducta ab Angelis ad quandam amœnissimum hortum, in cuius medio fuit coenaculum, & in illo thronus ubi confidebat Majestas CHRISTI JESU, qui est unicum Bonum nostrum, Mei quatuor Domini Angeli incæperunt canere præfente Domino & alijs multis Beatis Spiritibus, qui ibi erant; non omnes simul, sed singuli seorsim: incepit enim Minor & cecinit cantum, seu hymnum in laudem Divinæ Majestatis ejusdemque Bonitatis ac Misericordiæ, propter illam quam exhibuit peccatoribus, ignoscendo ipsis eorum peccata & adducendo illos ad cognitionem priorum errorum, ac deinde ad suam gloriam, constituto ipsorum capite, Sancto Rege Davide, qui aderat præfens canente eodem Angelo de agnitione commissi peccati, quam ipsi DEUS dederat per Prophetam Nathan. Quo cantu finito assurrexit Sanctus Rex David deponensque suam coronam prostravit se ad pedes Domini, penes quos illam collocavit, laudavitque ipsum ac benedixit, propter magnam gratiam quam ei præstiterat.

V. Lib. 4. c. 8. §. 3. Postquam agente VEN: MARINA Gregorius Papa XV. Anno 1622. Secundâ Decembris jussit celebrari officium de sancto Joachimo in universa Ecclesia & id ei Anno sequenti in Februario innotuisset, tunc, ait ipsa, quodam

dam die manè vidi gloriosum Sanctum Joachimum cum Beatissima Virgine, quam manuducebat, & postquam fecissem, quod soleo, mihi timendo, Beatissima Virgo me salutavit peramanter, dixitque mihi: Soror venio, cum meo Sanctissimo Patre ad agendas tibi gratias, pro grato mihi obsequio prestito, quòd procuraveris quantum in te fuit, ut celebraretur festum mei Patris. DEUS te propterea remunerabitur, unaque, ego. Meus Sanctissimus Pater adfert pretiosum cimelium, ut id tibi det, quod suscipet tanquam in gratiarum actionem. Sanctus Patriarcha se vertit ad Sanctissimam Virginem, dixitque illi: Filia & Domina mea, accipiat illud tua Majestas, detque ipsi sua manu, quia ab ista Creatura melius suscipietur ex tua, manu, quàm ex mea. Quare Sanctissima Virgo accepit ex manu sancti Patriarchæ torquem aureum pretiosissimum, accedensque ad me iniecit illum meo collo. Obstupui & raptum extra me propter tantam gratiam atque ad me reversa non vidi meos Dominos.

VI. Postquam advenit dies sancti Joachimi, 20. Martij 1623. Institui ut quàm solennissimè ipsius Festum celebraretur in Monasterio sanctæ Annæ Recollectarum Monialium Ordinis sancti Francisci. At ecce pridie dum agerem cum DEO, dixit mihi sua Majestas: Anima non poteris frui festo quod instituis tuo Sancto. Veni mecum & frueris illo, quod in ipsius honorem agitur in cælo. Duxit me Dominus ad cælestem Jerosolimam vidique sanctum Patriarcham splendide adornatum intrà ipsummet DEUM & in Divino illius pectore. Angeli in honorem ipsius celebrabant solenne festum decantando suâ cælesti musicâ laudes DEI & Sancti cum magno gaudio & júbilo ostendentes illum à se plurimi fieri. Sancti Veteris Testamenti etiam celebraverunt illius Festum & decantabant magnas ipsius laudes, dicebantque sibi ab eo fuisse ad Limbum allata nova de proximo adventu in mundum Filij

DEI. CHRISTUS Dominus illum summopere honorabat, compellendo ipsum Patrem. Fui delibuta ingenti solatio & lætata sum in Domino propter hoc festum. Sequenti postea die quo dicebatur officium de sancto Josepho Sponso **Beatissimæ Virginis**, quia illius festum quod inciderat in Dominicam **Quadragesimæ** fuerat translatum, vidi gloriosam sanctam **Annam** venientem cum sancto Josepho & postquam diu fuisset reluctata, nolens ipsis loqui, gloriosa **S. Anna** mihi dixit: Dominus me ad te mittit, ut te visitem, dicamque tibi pertinuisse ad singulare ipsius obsequium id, quod præstitisti, procurando festum mei Conjugis, qui est magnus in Regno cælorum. Ego habui maximam gloriam accidentalem & gaudium in ejus festo. Considera quid velis à me fieri in tui gratiam. Cui ego respondi: Mea Domina nihil peto, nisi ut roges Dominum, quò mihi det suum lumen, pro cognoscendis ipsius veritatibus ut me conformem in omnibus **Sanctissimæ** ejus voluntati. Tunc mihi Sancti promiserunt quòd me essent adiuturi & discesserunt.

VII. L. 4. c. 8. §. 2. Anno 1615. 25. Maji cum essent apud me **Beatissima Virgo**, **Sanctus Josephus**, ac innumeri Angeli, ingressus est meum cubiculū quidam Sanctus proceræ, quamvis non inconvenientis staturæ, quem, habito cælesti lumine, agnovi esse sanctum **Joachimum Patrem Beatissimæ Virginis**. Venit indutus veste fuscâ, pro more sui temporis; accessit ad **Sanctissimam Virginem** cum magna reverentia & veneratione flexisque genibus, accepit ex ejus manu Sanctum Infan-
JESUM in suas ulnas, atque dum ab illo tangeretur, illustravit ipsius vestem ingens splendor, quo antea carebat. Sanctus Infans amplexatus est suum Avum, suavissimèque illi est blanditus, pendens ex ejus collo. Surrexerunt deinde omnes, & exiverunt ex meo cubiculo. Præcedebat numerosa Angelorum multitudo, qui stabant apud portam, ac tum ibat Sanctus

Quis Joachimus, gestans parvulum in suis brachijs, quem sequebatur Beatissima Virgo, postea Sanctus Josephus, quo ordine processerunt inter cælum & terram, per aliud cælum medium, maximum & splendidissimum, recesseruntque tantopere, ut quasi disparuerint; semper illos tamen, licet eminus, videbam. Totam hanc sanctam Societatem antecedeabant duo sancti Angeli ex majoribus, quasi annunciantes pacem, ac dicentes, Patrem Æternum, propter merita JESU CHRISTI Domini Nostri, & Sacratissimum ipsius Sangvinem, propterque preces sancti Patriarchæ Joachimi, suspendere executionem suæ Justitiæ, & pœnas, quas ipsius populus multum promeruerat peccatis, contra ejus Majestatem commissis. Post has annunciationes, & promulgationes quasi pacis, reversa est ad meum cubiculum omnis illa sancta Societas, remanentibus ad portam sanctis Angelis. Introivit cum Sanctissima Virgine, & sancto Josepho sanctus Joachimus, ferens superbenedictum Infantem in suis brachijs & accessit ad meum lectum, flexitque genua, quasi ob reverentiam sancti Pueri, & postquam se collocavisset, ut illum mihi ostenderet, idem sanctus Puer, cum magno mutuo gaudio, amplexabatur sanctum Joachimum, ac attrectabat ipsius faciem, teneritudine & affectu nepotis, unaque dignatus est etiam me amplecti sanctus Pusio, & mea Anima fuit mirè exhilarata ab ipsius Majestate, sensitque maxima solatia: ego quoque affectu amantissimo illum disfavibam, tanquam abrepta in ejus amorem. His, aliisque peractis, sanctus Patriarcha rediit ad sanctissimam Virginem, & abiverunt eo ordine, quo venerant, ego verò remansi plena solatijs, propter annunciationem pacis, & gratias acceptas.

VIII. Par. 2. l. 1. c. 22. p. 98. Anno 1625: 20. Martij feriâ quintâ. Manè vidi gloriosum sanctum Joachimum, qui gestabat in brachijs Sanctissimam Virginem Dominam nostram,

quasi trimulam. Gloriosissima Domina habebat vultum conversum ad Sanctum, cujus humeros stringebat brachijs. Ego vidi ipsius dorsum, & erat induta vestibus longè pretiosioribus, quàm dici possit. Sanctus respiciebat locum, in quo eram, atque tum cæpit deprædicare tantas, ac divinas laudes, illius superbenedictæ Dominae Filia suæ, & Genitricis DEI, modo, & sermone adeò sublimi, ut à me nequeat explicari. Et postquam ipsam appellavit templum Spiritus Sancti, Sacrarium Verbi æterni, multisque alijs admirandis titulis, exprimentibus excellentiam, potentiam, & gloriam illius Celsissimæ Reginae, nec non singularia beneficia, quæ DEUS per illam contulit humano generi, imprimisque specialissimum illud, quod ipse sanctus à DEO acceperat, dum illum tam fortunatum effecit Patrem adeò admirabilis Filia; post hæc inquam, dicta, S. procubuit in genua, & humi collocatâ benedictâ puellâ, quæ velut innitebatur ejus pectori, elevavit oculos & manus ad Cælum, gratias agens DEO, pro omnibus his beneficijs, rogânsque Angelos, qui multi cum ipso erant, ut se adjuvarent, in gratijs agendis illi Summo Domino, à cujus bonitate ac liberalitate ea acceperat: quod ij Beati Spiritus fecerunt, cantando musicâ verè cælesti divinas laudes. Surrexit deinde S. Patriarcha, & apprehendens Præcellam Virginem unâ manu, alterâ scipionem, repræsentando eam ætatem, quam habebat, & qualiter cum ea egerit, dum esset trimula: atque descendens quasi per gradus, ex loco alto, ubi omnia prædicta fuerunt gesta, venit ad locum, in quo eram, & accedens ad me, verbis mihi suavissimis ac discretissimis (observant enim quoadhoc Beati cum morem, qui ipsis in hoc mundo usitatus fuerat: & dubio procul modus agendi hujus Sancti, in vita ipsius, fuerit perquam discretus ac suavis) gratias egit pro affectu, quo jam inde ab infantia optaveram, ut ejusdem festum celebraretur in Ecclesia, quo die feliciter ex isto mundo migravit, dicensque de

de ipso Officiū sicut de alijs Sanctis. Et quia meis industrijs tandem effectum est, ut hoc propositum executioni mandaretur, adjuvante Domino Andrea de las Infantas, quem dum ageret Consiliarium in Cancellaria Vallisoletana, plurimum animaveram ad hanc devotionem, & induxeram, ut conatu possibili procuraret à sanctissimo Domino nostro facultatem celebrandi festi, & recitandi Officij de Sancto. Id ille ferventissimè, cū esset Gubernator Hispalensis, præstitit per Canonicos, Romæ eo fine degentes, ut summus Pontifex definiret, Purissimam Virginem Dominam nostram fuisse conceptam sinè peccato originali. Quia verò Sanctus meminerat rei gestæ per Dominum Andream, quamvis mihi jam constiterit, ipsum post suum obitum existere in via salutis, cū tamen ignorarem, an jam foret in Cælo, interrogavi Sanctum, & rescivi ex eo, animam illius jam quiescere inter Beatos: atque subjunxit Sanctus, multum ipsi à se collarum fuisse, propter devotionem, quā illum coluit, sequē eādem ratione aditurum sibi devotos. Augustissima Puella, Virgo Domina nostra, sedebat in meo lecto, quæ, dum finivi sermonem cum sancto ipsius Patre, me amabilissimè intuita, accedensque ad me, dixit mihi quā secretissimè, voce quādam subtilissimā (iste nāque modus, & ille, quo DEUS animam in solitudine alloquitur, atque alius qui est instar spiritualis somnij, sunt tres modi loquendi, arcanissimi ac diviniissimi, quantum ego sum experta) dixit mihi, inquam, in hoc secreto silentio: Optimum tibi & lætissimum adfero nuncium nomine DEI, quoddā videlicet exaudiat, sitque exauditurus tuas preces, quas fundis pro Christianitate, ne illam hostes pessumdent bellis, quæ comminantur. Tum simul mihi valedicentes rediverunt, quæ descenderant, atque ibi mihi disparuerunt. Glorificetur DEUS in æternum. Amen.

IX. Lib. I. c. 22. p. 99. Anno 1625. 22. Martij conspexi gloriosum sanctam Joachimum, statimq; juxta illum conspexi sanctam Annam, & in sanctis brachijs Sanctissimam Virginem instar parvulae puellae, quam, amplexans ipsam ac adstringens ad suum sanctum pectus, cepit dulcissime alloqui, extollendo gravissimis, magni momenti verbis, sublimes ac admirandas virtutes ejusdem Dominæ, gratulando illi millies gratias à DEO acceptas, & specialissimum modum, quo ijs bene fuerat usa: seque demississimis affectibus DEO gratum exhibebat pro beneficio sibi ab eodem præstito, dum talem ipsi dedit Filiam. De his omnibus tam prolixum ac dulcem habuit sermonem, tantâ plenum gravitate, amabilitate, atque teneritudine, ut opinione meâ, nemo mortalium talia possit proferre. His dictis posuit Augustissimam Puellam ad brachia gloriosæ S. Annæ, quæ imitata Sanctum, similia loquebatur, deprædicans excellentias illius Dominæ, & millenas DEO gratias agens, cum humili gratitudinis demonstratione, pro data sibi ea filia. Vix suum Sancta finiverit sermonem, quando post ipsam, & sanctum Joachimum vidi sanctum Patrem Ludovicum de Ponte, indutum, more Sacerdotum, non casulâ, sed pluviali, omnesque tres ad me venientes, postquam sanctus Joachimus sanctissimam Virginem recepit ad suas ulnas. Tum sanctus Pater Ludovicus procumbens in genua, accepit, cum profundissima reverentia, illam Sanctissimam Puellam Dominam nostram, ex ulnis sancti Joachimi, quam in manibus tenens, non admotam pectori, prout à sanctis ipsius Progenitoribus admovebatur, sic flexis genibus mihi obtulit, ut oscularer ejusdem pedes, quos sum dissaviata cum magna teneritudine & consolatione meæ animæ: atque Augustissima Puella se inclinavit, & atrectans manibus meas genas, osculata est meam frontem, ac voce clara, quali loquuntur fæminæ, ætatis provectæ mihi dixit: Ave amica. Reposuit ipsam deinde sanctus Pater Ludovicus in bra-

brachijs Sancti Joachimi, & omnes reversi ad suum locum, ubi illos initio videram, discesserunt à me ac disparuerunt, relinquentes meam animam plenam suavissimo solatio. Benedictus sit DEUS ob suas misericordias. Amen.

X. Lib. 1. c. 22. pag. 100. Anno 1627. Die Sancti Josephi Divina Majestas mihi insinuavit velle se mihi præstare, specialem aliquam gratiam. Ego propter meos timores divertebam. Tum mihi Dominus Majestatis suavissimè, & amantissimè dixit: Cessa Anima: nunquid enim non vis videre Patrem meum Josephum? ista fuerunt ipsius verba, & hoc titulo compellavit Sanctum. Postea vidi velut eminùs venientem Sanctum Josephum cum multis Angelis. Veniebat gloriosissimus, ac plenus splendoribus: & quanquam summam repræsentaret gravitatem, erat tamen illa conjuncta magnæ benignitati. Appropinquavit mihi, & salutando me peramanter mihi dixit: DEUS sit tecum Anima. Ego sum Joseph, Sponsus MARIÆ Virginis. & venio ad te nomine DEI ad te visitandam, atque consolandam. Dum viderem hunc admirabilem Sanctum, & audirem dulcissimum ipsius alloquium, fuit mea anima in suo DEO repleta singulari solatio, & considerans virtutes, atque excellentiam tam cælestis hospitis, capi illum omni devotione & affectu cordis dicere: O gloriosissime Sancte, tu felicissimus fuisti virorum, & super omnes exaltatus, qui in mundo vixerunt, atque à DEO sunt creati; siquidem tanta fuit tua felicitas, ut sis electus in Sponsum illius, quæ futura erat Mater Incarnati Verbi Divini, & tu eundem Dominum, sudando ac laborando, educavisti & sustentavisti. O beate & Sanctissime Vir! Gloriosus Sanctus audivit me hæc sibi dicentem, & respondit mihi: Bene profecto dixisti Anima, bene dixisti: quia DEUS Dominus noster mihi tam magnum contulit beneficium, & insignem gratiam, ut essem Sponsus suæ Sanctissimæ Matris, serviremque Salvatori in e-

T y y

jus-

iisdem infantia: verè tamen tibi dico; beatum meum Patrem
 ac Dominum, gloriosum sanctum Joachimum, Patrem San-
 ctissimæ Virginis MARIE, à DEO in altiore & sublimiore
 esse constitutum gradu, quàm ullà viventium in hoc mundo
 possit exponi lingvâ, aut comprehendi intellectu. Hunc be-
 atum Patriarcham veneratur totum Cælum, & Angeli DEI
 illum suspiciunt, ut Patrem MARIE Virginis, ac Avum Re-
 demptoris. Est stupenda & propè infinita ipsius dignitas.
 Mea anima fuit maximo repleta solatio, audiens has laudes,
 quas mihi Sanctus referebat, de eo magno Patriarcha, quia
 illum pro viribus meis colo. Postquam mihi Sanctus ista di-
 xit, movit pallium, ac si illud deponeret ex humeris, coruscan-
 do magnis splendoribus: atque dum ipsum tunc aspicerem, vi-
 di, quod in pectore haberet lucidissimam crucem unius palmi,
 quæ mihi talis fuit visa, tamque admirabilis, ut ab ea non po-
 tuerim avertere oculos, cum meo magno solatio. Videns me
 Sanctus ita constitutam, dixit mihi cum suavissima benignita-
 te: Quid aspicias Anima? quid vides in ista Cruce, quod te
 tantâ afficit consolatione, & rapit in admirationem? Scias ve-
 lim, crucem quam sum passus in mundo fuisse unicum meum
 thesaurum, omnem meam gloriam, omnem beatitudinem, plu-
 risque à me æstimatam, & æstimari, velut acceptissimam Divi-
 nis oculis, quàm quod sim Sponsus Beatissimæ Virginis MA-
 RIÆ, & quasi in meo sinu educaverim Redemptorem. Gra-
 vissima, & incredibilis fuit, quam duabus occasionibus susti-
 nui. Primò, quando vidi prægnantem MARIAM Virginem,
 orta mihi inde incertitudo animi, cum ipsam plurimum amarè,
 fuit crux ex ijs, quas toleravi, longè maxima. Altera quoque
 erat acerbissima in exilio Ægypti, ubi vidi adorari idola, veri
 autem DEI ibi præsentis negligi cognitionem: affligebant me
 præterea opprobria, & vexationes, quas Sanctissima Virgo
 patiebatur ab illo impio & perverso populo; quæ mihi crux
 du-

dubio procul accidit molestissima. Crux, quam tibi Anima, DEUS dedit, datque ferendam, per decursum diuturnæ tuæ vitæ, est certè maxima, cum fuerit interdum gravior tormentis Martyrum, qui suum pro CHRISTO JESU sanguinem profuderunt. Æstima illam, sicut debes, & age magno DEO nostro ac Domino magnas gratias pro tanta tibi ab ipso exhibita misericordia.

XI. Parte 1. l. 6. c. 5. §. 2. Anno 1615. in Julio cum essem vehementer afflicta à doloribus & siti, duxerunt me mei Domini sancti Angeli, ad quendam amœnissimum hortum, ubi post alia præsentem Domino DEO & alijs multis beatis Spiritibus incepit meus Angelus Minor & cecinit cantum seu hymnum in laudem Divinæ Majestatis, ejusdemque Bonitatis ac Misericordiæ, propter illam, quam exhibuit peccatoribus, ignoscendo ipsis eorum peccata, & adducendo illos ad cognitionem propriorum errorum, ac deinde ad suam gloriam, constituto ipsorum capite, Sancto Rege Davide; qui aderat præfens, canente eodem Angelo, de agnitione commissi peccati, quam ipsi DEUS dederat, per prophetam Nathan. Quo cantu finito assurrexit Sanctus Rex David, deponensque suam coronam, prostravit se ad pedes Domini, penes quos illam collocavit, laudavitque illum ac benedixit, propter magnam gratiam, quam ei præstiterat. Deinde secundus Angelus incepit decantare laudes DEI, & cecinit hymnum seu cantum benedicens Divinam Majestatem, propter gratiam præstitam Sancto Jobo (& alijs Sanctis Justis) quod illum ad se duxerit, viâ tam extraordinariâ afflictionum, & Crucis. Atque eo cantu finito, surrexit Sanctus Jobus, qui aderat, & provolutus ad pedes Domini ipsum laudavit ac benedixit, propter eandem misericordiam, & gratiam sibi exhibitam.

CAPUT III.

De Immaculata Conceptione Beatissimæ Virginis.

I.

Quando jam advenit plenitudo temporis, ut Mater Verbo incarnando præpararetur, primò omnium providere oportebat, ne Matrem illam Dæmon præoccuparet, ut postea hospitium illud jam priùs temeratum, non nisi post expulsum & ejectum indè dæmonem, Filius DEI tardior Possessor ingrederetur. Huic ergo probro cavendo, necesse erat Sanctissimam DEI Matrem concipi sinè omni macula, adeoque decreto Universali, quantum ad peccatum Originale contrahendum, in Adamo non includi. De hoc ptæclarissimo, & toti per Orbem terrarum Christianitati dilectissimo mysterio, habuit VEN. MARINA permultas elegantes Revelationes, quas in gratiam sincerorum ejusdem Cæli & Terræ Regina cultorum & Honoris ejus, etiam ubi ab Ecclesia necdum ultimo rigore præcipitur, promovendi studiosorum diligenter hic annotabimus, ut etiam illi, qui hoc decus huic Sanctissimæ Matri Virgini, ejusdemque Divino Filio negant, videant quàm securè possint sententiæ piæ acquiescere, eam in Filio DEI non negando Filialem Pietatem, qui Matrem suam sic honorando, Filijs omnibus supremæ præbuerit erga Parentes Pietatis, in se ipso splendidissimum Exemplar.

II. Sic ergo VEN. Virgo MARINA refert Parte I. L. I. c. 31. §. 4. Quâdam nocte fui quasi in somnis à diabolo & alijs socijs incutientibus mihi vehementes timores cum magna crudelitate, ac tumultu, rapta & suspensa per capillos, ut mihi videbatur, vel per collum, & collocata in quadam re altissima
ac

ac posita in aëre, ubi mihi inflixerunt multos & acres ictus quodam fune, qui habebat crassissimos nodos. Sustinui illud supplicium valde diu & diabolus mihi significabat, quòd me ita excrucieret propter devotionem, quam habebam & ingenerabam alijs erga Immaculatam Conceptionem Beatissimæ Virginis *MARIÆ*. Evigilavi ex somno afflictissima tam internè in Anima, quàm quoad molestiam & cruciatum Naturæ. Et fuerunt tanti dolores, atque confractio miserabilis corporis, ut intra quatuor vel quinque dies vix me potuerim movere, vel vertere in lecto. Toleravi cum solatio meum martyrium, amore *DEI* & Sanctissimæ ejus Matris.

III. Lib. 2. c. 1. §. 2. refertur in die Nativitatis Beatissimæ Virginis à tota *SSS. TRINITATE* dictum: tota pulchra es Amica mea & macula non est in te: atque his verbis indicatam fuisse purissimam ipsius Conceptionem: prout infra tota hæc revelatio adducetur pro Nativitate Beatissimæ Virginis.

Ibidem §. 3. sic habetur. Anno 1619. Sancta Anna mihi amanter dixit: Amica non potes intelligere, neque cogitando assequi, summum gaudium & jubilum, quo mea Anima exultavit, quamdiu in visceribus meis tuli purissimam Virginem *MARIAM*, meam Filiam; & illustrationes, quas habui à *DEO* ijs mensibus, ex quibus intelligebam id, quod ferebam in utero, esse quiddam valde admirandum ac Divinum, plurimum commodi, ac boni allaturum universo mundo. Fuit autem *MARIA* Mater *JESU* purissima & concepta sine macula peccati originalis. Quidquid opponitur, abludit à véro, neque est credendum, sed nec dicendum ullâ ratione. Hæc fuerunt verba Sanctæ Annæ.

Agens cum *DEO* audivi suavissimam musicam Angelorum laudantium, ac magnificantium Immaculatam Conceptionem Beatissimæ Virginis, & subito vidi venientem cum ma-

gno Angelorum comitatu gloriosum Sanctum Joachimum Patrem DEI paræ, qui ipsam manucebat cum summa reverentia, & amore. Erat instar puellæ parvulæ, duorum ac dimidij anni, aut paulò amplius: veniebat autem hæc Sacratissima pupula quàm amabilissimè intuens suum Sanctissimum Patrem, & vultu hilari, vicissimque Sanctus Pater ipsam intuebatur summo cum amore & gaudio. Tota erat vestita auro, & lapidibus pretiosis, qui erant similes Soli lucenti; vultus ejus & capillus fuit elegantior ac pulchrior, quàm dici possit, vel verbis explicari. Ingressa est hæc Domina meum cubiculum, quam statim Sancti Angeli, qui apud me erant, humillimè & reverentissimè genibus humi defixis venerabantur: Domina verò illa & Sanctus Joachimus ipsos aspekerunt jucundè & amanter: petitâ deinde veniâ, accesserunt illam suo ordine, osculaturi pedes Sanctissimæ pupulæ; quod tamen ipsa, tergiversando non admisit. Cùm autem aspiceret suum Patrem ille ei dixit: Filia ac Domina mea, porrige tuam manum tuis Sanctis Angelis. Tum extendit suam manum, quam habuerat averfam, applicueratque lateri ad cingulum & illis porrexit, atque ipsi sunt eam reverenter osculati, & redierunt ad suum locum.

IV. Ibidem Beatissima Virgo promisit suam gratiam quibusdam personis eò quòd addictæ essent suæ purissimæ Conceptioni.

Ibidem. Vidi ingentem cohortem diabolorum, qui toti erant armati, & ferebant hastas mucronatas atque cuspidatas, ac edebant gestus quosdam truculentos, moliebanturque assaultum aliquem crudelem, ac terribilem, ut viderentur agi in rabiem, velleque invadere illud Sanctissimum mysterium; quod tamen nullâ ratione poterant, quia erant quasi ligati & vincti, ac impotentes ad invadendum. Quamvis autem quidam diabolus major ipsos animaret, & compelleret ac vexaret, ut agerent quod ipsis esset agendum, nihilominus erant magis im-

impotentes, & imbecilles, magisque deficiebant viribus. Mirata sum vehementer videndo istam ferociam diabolorum, & intellexeram hanc esse quandam figuram, quâ repræsentabatur id, quod accidit in mysterio purissimæ Conceptionis Dominae nostræ.

V. §. 3. Alio die Nativitatis Anno 1617. post mediam noctem venit ad me invisendam Sanctissima Virgo speciosissima cum suo Filio infante, quem gestabat in brachijs, & accedens ad me dixit mihi: Accipe hunc Infantem Filium meum, qui est meus Redemptor, & verum est meum esse Redemptorem, quia ipsius sanguine ac meritis fui præservata à peccato originali. Ego renuebam illum aspicere, dicendo illi: Ergone Domina, mihi illum das, ut tu absque illo remaneas! Respondit: libenter eum do omnibus qui illum volunt ex corde accipere, neque ego propterea ipso careo. Dedit mihi illum & sensi quod introivisset in me. CHRISTUS Dominus dixit mihi: Scito me venisse, ut tibi committerem aliquid concernens meam gloriam, & est, ut omnibus Sæcularibus & Religiosis, ac Monialibus, quibus cum versaris, svadeas devotionem erga meam Matrem, & ipsius Sanctissimam ac purissimam Conceptionem, immunem à peccato originali. Quando hoc audiui, fui recreata, & plurimum animata, atque exilarata, & respondi; Domine, faciam id quàm libentissimè & promptissimè.

VI. Anno 1617. dixerunt mihi Angeli in Vigilia Corporis CHRISTI. Constet tibi in Beatissimam Virginem Dominam nostram redundare magnum honorem in hoc festo, cò quòd fuerit Arca, in qua fuit clausus Filius DEI, factusque est Homo, idem ipse qui existit in Sacramento. Tunc subito inceperunt magnificè deprædicare Beatissimam Virginem, atque ipsius Immunitatem à peccato originali, jam indè ab ejus Conceptione, ac deinceps per totam vitam, assumptisque suis instrumentis musicis cecinerunt divinè

VII.

VII. Lib. 2. c. 2. §. 3. Die Præsentatæ Beatissimæ Virginis Anno 1622. Agens cum DEO, more solito, vidi CHRISTUM Dominum Crucifixum, unâque Sanctum Patriarcham Joachimum, Patrem DEI paræ, qui juxta se habebat Sanctissimam suam Filiam, Dominam nostram, puellam triennem, stringens ipsius manum, quàm reverentissimè, & amantissimè, eidemque tenerrimè ablandiens, & Sanctissima Pupula similiter erga suum Sanctissimum Patrem præ se ferebat magnum amorem, & reverentiam. Dum contemplerer hoc mysterium, vidi diabolum qui aliquantum distabat à Domina nostra, & quasi volebat illam adoriri à tergo, ac inferre illi aliquod damnum; quod tamen non poterat destitutus viribus. Vidi etiam ex CHRISTO Domino Crucifixo prodeuntem quandam Divinam virtutem, instar parvæ gratiosissimæ nebulae, quæ humectabat totam illam Sanctissimam puellam, eandemque reddebat formosissimam, ut adæquaret mille soles, plurimumque illustrabat. Eximia fuit elegantia, bonitas, cæterique Divini thesauri, quos vidi & agnovi in illa Sanctissima Domina, ut excedant captum omnis intellectûs. Diabolus fugit, ac evanuit. Sanctus autem Patriarcha subito sustulit ad suas ulnas intemeratam Virginem, valde reverenter & amanter, intuebaturq; ipsam & se in ea contemplantur: amplexabatur etiam illam, & osculabatur, compellabatq; mille blandis verbis dicendo ipsi: Filia mea, Domina mea. Et Sanctissima Puella stringebat in suis brachijs collum sui Sanctissimi Patris, ac contemplantur ipsum atque osculabatur cum magna honoris exhibitione. Sic illam Sanctus Patriarcha tulit ad me, ut ipsam venerarer, & contemplerer. Cùm esset apud me, vidi venientes plurimos sanctos Angelos, & adferentes quoddam pretiosum pallium, quo coopertum Sanctum Patriarcham cum castissima Pupula Domina nostra, quam gestabat in brachijs, tulerunt ad cælum, concinendo eximias laudes istius Dominæ; atque hoc modo
illam

illam portaverunt quoad usque effugeret meos oculos. Dictum mihi est, significatum mihi in hoc mysterio fuisse, quòd puritas Conceptionis Dominæ nostræ sit attribuenda CHRISTI Domini crucifixi virtuti, ac meritis, quæ ipsi fuerunt ab eo applicata, quòdque fuerit præservata à lapsu in peccatum originale.

VIII. Lib. 4. c. 2. §. 3. Dixit Gabriel Archangelus : sit benedictus noster magnus DEUS in omnibus operibus suis, & miserationibus, quarum una ex maximis mihi ab eo præstitis, quàmque ego æstimo, & quâ supra modum gloriôr, est, quod ab instanti purissimæ Conceptionis hujus præcellæ Virginis Matris DEI semper illi inserviverim, ac adfuerim per totum decursum ipsius Sanctissimæ Vitæ, quoad usque cum corpore & Anima est assumpta ad Cælos.

Parte I. L. 4. c. 9. §. 3. Festo Sancti Josephi Anno 1618. Me visitavit Sacratissima Virgo cum suo Sancto Sponso. Et ego ab illo petivi: Benedicte Sancte cùm perspectam habeas puritatem hujus Dominæ, roga DEUM, ut declaretur mysterium ipsius purissimæ Conceptionis. Responditque Sanctus: quamvis DEUS sit omnipotens, requirit tamen dispositionem, ex parte suarum Creaturarum; faciam nihilominus quod dicis.

Lib. 4. c. 23. §. 5. In festo Sancti Francisci fui ducta in spiritu ad Cælum cum gloriosis sanctis tribus Patriarchis Dominico, Ignatio, Francisco, & Sacratissima Virgo Domina nostra, aspiciebat cum speciali gaudio gloriosum Sanctum Franciscum dicendo illi, esse sibi ipsum charum, eò quòd ejus Religiosi defendissent suam purissimam Conceptionem.

IX. Lib. 4. c. 28. §. 1. In Decembri Anni 1616. Cùm ingens gaudium perciperem ex devotione quâ colebatur Immaculatissima Conceptio Beatissimæ Virginis, Divina Majestas me allocuta dixit: In quo ex his duobus, quæ proponam, ma-

Z z z

jor

jor favor exhiberetur & gratia cuius Principi Filiae magni Regis? an si hic bene illi volens, eam præter morem vestiret, atque exornaret venustissimè; hoc verò factò, ipsam sineret abire, quocunque illam casus deduceret: atque si, ubi eadem Princeps abiens, lapsa fuisset in aliquo nonnihil difficili transitu, seque commaculavisset, tum Pater ejus ex amore, quo ipsam prosequeretur, cernens afflictam ac gementem, illi blandiretur, eamque pacaret, dicendo: Noli affligi, Filia mea dilectissima, propter maculam tuæ vestis, ego enim tibi dabo aliam, istâ elegantiozem; juberetque illam subito exui eâ veste maculatâ, & indui aliâ elegantiore & pretiosiore? an verò, si idem Rex hanc Filiam suam adeò dilectam, postquam illam vestivisset, & venustè, ac admirabiliter exornavisset gemmis, apprehensâ ejus manu, sublatam in sua brachia ferret, ac traduceret per illum difficilem & periculosum locum, nè ibi caderet seque defædaret? Dic jam, quo ex his duobus tibi à me dictis modis existimas majorem favorem & gratiam à Rege præstandam suæ Filiae? Intellecto ac percepto hoc discursu, respondi: Existimo, mi Domine absque dubio fore majorem gratiam, quam Rex præstaret suæ Filiae, si ipsam manuduceret, ferretque in suis brachijs, ditatam & exornatam à se gemmis, nè caderet, seque macularet, quàm si lapsam ac defædatam rursum vestiret, ac denuò ornaret. Bene est, dixit Dominus, bene est. Sed subiice mentem meam cogitatio, quomodo ista comparatio Regis, qui tam splendidè exornaret suam Filiam, quæ postea cecidisset seque maculavisset, adaptari potest Sanctissimæ Virgini, eò quòd ipsa non fuerit exornata, neque habuerit ulla merita, antequam esset. Dixi id Domino, & Divina Majestas mihi respondit: Bona est comparatio: quia ego in mea æternitate, & in mente mea Divina, istam creaturam elegi in meam Matrem, ipsamque prædestinavi, & in mea prædestinatione jam inde extitit, modo à me explicato. Paulò post

pòst conspexi duas nubeculas, unam candidam & pulchram, & alteram veluti fuscā, à qua erat quasi obumbranda prior, sed Dominus ipsam detinuit. Et intellexi primam fuisse corpusculum recens formatum Virginis, alteram verò culpam originalem, quæ illud erat occupatura, sed esse inhibitam à DEO.

X. Ibidem §. 2. Dum Dominum & ejus Matrem quàm instantissimè rogarem, ut felicem sorteretur exitum negotium declarandæ Immaculatæ Conceptionis Beatissimæ Virginis in Decembri Anno 1617. Ipsa me est allocuta, significando mihi, me id bene ac rationabiliter petere à Domino, & dixit: Anima mea, ego non nego, sed fateor, me esse Filiam meorum Parentum: Verùm noveris, Dominum Majestatis ex mera sua bonitate & clementia mihi præstitisse eam gratiam & misericordiam, ut me præservaret à lapsu peccati originalis; id quod fuerat ab æterno decretum in Consistorio Sanctissimæ TRINITATIS, ibidemque erat constitutum, ut Virgo, in qua Verbum Divinum erat assumpturum Carnem humanam, esset purissima & mundissima ab omni macula, & immunis à nævo peccati originalis, atque hoc est certissimum.

Alio die, in Aprili Anno 1618. Cùm post Sacram Communionem DEUM orarem ut hanc veritatem illustraret, respondit Divina Majestas: Nónne vides? Nunquid enim mihi erat assumenda caro ex fæmina, quæ fuisset maculata peccato? indicando, id non fuisse conveniens infinitæ ipsius Bonitati.

Alio die mihi dixit Sanctissima Virgo, agens de hoc mysterio: Scias velim, pluris à me fieri gratiam, quòd non fuerim vel per momentum subdita peccato, & inimica DEI, quam quòd sim ab eo assumpta in Matrem.

XI. Lib. 4. c. 29. §. 1. Quodam die mihi DEUS dixit, accommodando se meæ timidæ ac vřrecundæ naturæ. Nónne

aliquid faceres in mei gratiam? Non ageres gratias Regi Philippo pro obsequio, quod mihi exhibet, dum piè tuctur purissimam Conceptionem meæ Sanctissimæ Matris? Quia sentiebam ingentem difficultatem in ejusmodi rebus, rogavi illum humiliter, nè mihi id mandaret. Et postquam multis hac de re egissem, quæ brevitatis ergo omitto, Sanctus meus Angelus Custos, loquens mihi in intimo & secretissimo Animæ meæ recessu, dixit hæc verba: Quod te scribere oportet ad Regem Philippum est hoc: Rex domine noster, millies tibi exosculos pedes, propter eximium obsequium, quod præstas Domino DEO nostro, ac Sanctissimæ ejus Matri & propter magnam gratiam, quam nobis omnibus facis, dum tanto pietatis sensu honoras ac tueris Purissimam Conceptionem hujus Dominæ nostræ. Dominus te idcirco remunerabitur; id quod ego ab eo suppliciter petam in meis indignis precibus. Quid in hoc habes difficultatis? aiebat Angelus. Post biduum vel triduum mihi rursum Angelus est locutus, dicendo: DEUS sit tecum, serva DEI, & Soror nostra. Constet tibi, me esse ad te missum à Domino Majestatis, ut tibi id persvadeam, de quo tecum est locutus. Vult verò, ut statim exequaris, quod tibi mandatum est, & injunctum; hæc enim est ipsius Divina voluntas. Ego timens, nè Dominus indignaretur, propter repugnantiam, quam ostenderam, dixi illi: Sancte Angele, ob quam causam te Dominus misit ad ferendum mihi istud nuncium, & quare mihi non dixit id Divina Majestas, sicut aliàs consuevit? Estne fortè ista, quod fuerim tam incircumspecta & inurbana: & dum mihi significaret, quid in hac re fieri vellet, sim illi obloquuta, exhibendo me ipsi difficilem? Non est hæc, dixit Angelus, ob quam tibi Dominus non loquitur per se ipsum, sed quia mihi voluit præstare istam gratiam, ut me constitueret suum Legatum, qualem præstat suis Angelis, & præstitit Sancto Archangelo Gabrieli, mittendo ipsum tanquam suum

Lega-

Legatum, ad Beatissimam Virginem, in negotio tanti momenti, quanti erat Incarnatio Filij DEI. Et animadvertite, quid hæc Domina responderit ad nuncium Angeli, dicendo tandem: Ecce Ancilla Domini, fiat mihi secundum verbum tuum. Atque hoc supposito, quid respondes ad id, quod tibi dixi nomine DEI. Id ipsum aiebam ego, quod respondit mea Domina, Virgo MARIA, cujus sum ancilla, & dico: Ecce vilissimus vermis & creatura Domini, fiat in me voluntas ejus, quia eadem est mea, nec aliud volo ac desidero. Bene est, dixit Angelus, vale. Subito desijt videri à mea Anima. Et scripsi Epistolam ad Regem Philippum Tertium sicut mihi fuerat imperatum.

XII. Aliam Epistolam jussit illam scribere deinde ad eundem Regem, adhibitâ operâ duorum Angelorum, cum multis circumstantijs, dicendo illi, ut ei scriberet, expedire ad Majorē gloriam Domini DEI, & obsequium ipsius ac Sanctissimæ ejus Matris, ut Episcopatibus ac Prælaturis Hispaniæ prospiciat de personis, non solum bene meritis, sed etiam qui teneant & profiteantur sententiam de Purissima Conceptione Beatissimæ Virginis conceptæ sinè peccato originali. Hæc Epistola fuit scripta ac tradita ipsimet Regi ad manum.

XIII. Alias literas exaravit ad Reverendissimum Patrem Provinciale ordinis Prædicatorum, Fratrem Dominicum Pimetellum in hæc verba, prout refertur Parte 1. Libro 4. cap. 29. §. 1.

DEUS sit in Anima tuæ Paternitatis, detq; ipsi suum Sanctissimum ac Divinum Amorem.

Reverendissime Pater, bene advertit Tua Paternitas, quàm timidè ac verecundè egerim, eò, quòd non fecerim, quòd debeo, ut clarè ipsi loquerer de negotio Purissimæ Conceptionis SS. Virginis MARIE Dominæ nostræ. Non feci bene, ut dico, & Dominus Deus noster Majestatis me propterea reprehendit:

Zzz 3

Quia

Quia postquam mihi injunxisset, ut exponerem ac dicerem, quod intellexeram à Divina Majestate, de veritate hujus Sanctæ doctrinæ, designavissetque mihi Viros graves, & sapientes ac Religiosos, atque ex Ordine Nostro, quibus id dicerem; postquam etiam fuisset obsequuta obedienter, quoad cæteros, id quod per DEI misericordiam habuit optimum successum; tantum cum tua Paternitate, quæ erat ex designatis, quibuscum mihi erat agendum fusiùs, egi timidè & verecundè. Nollem hunc defectū utriq; imputari, quòd ego sim inobediens, Tuæ autem Paternitati, nescio desitne dispositio. Negotium in eo versatur, mi Domine; quòd sit infallibilis veritas, Sanctissimam Virginem MARIAM Dominam nostram fuisse conceptam finè peccato originali; quod scio ab ipsomet DEO, qui est veritas infallibilis, quæ non potest falli, neque nos fallere. Et quia hoc est præcipuum, sufficiat. Omitto allegare Sanctos & Nostros, quemadmodum etiam possem. Benedictus sit DEUS! Cum ita sit, obsecro Tuam Paternitatem, quam maximè possum, & rogo Nomine DEI, in cujus versor præsentia, dum id dico; expendat hanc rem bene, & amplectatur ex corde, atque credat, esse veram istam sanctam sententiam, quam plerique omnes tenemus, ad majorem gloriam Domini DEI nostri, & Sanctissimæ ipsius Matris, animetq; se Tua Paternitas ad id, siquidem ista sancta doctrina æquè potest teneri propter honorem Sanctissimæ Virginis Dominæ Nostræ, & tenenda est quia est vera, ac summus Pontifex nobis concessit, ut ipsam honoraremus, eique faveremus, volens, ut ista doceretur pro concione, & contraria, quoad id, prematur silentio. Hoc est quod fieri convenit, & quod DEUS vult à tua Paternitate. Atque id sufficiat, amore DEI. Divina Majestas Tuam Paternitatem conserve, exornetque cumulatè donis celestibus ipsius Animam. Ex Domo, die Martis.

MARINA DE ESCOBAR.

XIV.

XIV. Ibidem §. 2. Ut autem intelligerem, inquit, quantum DEO placeat, si fiat quod ipse jubet, etiam si non sortiatur statim optatum exitum, dignatus est mihi manifestare, quid contigerit eo tempore, quo meæ literæ fuerunt traditæ Reverendissimo Generali Sancti Dominici, quia juxta bonas conjecturas, tunc accidit hæc visio. Cum vacarem orationi in Januario 1617. Converti oculos Animæ ad meos Dominos quatuor Angelos, & vidi illos splendidissimè indutos, atque exornatos auro purissimo cælesti & gemmis. Obstupefcens dixi illis: Domini mei, nōne mihi dicent, quare sint taliter ornati, & præter morem gloriosi? id enim fieri consuevit, quando speciale festum celebratur in nostra Ecclesia, & Dominus Majestatis vult, ut celebretur ac honoretur in cælesti Jerosolyma: verum ego modò neque video neque percipio ullam talem solennitatem. Solennissimum festum agitur, Soror, dixerunt illi, in cælesti Jerosolyma hoc die. Et ratio est, quia hodie per te Nomine DEI & Sanctissimæ ipsius Matris intimatur Ordini Sancti Dominici, quæ sit Sanctissima ejus voluntas, quoad opinionem, quam ab illis vult teneri, de materia Purissimæ Conceptionis Dominæ nostræ. Illud festum solennissimè celebramus Sancti Angeli in cælesti Aula. Audiens id ab ipsis dici, obstupui, dixique illis: Estne possibile, mei Domini, quòd propterea celebretur tantum festum? & quòd hoc DEO fuerit tantopere gratum, eique placuerit? Tunc, dummodo DEO gratum esset, ac placeret, ut dicerem, quod ea de re sciebam, concepi desiderium id ipsum exponendi ac indicandi ipsius nomine universo Ordini Sancti Dominici, quemadmodum faciebam.

XV. Et §. 3. Refertur ingens cæleste donum, quod ei Beatissima Mater contulit in præmium pro eo, quòd conata sit divulgare Immaculatam ejus Conceptionem.

Ibidem §. 4. Quodam die audiui solennem musicam in
cæ-

cælo, & vidi descendentem Sacratissimam Virginem cum qua veniebant multi Sancti & Sanctæ. Postea Beata Virgo incepit ascendere ad Cælum per quosdam veluti gradus & cum illa Sancti & Sanctæ ordine geminato, atque ego unà cum ipsis. Ubi Sacratissima Virgo fuisset ingressa cælum, venissetque ad Thronum Beatissimæ TRINITATIS, hæc illi dixit: Tota, pulchra est Amica mea, & macula non est in te. Et cum subito apprehendisset Beatissima Virgo meam manum, dixit ad Patrem æternum: Domine ista est amica mea, & famula tua, MARINA. Quale præmium ipsi vis dare pro obsequio, quod tibi exhibuit, promulgando, ut potuit, meam Purissimam Conceptionem? Dominus illi dixit, se permittere, ut mihi pro suo arbitrio daret ejus nomine, quidquid vellet. Hoc audito, Beatissima Virgo imposuit elegantem torquem meo collo, dicens mihi: Accipe istum torquem in signum doni perseverantiæ, quod tibi do nomine Filij mei. Ac deinde me exornavit alio pretiosissimo, dicendo eum esse pignus præmiorum, quibus postea essem fruitura, brevi enim me migraturam.

XVI. L. 4. c. 30. §. 1. Quodam tempore circumtulī oculos Animæ & conspexi Beatum Sanctum Thomam, qui mihi gravi quodam & sapientissimo modo dixit: Soror, exhibe mihi istam charitatem, & gratiam, amore DEI, ut dicas meis Fratribus, me, si fortè cogitant, quòd me honorent, mihi que rem faciant gratam ac præstent obsequium, dum defendunt opinionem, quæ nunc tantopere discutitur de Sanctissima Conceptione, ipsis significare, mihi hac in re nullum exhiberi ab illis obsequium, neque ullum deferri honorem. Dic illis id, ob reverentiam DEI, quem amas & ejus Matris. Atque hoc dicto mihi valedixit & abiit. Ego vehementer obstupui talia DEI opera, & quod mihi fuerat dictum à Sancto.

Cum id scriberem, & pervenirem ad verba, quæ dixit, Sanctus Thomas de Sancta Conceptione Dominæ Nostræ, sub-

substiti, rogans DEUM, ut illuminaret meum intellectum ac memoriam, nè alia scriberem verba, quàm dicta à Sancto. Ità me hæsitantem Domini mei Angeli, & alij cælestes Palatini, inceperunt valde potenter urgere, dicendo: Ità dic, Soror, ità dic, quia, ità tibi dicendum est, & ità dixit Sanctus. Dic ità. Ideoque fui compulsæ, ad hoc scribendum.

XVII. Aliâ vice vidi Sanctissimam Virginem inter Sanctam Catharinam Senensem & Sanctam Luciam. Sancta Catharina Senensis me intuita, quàm amantissimè & jucundissimè dixit mihi: DEUS sit tecum Soror. Et tangens suâ manu Sanctissimam Virginem, dixit: Aspice, mea Amica, aspice istam Sacratissimam Dominam nostram, tam sanctam ac Divinam, tam admirabilem, & tam speciosam ac pulchram, tam puram & mundam ab omni macula, atque ab omni culpa ac peccato, quo nunquam fuit contaminata, nec quidem Originali, quod est verum.

XVIII. Ibidem §. 2. Die gloriosi S. Dominici horâ terciâ matutinâ in Augusto Anni 1622. me est dignatus idem Sanctus Patriarcha invisere comitantibus ipsum multis Sanctis ex Sacra ejus Religione & magno numero Angelorum DEI. Duxerunt me ad Ecclesiam Conventûs illius in hac urbe, ubi vidi Majestatem CHRISTI Domini, & ipsius Sanctissimam Matrem, qui habebant in medio gloriosum Sanctum Dominicum, quasi illum in domo ejus & Festo honorantes. Postea CHRISTUS Dominus noster bene precatus est Instituto Ordinis Sancti Dominici, ac deinde omnibus ipsius filijs quàm affabilissimè & amantissimè. Postea vidi venientes multos Religiosos Ordinis ex ijs, qui etiamnum degunt in carne mortali, ad ferream cratem Collegij Sancti Georgij, quorum erat ingens numerus, & quosdam agnovi. Ibant autem bini, & comitabantur ipsos multi Angeli DEI. Accedebant locum in quo erat CHRISTUS JESUS, unicum nostrum Bonum, &

Aaaa

ipsum

ipsius Sanctissima Mater, ac Sanctus Patriarcha, ibique se prosternebant, ac statim modicum erigebant, & Dominus illis benedicebat, imponebatque suam Sacram manum capiti singulorum, peramanter & affabiliter. Deinde Beatissima Virgo illis est impertita suam benedictionem, quæ imponebat cum magna benevolentia suas Sacratissimas manus singulorum humero, quasi illis agendo gratias pro devotione, quâ afficerentur erga ejus Majestatem, & Purissimam ipsius Conceptionem: omnes enim illi qui advenerant, tenebant piam opinionem, & hi ut dico, erant multi. Dixitque illis, se ipsis semper gratificaturam, & futuram eorum specialem Advocatam, neque illos unquam deserturam. Sanctus quoque Patriarcha illis bene precatus est cum magna charitate. Dum spectarem hoc mysterium cum magno meo solatio, audivi, quod venirent colloquentes à ferrea crate ejusdem Collegij multi Angeli, & differentes cum quodam Patre gravi Ordinis, ac pererudito mihi bene noto. Hic veniebat cum Sancto Doctore Thoma, qui ipsi magnas agebat gratias pro eo, quod fecerat in favorem piæ opinionis de Sanctissima Conceptione. Mox vidi venientes alios multos Angelos, qui comitabantur alium Patrem, gravem ejusdem ordinis, quem etiam novi, veniebantque loquentes cum ipso de eadem materia, & hi duo Patres simul, qui hodieque vivunt, fuerunt ducti ab Angelis ad conspectum CHRISTI JESU Domini Nostri, & Sanctissimæ ejus Matris, ac Sancti Dominici, dederuntque ipsis benedictionem eodem modo & ordine, quo reliquis.

XIX. Ibidem §. 3. Aliquando vidi quendam Beatum Religiosum ex Ordine Sancti Dominici, qui exceperat meas Confessiones per aliquot menses. Salutavit me jucundè; & cum illum intuerer, vidi quod sustineret manibus nonnihil elevatam vestem superiorem, in qua habebat multas gemmas, & illis immixtos flores sive violentes, quamvis eos tunc non viderim,

rim, donec Sanctus expanderet habitum, & mihi ipsos ostenderet, dicens cum magno gaudio: Aspice, Anima, quid tibi feram, ut videas, & recreeris in Domino. Magno me affecit solatio aspectus eorum thesaurorum, quia mihi videbantur esse magni pretij & valoris. Interrogavi ipsum: Quales thesauri sunt isti? & quales flores? respondit mihi: hæ gemmæ, quas hic vides, sunt symbolum, & repræsentant magnum valorem ac pretium sententiæ, quam tenent non nulli Religiosi nostri sacri ordinis, de Purissima Conceptione Beatissimæ Virginis. Hi flores autem sunt figura & repræsentatio opinionis contrariæ, quam tenent cæteri Religiosi nostræ Religionis. Scito, quod DEUS mihi dignatus sit injungere hoc munus, ut colligam istas gemmas, & hunc fructum ac flores, atque cum ab eo fuero jussus, illos exhibeam ac offeram Sanctissimæ Virgini Dominæ Nostræ, nomine omnium Religiosorum nostræ sanctæ Religionis, quæ libentissimè hoc donum suscipit, & gratissimo animo: gemmas, propter veram sententiam; & flores, propter bonam intentionem ejus, qui illos offert.

XX. Lib. 4. c. 31. Conspexit venientem Gloriosum Sanctum Ildephonsum voluisse docere Concionatores modum publicandi in quavis Concione Purissimam Conceptionem, Beatissimæ Virginis, cui fuerat tantopere addictus in vita. Cum enim eo tempore Vallisoleti sæpe concionaretur, loci Episcopus D. Franciscus Sobrinus, quem MARINA optimè noverat, & quo frequenter usa fuerat conscientiæ arbitro, essetque quasi afflicta, quod non posset audire ullam concionem, dixerunt ipsi illius Angeli: Noli affligi, brevi enim aliquam audies, quæ tibi magnum adferet solatium. Subito consexi venientem Gloriosum Sanctum Ildephonsum, qui in admirabili cathedra ibi extructa, superponens manum uni ejus lateri, & alteram alteri, exorsus est dicendo: Laudetur Purissima

lima Conceptio Beatissimæ Virginis *MARIÆ*, immunis à peccato originali.

Ibid. §. 1. Dominus Franciscus Sobrinus Episcopus Valisoletanus profectus Madritum, vocatus à Rege Philippo III. ad negotia concernentia Conceptionem Beatissimæ Virginis, atque tum vivere desijt in Januario Anni 1618. Paulò post comparuit *MARINÆ*, gaudens, dixitque ipsi: Constet tibi, me in hora mortis meæ habuisse ingens solatium, propter obsequium, quod exhibui *DEO*, & Sanctissimæ ipsius Matri, in defendenda ejus Purissima Conceptione. Tum, ait ipsa, ego illum interrogavi: Dic mihi autem, Sancte Pater, quid hoc super argumento ibi rescivisti, & quid vidisti? Respondit mihi peramænè: Quod intellexi, defendi, & credidi, id hìc vidi & cognovi; atque hoc dicto à me discessit, relinquens me in quodam raptu meæ animæ. Post biduum oblatâ mihi quâdam occasione loquendi de materia hujus Sanctæ Conceptionis, cum aliqua persona, dum hac de re cogitarem, alloquutus est me iterum, & cum magno ardore, bis terve eadem verba repetens, mihi dixit: Noli esse timida, noli esse timida, neque pudibunda in loquendo de hoc argumento, nec intermittere promovere, pro viribus, hanc Sanctam opinionem, quam tenes.

XXI. Ibidem §. 2. Per idem tempus, quidam Religiosus Sancti Dominici differens de hac materia, aperuetat causam, ob quam non crederet his novis revelationibus, dicendo: Quare, cum *DEUS* possit inspirare Pontifici hanc veritatem Conceptionis, id non faceret? & quomodo manifestaret res tam admirandas uni fæminæ? essequæ rem valde difficilem, cogitare, quod ista fæmina possit integram Religionem perducere in suam opinionem. Devenit hæc res in notitiam *MARINÆ*, cùmque ea ipsa eam perpenderet, agens cum Domino dicta illi fuerunt ab eo ista verba: Nunquid ego fortè opus ha-

habeo magnis instrumentis, ut loquantur admirandis & stupendis operibus id, quod ego volo facere? Nunquid pro subiectione mihi mundo, & fundanda mea Ecclesia, elegi magnos & eximios sapientes? Non profectò, sed pauperes & rudes piscatorculos, qui exercebant suis relictis retibus hanc artem? Et nòne cùm loqui possem per me ipsum, & per Angelum, vel aliò modo, quo voluissem, loqui, volui per asellum Prophetæ Balaam, & sæpe loquor per innocentes infantes, ac per simplices & idiotas: neque cupio aut volo loqui cum ijs, qui suo intellectu & ingenio naturali volunt humanæ similem reddere Scientiam meam Divinam, volúntque indagare veritatem meorum judiciorum, & illa penetrare atque scrutari, cur non fiat hoc, & cur fiat illud; quos oportet animadvertere, nè se intromittant in explorandam veritatem meorum sapientissimorum judiciorum? Estne fortasse mihi quidpiam novi, loqui cum humilibus & parvulis, ac bene dispositis; nec non facere magna opera per debilia instrumenta? Antiquum est id, ac ordinarium, atque dignissimum meâ Majestate ac Sapientiâ, & facio, quod volo, pro meo libitu, non indigens ullâ re, vel quoquam homine. Unde discitur ac discendum est, quid sit infinitudo meorum judiciorum, ac tenuitas & exiguitas humanæ scientiæ.

XXII. §. 3. Vidi quodam tempore in meo cubiculo Sanctum Dominicum & Sanctum Ignatium. Ac Sanctus Dominicus intuitus me dixit mihi: Nos Soror venimus ità jubente & facultatem concedente DEO, ut tibi referamus gratias pro eo, quod fecisti & scripsisti de hoc argumento concernente Purissimam Conceptionem Beatissimæ Virginis, dicamúsque tibi, quam id bene factum sit, quámq; fuerit gratum DEO, & Sanctissimæ ejus Matri. Habe solatium in Domino, qui te propterea remunerabitur. Hoc audito, quodammodo obstupui, & fui mihi crepta, atque confugi ad DEUM, quia propter

meos timores omnia mihi videbantur nova; & paulò pòst redij ac petij mihi ignosci à Sancto, qui mihi dixit: nè te idcirco affligas, Soror. Tum dixi: Benedicte Sancte, ego sum miserabilis peccatrix, & obnoxia cuidam defectui, quem existimo esse superbiam, estque iste, quòd mihi aliquando veniat in mentem, quasi eminus: si Papa definiret contrariam nostræ opinionis, & ijs quæ scripta sunt de dicta materia, quid de me fieret? & quales essent afflictiones meæ Animæ, dum arbitrarer, me erravisse? quia veritas & quod oportet credere, est illud, quod definiverit Papa. Noli affigi Soror, dixit Sanctus nec admitte istam cogitationem, neque illam cura. Permite, id DEO nec puta esse superbiam, cum non sit; sed effectus nimiorum tuæ Animæ timorum. Hinc mea Anima percepit solatium, & fuit recreata. Deinde mihi dixit: Dices meis dilectis filiis (& nominavit mihi duos) me ipsis agere gratias, pro charitate, quam tibi exhibent, quòdque crediderint ijs, quæ scripta sunt; & à Domino Majestatis, atque à Sanctissima ejus Matre, favore & gratiâ cumulandos omnes bene affectos Purissimæ Conceptioni Dominæ Nostræ, ac Matris DEI. Hoc dicto rogavit cum humili reverentia Sanctum Ignatium, ut me alloqueretur, diceretque mihi etiam, ac annuntiaret, cur venisset nomine DEI, ut sic integrè adimpleretur id, quod ipsis erat injunctum & ego majorem acquirerem notitiam illius veritatis, magisque recrearer, & plus caperem solatij.

XXIII. §. 4. Tum Sanctus Ignatius, conjectis in me oculis, mihi dixit: Soror & Filia nostra dilectissima: scias, velim, persvadeasque tibi indubitanter, Domino DEO nostro Majestatis, ejusque Sanctissimæ Matri, plurimum placuisse omnia ea, quæ fecisti & scripsisti concernentia materiam, de qua est loquutus Beatus Sanctus Dominicus, Purissimæ Conceptionis Dominæ nostræ. Gaude & solatium habe in DEO. Dices etiam Fratri Nostro, & Filio dilectissimo, magnopere
Do-

Domino DEO ac Sanctissimæ ejus Matri, factum illius placuisse, & quod te hac in re juverit, idque à Divina ipsius Majestate illi compensandum maximo præmio, ac fore, ut ei gratificetur. Mihi quoque idem summè placere, agereque me, ipsi gratias, & fecisse illum mihi in eo rem gratissimam, facturumque semper acceptissimum, dum tibi succurrerit in omnibus, sollicitusque fuerit de te, ac de spectantibus ad Animam tuam, & solatium tuum, tanquam de re propria. Hoc illi ex me dices, absque tergiversatione.

Deinde donârunt hi duo Sancti ei duas rosas albam & rubram, quas fervavit ei Sanctus ejus Angelus Custos, qui eas postea ei roganti sic explicuit. Rosa alba quam mihi pro te obtulit Sanctus Dominicus, repræsentabat & significabat veritatem mysterij, quale est in se ipso Purissimæ Conceptionis Dominae Nostræ; rubra verò quam mihi etiam pro te obtulit Sanctus Ignatius, repræsentat ac significat, verè ac fideliter omnia de hoc argumento à te esse scripta.

XXIV. §. 5. Pater Magister Frater Laurentius Gutierrez Ordinis Prædicatorum insignis Ecclesiastes ac Defensor Immaculatae Conceptionis Beatissimæ Virginis, qui cum esset Rector Collegij Sancti Gregorij Vallisoleti sæpe egerat cum Venerabili MARINA, in vigilia Conceptionis Toleri Anno 1623. obiit. Dein 16. Decembris, ait Venerabilis MARINA vidi Angelos multos intrantes meum cubiculum cum palmis. Post ipsos sunt ingressi quidam Sancti ex Ordine Sancti Dominici, & Sanctissima Virgo Domina nostra, ac Sanctus Thomas de Aquino, deducentes in medio Animam Patris Magistri Fratris Laurentij, gestantis palmam in manibus, & redimiti pretiosa corona, qui erat valde hilaris, contentus, resplendens, quòd jam in Cælo frueretur DEO. Sanctissima Virgo incepit loqui, & salutavit me ac dixit: Soror, adduco tibi hic virum generosum, qui est concionatus de mea Purissima
ma

ma Conceptione, eandemque publicè docuit, ac propterea illum fovi, & juvi, usque dum illum perducerem ad statum Glorix, quâ, ut vides, fruitur; & Dominus meus illi contulit talia auxilia, & subsidia in ipsius morbo, atque ipse, tam bene est ijs usus, me adjuvante, ut potiatur jam bonis æternis, datâque sit ipsi palma & corona victoriæ. Deinde Sanctus Thomas idem dixit: Iste est vir generosus, qui tuitus est honorem meæ Dominæ, & ipsius Purissimam Conceptionem. Ad hæc omnia, Sanctus Vir siluit, & cum ingenti gaudio ac lætitia me salutavit, dixitque: DEUS tibi rependat, Famula DEI, beneficium, quod mihi præstitisti, quia propter tuas preces, ac gemitus, quos DEUS exaudivit, eidem placuit, ut multi Religiosi meæ Sacræ Religionis, & ego habuerim, ipsique habeant jam hoc Sanctum propositum, profitendi istam veritatem, Purissimæ Conceptionis Sanctissimæ Virginis Dominæ Nostræ, immunis à peccato originali; & quia ego sum de illa concionatus, data mihi est hæc palma & corona. Valedixitque mihi dicendo: Volo tecum dividere istam palmam. Et decerpens ex illa unum ramusculum, dedit mihi ipsum, admovensque manum coronæ, sustulit ex ea gemmam splendidam, quam mihi tradidit, atque tam illum, quàm hanc intromisit in me, ac addidit: Referes hanc visionem meis amicis ex meo ordine, quibus tibi videbitur; nominavitque aliquos speciatim.

XXV. Lib. 4. c. 32. §. 2. Die 19. Decembris vidi Sanctissimam Virginem à tota Sanctissima TRINITATE coronari. Pater æternus eam sic alloquebatur: Filia mea dilectissima! Et imposuit illi coronam, in præmium promptæ voluntatis, quâ suum Filium statim atque illum concepit in suis visceribus, obtulit Æterno Patri, ut redimeret ac servaret genus humanum, suâ morte ac Passione. Filius autem ei dixit: Mater mea & Domina mea; imponens illi aliam coronam, propter puritatem Virginalem, quam habuit in Conceptione

Ver-

Verbi Æterni, quod Caro factum est in ejus utero. Sanctus denique Spiritus ipsam appellavit Sponsam, dando illi aliam coronam, propter ejus Purissimam Conceptionem, immunem à macula originalis peccati. Hunc in modum coronata Sanctissima Virgo ad me accessit, & impertita mihi est suam sanctam benedictionem, meque perbenevolè est amplexata, dicendo: Soror, hunc tibi amplexum do propter te, ac pro te: & subito me iterum suis ulnis strinxit; dicens: Hunc tibi amplexum præbeo pro meis servis, & amicis tuis, qui tuentur ac profitentur meam Purissimam Conceptionem, expertem peccati originalis, & hoc ipsis dic meo nomine, ita enim volo. Postridie ante Sacram Communionem, mihi Dominus dixit: Anima, venio ad te, & adfero tibi tres flores ex coronis meæ Matris. Unum florem, agebat Dominus, se mihi ferre, eò quòd meam Animam, & universa subjecerim Divinæ voluntati, cùm essem in ætate viginti mensium, postquam mihi DEUS acceleravisset usum rationis: alterum propter virginalem puritatem, quam per omnem vitam DEO adjuvante, conservaveram: tertium propterea, quòd asseruerim & crediderim Puritatem Sanctissimæ Conceptionis Dominae nostræ, liberæ à peccato originali.

XXVI. Lib. 4. c. 35. §. 2. Edocta à Beatissima Virgine quoddam breve Rosarium. Postea addebat etiam de Conceptione sic: Benedicta sit ac lauderetur Sanctissima Conceptio, Nativitas & Præsentatio in templo Sanctissimæ Dominae nostræ. Interrogavit Angelos facerentne bene, responderuntque omnes eam bene facere.

Parte 2. L. 1. c. 17. p. 77. col. 2. Conspexi in Cælo pulcherrimum & admirabilem thronum Regium, in quo sedebat gloriosissima Virgo Domina nostra circumdata à magna Angelorum multitudine, qui illam certo adorationis modo honorabant tanquam DEI Genitricem. Erat obstupescenda,

& specialissima pulchritudo hujus magnæ Reginae plenæ gloriâ & Majestate. Gerebat elegantissimum cingulum ex auro, unionibus, & gemmis confectum, symbolum Purissimæ suæ Conceptionis immunis à peccato originali.

XXVII. Lib. I. c. 39. p. 157. col. I. Quæ sequuntur de Immaculata Conceptione dictavit VEN. MARINA Patri Magistro Fratri Andreae de Ponte Ordinis Prædicatorum, cujus charactere & manu propriâ ex ore Virginis conscriptæ habentur chartæ.

Anno 1624. Dominus mihi dixit: Scias velim Anima corpus meæ Sanctissimæ Matris in visceribus Sanctæ Annæ consveto & naturali modo fuisse formatum, quo cætera corpora humana; verum celerius & longè brevior tempore: cum autem esset ultimatè dispositum ut informaretur ab anima eo ipso momento, eodémque instanti, quo Anima creata illud informavit, plenam quoque fuisse gratiâ ac donis DEI; atque à Divino Sole admirandis illustratam splendoribus, dum eam reddidit DEI-formem, ipsique contulit usum rationis, ut jam tum subito inceperit mereri. Istud est mysterium, quod vidisti.

Postea die Dominicâ vigesimâ quartâ Novembris, rursum conspexi hanc Augustissimam Dominam, quæ mihi dixit: Veni mecum Soror, & videbis mirabilia. Etsi verò me initio ob meam verecundiam ac timores excusaverim, nihil mihi tamen id profuit. Duxit me ergo ad cælestem Jerosolymam, ubi eo die celebrabatur solennissimum Festum, cui me Sanctissima Virgo voluit adesse. Audivi suavissimam Musicam Angelorum, quæ tota referebatur ad laudem magnæ istius Dominæ. Erat ingens læticia, & gaudium cælestis illius Aulæ. Videbantur mihi ex altitudine ad solum ejus cæli decidere quædam velut stellæ fulgentes, etiâque ad terram nostram cadebant cælestes rores & influentiæ. Regina Cæli fuit gloriosissima :

ma :

ma & lætissima; cecinit duos versus ex Cantico Magnificat, quorum unus erat: *Quia respexit humilitatem ancilla sua, ecce enim ex hoc beatam me dicent omnes generationes.* Gratias tum egit Patri æterno pro collatis sibi beneficijs, dum est concepta sinè originali peccato, ipsamque elegit in Matrem sui Filij. Angeli deinde cecinerunt: Gloria Patri, & Filio, & Spiritui Sancto. Peractâ solennitate me reduxit ad meum angulum. Dominus mihi dixit, diem illum esse in Cælo sollemnissimum, eò quòd eodem Archangelus Michaël vicerit Draconem, qui vehementer impediabat cultum conceptæ absque labe originali Sanctissimæ Virginis; fuerit vetò sublatum grande quodpiam piæ opinionis obstaculum.

XXVIII. Anno 1625. 7. Decembris. In vigilia Festi purissimæ Conceptionis & die gloriosissimi Doctoris Sancti Ambrosij, mihi apparuit Regina Angelorum, cum hoc sancto Doctore & dixit: Vide Anima, adduco hîc Ambrosium, qui est meus amicus. Et cùm hoc diceret, elevavit ipsius Majestas brachium, atque cum magna charitate imposuit humero Sancti. Vidi clariùs quòd à me superiùs dictum est ipsam non solum, in eo primo instanti incepisse, accelerato usu rationis, mereri; sed etiam confirmatam fuisse in gratia.

Postridie 8. ejusdem Mensis quâ celebrabatur festum ejusdem Conceptæ absque peccato originali, intellexi quomodo sibi DEUS complaceret in præcelsa illa Domina, quanto ipsam prosequeretur amore, quatumque eidem gratularetur gratias ipsius & gloriam, & quòd esset concepta immunis à peccato originali, quòdque Divinus ille panis (qui tunc in Sanctissimo Sacramento apparebat.) formatus, & Sacro-Sanctum illud mysterium peractum fuisset in purissimis ejus visceribus. Concluserunt Dominus omnes ipsius laudes ijs verbis. Tota pulchra es amica mea & macula non est in te.

XXIX. Lib. I. c. 34. pag. 161. Anno 1626. 8. Decembris,

Bbbb 2

bris, quâ festum agitur purissimæ Conceptionis. Duxit me, Sanctissima Virgo splendidissimè ornata ad Cælum. Angeli inceperunt cælesti melodiâ celebrare festum Purissimæ Conceptionis hujus Dominæ. Accinebant laudes Domino DEO gratias ipsi agendo propter beneficium Mundo præstitum inchoatâ hodie nostrâ Redemptione.

Eodem die priusquam me SS. Virgo, sicut dixi, abduceret DEUS mihi denuò manifestavit mysterium Purissimæ ipsius Conceptionis, imûnis à macula peccati originalis, cum cæteris, quæ alibi scripsi, atque addidit primam gratiam eidem collatam in illo instanti, quo Anima fuit unita corpori, fuisse majorem, quam habuerint Angeli vel Sancti & hanc deinceps semper crevisse.

Parte 2. Lib. 2. c. 12. p. 261. col. 1. Anno 1628. 8. Septembris. Vidi in Cælo Beatissimam TRINITATEM, & quodammodo impressum in Divina ipsius mente æternum illud decretum de creanda in tempore Virgine MARIA, ut esset Mater Redemptoris generis humani. Vidi præterea, quòd postquam illam creavit exemptam à peccato originali, cujus reliqui omnes Filij Adam sumus rei, eadem Beatissima TRINITAS præsetulerit indicia lætitiæ, visâ pulchritudine & perfectione illius operis, quo absolutius eousque non prodiderat ex Divinis ipsius manibus.

CAPUT IV.

De Nativitate Beatissimæ Virginis DElparæ.

I.

PArte 1. l. 2. c. 1. Die antecedente vigiliam festi Nativitatis Beatissimæ Virginis dum vacarem recollectioni, mihi ostendit Dominus cimelia aurea & lapides pretiosos elegant-

gantiores, quàm dici possit vel cogitari. In his erat pretiosissimus, quem fixius fui intuita, torques aureus elegantissimus, habens lapidem pretiosissimum in medio, qui magnitudine adæquabat parvulum ovum, ad cuius similitudinem erat efformatus, & referebat colore purissimum rubinum, atque vibrabat tales radios, & splendores lucis, ut videretur multò magis coruscare quavis lucidissimâ stellâ. Quia verò mihi Dominus non manifestabat quidnam id rei esset, stupebam contemplan- do illum, & cogitando quid significaret. Aliquantò post mihi dixit Divina Majestas: Ista cimelia spectant ad desponsatam ac recenter genitam; & significant præclarissimas sublimissimâsque virtutes, quibus exornavi, ac locupletavi Animam & purissimum cor meæ Matris eo die, quo fuit nata. Hoc audito fui repleta solatio, & mirata sum expendens excellentissimas virtutes hujus Dominæ, quæ repræsentabantur per illa, pretiosa cimelia; præsertim Charitatem & amorem DEI, ac proximi; quo cor ipsius flagrabat, & quem significabat pretiosissimus rubinus in medio aurei torquis collocatus. Deinde §. I. Ipsâ nocte Nativitatis vidi oculis animæ supereminentem Virginem instar puellulæ modo genitæ, formosiores & splendidiores quàm cogitari possit, cum corona aurea, quam gestabat in capite, radiantem ingenti splendore & cimelijs ac torque ornatam, quæ præcedente nocte videram, & Sacrum ipsius pectus exornabat cimelium, seu pretiosissimus lapis, qui erat in medio torquis, cuius mihi aspectus majora attulit dona & gratias, quàm fuerint eatenus meæ Animæ à DEO collatæ.

II. Alio festo Nascentis ejusdem Virginis, vidi illam quasi infantulam modo genitam in brachijs Sanctæ Annæ, adstante Sancto Joachimo. Flebat pupula amarè, ut tota videretur diffuere in lacrymas, neque tamen illi Mater præberet ubera, conticescebat. Accepit ipsam Sanctus Joachimus &

blandiebatur illi, quæ nihilominus eodem modo plorabat, quoadusque conquiesceret obdormiscens, ac tum eam reddidit Sanctæ Annæ. Ego mirabar, videns ipsam die tantæ lætitiæ, tantopere plorantem, videbanturque etiam Sancti ejus Parentes ignorare, cur fleret. Aderant nonnulli Angeli ex ijs, qui sunt in Cælo sublimiores, & unus illorum mihi manifestavit causam istius ploratus, significando mihi hanc pupulam jam inde ab ipsa sua Nativitate fuisse præditam usu rationis, ac magnâ sapientiâ, & singulariter à DEO illuminatam, ab eodemque tunc illi clarissimè revelatum Verbum Divinum incarnandum (non tamen dictum assumendam ab eo carnem in ipsa,) & quàm multa passurū esset pro hominibus, eorundemque ingratitudinem, nec non multa peccata, quibus esset offendendus tantus Dominus atque istam fuisse causam illius ploratus.

III. Die Nascentis Sanctissimæ Virginis vidi ejusdem Majestatem recenter natam formosissimam, & pulcherrimam, circumdatam innumeris funiculis, contextis ex purissimo auro, ac mirum in modum refulgentibus, qui extendebantur per totum mundum, unaque stipatam plurimis sanctis Angelis. Proximè ipsius Majestatem erat infinitus numerus lapidum pretiosorum, aureorum elegantissimorum cimeliorum, ac gemmarum, ingentesque splendores luminis, & claritatis, multi soles lucidissimi, nec non alij copiosi thesauri qui omnes significabant maximas recenter natæ pupulæ virtutes. Post hanc Dominam stabant tres Divinæ Personæ, ac tenebant in suis manibus titulum, qui continebat illa verba: Tota pulchra es, amica mea, & macula non est in te; quibus indicabatur purissima ipsius Conceptio. Interea inceperunt instar vehementis grandinis in terram decidere Divini illi thesauri, in magna abundantia & duodecim Angeli DEI adfuerunt perquam diligentes & celeres, ut illos colligerent, ac deferrent ad Thesaurum Ecclesiæ: erant

erant autem superabundantia merita, quæ illa Sanctissima Domina in ea ætate habebat, & videbantur mihi tunc longè majora, quàm sint simul sumpta cæterorum Sanctorum.

CAPUT V.

De Præsentatione, Desponsatione ac Vita privata Beatissimæ Virginis.

I.

PArte 1. L. 2. c. 3. §. 2. Die Præsentatæ DEI paræ vidi in Spiritu Sanctissimam Virginem Dominam nostram quasi puellam trimulam comitantibus ipsam multis Angelis & Sancto Archangelo Gabriele. Erat formosissima, rapiébátque me ad sui contemplationem. Oculi ipsius erant cæsi, & capillitium quasi aureum; habebat calceamenta pellucida, tectis integrè pedibus. Ante diem, qui DEI paræ partum exspectanti est sacer, vidi rursus eandem Sanctissimam Virginem quæ mihi peramanter dixit: Noveris Amica mea, quòd à die meæ Præsentationis in templo usq; ad diem Incarnationis mei Sanctissimi Filij, me semper exercuerim continuâ oratione ac meditatione Divinorum mysteriorum, ac magnalium DEI, amando ipsum omnibus meis viribus, contemplandóque illum assiduè, & nec ad momentum ab eo recedendo. Continuè quoque cor meum, & anima mea ardentissimè desiderabat adventum, Filij DEI in mundum, ut esset Redemptor, ac Reparator generis humani. Et cum recenseret istas suas virtutes, atque prærogativas, manifestavit mihi simul Divinissimam devotionem, quâ illas exercebat. Habui magnum solatium, vehementerque obstupui, cognoscendo aliquantum, ac intelligendo sublimitatem cælestis & altissimæ contemplationis, cui dedita fuerat ista Celsissima Domina.

II.

II. Parte 2. Lib. 1. c. 39. pag. 162. col. 1. Biduo ante festum Præsentationis duxit me Sanctissima Virgo Domina nostra ad templum ubi à suis Sanctissimis Parentibus fuit DEO præsentata. Ibi vidi quindecim gradus, quos mea Domina conscenderat, & spectavi ipsam gradatim ascendentem. In primo gradu tales elicit actus resignationis in Divinam voluntatem, & amoris DEI, atque oblationis sui ipsius, ut plurimum ipsi promeruerit. In secundo, pariterque cæteris gradibus actus, & merita mirum in modum creverunt, & quando pervenit ad supremum, videbatur mihi eminentissimus esse excessus gratiarum.

III. Lib. 1. c. 39. pag. 162. Magna hæc Domina ostendit mihi mysterium suæ Virgineæ Desponsationis cum Sancto Josepho. Ibi illam vidi plenam quasi gratijs, ac donis cælestibus, & majoribus auctam meritis, respondentibus singulari obedientiæ, quæ se Divinæ subiecit dispositioni incundo conjugium. Actus hic obedientiæ fuit in purissima Virgine, specialis meriti, DEOq; acceptissimus.

Parte 1. Lib. 4. c. 9. §. 1. Cum vacarem orationi in Festo Sancti Josephi, vidi coram me CHRISTUM Dominum, ejusdemque lateri adstantem gloriosum Sanctum Josephum, aperto capite cum magna humilitate, utpote coram Majestate tanti Domini. Habebat vestitum honestum & perelegantem, vultus ipsius erat mirè modestus, & gravis, in quo præferebat magnam mansuetudinem, & Sanctitatem: apparebat esse maturæ ætatis, quasi quadragenarius, habebatque baculum aureum. Aspexit illum CHRISTUS Dominus vultu amænissimo, dixitque mihi cum ingenti gustu: Ecce iste est meus Pater, & is, quem eo loco habebam in terra; quid tibi de illo videretur. Ego ipsum intuebar & recreabar, mirabarque me videre Sanctitatem, quam demonstrabat, & multò magis, quòd viderem æstimationem, & venerationē, ac amorem, quo, pro nostro Exem-

xemplo CHRISTUS Dominus se prosequi ostendebat istum gloriosum Sanctum, eòquòd ipsum educavisset ei que servivisset Infanti. Dum ipsum ità contemplerer, videreturque mihi etiam eximius esse illius honor, quòd habuerit Sponsam Sanctissimam Virginem, & Matrem JESU CHRISTI DEI & Homini veri; dixi ipsi: Verè gloriose Sancte, fuit tibi præstita major gratia & favor in eo, quàm fuerit præstitus ulli unquam virorum in terra; siquidem tibi data est in Sponsam mulier optima & Sanctissima omnium quas habuit, aut habiturus est unquam mundus, quamvis universarum simul Sanctitas in hunc censum veniret. Poteste æstimare felicem ac beatum. His auditis, quæ dixeram, gloriosus Sanctus composuit suas manus fixisque humi genibus, dixit cum magna humilitate, & æstimatione hujus gratiæ, quam illi DEUS contulit: Ità omnino est, & ità esse agnosco. Deinde se erexit, constititque ad unum latus CHRISTI Domini, qui etiam stabat. -

Libro 4. c. 9. §. 3. Anno 1618. Festo Sancti Josephi me, visitavit Sanctissima Virgo cum suo Sancto Sponso, dixitque mihi: Vidén hîc Virum Sanctissimum, & felicissimum omnium, qui sunt in Cælo; eo quòd ipsi DEUS confiderit suum Filium, ut ipsum educaret, & me ejus Matrem.

CAPUT VI.

De Annunciatione Beatissimæ MARIÆ Virginis.

I.

PArte 1. Lib. 2. c. 3. §. 1. In pervigilio quodam Festi Salutatæ DEI paræ, quia ex conspectu Sanctissimæ Virginis fui turbata, dixit mihi præsens ibi Sanctus Archangelus

Cccc

gelus

gelus Gabriel: timores, & tergiversationes tuæ moderatæ potius te disponunt pro obtinendis his Divinis favoribus: excellentes autem & iusto majores, tibi præbent occasionem & materiam exercendæ mortificationis. Si ergo Sancte Archangele, aiebam ego, ita est, doce me, quid sit faciendum, ut me conformem Divinæ voluntati. Tum sanctus Archangelus extendit manum, quasi attingendo, quam reverentissimè vestem Sanctissimæ Virginis, quæ summa cum gravitate, & extraordinaria modestia atque charitate mihi dixit: Ego quando hic sanctus Angelus venit ad me, nomine DEI invisendam die meæ Annunciationis, non fugi: turbata sum tamen inculpabiliter, sicut quando Princeps quæpiam Virgo, humilis ac verecunda, videt coram se derepente legatum, adferentem ipsi aliquod nuncium, naturaliter turbatur, & erubescit pro animi sui demissione; eoque amplius, si id requirat conditio nuncij, quod adfert. Ego respondi: Enimverò Domina, tua Majestas voluit bene ab Angelo edoceri de nuncio, & interrogavit illum de modo, & qua ratione futurum esset quod nunciabat. Responditque Domina nostra, hoc ideò feci, quia Angelo DEI aliquid dicente, quod repugnare videtur Divinæ legi, ac præcepto, necesse est scire quomodo sit futurum istud, deque eo instrui. Voto, quo ego me obstrinxeram, Castitatis, videbatur repugnare nuncium, quod mihi adferebat; ideoque de illo petivi edoceri, quomodo esset mandandum executioni: statim tamen, ac specialiter à DEO illustrata cognovi, Angelum ipsum esse ipsius & modum, quo peragendum erat illud mysterium, sinè mora consensi, dicendo: Ecce Ancilla Domini, fiat mihi secundum verbum tuum. Prosequuta est Sanctissima Virgo suum sermonem, explicando aliquot versus ex cantico, Magnificat, Divinâ suâ Sapientiâ, & quomodo illius Anima laudaverit, ac benedixerit DEUM propter magnam gratiam, quam illi præstiterat, dum ipsam fecit suam Matrem; quo-

quomodo etiam omnes Gentes illam deprædicent, ac benedicant, eò quòd Dominus respexerit humilitatem ancillæ suæ; & alia his similia, quibus mea Anima fuit recreata, & exultavit in Domino.

Sequenti die festo vidi, ait, Sanctissimam Virginem Dominam nostram, intentam altissimæ contemplationis, & Sanctum Archangelum, venientem nomine DEI, ad felix illi ac fortunatum adferendum nuncium, eo prorsus modo, quo ipsi die Annunciationis ejus attulerat. Audivi & vidi acsi denuò perageretur hoc mysterium, salutationem Angeli, turbationem Sanctissimæ Virginis, interrogationes, ac responsa ejusdem Dominæ, & Sancti Archangeli Gabrielis ad ultimum usque Virginis responsum. Ecce Ancilla Domini fiat mihi secundum verbum tuum: atque tunc passa fui ectasim.

II. Anno 1619. Die Annunciationis vidi Sanctissimam Dominam Matrem DEI. Intenta erat cuidam altissimæ contemplationi, & quasi sola degebat in quodam recessu. Interea vidi Sanctum Archangelum Gabrielem, qui intrans in conclave illius Dominæ, maximâ reverentiâ illam salutavit, & peregit omnia, quæ nobis refert Evangelium de hoc sublimi mysterio. Eo tempore, quo duravit colloquium Angeli & Sanctissimæ Virginis Dominæ nostræ, totum cælum, & Spiritus Beati, cum omni natura creata quodammodo admirabundi & suspensi hærebant expectando assensum illius Dominæ, tanquam id, quod omnes tantopere exoptabant, propter summa bona, quæ ex eò assensu erant proventura universis, præsertim generi humano. Statim atque ista Sacratissima Domina protulit ista verba, & præbuit suum assensum cum tanto affectu, ut acceptando maternitatem DEI, acceptaverit unâ atque ex corde amplexa fuerit omnes molestias, & angustias, ac dolores, quos Sanctissima ipsius Anima erat perpassura, annuendo, ut esset Mater DEI; eo, inquam, ipso momento quo assensit.

hæc Domina, vidi illam totā DEificatam, & collucentem, ut appareret inhabitari ipsius Animam à Verbo Æterno Incarnato. Sed in alia viſione ſimili, cū illam audirem dicentem ea verba: Ecce Ancilla Domini, &c. comparuit mihi quædam ſtella ſimilis igni, immenſi ardoris, ac ſplendoris, quæ eſt ingreſſa in iſtam Dominam, eamque ità DEificavit, ut niſi nos fides doceret, ipſam non eſſe DEUM, viſa fuiſſet eſſe DEUS. Et intellexi per hanc ſtellam repræſentari Verbum Divinum, quod tum aſſumpſit carnem ex ipsius viſceribus. Ità exhibebatur modus, quo contigit hoc Sacratiffimum myſterium.

III. Lib. 3. c. 8. §. 1. Agens cum DEO horâ ſecundâ noctis Anno 1611. vidi tres Beatos Spiritus, qui ut mihi videbatur, erant Angeli DEI, ſtantes coram me aliquantum ex parte; dixerunt mihi modo admirabili, & valde gravi: Soror venimus, ut tibi annunciemus nova nomine DEI; neque mihi tunc plus ſunt locuti, qui attendebant ad effectum, quem illud verbum, ſeu nuncium, operaturum eſſet in mea Anima, qui erat quædam turbatio; tum quòd nescirem qualia nova eſſent illa, tum quia admirabar admirabilem modum loquendi quo utebantur. Nam loquentibus tribus, loquebatur tantum unus, & loquente tantum uno, loquebantur omnes tres. Dum ij cæleſtes Spiritus me viderent ità turbatam ac admirabundam, alloquentes me denuò cū magna ſvavitate, ac benignitate, eodem arcano modo, de quo dixi & novo lumine colluſtrantes meam Animam, ad percipiendum myſterium; dixerunt mihi: Soror noſtra, nè turberis, neque affligaris; nova enim, quæ tibi annunciamus, ſunt optima. Tamen ego non omnino depoſui meam perturbationem, & dixi illis: Domini, Deus poteſt facere quidquid vult, aut ſicut vult, & ego quid habeo hac in re expediendum? reſponderunt mihi illo dicto modo arcano & novum communicando lumen meæ Animæ: ità verum eſt quod dicis, requirit tamen DEUS tuam diſpoſitionem.

Tum

Tum ego respondi : Domini si ex mea parte requiritur aut debet esse aliqua bona dispositio ad recipiendas à DEO ipsius gratias, ea quam ego habeo, est valde exigua, misera, bilis, & imperfecta, ideóque nescio quid facere possim vel dicere hac de re. Ignoro quomodo me debeam disponere. Illi verò mihi dixerunt eo modo mirabili, de quo antè dixi : nè te quidquam affligat, vel sollicitam reddat, quia dispositio, quam à te petimus, est ut solùm velis acceptare gratiam, quam tibi Dominus modo vult præstare. Auditis his verbis, fui liberata ab omni illa molestia, & sollicitudine, ac turbatione, quam habueram, subsecutâ magnâ pace & quiete, ac dixi cum affectu, quem DEUS meæ Animæ communicavit, Resignationis & propriæ Cognitionis : Ecce tua pauper creatura & ancilla mei Domini, fiat in me, in omnibus & per omnia Sanctissima tua & amabilissima voluntas. Postquam id dixissem, unus ex illis tribus Angelis recessit aliquantùm ab ijs seque, constituit quasi è regione ipsorum & fuit res mirabilis ac plena mysterio, quam mea Anima ibi vidit, atque cognovit per lumen sibi à DEO communicatum : quia dum recederet ab illis duobus, unus ille manebat cum duobus, ac duo manebant cum illo uno, & agnovi ex illuminatione divina, quòd iste recessus unius à duobus esset figura mysterij Incarnationis secundæ Personæ Sanctissimæ TRINITATIS, JESU CHRISTI Domini nostri. Deinde elevatis animæ oculis ex inspiratione DEI conspexi cælos quasi patefactos, & apertos, vidique ex altissimo ac supremo eorum descendentes pulcherrimo ordine, binos & binos instar supplicantium, innumerabiles Angelos, ac Spiritus beatos adeò ut viderentur egredi ex cælesti Jerosolyma omnes illius cives & Aulici : cùmque descendissent hoc ordine donec pervenirent ad illos sanctos Angelos, quos dixi stetisse mirabiliter, duos ex una, & unum ex altera parte, fuit instituta divina quædam

supplicatio in cujus medio à dextris procedebat Sanctissima Virgo Domina nostra sublimior alijs sanctis Angelis, quasi confidens in quodam throno, stipata comitatu multarum Virginum, & sanctarum subsequenrium, intercedentibus per intervalla plurimis Beatis Spiritibus. Postea vidi grande & elegans, augustum ac munitum Castellum, adeoque stupendum, ut nunquam potuerim intelligere, quale fuerit: quia illius Majestas, ac magnitudo excedebat captum omnis creaturæ, unde ibi fui obrecta, perdita & submersa eâ caligine: nescio an tunc evanuerint ex meis oculis illi tres admirabiles Angeli.

IV. Parte 2. L. 1. c. 40. Anno 1624. 25. Martij in Festo Annunciationis meæ Dominæ conspexi Sanctissimam Virginem in ea ætate, & ita constitutam sicut fuerat dum est salutata ab Angelo tam venustam, speciosam & gratijs plenam ac donis cælestibus, ut nullis possit verbis explicari. Audivi Sanctum Archangelum Gabrielem, qui ipsi singulari reverentiâ nomine totius Beatissimæ TRINITATIS, nuncium exponebat. Videbatur mihi tota cælestis Aula tam DEUS, quam ipsius Angeli animo quodammodo, ut loqui solemus, suspenso præstolari illud: *fiat*, ex ore hujus Sanctissimæ Virginis, pariterque universa terra & homines expectare suum remedium, ut assentiretur. Simul ac ejus Majestas pronunciavit: Ecce ancilla Domini fiat mihi &c. vidi in Cælo ingentes plausus & jubilos: audivi cælestem musicam, & laudes DEI. Atque eodem momento Omnipotens DEUS illam purissimam Virginem replevit multis gratijs, & inæstimabilibus bonis transformando ipsam in se adeo, ut videretur esse per participationem quodammodo DEUS, & vera ejusdem DEI Mater, tametsi solum Verbum æternum in Virgineis illis visceribus assumeret carnem. Subito vidi Angelos se se prosternentes, ipsamque tanquam Dominam adorantes. Idem fecit Sanctus Archangelus

gelus Gabriel, & provolutus in genua gratias illi egit pro beneficio, quod mundo præstiterat, acceptando nuncium eique suum præbendo consensum.

Dum spectarem tam grande mysterium, Sacratissima hæc Domina fuit ducta ad cælestem Jerosolymam comitantibus ipsam omnibus Angelis (qui me quoque cum ea duxerunt) & præsentata Beatissimæ TRINITATI, ubi summo cum gaudio ac honore exceptam Pater æternus compellavit dicendo: **Filia mea; Filius: Mater & Domina mea; atque Spiritus Sanctus: Sponsa mea.** Prostraverunt se denuò omnes illi Angelici Spiritus in eo cælo, & specie quadam adorationis ipsam sunt professi suam esse Dominam.

Aliâ vice vidi hanc Excelsissimam Virginem coram Patre æterno, qui illi dixit: **Filia & Domina, fiat quod petis, fiat, per me licet.** Observavi specialiter quod appellaretur Domina, cum non loqueretur Filius, sed Pater æternus. Hærebam in meo dubio, & Divina Majestas mihi dixit: Scias velim, Anima, postquam Filius meus humanam assumpsit carnem, inter me & hominem, præsertim verò Virginem, intercedere, quandam parentelam ac proinde benevolentiae causâ, atque ut doceam, qualis ipsi debeatur veneratio, illam voco Dominam.

V. Lib. I. c. 42. p. 173. Anno 1624. 26. Novem. Vesperiferiâ tertiâ, præcedentibus plurimis Angelis ad meum cubiculum; post eos prodivit Trinus Dominus DEUS noster; specialiter verò se mihi distinctius repræsentavit Sacratissima persona Patris æterni. Veniebat humanam præferens speciem in eo apparente, corpore, quòd aliàs dico, esse absque comparisone longè subtilius phantasticis corporibus, quæ solent assumere Angeli. Hic Dominus est ingressus Oratorium, & accedens ad altare, collocavit in parte superiore id quod ferebat in manibus; erat verò patena instar earum quibus utitur Ec-

cle-

clesia, sed pretiosissima, & super illam apparebat minimus puerulus, non excedens longitudinem digiti, qui licet non videretur esse maior, indicibilis tamen ex erat ejusdē pulchritudo, & immensa venustas. Vidi deinde egredientes ex eadem inaurata aula, plurimos alios Angelos, qui pariter laudes DEI concinebant, & postremò prodixit Sanctissima Virgo, magnā spectabilis Majestate & speciosissima. Introivit in Orationarium, & prostravit se coram Patre æterno procumbens in genua, seque profundè inclinavit, ut quasi fronte contingeret terram; erexit postea caput provoluta in genua. Tum Pater æternus se convertit ad hanc Inclytam Virginem, cum Patena & Puerulo in ea posito (sicut se Sacerdōs vertere consuevit ad porrigendam Sacram Eucharistiam,) dixitque illi: Domina, vides hic meum æternum Filium, quem tibi trado, ut in tuis visceribus assumat carnem humanam; suscipe ipsum ac educa atque fove & inservi eidem tanquam Filio meo, ut suo tempore redimat mundum. Ecce confido tibi ipsum, ac trado: novi enim te, huic muneri satisfacturam, prout debes. Virgo se inclinavit profundè, & postquam præbuit assensum immensus ille Infantulus introivit per Virginis pectus, seque inclusit in purissimo ipsius utero. Egit hæc magna Domina tenerrimas Patri æterno gratias pro collato sibi beneficio, & Dominus est illam complexatus, vocando eam Filiam, rursumque admonendo, ut omnia pro sua obligatione, quàm perfectissimè exequeretur.

CAPUT VII.

De Visitatione Elisabeth & Sancti Joannis Baptistæ.

PArceat, humanissimè rogatus benevolens Lector, quòd residua non possint omnia æquè expansè hîc describi brevitatîs causâ. Ex hæc-
nus tamen dictis, quæ speciminis causâ præmissa sint, satis appa-
ret, reliquos omnes, qui restant, articulos Fidei, ut & Doctrinas Chri-
stianas, simili modo ad abundantiam eleganter illustrari: quæ tamen omnia reliqua
sic de verbo ad verbum si adducerem, liber in molem nimiam excre-
sceret. Solâ igitur citatione contentus, Lectorem benevolum ad ipsa loca cita-
ta pro libitu legenda remittere cogor. Unde & hoc uno capite compre-
hendam Myſteria omnia Christi D. usque ad Passionem.

Visitatio Elisabeth.

Parte 1. L. 2. c. 5. §. 1. Anno 1611. Die *Visitationis* vidit Ven: Mari-
na SS. DEIPARAM peregrinantem ad S. Elisabeth, & audivit DEUM laudan-
tem ejus *Immaculatam Conceptionem*.

§. 2. Vidit SS. Virginem & S. Elisabeth inter se colloquentes.

Nativitas Christi Domini.

P. 1. L. 2. c. 6. §. 1. Vidit in stabulo Betlehemitico circumstantias
Nativitatîs Christi, quem invita ad sua brachia suscepit.

§. 2. Vidit Angelorum gaudium de Christo nato, & quòd repositus
fuerit in præsepio.

§. 3. Vidit in Persona Christi Intellectum Viri perfecti, & simul in-
fantiles actiones.

Ibidem Anno 1618. Audivit Christum dicentem se paratum fuisse
pro illa sola incarnari.

§. 4. Anno 1622. Ven: Marina in medio sui cubiculi Christum D. in-
vita accipit ad sua brachia, eum Patri æterno offert tanquam Mater.

L. 2. c. 7. §. 1. Venerabilis Marina vidit in Cælo solennitatem in ho-
norem SS. Humanitatîs Christi D. & aureos nummos cadentes, qui erant
figura incarnati Verbi.

§. 5. Ven: Marinaæ domestici Angeli eleganter ornati appellârunt se
Principes Ministros, & *Meninos*, seu Ephebos parvuli JESU.

Et c. 9. §. 6. Adfuit Nativitatî Christi Ven: Marina, & emendicavit
à S. Josepho particulam panis, quem etiâ distribuit suis præsentibus amicis.

P. 2. L. 1. c. 42. pag. 175. col. 1. Anno 1626. Vener: Marina comitata Beatissimam Virginem in Betlehem proficiscentem.

Pag. 178. col. 2. Anno 1628. jussu SS. Trinitatis omnes Angeli adorârunt parvulum JESUM unâ cum aliquibus hominibus viventibus.

P. 1. L. 2. c. 4. §. 3. Et c. 6. §. 5. & c. 7. §. 2. Describitur Spiritualis Cihristi D. in Anima per Gratiâ Nativitas.

Circumcisio & Epiphania Domini.

P. 1. L. 2. c. 8. Ven: Marina adfuit dispositionibus pro Circumcisione, non tamen vidit ipsam Circumcisionem.

§. 2. Vidit Christum Infantem à Deo Patre ditatum cimelijs, in præmium Circumcisionis.

P. 2. L. 1. c. 43. pag. 179. Anno 1625. de Resignatione pueri JESU & Beatissimæ Matris in Voluntatem Patris æterni in Circumcisione.

P. 1. L. 2. c. 9. §. 6. Anno 1624. Solennitas in Cœlo, & Adoratio Infantis JESU cum muneribus, cui etiam Ven: Marina obtulit quinq; nummos aureos.

Ibidem §. 1. Adventus SS. Trium Regum.

§. 2. Colloquium Ven: Marinæ cum SS. tribus Regibus de eorum profectioe, Stella, itinere, muneribus, & alijs circumstantijs; & quomodo cum illis profecta est in regiones eorum.

§. 4. Stella SS. Trium Regum.

§. 5. Ven: Marina proficiscitur cum SS. Regibus per Jerosolymam in Bethleem & offert Christo Domino Cor.

P. 2. L. 1. c. 43. pag. 180. Anno 1625. quomodo SS. Virgo exceperit SS. tres Reges.

Pag. 181. Anno 1628. Descriptio Tugurij Bethleemitici, dum illuc venirent Sancti tres Reges; & eorum Adoratio ac munera.

Ibidem subjicitur Adversio P. Andreæ Pinti Ramirez pro concordandis, quæ videntur inter se discordare.

Parte 1. L. 2. c. 7. §. 2. Sancti Innocentes omnes fuerunt Martyres.

Parte, 2. L. 1. c. 42. pag. 177. col. 1. Anno 1626. vidit Ven: Marina Gloriam Sanctorum Innocentium.

Purificatio Beatissimæ Virginis.

P. 1. L. 2. c. 10. §. 1. Anno 1547. Beatissima Virgo se disposuit pro itinere ad templum duabus fœminis comitata; ubi expectabatur à Simeone, & Anna Prophetissa.

§. 3.

§. 3. Anno 1623. Processio Angelorum cum albis cereis accensis, deducunt Beatissimam Virginem ad Templum.

L. 3. c. 18. §. 2. Die Purificationis est Beatissimæ Virgini revelata Passio Christi D. per Simeonem, quæ in eo momento elicit actum ferventissimæ Resignationis.

P. 2. L. 1. c. 39. pag. 162. Sanctissima Virgo illo actu Resignationis, quo suum Filium Patri æterno ad Mortem die Purificationis obrulit, plus merita est, quàm omnibus prioribus actibus.

L. 1. c. 43. pag. 183. Anno 1629. Eadem Resignatio, magnificè in Cælo repræsentatur.

Vita Christi D. usque ad Passionem.

P. 1. L. 2. c. 10. §. 4. Anno 1597. Beatissima Virgo redit ex Bethleem domum vecta asino in Nazareth.

C. 11. §. 2. Veni Marina vidit Christum infantulum SS. Matri colludentem, & vesticulas ejus examinat, & deprehendit jam tunc signa clavorum in pedibus & manibus.

§. 4. Anno 1616. Puerulus JESUS dormiens considerat peccata hominum.

L. 4. c. 9. S. Joseph gestat reverentissimè Dominum JESUM circiter bimulum.

L. 2. c. 12. §. 1. Puer Jesus duodecim annorum jam tunc habebat omnem sapientiam, conversatus adhuc Infans cum SS. sua Matre. Legis Doctoribus annuntiavit Messiam jam venisse.

P. 2. L. 1. c. 40. pag. 162. col. 2. amisso puero JESU Beatissima Virgo elicit excellentissimos actus Resignationis.

P. 1. L. 2. c. 11. §. 1. Describuntur Facies, & oculi Christi D. ut & oculi ac capilli, collum, & guttur Beatissimæ Virginis, Vestis, Statura. L. 1. c. 17. §. 1. & 3. Et L. 2. c. 10. §. 1.

P. 1. L. 4. c. 9. §. 4. pag. 370. Col. 1. S. Joseph sui opificij labore sustentabat Christum D. & Beatissimam Virginem, in paupertate non vili, nec miserabili, sed honorata: & Beatissima Virgo etiam juvabat.

L. 2. c. 12. §. 2. pag. 186. Describit Christus D. suam Vitam, usque ad Annum ætatis trigessimum.

CAPUT VIII.

De Passione Domini.

P. 1. L. 2. c. 14. §. 1. pag. 189. col. 1. Assignantur causæ Passionis ab ipso Christo D.

§. 2. Tristitia Christi D. non fuit melancholica, sed longè diversa.

L. 1. c. 19. §. 4. Christus D. majorem dolorem passus in dextro pede, & manu sinistra.

L. 2. c. 27. §. 1. Afflictio Christi D. interna, diebus Passioni proximis.

L. 3. c. 17. §. 1. Anno 1622. Continua Crux Christi Domini.

P. 1. L. 2. c. 14. pag. 190. col. 2. §. 3. Christus D. offert Deo Patri pro Christianis sudorem Sangvineum, cui Pater æternus respondet.

P. 2. L. 1. c. 44. pag. 187. Repræsentatur in Cælo, quomodo Christus D. in horto Gethsemani non suam, sed Patris Voluntatem prætulit.

P. 1. L. 2. c. 15. pag. 191. col. 1. Quæ contigerunt ante Flagellationem noluit Christus D. à Ven: Marina videri.

§. 1. Anno 1615. Tormentum Flagellationis repræsentatur Ven: Marinæ, cujus de hoc Tormento judicium Christus D. requirit.

L. 5. c. 2. §. 7. Anno 1619. Vene: Marina sensit Flagellationis tormentum.

P. 1. L. 2. c. 15. §. 2. Milites & famuli implexam coronam spinæam prius probârunt in capite cujuspiam pueri.

P. 2. L. 1. c. 44. pag. 184. Anno 1626. Ven: Marina spectavit inter tumultum Carnificum, actum spinæ Coronationis.

P. 1. L. 2. c. 15. pag. 193. §. 3. Interfuit Ven: Marina horribili Spectaculo Bajulationis Crucis, & comitata est Christum D.

C. 20. §. 1. pag. 219. Ven: Marinæ ostendunt Angeli Stationes Vix Bajulationis Crucis.

P. 1. L. 1. c. 29. §. 1. Anno 1600. Christus D. dixit se majorem dolorem passum in manu sinistra quàm in dextra.

L. 2. c. 15. §. 4. Actus Crucifixionis Christi D. nudi.

C. 16. §. 1. Christi D. Crucifixi situs.

§. 5. Elevatio Crucis.

§. 2. Mare dolorum Christi D. Crucifixi.

P. 2. L. 1. c. 39. pag. 162. Ingens meritū Beatissimæ Virginis sub Cruce.

L. 2.

L. 2. c. 19. pag. 288. Anno 1625. Latro malus Crucifixus cum Christo Domino.

P. 2. L. 1. c. 15. pag. 66. Actus Sepulturæ Christi D.

P. 1. L. 2. c. 15. §. 5. Beatissima Virgo & Ven: Marina ex mutuo colloquio Solatium capiunt. Dolor SS. Virginis in vultu ejus resplendebat elegantissimè, quia omnes ejus Virtutes erant in gradu altissimo.

P. 2. L. 1. c. 44. pag. 185. col. 1. Anno 1628. pridie Palmarum ostensa fuere Ven. Marinæ mysteria Passionis, oratio in Horto, Comprehensio, Flagellatio, Crucifixio, septem verba, Transfixio lateris, Desolatio Beatissimæ Virginis, sepultura. Denique & Indignatio Dei contra peccatum Adami.

C. 25. Anno 1626. Ven: P. Ludovicus de Ponte inter Sanctos Benedictum, Augustinum, Ignatium, Bernardum, Sermonem habuit ad Ven: Marinam de Incarnatione, & Vita Christi D.

L. 1. c. 26. pag. 111. Anno 1630. Habet ad Ven: Marinam Sermo. nem S. Benedictus de Amore Christi D. erga nos in Vita, & Passione sua.

L. 2. c. 21. pag. 301. Anno 1626. Dicit Christus D. Ven. Marinæ se suis compati, quia omnium suorum dolores in se expertus.

L. 1. c. 43. pag. 184. Anno 1629. Ven: Marina videt in Cælo vastissimum Flumen meritorum, & sanguinis Christi D. quo omnes homines aspergebantur.

P. 1. L. 2. c. 16. §. 2. Christus D. ostendit Ven: Marinæ sua vulnera, quæ dolet se non habere sufficientem dolorem de ejus Passione.

§. 3. Christus D. manifestat Ven. Marinæ suos labores, itinera, sudores, lassitudines, vigilias, orationes, & jejunia.

P. 1. L. 3. c. 18. §. 5. Ven: Marina videt Crucem Christi in magna Majestate.

C. 20. §. 2. Anno 1621. Christus D. misit Ven. Marinæ suos clavos ferreos, materiales, per quos suum sanguinem cum ejus sanguine commiscuit.

CAPUT IX.

Mysteria gloriosa Vitæ Christi D.

P. 1. L. 2. c. 17. pag. 204. col. 2. Exhibetur Ven: Marinæ reunitio Animæ ad Corpus Christi D.

C. 18. Vidit Christum D. liberaliter distribuentem sua dona post Resurrectionem.

§ 1. Christus D. in die suæ Resurrectionis deposuit pretiosissimam vestem dolorum, ac ignominiarum, quibus eatenus SS. ejus Humanitas fuit induta.

§ 2. Modus Resurrectionis manifestatur Ven. Marinæ, ut & Ascensus ad Limbum. Christus D. noluit tunc ab ea adhuc tangi, sicut nec quondam à S. Magdalena. SS. suam Matrem redivivus Christus D. visitavit.

§ 3. Vidit Ven: Marina SS. Patres ex Limbo eductos: sed locum, in quo erat post Resurrectionem Christus D. intelligere non potuit. Vidit Sanctum Thomam Apostolum, & audivit dicentem: Dominus meus, & Deus meus.

P. 2. L. 1. c. 45. Anno 1624. Redivivus Christus D. primò adjit SS. suam Matrem; deinde S. Magdalenam. SS. Matri suæ ipse, quæ Deus, dedit Benedictionem, sed ab ipsa vicissim, quæ Homo, recepit Benedictionem. In Cælo fuit inexplicabilis celebritas: Christus D. apparuit conculcans mortem. Aliàs vidit Ven: Marina, quomodo in eo tota SS. Trinitas existat. Vidit & Sacrum cadaver non horridum, non fœdum, sed gratiosum, & plenum Majestate, & duo illa tam distantia inter se extrema, *Deus & Mortuus*, in eo conjungi obstupuit.

P. 1. L. 2. c. 19. §. 1. Gaudium Christi D. ascensuri. Ven: Marina, ducta ab Angelis ad locum *Ascensionis*.

§ 3. Anno 1619. Ven: Marina interfuit Ascensioni, & ipsa etiam, ascendit in Cælos, percepitque multa dona, quæ Christus D. paravit hominibus.

§ 4. Anno 1620. Christus D. promittit se post Ascensionem nihilominus mansurum nobiscum.

§ 6. Magnificencia Christi D. ascendentis.

C. 20. §. 1. Ven: Marina vidit, quomodo in Cælo Christum D. exceperit Deus Pater.

Parte 2. L. 2. c. 15. pag. 273. Anno 1627. in Triumpho Christi D. ascendentis vidit Ven: Marina Cælum peristromatis ornatum; audivit gemitus Dæmonum, & Angelicam triumphu hujus promulgationem.

Nota benevole Lector, ea quæ ad Festum *Pentecostes* pertinent, jam esse superius relata, ubi de Persona *Spiritus Sancti*, fuit actum.

P. 1. L. 4. c. 33. §. 1. Anno 1622. Ven: Marina adfuit Morti Beatissimæ Virginis, cui obviam processit tota SS. Trinitas. Apostoli sepeliverunt Sacrum corpus.

§. 2. Gloria Morientis SS. Virginis maximè manifestat Potentiâ Dei.

P. 2. L. 1. c. 40. pag. 164. Anno 1624. Gloria SS. Virginis in Cælo obscurat lumen aliorum Cœlitum, sicut sol stellas, & excedit Gloriam omnium simul sumtorum Sanctorum. Modus & situs morientis SS. Deiparæ, collocatæ in altissimo Throno. Christus D. reduxit ejus Animam ad sepulchrum, & redivivam adduxit in Cælum.

Ibidem pag. 166. Anno 1629. Situs inlecto SS. Matris mortuæ, Sepultura ejusdem ac Resuscitatio, in Cælum deductio, Reliquiæ Sacræ ejusdem.

P. 1. L. 3. c. 21. §. 1. Modum *Judicij extremi* vidit Ven: Marina.

C. 3. §. 1. Anno 1619. Vidit Ven: Marina apertum librum conscientie suæ.

P. 2. L. 1. c. 2. p. 9. Anno 1626. Ven: Marina facta est quasi paradigma erubescentiæ reorum in die *Judicij*.

P. 1. L. 1. c. 31. §. 3. Anno 1616. Asperissima toga carduis suffulta, quâ Diabolus multum Ven: Marinam excruciauit, jussu Dei servatur pro die *Judicij* omnibus exhibenda.

L. 2. c. 19. §. 4. Anno 1620, Dixit ad Ven: Marinam Christus D. quòd in ejus *Judicio* particulari comparebunt coram illo omnia bona & Cœlestes thesauri ei unquam concessi.

C. 21. §. 1. pag. 332. Vene: Marinæ volenti se præparare pro Mor-te, & *Judicio*, Cor suggessit, potius: non intres in *Judicium* cum servo tuo, quia non justificabitur in conspectu tuo omnis vivens.

Parte 2. L. 1. c. 2. pag. 10. Ven: Marina propter suam negligentiam flagellatur.

PARS V.

*Complectens ea, quæ ad Fructus ex Incarnatione
Filij Dei consecutos pertinent.*

IN hac parte adducuntur Revelationes Ven: Marinæ de Ecclesia, de Statibus Religiosis, de Sanctis, de Sacramentis, de Purgatorio, Cælo & Infer-

Inferno, adeoque declarantur & confirmantur tres residui ex Symbolo Apostolorum Articuli, nempe *Credo S. Ecclesiam Catholicam, Sanctorum Communionem, Remissionem peccatorum, & Vitam eternam.*

CAPUT I.

De Ecclesia.

P. 1. L. 2. c. 23. §. 1. Anno 1622. Admirandum Emblemata, Ecclesiae militantis, & triumphantis ac Communicationis inter eas intercedentis, nec non Potestatis, clavium & Indulgentiarum summi Pontificis.

L. 4. c. 10. §. 1. SS. Virgo & S. Joannes Apostolus, venerantur S. Petrum Apostolum Summum Pontificem.

L. 3. c. 12. §. 2. Currus mysticus flammeus à Sanctis 4. Animalibus dirigente Christo D. tractus, Symbolum Ecclesiae.

L. 4. c. 5. §. 1. Anno 1621. Castellum aureum vehementer à Dæmonibus oppugnatum, à Sanctis Angelis protectum est Symbolum Ecclesiae.

L. 3. c. 15. §. 2. Anno 1619. Christus D. ostendit Ven: Marinae, causam, cur tam multi ex Ecclesia damnentur, esse, quòd sint pauci operarii.

L. 3. c. 16. §. 1. Exhibetur Ven. Marinae status confusus Ecclesiae.

L. 5. c. 6. §. 5. Quomodo se diversè erga Ecclesiam gerant Hæretici, & Peccatores.

C. 7. Ecclesia est similis Apothecae per totum Mundum diffusae, in qua sunt infinitae præstantissimae Medicinae pro infinitis ægris sanandis sufficientes: sed desunt idonei Medici, ut plerique sint rudes, inepti, negligentes, exceptis pauculis modicae scientiae.

L. 6. c. 13. §. 1. Elegantissimus cum septem canalibus Fons, est Symbolum Sanctae Ecclesiae Catholicae, plenae meritis Christi D. & Sanctorum.

P. 2. L. 2. c. 38. pag. 379. Anno 1624. Extra Ecclesiam non est salus.

L. 2. c. 40. pag. 387. Anno 1625. Christus D. protegit semper Ecclesiam.

L. 2. c. 8. pag. 241. Anno 1630. Dolor Christi D. ob ingratitudinem, & perversitatem sui populi Christiani.

P. 1. L. 6. c. 13. §. 1. *Ritum* Breviarii alternatim persolvi soliti habet Ven: Marina in Angelis.

C. 14. §. 1. Anno 1623. quòd in Ecclesia usus linguae *Latinae*, Divinae Majc.

Majestati placeat, patet, quia omnes illius Domestici Angeli unitis vocibus Latine laudes Christi D. concinuerunt.

Sic L. 2. c. 24. §. 1. Divina Spiritus Sancti Persona Ven: Marinae collo torquem, pectori pretiosissimum cimelium, septem annulos manibus, capiti coronam, auriculis in aures cum magna Authoritate imposuit, omnia cum Verbis *Latinis*.

Sic L. 6. c. 19. §. 3. audivit Ven: Marina suos Angelos preces dicentes *Latine*.

Ritum Exequiarum Christianarum etiam Dominus varie confirmavit, ut L. 6. c. 20. §. 1.

Imaginum Sacrarum cultum esse Coelestibus gratum patet ex Parte 2. L. 1. c. 18. §. 3. pag. 87. col. 4. Item L. 1. c. 30. §. 3. pag. 129. col. 2.

Cultus & Honor ac Adoratio S. *Crucis*, eleganter patet ex P. 2. L. 1. c. 45. pag. 191. ut & honor, qui exhibetur æneis, vel ligneis simulachris Christi D. Crucifixi.

P. 2. L. 2. c. 40. pag. 386. Christus D. graviter reprehendit *Seclarios* ab Ecclesia Catholica alienos, eosque precipitat in Infernum.

L. 2. c. 38. pag. 379. Pagani, Judæi, *Hæretici* non possunt in sua Fide salvari.

CAPUT II.

De Ecclesia militante.

HAbuit Ven: Marina diversas Revelationes, circa statum Justorum Viatorum, & circa Ordines Religiosos, ex quibus pauca hic attingam, quibus aliquod lumen etiam circa hæc nobis accedat?

P. 1. L. 6. c. 12. §. 2. Quanti sint apud Deum pia Desideria, bona Opera ordinaria, & Affectus Amoris Justorum in Terris, quæ nos parvi facimus.

P. 2. L. 2. c. 38. pag. 381. Anno 1626. Preces Justorum Viatorum efficaciores sunt, quam Cœlitum.

P. 1. L. 2. c. 27. §. 1. Preces Justorum Viatorum multum valent apud Deum.

L. 4. c. 17. §. 4. S. Ignarius dicit Ven: Marinae Justos Viatores quandoq; à Deo impetrare, quæ Cœlites non audent.

L. 5. 13. §. 2. Quod Deus libentissime audiat preces suorum in Ter-

E c c e

ra:

ra: ita ut propter eorum simplicitatem concedat Deus tantum, aut amplius, quam Cœlitibus.

Exornatur S. Ecclesia statu Religioso. Verumtamen prolixum esset omnia de his afferre. Sufficiant duo Ordines, cum quibus solis Venera: Marina frequentiore habuit communicationem. Etsi enim ex mandato Dei fundaverit in Hispania ordinem S. Brigittæ, cum ejus tamen Patribus nunquam fuit conversata.

P. 1. L. 4. c. 21. §. 3. *S. Dominicus*, exhibet Ven: Marinæ multos sui ordinis in Terris Sanctos.

C. 22. §. 1. *S. Dominicus* postquam magnâ pompâ visitavit suos in mundo Conventus cum tot Sanctis sui Ordinis, ut viderentur mundum implere, provolutus ingenua solennissimas egit Deo gratias.

L. 4. c. 18. §. 1. *S. Dominicus* jubet Ven: Marinam orare pro *Societate JESU*.

§. 2. Sancti 6. Angeli præsentibus SS. Dominico & Ignatio, nomine Sanctissimæ Trinitatis annunciant Ven: Marinæ, fore, ut duæ Sacræ Religionis *Prædicatorum & Societatis JESU*, quoad sententias concordent, venturumq; tempus, quo id sit Ecclesiæ necessarium.

§. 3. Vidit Ven: Marina Processionem, in qua alternatim procedebant *Dominicani & Jesuvite*, ad quos Sancti eorum Fundatores habuerunt sermones de concordia & unione.

L. 4. c. 13. §. 4. Anno 1615. *S. Dominicus* deprædicat encomia *S. Ignatij*.

C. 14. §. 1. Angeli ostendunt fructus factos à Societate JESU.

§. 3. Ostenditur Ven: Marinæ omnes ad illud usque tempus in Societate mortuos, esse Salvatos.

C. 17. §. 4. *S. Ignatius* comparuit in luctu propter exeuntes ex Societate JESU.

§. 3. *S. Ignatius* orat cum suis pro Societate.

P. 2. L. 1. c. 28. pag. 119. Anno 1626. Ven: Marina rogat *S. Dominicum*, ut impetret concordiam inter suos & Societatem.

C. 29. pag. 120. Anno 1625. Iterum Ven: Marina rogat *S. Dominicum*, ut Deo commendet Societatem afflictam, qui ei causas persecutionis aperit.

C. 34. pag. 139. Anno 1626. Vidit Ven: Marina quendam *S. Patriarcham* iratum suis Religiosis, ut & Christum D. omnibus persecutoribus Societatis JESU.

Pag. 140. P. Ludovicus de Ponte narrat Ven: Marinæ donum Zeli Animarum in Societate.

Pag. 141. S. Franciscus Xaverius dicit se esse tantum ramusculum ex arbore Societatis JESU.

CAPUT III.

De Ecclesia Triumphante.

Plena est utraque Pars Vitæ Ven: Marinæ rerum cœlestium, propterea solùm annotabo pauca, circa aliquos Sanctos, ex quibus etiam articulus Fidei de Cultu & Invocatione Sanctorum confirmatur.

Sancti Petrus & Joannes Baptista extulerunt ad Cœlum Cor Cordis Ven: Marinæ. Parte 2. L. 1. c. 8. pag. 41.

S. Joannem Evangelistam videt Ven: Marina quasi in corpore resuscitato. Parte 1. L. 4. c. 11. §. 4.

S. Maria Magdalena non peccavit mortaliter peccato carnis. Parte 1. L. 4. c. 11. §. 1.

Sancti Cosmas & Damianus, tanquam Medici visitant Vener: Marinam L. 3. c. 13. §. 3. Præsentibus iisdem Sanctis Dæmones torquent duos Tyrannos L. 5. c. 20. §. 3.

S. Christophorus transferebat per flumina Viatores c. 21. §. 3.

S. Benedictum exultat S. Ignatius. Parte 2. L. 1. c. 26. pag. 113.

S. Benedictus primus vixit, ut Religiosus, sub Obedientia, & Observatione regularum. P. 2. L. 1. c. 37. pag. 114.

S. Bernardus plurimum meruit tolerantiam morborum. Parte 1. L. 4. c. 26. §. 5

S. Bonaventuram conatur impedire Diabolus inspecie Bufonis. Parte 2. L. 1. c. 32. pag. 131.

S. Angelus Custos reprehendit Ven. Marinæ inurbanitatem erga Sanctos. P. 1. L. 2. c. 22. §. 3.

S. Dominicus à quodam Peccatore in Patronum electus, ardentissime ejus causam agit. P. 1. L. 5. c. 13. §. 3.

Ven: Marina perit in Cœlo Virtutes Sanctorum Francisci, Dominici, & Abrahami. L. 3. c. 14. §. 1.

Eccē 2

Beatif-

Beatissimæ Virginis Imaginem Sylvæducentem in Belgio malè ab hæreticis tractatam vindicari petit à Deo Ven: Marina. P. 2. L. 2. c. 12. p. 262.

P. 1. L. 1. c. 22. §. 1. *S. Dominicus* fuit in puerita Sanctus.

§. 3. *S. Thomas* ex suggestu prædicat Laudes *S. Dominici*.

L. 4. c. 20. §. 1. *S. Dominicus* est in cælo ex eis, qui habent auream clavim.

C. 22. §. 2. Donavit pretiosum Rosarium Ven: Marinæ.

P. 2. L. 1. c. 28. pag. 117. Maximos honores Deus, & Cœlites exhibent *S. Dominico*.

P. 1. L. 4. c. 23. §. 4. *S. Franciscus Seraphicus* ducit Ven: Marinam ad videndum suum corpus.

C. 24. §. 1. Explicat Ven: Marinæ modum, quo Sancti assument corpora, & in eis apparent, eamq; cum SS. Bonaventura, Ludovico, Antonio, Junipero ducit ad suum sepulchrum.

P. 1. L. 4. c. 23. §. 2. Extollit laudes Patientiæ coram Ven: Marina, cui secum adduxit ex Cælo parvulum ejus nepotulum Infantem.

P. 2. L. 1. c. 30. pag. 123. Anno 1624. Describitur Crypta Sacri Corporis, ad quod honorandum admissi ejus religiosi diversorum officiorum, ut coci, hortulani: aliqui in acutis, aliqui in rotundis caputijs.

Pag. 124. Invitat Ven: Marinam, ut in ejus domo petat frustum panis, & scutellam ejus jusculi, quod dari solet pauperibus. Deinde invitat illam ad Convivium in Cælo, quod Deus instructurus esset in ejus festo, omnibus Sanctis Patriarchis Religionum, & omnibus Sanctis, qui ex eis canonizati sunt: ministraturis ad mensam ipso Sancto Francisco, S. Bonaventura, S. Ludovico Rege Galliæ, & Fratre Junipero. Pompa S. Francisci procedentis ad illud convivium, ad quod ministravit ipse reflexis manicis.

Pag. 126. Deus Sancto Francisco miras gratias concessit, ut ei apud populum conciliaret æstimabilitatem pro ejus munere necessariam.

L. 1. c. 31. pag. 128. Anno 1629. Vidit Ven: Marina ingentem Gloriam Sancti Francisci.

P. 1. L. 2. c. 28. §. 3. *S. Ignatio* delatus honor in Cœlis gestandi SS. Sacramentum in solennitate Corporis Christi.

L. 1. c. 18. §. 1. Non vult agi de sua canonizatione.

P. 2. L. 1. c. 33. pag. 135. Ven: Marina videt Animam Sancti Ignatii intra fortissimam & coruscantem columnam. Deinde in gloriosissimo Throno cum splendidissimo in pectore Nomine JESU, assistente Sancto Fran-

Francisco Xaverio, & suis Religiosis, quibus dedit Benedictionem. Tum Sanctus Dominicus jussu Dei, dixit Panegyrim S. Ignatij. Demum gratulati sunt ei omnes Sancti,

P. 2. L. 1. c. 33. pag. 137. *Sancti Ignatij* latera stipabant S. Franciscus Xaverius, & Ven: P. Ludovicus de Ponte, qui dixit quòd magno se periculo exponant, qui ex Societate egrediuntur.

C. 34. pag. 139. *S. Ignatius* visus est cum sacerdote celebrante se penetrare, & unire.

P. 1. L. 1. c. 18. §. 2. *S. Ignatius* conscripsit numerum suorum bonorum Filiorum, ut specialem eorum curam gereret.

§ 3. Diabolus se interponebat, nè Ven: Marina posset loqui S. Ignatio.

L. 4. c. 14. §. 3. Deus S. Ignatio committit arbitrium Vitæ & mortis Ven: Marinæ.

P. 1. L. 4. c. 19. §. 1. *S. Franciscum Xaverium* in curru Triumphali circumvehunt per omnes Provincias, in quibus prædicavit.

§. 2. *S. Xaverij* pedes apparent auroi, Cor instar ardentissimi carbonis, manus suavissimi odoris.

§. 3. S. Xaverius donat Ven: Marinæ Reliquarium, in quo fuit mysticè Virtus Cœlestis Spiritûs, Sancti Ignatij.

CAPUT IV.

Articulus Decimus. Remissionem peccatorum.

P. 1. L. 2. c. 6. §. 4. & 5. SS. Virgo nunciat Ven: Marinæ, Christum D. in ea nasciturum per Gratiâ. Simile est c. 7. §. 2,

L. 6. c. 15. §. 5. Ven: Marina Baptismalem Gratiâ cupit renovare.

P. 1. L. 2. c. 29. Sacerdotes Confessarij lavant Animas. Ibidem P. 2. c. 21. pag. 299.

P. 2. L. 1. c. 13. pag. 54. Absolutio Sacramentalis non competit Cœlitibus.

Ibidem c. 37. pag. 150. Ven. P. Ludovicus quoddam Schema Extreme Unctionis confert.

P. 1. L. 4. c. 25. §. 4. Iteratio *Indulgentiæ plenariæ* non est superflua.

P. 2. L. 1. c. 16. pag. 68. *Indulgentiæ* Thesaurus Ecclesiæ.

P. 1. L. 5. c. 5. §. 2. Requisita ad lucrandas *Indulgentias*.

P. 1. L. 5. c. 1. §. 1. *Purgatorij pœnæ.*

C. 2. §. 1. *Purgatorij pœnæ* graviores, quàm hujus Vitæ morbi. Pa-
ri, quod à Deo immittitur, etsi non desint multi defectus, satisfacit pro
multis annis Purgatorij.

§. 2. *Animæ Purgatorij* patiuntur quælibet seorsim solitariè, ac si
nulla alia adesset.

§. 3. Inferni tormenta sunt majora, quàm Purgatorij; ubi singulis
Animabus constat, quòd sint in Gratia.

§. 4. *Animæ* purgantur etiam extra locum Purgatorij.

§. 5. Deus faventissimus Animabus Purgatorij liberaliter *Indulgentias*
eis concedit.

Et c. 3. §. 1. Infantes in Cœlo, rogant pro suis Parentibus in Purga-
torio, &c.

§. 2. Ven: Marina singulis Communionibus liberat quatuor Animas,
qui numerus respectu Purgatorij est, quasi gutta respectu vasti fluvij.

§. 3. Anima per Indulgentias educta ex Purgatorio, nondum tamen
ducta ad Cœlum.

Et c. 4. §. 2. Actibus Heroicis liberantur Animæ. Magnus Jubilus
in Cœlo ob Animas ex diuturnioribus pœnis liberatas.

§. 3. Parenti ex Purgatorio exeunti, obviam cum Angelis procedunt
ejus proles ex Cœlo.

§. 6. Ad Matris preces Filius paulò post occidendus à mala vita con-
versus ad Purgatorium pervenit. Non facilè permittit Deus Animas dam-
nari, sed ad hoc multùm requiritur. Non omnes, qui moriuntur sinè Sa-
cramentis, damnantur.

Et c. 13 §. 5. Deus punit peccata venialia gravibus pœnis.

P. 2. L. 1. c. 4. pag. 18. Descriptio Purgatorij.

C. 24. pag. 104. S. Dominicus per Ven: Marinam liberat Animam
ex Purgatorio.

L. 2. c. 17. pag. 279. Deus prohibet applicari Indulgentias pro qua-
dam Anima ad Purgatorium usque ad diem Judicij Damnata.

Pueri parvi graves sustinent pœnas, quia nos credimus eos statim mi-
grare ad Cœlum, & ideo pro illis non oramus.

Religiosus ob immoderatum affectum erga consanguineos, etiam li-
beratus à Purgatorio adhuc ostentat dolorè ob tot gradus gloriæ neglectos.

Paginâ 281. Ven: Marina graviora in suo lecto passa, quam quædam Anima Purgatorij, pro qua plurimas preces obtulit diu.

Paginâ 283. Colloquium mirabile cum Deo ad liberandam quandam Animam.

P. 1. L. 2. c. 7. §. 2. S. Franciscus Seraphicus non fuit *Sacerdos*, & ideo Missam coram Ven: Marina non celebravit sicut S. Dominicus, & S. Ignatius.

L. 4. c. 1. §. 3. Potestas data *Sacerdotibus*.

L. 1. c. 29. §. 3. Sanctissima Virgo reveretur officium *Sacerdotis*.

L. 5. c. 13. §. 3. *Sacerdotes* suo officio repræsentant Christum D.

P. 2. L. 1. c. 46. pag: 198. Modus, quo in Ven: *Sacramento* existit tota Sanctissima Trinitas.

L. 2. c. 20. pag: 297. Diaboli vires omnes corruunt ad præsentiam *SS. Eucharistia*.

P. 1. L. 2. c. 26. §. 4. Modus, quo Christus D. existit in Ven: *Sacramento*. Idem habetur L. 4. c. 2. §. 5. Et L. 2. c. 26. §. 3.

L. 2. c. 22. §. 1. Institutio *Ven: Sacramenti*.

§. 2. Transubstantiatio.

§. 3. Admirandæ declarationes, & similitudines modi existendi Christi D. in *SS. Eucharistia*.

§. 4. Christus D. in *SS. Eucharistia* nec videt, nec audit.

§. 5. Ven: Marina vidit ipsum modum transubstantionis, quem nulla lingua explicare potest.

P. 2. L. 1. c. 46. pag: 195. Christus D. ipsemet Ven: Marinæ porrigit, *SS. Eucharistiam* & labia linteolo abstergit.

P. 1. L. 2. c. 28. §. 1. S. Michaël Archangelus, & omnes *SS. Angeli* prostrati, rogant, & impetrant, ut D. Deus augeat in Ecclesia venerationem Sanctissimæ *Eucharistia*, quam & ipsi venerantur.

P. 1. L. 2. c. 27. §. 1. Sacratissimus sanguis & Corpus Christi D. in *Missâ* quotidie oblatus est tanti Valoris, ut propter ipsum tolerentur populi, qui mererentur destitui.

§. 4. Christus D. se cum Sacerdote celebrante incorporat.

L. 6. c. 19. §. 4. S. Dominicus præbuit *viaticum* Ven: Marinæ.

P. 2. L. 1. c. 46. pag: 96. Quantopere affligat Dæmones cultus *SS. Eucharistia* ad Festum Corporis Christi.

L. 1. c. 46. pag: 147. Solennitas in Cœlis die Corporis Christi, & indu-

industria Dæmonum, ne quid Hæreticis, Gratiæ & Favores Cœlestes illa die profint.

P. 1. L. 2. c. 26. §. 1. Admiranda in Cœlo Processio die Cœnæ Domini, cum Ven: Sacramento, quod Deus Pater portavit.

C. 27. §. 2. Quod Christo D. sit grata nostra Festivitas Corporis Christi.

§. 3. Christus D. in Processione in SS. *Eucharistia* deportatus, miranda mysteria Ven: Marinæ exhibet, tolerans præsentium erga se irreverentiam. Aliàs in simili processione eidem exposuit suum erga genus humanum affectum.

C. 28. Angeli eleganter ad Festum Corporis Christi ornati narrant de solennitate, quæ tunc habetur in Cœlo.

CAPUT VI.

Articulus Duodecimus. Vitam æternam.

ADverte Lector Articulum Undecimum; *Carnis Resurrectionem*, jam esse explicatum, & absolutum supra, ad Articulum Septimum, de Judicio extremo, ubi Christus D. Judex omnium faciet omnes mortuos resurgere.

P. 1. L. 3. c. 16. §. 2. De Via; quâ pervenitur ad Cælum.

C. 10. §. 1. & §. 3. & §. 5. Describitur *Beatitudo* Cœlestis, ad nictum oculi visa à Ven: Marina.

L. 13. §. 4. Ven: Marina videt ex suo lecto Cælum stellarum.

§. 5. Ven: Marina videt Deum instar Amphitheatri.

C. 11. §. 5. Plures fœminæ, quàm Viri student contemplationi.

L. 3. c. 7. §. 3. Sancti Cœlites nunciant Ven: Marinæ, quod sit æternum in Cœlis victura.

§. 4. Præ gustatio *Beatitudinis*.

C. 9. §. 3. Excellentia *Beatitudinis* deprædicatur.

L. 3. c. 6. §. 4. Ven. Marina cupit citò esse in Cælo.

C. 10. Ven: Marina assimilât se myopi respectu visionis rerum cœlestium.

P. 2. L. 1. c. 47. pag. 200. Vita præsens incapax *Beatitudinis*.

C. 48. pag. 204. *Beatitudo* inexplicabilis, etiam totius Mundi verbis, nec quoad partem suam aliquam. L. 2. c. 2. pag. 213.

Sed

Sec nec ulla similitudo in creatis invenitur. L. 2. c. 40. pag. 389.

P. 1. L. 4. c. 7. §. 4. Etiam oculi corporei frequentibus Revelationibus sunt quasi spirituales.

P. 2. L. 1. c. 39. pag. 383. *Beatitudo Parvulorum*, post Baptismum statim mortuorum.

L. 1. c. 20. pag. 87. Gradus diversi Cœlitum, quos etiam Visio cujusdam Lunæ (quæ est Symbolum Sanctissimæ Virginis) accidentaliter exhilarat.

P. 1. L. 5. c. 1. 2. & 3. Status *Parvulorum in Limbo*.

P. 1. L. 3. c. 21. §. 3. Ostendit Deus Ven: Marinæ Voragine, & tormenta *Inferni*.


P. 2. L. 2. c. 2. pag. 212. Peccatores unâ cum suis Divitijs in *Inferno*.

P. 1. L. 5. c. 1. §. 1. *Damnati* instar rabidorum Canum cum Diabolis permixti, intra Fossam ardentem, volutati opprimuntur à gravissimo pondere.

§. 3. Deus non faciliè revelat statum ullius *Damnati*.

L. 5. c. 11. §. 4. Vidit Ven: Marina quendam à Diabolis ad *Infernum* deportari.

C. 18. §. 4. Ven: Marina videt triginta Religiosos *Damnatos*.



TRACTATUS V.

*Documenta Moralia ex Revelationibus Venerabilis
Marina de Escobar in S. Ecclesia commodum
redundantia.*



In Tractatu præcedenti ostendi copiosè, quantopere non solum Sanctæ nostræ Catholicæ Fidei congruant Revelationes Venerabili Marinæ Virginis de Escobar exhibitæ; verum etiam, quòd multi hujus ipsius Sanctæ Fidei Articuli lucem aliquam inde accipiant, ad majorem declarationem, illustrationem, ac confirmationem. Nunc referendum superest, quantam etiam Sapientiam pro moribus, & actionibus Hominis

.ffff

Chri-

Christiani Venerabili huic Virgini contulerit Divina Majestas, ut inde fructus Doctrinæ Asceticæ redundet etiam in Ecclesiam Sanctam, præsertim pro directione Patrum Spiritualium, & Ascetarum, ut Documenta eis suppetant suas aliorumq; Animas ad supremos Perfectionis gradus securè deducendi. Quia verò Libri hujus moles Brevitatem exigit, ideo solùm loca indicare contentus, Lectorem ad ipsam Vitam duobus Tomis, seu duabus Partibus hîc Pragæ editam, remitto.

CAPUT I.

De statu peccatorum, de Miserijs hujus Vitæ, ac de Pœnitentia.

DE hoc agit Ven: Marina Par: 1. L. 5. c. 6. §. 3. Dæmon habet suos Crucifixos.

P. 2. L. 2. c. 5. pag. 229. Cælites pro aliquibus Peccatoribus non orant..

L. 2. c. 21. pag. 303. Quidam homines malitiâ Diabolis pares.

P. 1. L. 5. c. 11. §. 4. Pro quibusdam Peccatoribus non est orandum.

L. 5. c. 7. pag. 479. Restitutionis obligatio multos damnat.

P. 2. L. 2. c. 6. pag. 231. Difficilimum est aliquos peccatores convertere.

P. 1. L. 3. c. 15. §. 2. Vanitatem mundi detestatur Deus.

P. 2. L. 1. c. 6. §. 29. Servis Dei licent quandoque recreationes.

L. 2. c. 22. pag. 305. Quærite primùm Regnum Cælorum.

P. 1. L. 1. c. 15. Tentationes superantur recursum ad Deum.

§. 1. Diabolus Phantasiam intorquet.

L. 2. c. 10. §. 2. Dæmonis ferocia in tentando.

L. 1. c. 15. §. 2. Corona Cœlestis Patientiæ pro Deo, præsertim usq; ad sanguinem.

§. 3. Jejunium diei Cinerum violatum.

Scrupuli. P. 2. L. 1. c. 32. pag. 132. Qui non vult decipi non decipietur.

L. 2. c. 42. pag. 398. Doctrina pro scrupulosis.

P. 1. L. 1. c. 16. §. 4. Fervor aliquando remittendus.

L. 1.

L. 1. c. 18. §. 3. Distractio aliquando necessaria.

C. 9. §. 1. & 2. Leves defectus facile condonantur, & sunt pro cautela.

Pœnitentia an præstet Innocentiæ. P. 1. L. 1. c. 10. §. 1.

P. 1. L. 1. c. 16. pag. 74. Oportet cooperari Deo. Idem habetur L. 3.

c. 5. §. 3.

P. 2. L. 2. c. 21. pag. 298. Horror difficultatum vincendus.

L. 1. c. 37. pag. 151. Solus Homo resistit Deo.

L. 3. c. 18. §. 3. Vera Pœnitentia perducit ad Cœlum securè.

L. 1. c. 10. §. 3. Ven. Marina graviter punita.

P. 1. L. 1. c. 28. §. 2. D. Deo quisque det quod habet.

§. 5. Victoria Sui.

L. 6. c. 4. §. 1. Deus ipse approbat aliqua fomenta in Mortificatione.

C. 15. §. 1. Flores quinque sensuum Deo statim in prima ætate offerendi.

L. 1. c. 11. §. 1. Molestationes conservant Animam in subjectione.

CAPUT II.

De Humilitate, Paupertate, Castitate, Obedientia & Patientia.

P. 1. L. 1. c. 5. pag. 22. *Humilitatem* augent favores Divini.

L. 1. c. 7. §. 1. Paradoxa *Humilitatis*.

§. 4. *Cognitio propria* inflamat Amorem Dei.

C. 21. pag. 96. col. 1. Annulo inscriptum; Ancilla JESU Christi mei Domini.

L. 1. c. 27. §. 2. *Humilitas* fugit singularia & speciosa.

§. 4. *Humilitas* Ven: Marina, dum illi stigmata sacra imprimerentur.

L. 2. c. 23. §. 4. Ven: Marina horret Titulum sponsæ. Idem habetur

L. 3. c. 14. §. 2.

Humilitas Ven: Marina P. 2. L. 2. c. 22. pag. 306. Item L. 5. c. 10.

§. 5. Ibidem pag. 299.

L. 6. c. 12. §. 1. Arbor debet ignorare suos fructus.

P. 1. L. 1. c. 7. pag. 29. *Cognitio sui* est Crux gravissima.

Ffff 2

§. 3.

- §. 3. Præcipuum Exercitium Ven: Marinæ est *cognitio sui*.
- §. 4. Ven: Marina in *cognitione* sui alios excellit.
- P. 2. L. 1. c. 1. pag. 3. *Cognitio sui* est Vitæ spiritualis Clavis.
- L. 2. c. 21. pag. 298. *Cognitio sui* temperanda per fiduciam in Deo.
- L. 1. c. 2. pag. 6. Omnia nostra sunt Deo attribuenda.
- P. 1. L. 1. c. 9. §. 2. *Cognitio sui* parit Contritionem.
- P. 1. L. 1. c. 2. §. 3. Diabolus Ven: Marinam decepit initio.
- P. 2. L. 1. c. 32. *Cognitio* miseræ nostræ agnoscit malitiam peccati.
- C. 4. pag. 19. *Cognitio sui* dolet de Peccatis, quæ unquam committere poterat.
- L. 1. c. 1. pag. 2. Arcana mira Cognitionis sui.
- L. 2. c. 22. pag. 304. *Cognitio* sui persvadet sibi inesse omnia possibilia peccata.
- P. 1. L. 5. c. 28. Septem Puncta Cognitionis propriæ.
- P. 1. L. 1. c. 4. §. 5. De eo, quod est *servire Deo*.
- L. 5. c. 20. §. 2. Servitium Dei initio habet difficultates.
- L. 1. c. 11. §. 2. *Timor Domini* Turris fortis.
- P. 2. L. 1. c. 15. pag. 63. *Timor Domini* custodit Thesauros Animæ.
- P. 1. L. 1. c. 13. §. 1. *Fides* de mysterio SS. Eucharistiæ quantopere placeat Deo.
- §. 2. Ad S. Communionem magis attrahit Amor, quam retrahit Timor.
- §. 3. Dæmon odit frequentiam SS. *Eucharistiæ*.
- P. 1. L. 1. c. 17. §. 4. Ven: Marina petit pati necessitates Corporis.
- C. 22. §. 2. pag. 100. *Paupertatem* Ven: Marinæ sublevat S. Dominicus.
- L. 6. c. 11. quàm grata sit Deo *Paupertas* spiritu.
- P. 2. L. 6. c. 22. pag. 305. *Paupertas* Ven: Marinæ elemosynaria.
- L. 2. c. 6. pag. 235. Ven: Marinæ aspectus, liberat à Tentatione *Carnis*.
- L. 3. c. 6. p. 427. Familiaris cum DEO conversatio facit Animas castas.
- P. 1. L. 4. c. 34. §. 2. *Obediendum* Confessario contra proprium sensum.
- L. 1. c. 6. pag. 26. Vita Ven: Marinæ permixta fuit gaudijs & crucibus.
- §. 2. *Patientia* optima in Crucibus, quas Deus permittit congruè ad cujusque statum.
- C. 10. pag. 48. Angeli hortantur Ven: Marinam ad *Patientiam sui ipsius*.

L. 6. c. 2. Præstantia statûs Patientiæ. §. 3. etiamsi aliquando impediât laborem pro salute proximi.

C. 9. §. 3. Bonum est in afflictione petere levamen, cum resignatione.

P. 1. L. 1. c. 9. §. 4. *Odium* sui.

P. 1. L. 2. c. 14. pag. 189. Angi desiderijs pro Deo, est etiam *Patientia*.

P. 2. L. 1. c. 25. pag. 318. *Resignatio* Deo placet, etiam non secuto effectu.

P. 1. L. 1. c. 6. §. 3. Deus scit facere, ut quod est modicum, affligat multum.

C. 30. §. 1. *Crux* est etiam Instrumentum Solatij.

L. 2. c. 9. §. 3. *Æstimatio Crucis*.

L. 3. c. 17. §. 2. D. Deus porrigit occasiones *Resignationis* heroicæ.

P. 2. L. 1. c. 22. pag. 101. S. Joseph extollit encomia *Crucis*.

L. 2. c. 21. pag. 301. Christus D. tentatus per omnia, juvat in tribulationibus.

C. 25. pag. 316. Admirabilis *Resignatio* in Cruces præ delicijs.

P. 1. L. 1. c. 32. §. 1. Nunquam Deus nobis vicinior, quàm in Tribulatione.

CAPUT III.

De Oratione, & Revelationibus.

P. 1. L. 1. c. 5. §. 1. Oratio perseverans Deum movet.

§. 3. Disparitas inter Orationem Discursûs, & infusam sinè discursu.

C. 11. pag. 52. Oratio, quasi ex Justitia, exigit à Deo.

C. 14. §. 3. Oratio stringit Deum; Oportet petere, sicut debet. Deus exaudit suos quandôque faciendo, ut sit ad Gloriam ejus, quod alioquin non esset.

L. 4. c. 17. §. 4. Justi impetrant in terris, quod quandôque Cœlites non audent.

C. 23. §. 4. Ven: Marina impetrat, quod non potuit S. Franciscus.

P. 2. L. 1. c. 45. pag. 190. Multorum preces prævalent Orationi Ven: Marinæ.

L. 2. c. 3. pag. 216. Justorum oratio semper exauditur.

C. 6. pag. 236. Admirandus casus, quo Oratio ligavit manus Deo.

C. 9. pag. 249. Tres vetulæ suis orationibus sustentant Hispaniam.

P. 1. L. 5. c. 8. §. 3. Quod Christus D. solus non impetrat, impetrat humilis Oratio juncta cum meritis Christi D.

L. 5. c. 13. §. 2. Justi in Terra, suâ simplicitate sæpe plus impetrant, quàm Cœlites.

C. 19. §. 2. Decretum Dei est tam potens, & immensum, sicut ipse Deus, quandôq; immutabile.

L. 6. c. 9. §. 3. Deus nè quid suis neget, facit nè id petant.

L. 5. c. 30. §. 1. Ingentia bona orationis. Quinque conditiones Orationis.

§. 3. Etsi quandoq; non percipiatur Oratio esse exaudita, exauditur tamen.

P. 2. L. 2. c. 1. pag. 208. Specialis Casus admirandus, exauditur post 9. Missas Orationis pro tota Christianitate.

C. 26. pag. 320. Sanctissima Virgo docuit Ven: Marinam quandam *Orationem Vocalem*.

Paginâ 321. Alia, similis Oratio Vocalis admirabilis.

Paginâ 322. Alia, quam docuit Divina Majestas.

Paginâ 323. Devotio per quinque Pater & Ave à Deo laudata, & alia per 11. Missas. Item alia per 34. Missas.

Paginâ 324. Alia efficax Devotio per 4. Missas tradita à SS. Deipara.

P. 1. L. 3. c. 3. §. 1. Ven: Marina rapta intra Deum, vidit momentaneè faciem Dei.

C. 1. §. 4. Descriptio immersionis in divinam caliginem: Amplius est, quàm hoc.

P. 2. L. 2. c. 4. pag. 223. Quæ in his Visionibus videntur, differunt à nostris plùs, quàm res à malè picta sua imagine.

P. 1. L. 1. c. 3. §. 3. Non omnes Revelationes fiunt solùm in spiritu.

P. 2. L. 1. c. 12. pag. 50. In omni Revelatione sui semper Deus alio modo se Ven: Marinæ exhibuit.

L. 3. c. 1. pag. 401. Modus verborum, quæ à nobis percipiuntur, differt ab illo, quo pronunciantur à Divina Majestate, ibiq; ab Anima percipiuntur, sicut res vivens à mortua.

P. 1. L. 1. c. 11. §. 3. Stupenda cum Deo Familiaritas.

P. 2. L. 2. c. 5. pag. 227. Spiritus Sancti erga Ven: Marinam blanditiz Amoris.

P. 1.

P. 1. L. 2. c. 23. §. 2. Spiritus Sanctus exhibet maximos Favores Ven: Marinae.

P. 2. L. 1. c. 21. pag. 95. Stupenda cum Spiritu Sancto Familiaritas.

L. 1. c. 46. pag. 105. Stupenda cum Christo D. Familiaritas.

L. 3. c. 2. §. 3. Status Revelationum affert Vitam prorsus aliam, quasi Aulicam post Rusticam.

CAPUT IV.

Conformitas cum Divina Voluntate, Amor DEI & Proximi ac suprema Perfectio.

P. 1. L. 1. c. 5. pag. 22. Non expedit omnibus Via extraordinaria, nec omnibus ordinaria.

L. 1. c. 8. §. 4. Deus Ven: Marinae Divinae Voluntati conformatae dixit: quidquid feceris, mihi placebit.

C. 9. §. 3. Deus exigit Cor indifferens ad subeundas Tentationes.

C. 16. §. 1. Oportet esse contentum, quod Deus huic hoc, aliud alteri injungat.

L. 3. c. 2. §. 1. Si Deus nos poneret cum Job ad sterquilinum, daret etiam auxilia ad hoc.

L. 5. c. 33. §. 2. Studiosum Sanctitatis oportet esse contentum, ut sit ex minimis servis Dei.

L. 6. c. 1. §. 4. Angelus Custos format scriptum, quo Ven: Marina se conformat in omnibus Divinae Voluntati, cui se subscribit etiam Christus D.

C. 3. §. 2. Actu uno Resignationis plus merita Ven. Marina, quam aliàs tota Vita.

§. 3. Scriptum Instrumentum Resignationis in Divinam Voluntatem subscripsit Christus D. & Ven: Marina.

§. 4. Resignationi in æternum, non censentit Christus D.

§. 5. Per Resignationem augetur stupendè meritum.

§. 6. Resignatio quoad gradum Sanctitatis, quem nobis voluerit Deus dare.

P. 2. L. 1. c. 17. pag. 79. Dæmon resistit actibus Resignationis. Stupendus actus Resignationis in Cælo à Ven: Marina elicitus.

P. 1.

P. 1. L. 1. c. 8. §. 1. & 2. *Amor Dei* satiat, simul & plus desiderat amare. Sanctæ stultitiæ, quas lingua tunc effundit.

C. 10. *Amoris* fervor.

L. 2. c. 16. §. 6. *Amor* non vult dimittere amatum.

P. 1. L. 1. c. 23. §. 3. Ven. Marina per plateas, & aliàs obvios exhortatur ad bonum.

P. 2. L. 1. c. 13. pag. 102. Ven. Marinæ data clavis ad salvandas Animas.

P. 1. L. 5. c. 10. §. 3. Ven. Marina, videbatur sibi suis humeris portare universos homines.

§. 2. c. 10. §. 3. Deus non vult deferi negotia concernentia proximos.

P. 1. L. 1. c. 3. §. 3. Status *Anima perfecta*.

L. 6. c. 15 §. 1. Errores *Amoris* bene possunt ignosci.

C. 16. pag. 654. In *Anima perfecta* concurrunt Actus Virtutum unitarum in unum.

P. 2. L. 1. c. 7. pag. 32. Tandem Corpus consentit, & adjuvat Spiritum, quasi spirituale.

Pag. 33. Majora præstat *Anima perfecta*, auxiliante corpore, quàm sine illo.

L. 2. c. 21. pag. 299. Virtutes præstantissimæ, quasi aurum igne, evadunt altiores Humilitate &c.

CAPUT V.

Documenta Venerabili Marinæ, ut & ab ea data.

P. 1. L. 4. c. 16. §. 2. S. Ignatij de Constantia Documentum.

P. 2. L. 1. c. 24. §. 105. S. Augustinus de Renovatione oblationis sui.

C. 25. pag. 106. Conciones Sanctorum quatuor Patriarcharum.

P. 1. L. 5. c. 31. §. 2. Epistola ad P. Provinciam Dominicanorum, de Meditatione & Collectione.

§. 3. Ad quandam Patrem Dominicanum de Vita solitaria non amplectenda.

P. 2. L. 2. c. 23. pag. 308. Ad suas Sorores domesticas de Miseria nostra, & amore Dei in nos.

Pag. 310. Ad Monialem cujusdam Monasterij de Humilitate, & causa Custodia sui.

C. 24.

C. 24. §. 315. Ad quandam Magnatem de retinendo officio in obsequio Regis.

P. 1. L. 1. c. 23. §. 1. Deus mittit Ven: Marinam ad conversandum cum Patribus Dominicanis.

C. 11. §. 3. Quomodo se gerendum erga Confessarios.

C. 19. §. 1. Expediit omnia aperire Confessario, etiam non dubia.

§. 3. Ven: Marina voluit suo Confessario facere votum Obedientiæ: cui S. P. Ignatius limitatè vix tandem consensit.

L. 5. c. 12. §. 2. Iratus valde Deus cuiuspiam Magnati scandaloso.

L. 6. c. 13. §. 1. Ministri Justitiæ debent semper respicere Deum.

P. 2. L. 2. c. 19. pag. 289. Personæ publicæ caveant obstinatè proprium iudicium.

CAPUT VI.

Quædam de statu publico.

P. 1. L. 5. c. 10. §. 3. Anglia convertetur.

P. 2. L. 1. c. 29. pag. 122. S. Dominicus cum Ven: Marina Diabolos per Germaniam & Belgium expulerunt.

L. 2. c. 4. pag. 221. Ven: Marina, jussu Dei, promulgavit quædam per omnes 4. Mundi Partes, dispari effectu.

C. 13. pag. 265. Ven: Marina in Anglia & Palæstina distribuit dona Dei.

C. 15. pag. 270. Deus iratus Japoniæ & Carolo Regi Angliæ.

C. 16. pag. 276. Matrona quæpiam in Provincia pagana ignota procul remota Christianam Fidem ibi occultè fovet & promover, cui & Anglis Ven: Marina distribuit Cælestia dona.

C. 9. pag: 250. Ven: Marina petit diu vivere pro auxilio Hispaniæ.

C. 11. pag: 225. Hispaniæ expediit expectare potius, quam inquire hostes.

Pag: 257. Hispani Ven: Marinam non audientes periclitati de amittenda Flotta Indica.


C. 12. pag: 260. Perditio Hispaniæ ex falsa moneta.

Pag: 161. Deus misit Philippo quarto auream catenam, & alijs Aulicis alia.

C. 24. pag. 313. Non sunt tanta merita Catholicorum, ut eorum causam Deus contra Hæreticos extraordinariè juvet.

C. 34. pag. 314. Bonitas Dei Germaniam & Belgium punientis habuit plumbeos pedes.

TRACTATUS VI.
De nimio Amore DEI erga homines, per nimiam erga Sanctos familiaritatem, & blanditias nimias declarato.

uia præcipuum, quod in Venerabilis MARINÆ de ESCOBAR mirabili vita aliquibus displicet, est tanta ejus felicissimæ Virginis cum Divina Majestate Familiaritas, ut in nullo Libro gestorum cujuscumque Sancti tanta, tam cumulata inveniantur amoris blandissimi miracula: ideo Tractatu isto specialiter difficultati huic conabor satisfacere. Breviter quidem, quia moles Libri plus non permittit.

CAPUT I.

Cur necesse sit, præsertim in novo Testamento tantas Blanditias Sanctis à DEO exhiberi.

I.

Infinitam Essentiam DEI, Infinitam quoque necesse est sequi Omnipotentiam, Infinitam Sapientiam, Infinitam Bonitatem, Infinitam Durationem, adeoque & Infinitam Misericordiam, Infinitam Justitiam. Scitum enim est: *Proprietas sequitur suum fundamentum*, ergo & Infinitæ Essentiæ DEI proprietates, seu attributa correspondere, & proportionari non possunt, si non sint etiam ipsæ perfectionis Infinitæ. Quis enim ignorat monstrum fore abominabile, si homo quispiam nasum haberet unius digiti, oculos verò æquales toti orbi terrarum, tibiam haberet unius milliaris, tibialia verò unius ulnæ? Natura nempe est, quæ sibi relicta omnia producit in pondere, numero, & mensura, nec nisi coacta & aliunde in suo ordine impedita declinat in monstra. Unde quidquid alicui proportionatum non est, non est ei naturale. Et Natura quidē pati violentiam potest, quia est divisibilis; sed DEUS simplicissimus, supremum Ens omnia Entia antecedens, nec habet in quo, nec à quo impediatur, cum sit ita indivisibilis & simpliciter simplex, ut nec Essentia ejus ab Existentia in eo distingvantur.

II. Jam ergo Fide tenemus DEUM esse infinitè justum, & propterea poenas ab illo posse infligi infinitas: tenemus quidem Fide, sed tamen in hoc ipso sentiendo experimur difficultatem, dū capere non possumus, quomodo Infinita amantissimi Patris Bonitas, per millies millena secula nullum sit levamen, nullam remissionem damnatis suis creaturis præstitura. Nec ullum Argumentum hanc nobis veritatem persvaderet, nisi in obsequium Fidei sanctæ Intellectum captivaremus. Non minorem sentimus difficultatem, dum Judicia DEI super nos mortales Abyssum multam, imò Infinitam, & incomprehensibilem consideramus, quòd Divina Bonitas, sincerè desideret salutem omnium, ita ut atrocissimam pro omnibus subierit mortem; & tamen simul, cum in manibus ejus sit salus omnium,

possitq; prædestinare omnes, non tamen prædestinet, sed unū, nihil præ alio meritum prædestinat, altero in numero damnandorum miserè relicto. Nempe *O Altitudo Sapientia, & Scientia DEI Infinita!*

Hoc est, quòd Doctores Sinenses attonitos tenet, dum sibi quidem Mysterium SSS. Trinitatis sinunt persvaderi, eò quòd dicant, prudenter omnino præsumendum esse majorem esse DEI Essentiam, quàm ut à nobis comprehendi possit; Mysterium verò Incarnationis rejiciunt, eò quòd Majestate Divina (dicunt) penitus sit indignum, & à ratione sit prorsus alienum cogitare DEUM fuisse suspensum in patibulo, poenâsque latronum sustinuisse. Quod Doctoribus contingit in Sinis, hoc nobis Europæis etiam Christianis contingit, quoad Mysterium Divini Amoris *blandi*, & amicæ cum creaturis Familiaritatis, dum nobis videtur indecorum, ut se tanta Majestas ad tam vilem cum hominibus simplicibus, cum pueris, cum idiotis, cum Mulierculis, cum Vetulis conversationem, ad tam contemptibilem *Familiaritatem*, ad tam vulgares quasi paris cum pari, *blanditias* & confabulationes demittat. Illam ergo, quam propter tantam inter supremâ Majestatis Divinæ magnitudinem, gloriam, & Dignitatem ex parte una, & inter humilitatem, vilitatem, ac indignitatem stabuli, asparum, sputorum, patibuli, crucis, virgarum, latronum ex parte altera impropportionem, Sinenses Doctores inveniunt difficultatē; hanc Nostrates inveniunt inter supremam Divinæ Majestatis Authoritatem, gravitatem, ex parte una, & inter tam blandulos amores, sermonationes sponsalicias, colloquia tenerrima ex parte altera.

III. Solvi difficultatem istam in Proæmiali mea Epistola, §. 3. per totum, cur oporteat Dominum DEUM æque mundo contestatam, manifestatamque facere infinitatem sui blandissimi Amoris; ac manifestat Infinitatem sui Paterni erga proles, aut Gubernatorij erga subditos, aut Pastoritij erga oves, aut Fili-

Filialis erga Parentes, aut Magistralis erga Discipulos, aut Dominalis erga servos amoris, aliorumque suorum Attributorum. Grande, & notatu dignissimum est, quod habet Venerabilis MARINA P. I. Lib. 5. c. 33. §. 1. *Amplior est, & major Amor, quo nos amavit CHRISTUS DOMINUS, quam id, quod pro nobis est passus.* Unde nullis indicijs potest ille Amor nobis satis innotescere, & omnes illæ blanditiæ, sunt adhuc minus quid & exiguum, ut Amorem DEI erga nos adæquent. Frustrâ ergo quasi de ipsamet Divina Majestate querimur, quod *nimis nimis* honorati sint ejus Amici, quod *nimis nimis* exceßerit ipse DEUS in suis favoribus, adeò, ut propter ipsam suam multitudinem reddantur creditu difficiliores. Nos nimirum præscribere Domino DEO terminos Amoris volumus, nè sit tam liberalis, nè nobis plura præstet, quam intelligere possumus, aut saltèm, ut à nobis accipiat, servetque hanc regulam: *Domine hæcenus talia non fecisti, ergo nec nunc facias.*

CAPUT II.

Cur DEUS nulli alteri sanctæ Personæ tantos blandi Amoris Favores, quam Venerabilis Marinæ exhibuerit.

I.

Querela hæc fundatur in eo, quòd in nullis Sanctorum gestis legamus literis traditos tam copiosos, tam inusitados favores, & tam mirabiles, quam in una Vita hujus Virginis MARINÆ. Responsio quidem in promptu est, quia *Dominus est.* Et quis Confiliarius ejus fuit? omnia, quæcunque voluit, fecit in Cælo & in Terra. Si Moyses cum Divina Majestate familiarissima, & frequentissima colloquia divinis non essent inserta literis, eandem paterentur difficultatem, diceremusque *nimiam, nimiam* esse DEI familiaritatem,

præsertim cum ad nullum alium unquam tantam legamus. Si ergo tanta fuit Domini DEI in antiquo Testamento familiaritas, quanto majorem necesse est inveniri in Testamento novo? utpote in Lege Gratiae, in Lege Amoris, in qua haud dubie debent inveniri Personæ Sanctæ, quæ incomparabiliter frequentiore habent, magisque mirabilem cum DEO præ Veteri Synagoga communicationem. Et hæc quidem tanta, tam blanda cum DEO familiaritas, cum sit unum ex signis credibilitatis S. veræ Ecclesiæ; cuivis Christiano magnopere gaudendum est, quod in hac mirabili Virgine hæc tam illustris Ecclesiæ prærogativa invenitur adimpleta.

II. Utrum autem nulli alteri Personæ sanctæ tam cumulatō Divina Majestas præstiterit Favores, certum non est, quia Divina Majestas noluit omnia scribi. Certum est id, quod Bollandus habet, B. Margaretam de Cortona non habuisse quandoque ad manum, virum, & Confessarium, cui posset, ut voluisset, dictare divinos erga se favores. Dubitari non potest, quin DEUS Sanctis Ecclesiæ Doctoribus, Sanctis Religionum Fundatoribus, plurima locutus sit; quæ tamen DEUS voluit latere; ut & omnia, quæ circa Beatam Virginem Matrem usque ad ejus obitum contigere. Quid de Sancta Maria Magdalena quotidie ad Cœlestia ab Angelis solita levare? Certè Sancta Rosa statim initio suæ Sanctitatis, humile hoc pactum, creatura cum suo Creatore iniit, nè quidquam earum gratiarum, quas ei Divina Majestas secretò largiebatur, evulgaret.

III. Nihilominus querelæ huic videtur in ipsa Vita VEN: MARINÆ satisfieri non semel gratiosis responsionibus, quarum aliquas sparsim attigi. Sic Parte I. Lib: 1. c. 3. §. 3. cum ipsamet VEN: MARINA, ad tam eximias gratias sibi à DEO collatas obstupescens dixisset: O Domine qualia sunt ista, adeò magna & extraordinaria, quæ mihi dicuntur, ut vix familia legantur contigisse Sanctis? Respondit Dominus;

Er-

Ergone mea potentia est alligata solum ad id, quod feci? Et iterum alias: o Domine quis unquam crederet tantas, ac tam mirabiles gratias, quibus me cumulas? Respondit Dominus: quare non crederentur? Nonne fuit majus meum, & bonitatis meae, ac misericordiae opus, quod sim factus homo propter hominem, & tantum illorum causa sum passus? quodque vobiscum manserim in Sacramento Altaris? si haec tam admiranda opera feci, nunquid non potero minora? Item alia vice, cum ejus praemagna debilitate in lecto decumbentis brachium apprehendisset, ut eam elevarer, eo quod ipsa se non posset erigere: illa vero ad tantam dignationem reluctaretur; Dominus dixit: Adverte quid est amplius, an hoc, quod hoc tibi faciam, ut me adjuvante consurgas, an vero, quod maneam in Sanctissimo Sacramento, ut me sumant ij, quos ego amo, propter quos etiam sumor a tot malis Sacerdotibus?

Et L. 1. c. 7. §. 2. ubi sequentia refert: Detinuit se CHRISTUS D. apud me tanto tempore, ut mihi assederit, audiendo mea dubia, iisque respondendo. Deinde se erexit Divina illius Majestas, & postquam aliquantum fuisset progressus, ac recessisset, vocavit me, dixitque: MARINA accede; subindicans mihi, se velle mecum corporaliter deambulare per cubiculum: sed fuit tantus meus pudor, qui me idcirco occupavit, ut me non potuerim movere. Quando vero potui loqui, mirata sum & conquesta, quod Divina Majestas dixisset ac voluisset talem rem facere, siquidem hoc me submersisset in mea abyssu, & dirupisset mihi cor praevementia doloris. Tum CHRISTUS Dominus suaviter respondit: quid ergo? nonne ego ita egi cum alijs, ut cum serva mea Catharina Senensi? Et nonne ego dixi, quod quanto magis se quis humiliaverit, tanto magis sit exaltandus.

IV. Item Parte 2. Lib. 2. c. 6. pag. 30. post alia plura, Angeli interrogaverunt Dominum Majestatis: quare Domine

cs

est tam multa largitus huic Creaturæ? Dominus autem respondit: quia volui, & quia in omnibus suis operibus, verbis & cogitationibus semper studuit se conformare meo beneplacito, & exequi meam voluntatem; ideoque illi tradidi clavim meorum Thesaurorum, & ipsius arbitrio commisi pacem ac bellum: Illa verò omnia faciet secundum meam voluntatem, & inspirationes ac motiones, quibus à me in omnibus dirigetur? Ego hæc verba (dixit VEN: MARINA) quæ DEUS loquebatur audiebam velut attonita, & aiebam: Domine quis adhibebit fidem tuis dictis? & respondit cum summa Majestate: non poterit rationaliter ijs denegare Fidem, quisquis crediderit me esse bonum, atque omnipotentem, & judicia mea esse iusta, viasque meas & semitas occultissimas.

Et eadem parte L. 2. c. 28. p. 331. vidit VEN: MARINA in Cœlo præparationem quasi ad magnum Festum, & Angelos mutuo se interrogantes, quænam erit ista anima tam felix, pro qua tantam Divina Majestas apparat solennitatem? quibus alij dicebant; quid miramur? cùm DEUS Dominus noster dederit suum Filium Mundo, pro hominum commodo, quid eorundem gratiâ non faceret? hæc omnia licet sint tanta, multò sunt minora, quàm sit DEUM mori pro homine; talia inter se conferebant illi superni spiritus.

Et L. 2. c. 31. dixit VEN: MARINA ad DEUM: quid est hoc mi DEUS! profectò gratiæ, quas mihi præstas, sunt adeò frequentes, ut dubitari possit, an tu illarum sis Autor? Respondit mihi tum Dominus quàm benignissimè: Dic Anima, quis propter omnes homines in Virgineis MARIÆ visceribus, homo factus est? Filius DEI, Domine, dixi. Bene est subjunxit Divina Majestas. Et quis cùm tantus esset Amor ipsius, est natus in paupere præsepio? quis fugit in Ægyptum? totamque vitam egit in summa rerum necessariorum penuria? Respondi etiam celeriter: Filius DEI, mi Domine. Hunc in modum
me

me interrogabat percurrendo omnia vitæ ac mortis suæ My-
steria; Et ego eodem tenore respondebam. Post hoc Divina
Majestas conclusit dicendo: Cum igitur DEI Filius tantum e-
gerit, passusque fuerit pro hominibus, idemque pro singulis,
si necesse esset, egisset ac passus fuisset, quid est mirum ab eodem
ob animam, quam singularissimè amat, eas præstari gratias,
quas experiris?

Item Lib: 2. c. 33. pag: 359. dixit ad eam DEUS. Anim-
adverte anima, ego sum omnipotens, & clementissimus, at-
que habeo infinitos modos, quibus me communicem animabus
ipsis diversissima manifestando.

V. Ecce quanta DEUS ipse de hac contra Revelationes
VEN: MARINÆ querela, dignatus est explanare, & causas sui
tanti erga eam favoris declarare. His tamen omnibus præmis-
sis, cum supra dixerim, non esse omnino certum, utrum nulla
alia Sancta DEO dilecta Persona Serva DEI tam copiosas, tam
dulces, tam teneras, tam amorosas cœlestis Sponsi blanditias
sit experta: ut hoc magis confirmem, quin imò reddam etiam
probabile, plures ex Sanctis similibus delicijs, favoribus, gra-
tijs, amoribus divinis abundasse, selegi speciminis causâ, duas,
unius ejusdemque Monasterij, eodem simul tempore, Ordinis
Sancti Benedicti Sacras Virgines, nempe Sanctam Gertrudem,
& Sanctam Mechtildem, in quarum actis similium cœlestium
blanditiarum inveniuntur etiam copiosissima argumenta, tametsi
haud dubiè, plurima adhuc alia ibidem à Conscriptoribus fue-
rint prætermissa: prout & ego hic prætermittam brevitatis
causâ plurima, præsertim ex S. Mechtilde, contentus ferè loca

Lectori indicare, ubi ipse, si velit, possit omnia expansè
invenire, & legere, nè Liber iste in molem
nimiam excreseat,

Hhh

CAPUT

CAPUT III.

*Favores & Blanditiæ Divinæ erga S. Gertrudem
Abbatissam Elpidianam ex Prologis, & Libro primo
ac secundo Revelationum collecti.*

I.

Ludovicus Blosius Vir tantæ Scientiæ ac Sanctitatis in suo Monili Spirituali narrat S. Gertrudem Anno ætatis suæ quinto (quod videtur contigisse circa Annum Domini 1270. cum librum primum suarum Revelationum scribere inceperit Anno 1289.) in sacro Religionis horto, unâ cum sancta Mechtilde plantatam in Monasterio Helpede in Saxonia medio milliari ab oppido Eisleben (infelicæ Patriæ fœdi Hœresiarchæ Martini Lutheri) Comitatus Mansfeldensis, Diœcesis Halberstadiensis, per Comites Mansfeldenses fundato, omnium virtutum splendore refulsisse. In Latinæ lingvæ cognitione brevi multum profecit. Munus Abatissæ quadraginta annis, & undecim diebus sanctè tenuit, prout annotatur L. 5. Revelationum ejus, c. 9. Mortua ex apoplexia minori, post viginti duas morbi hebdomadas. Ibidem c. 3. refertur, quòd illâ horâ, quâ obiit, in latitudine totius Orbis terrarum, nulla petitio iusta, fuerit ab ullo petita, quam D. DEUS non exaudivisset. *Pag: 597.*

Præcipuum ejus fuit studium sectari Cordis humilitatem, & munditiem, DEOque per ardentem charitatem! conjungi. Quoscunque homines videbat, sibi præponebat. Aliquando iter faciens præ nimia sui abjectione dixit ad Dominum: ah Domine mi! inter præcipua miracula quæ facis, istud valde eximium esse arbitror, quòd permittis, ut me vilissimam peccatricem terra ferat. Ad quæ verba Dominus benignè respondit: meritò terra se tibi calcandam præbet, quandoquidem

dem omnis Cœlorum dignitas ineffabili desiderio illam jucundissimam horam expectat, quâ te excipiat, & portet.

II. Narrat dein Ludovicus Blosius Dominum præclara quinque vulnerum suorum stigmata cordi ejus sensibilibus impressisse, & tam amœnam habitationem sibi in ea præparasse, tamque suaviter cor suum erga eam apposuisse, ut nisi homines scirent Potentiam & Bonitatem ejusdem Domini esse interminam, vix credere possent, illum tantam amicitie Familiaritatem, præcellentissimæ Matrisuæ Virgini MARIE demonstrasse in terris, quantam isti demonstravit. Hinc ipse Dominus de ea adhuc vivente loquens cuidam sanctæ personæ dixit: cum nemo hodie vivat, qui per puram intentionem, bonamque voluntatem, & veram fidelitatem mihi vicinior atque conjunctior sit, quàm illa; ego quoque ad nullam animam in carne degentem majori favore inclinor, quàm ad animam illius. Unde & nusquam convenientius invenire me potes, quàm in Sacramento Altaris, ac deinde in corde, & anima hujus sponsæ meæ, ad hanc enim admirabili modo, omnem Cordis mei divini delectationem converti. Cuidam quoque alteri sanctæ Vitæ Personæ in Monasterio eodem pro ea oranti Dominus dixit: quicumque verba ejus susceperint, monitisque ejus humiliter obederint, non deviabunt à salutis itinere, sed tandem ad vitam æternam pervenient. Et ipsi Gertrudi dixit: quoniam ego te misericorditer elegi, ut in te jucundè habitem, quicumque se tuis orationibus (piam fiduciam habens) commendaverit, per gratiam meam salvus erit. Et rursum: nullus eorum, qui verba tua cum humilitate audiunt, & secundum illa vitam suam piâ intentione instituunt, usquam perire poterit, sed via tutâ, absque errore veniet ad me.

III. Accepit etiam cum promissis à Divina & nunquam fallente veritate, quòd sicut in morte CHRISTI virtus Amoris nobilissima separavit animam à Corpore ipsius Domini JESU:

Hhhh 2

ita

ità in morte ipsius Virginis Divinus amor deberet omnes vires ejus consumere.

Lib: 1. c. 4. Cuidam, cujus precibus se Virgo hæc commendaverat, oranti pro eadem Dominus respondit: ego totus sum illius: nempe cui me tota affectione inter ejus amplexus, tanquam captivus tradidi. Amor enim divinitatis adeo eam inseparabiliter mihi univit, quomodo aurum & argentum per ignem simul in unum conflantur Metallum. Ego Dominus omnes pulsus ac motus cordis ejus excito, moveoque meo spiritu amoroso ac vivifico, in quo voluptatem habeo incomprehensibilem. *pag: 19.*

Accidit alio tempore, ut Dominus cuidam dixerit; hæc pro qua tu oras, Columba est mea absque felle; ipsa mihi Lilium est electum, quod manibus portare affecto. Ipsa rosa denique est mea suaviter olens. Ipsa præterea mihi Flos est vernans, ac semper virens, in quem respiciendo oculis meis perquam jucundam haurio amoenitatem. Postremo, ipsa est Civibus coelitibus dulcis, suavissimaque Harmonia, quam efficiunt omnes illæ, quas adeo æquanimitè fert; adversitates, veluti tintinnabula aurea in corona mea suspensa. *pag: 20.*

IV. Ante Quadragesimam accidit, ut Dominus cuidam de ea loquens dixerit: tanta hujus animæ delectatione afficior, ut sæpè numero, dum ab alijs hominibus offendor, me ipsum in ea quieturus insinuem, atque pressuram cordis, aliãve molestiam tum corporis ei destinem, quam dū tantā, ut solet gratiarum actione suscipit, tantā suffert humilitate ac patientia, tantā denique illam devotione in unione Passionis meæ mihi offert, omnino me reddit placatum, facitque ut innumeris hominibus illius amore parcam. *pag: 20.*

Alia quædam devota audivit Dominum sibi dicentem: electæ hujus meæ, qui videntur defectus, justò magis vocari possunt animæ ejus profectus. Eam ob rem, quasi pro singulis

gulis defectibus, unde se adeò humiliat, singula largitus sum ei dona. Nihilominus tempore opportuno, cum omnes defectus mutavero ei in virtutes, & splendidum lumen, Anima ejus fulgebit. pag: 21.

Capite 12. Accidit aliquando, ut diceret Domino: Ego nequeo ullam in terris rem invenire, quæ me delectet, præter te solum dilectissimum. Cui Dominus quasi vicem rependens: & ego neque in cælis, neque in terris quid reperio, in quo sine te oblecter. pag: 43.

Capite 15. Dixit ad eam Dominus: Quantumcunque, quisque per te sperat se accepturum, tantundem à me absque dubio obtinebit. Quidquid præterea cuivis nomine meo promiseris, hæc ei certissime præstabo. Nam etsi fortasse humana imbecillitate præpeditus ille, pro quo tu oras, operationem meam non senserit; nihilominus tamen juxta promissionem, in anima illius ego profectum operabor. Cum postea hanc divinam promissionem admirabunda recoleret à Domino sciscitata quinam fieri posset, ut se vilissimam hac gratiâ dignaretur: cui Dominus: nonne universalis Ecclesia confitetur me soli Petro olim dixisse: *Quidquid solveris super terram, erit solutum in Cælis*! cum tamen simul credat hodie quoque hoc ipsum fieri per Ministros Ecclesiæ. pag: 58.

Capite 19. Ad hoc elegi te, ad hoc utor te, ut sis tanquam Triclinium Thesaurorum meorum, in quod gratiarum mearum divitias colligam.

V. Lib: 2. Cap: 6. In Nocte Sacratissima Nativitatis Domini Sancta Gertrudis sensit sibi divinitus dici: sicut ego sum Figura substantiæ DEI Patris in Divinitate, sic tu eris Figura substantiæ meæ ex parte Humanitatis, suscipiens in Tuam Deificatam Animam emissiones meæ Divinitatis, sicut aer suscipit radios solaris claritatis, ut hoc radio unitivo medullitus penetrata habiliteris ad familiariorem mei unionem. pag: 90.

Capite 21. Cùm die quadam mente revolveret, quòd Dominus dona sibi divinitus data, non more pollicitantium manu ad manū firmaverit, ipse Dominus se his objectionibus satisfacturum promisit, & statim utriusq; manibus Cor suum Divinum pandens, jussit eam dexteram extendere, & sic patefactum Cor suum retrahens, manu ejus inclusā dixit: Ecce dona tibi collata me tibi illibata servaturum promitto. Ità tamen, quòd si ad tempus dispensativè ipsorum effectum subtraxero, obligo me postmodum triplici lucro id persoluturum ex parte Omnipotentiae, Sapientiae, & Benignitatis virtuosae Trinitatis, in cujus medio ego vivo & regno verus DEUS per aeterna saecula saeculorum. *pag: 121.*

Capite 22. Narrat ipsa de quadam admirabili visione & subdit: O! quid amplius dicam de ista dulcissima visione! quia, ut verum fatear, prout mihi videtur, omnium lingvarum Eloquentia per omnes dies vitae meae hunc praeclarum modum te videndi etiam in Caelesti gloria, nunquam persuasisset, si dignatio tua, DEUS meus unica salus Animae meae, per experientiam me ad illam non induxisset. Hoc tantum dicere me delectat, sicut ego aestimo, verè dico, nisi Divina Virtus tua contineret hominem, nunquam permetteret animam in corpore permanere, cui hoc vel momentaneè gustare indultum foret. *pag: 123.*

Sæpius experta sum (pro quo tibi gratiarum actiones in unione mutui amoris semper Venerandae TRINITATIS offero) dignationem praevalentissimi osculi tui in tantum, quòd quandòque sedenti mihi, & intendenti tibi in intimis, & legenti horas canonicas, aut vigiliis pro defunctis, sæpe inter unum psalmum decies vel pluries prae dulce osculum infixisti ori animae meae, osculum, quod omne aromaticum excedit, & mellis poculum. *pag: 124.*

VI. *Capite 23.* O Domine hoc donum omni creaturae stupen-

Stupendum, & reverendum mihi contulisti, quod scilicet ab illa hora, anno vitæ meæ vigesimo quinto, usque in præsens nunquam ad oculi nictum sensi vel cognovi te cordi meo alienatum. *pag: 125.*

Addidisti etiam mihi inter hæc, inæstimabilem amicitiae familiaritatem impendere diversis modis illam nobilissimam, Arcam Deitatis; scilicet Deificatum Cor tuum præbendo in copiam omnium delectationum mearum, nunc gratis dando, nunc ad majus indicium mutuae Familiaritatis illud mihi pro meo commutando; cum quo & tam occulta secretorum Judiciorum, simul & deliciarum tuarum mihi manifestasti, ac amicissimis blanditatibus animum meum multoties liquefecisti, quod si ignorarem abyssalem supereffluentiam dignationis tuæ, mirarer, si intelligerem te præ omni creatura soli dignæ Matri tuæ benignissimæ tecum regnanti in Cælo, tam dignantissimæ blanditatis exhibuisse affectum. Insuper tam fidelibus promissionibus allexisti animam, qualiter mihi in morte & post mortem velles benefacere. Ad cumulum beneficiorum hoc addidisti, quod mihi dulcissimam Matrem tuam Beatissimam Virginem **MARIAM** in Procuratricem tribuisti, & me sæpius affectui, ejus admirabiliter commendasti, sicut unquam diligentius fidelis Sponsus delectans dilectam Sponsam Matri propriæ potuit commendare. Super hæc omnia multoties induxisti, imò rapuisti me in talem Tui Unionem, quod supra miraculum miror, quod post illas horas potui amplius vivere, sicut homo inter homines. Item beneficium illud, quod tu vestitor siderum mihi impendisti in amænosa intimorum meorum dispositione, Sanctissimorum vulnerum tuorum impressione, secretorum revelatione, & familiarium ac amicissimarum blanditarum exhibitione. Domine **DEUS** Creator, & Regnator meus; tu desuper effluenti abyssu pietatis tuæ me certificasti verissimè, quod quicumque etiam peccator, cum supra scripta inten-

intentione voluntatem suam ad hoc flexerit, quòd ad tui laudem, mei memoriam facere voluerit, nunquam præsentem vitam terminabit, antequam tu cum tali speciali gratiâ remunereris, quòd tibi conversatio ejus placeat, & etiam in corde ejus habeas aliquam familiarem delectationem. Pro quo tibi sit laus illa æterna, quæ de increato amore procedens jugiter effluit in te ipsum. *pag: 135.*

CAPUT IV.

Favores Divini ex Libro 3. Revelationum Sanctæ Gertrudis.

I.

C*apite 5.* Die S. Mathæi Apostoli in impetu virtutis se declarans Sancta Gertrudis de sinu Domini, in quo deliciarum videbatur, dejecit se ipsam in pavementum, quasi vile quoddam cadaver cum his verbis: Ego, Domine expono me ad omnia toleranda, quæ tibi potuerunt fore laudabiliora. Unde Dominus protinus festinè consurgens juxta illam in pavimento recubuit; quasi illam ad se recolligans & dicens: *hoc est meum.* Ex cujus virtutis potentia illa animata erexit se ad Dominum, & dixit: ita Domine mi: opus manuum tuarum ego sum: & Dominus; hoc etiam superadditum tibi est, quòd amor meus tibi in tantum intricatus est, quòd sinè te vivere nolo. Ad quod mirans illa dixit: cur Domine mi, sic loqueris? habes infinitos in Cælo & terra amicos, cum quibus beatè vivere possis, licèt creata non essem. Respondit Dominus: qui semper caruit aliquo membro, nullo dolore cruciatur, ut ille, cui adulto abscinditur. *pag: 144.*

Capite 7. Die SS. Innocentium dixit CHRISTUS D. Sanctæ Gertrudi; si quis humanâ tentatione impugnatus, firmâ spe

—spe sub protectionem meam confugerit; inter cæteros est, de quo possum dicere: *Vita est columba mea*, tanquam electa ex millibus, quæ in uno ocellorum suorum transvulneravit cor meum Divinum, in tantum, quòd si scirem me non posse subvenire illi, hæc tam molesta esset desolatio cordi meo, quòd eam omnes cælestes deliciæ non possent alleviare. pag: 146.

Capite 8. Dominus dixit S. Gertrudi, audi à me quòd sanguine meo sis redempta, & perpende, quòd totum tempus triginta trium annorum, quo in hoc exilio laboravi pro te nihil aliud extitit, quam Legatio desponsationis tuæ. Audi à me quòd spiritu meo sis dotata, & disce, quòd sicut in Legatione illa totos triginta tres annos corpore laboravi; sic in spiritu celebravi jucundissimas exoptabilissimásque Nuptias pro tui conjunctione. pag: 148:

Capite 11. Quâdamvice dum ex consideratione indignitatis, & pusillaminitatis suæ nullo modo posset ad fruitionem contemplationis anhelare solito modo, tandem gratuitâ miseratione Domini JESU CHRISTI, videbatur sibi procedere pro modulo sui desiderij, & Regi Regum assistere in ea forma, quâ Esther æstimatur astitisse Regi Assvero. Quam benigna dignatio Salvatoris, allocuta est his verbis: *Quid jubes Domina Regina.* pag: 156.

II. Cap: 12. Dixit ad Dominum: ecce dilecte mi non solum viscera, sed etiam omnia membra mea commota sunt super te. Ad quod Dominus: quod à me fluxit & in me refluxit, ego optimè scio, & sentio: Sed tu adhuc mortali carne circumdata, nunquam nòsse poteris, qualiter è converso tota dulcedo Divinitatis meæ est super te commota. Hoc tamen scito, quòd ex hujus gratiæ commotione tu apud me suscepisti talem glorificationem, qualem corpus meum suscepit in monte Tabor coràm tribus Discipulis meis, ut ego dulcore charita-

tis commotus gratulabundè de te dicere possum: *Hic est Filius meus dilectus, in quo mihi bene complacui.* pag: 159.

Capite 18. Post sacram Communionem exhibuit se illi Dominus in specie Pelicani, sicut depingi solet, rostro transfodiens Cor suum. Quod cum illa admirans diceret; quid mihi Domine mi, per hanc similitudinem niteris persuadere? Dominus respondit: ut consideres quàm inæstimabilibus amoris stimulis propulsus, hoc tam inæstimabile donum (Sacramentum Altaris) porrigo. Quod si incongruum non esset addendum, post hoc donum magis eligerem mortuus remanere, quàm hoc donum ab amante anima continere. pag: 182.

Quadam die communicatura, dum frequentiore, quàm solebat more propter indignitatem suam se subduceret, exorabat Dominum, quatenus ipse pro se Hostiam ipsam Sacro-Sanctam in persona susciperet, & sibi met incorporaret. Ac deinde ex nobili spiramine suavissimi afflatus sui, singulis horis tantum sibi aspiraret, quantum exiguitati suæ congruere cognosceret. Hinc cum per moram in sinum Domini, quasi sub umbra brachiorum ejus quievisset, ita quod latus suum sinistrum benedicto lateri Domini dextro applicatum videretur, post modicum erigens se cognovit ex amatorio vulnere sanctissimi Lateris Domini se in sinistra, quasi roseam cicatricem contraxisse. Post hæc dum ad suscipiendum corpus CHRISTI accederet, ipse Dominus, videbatur ore suo Deifico in se suscipere Hostiam illam Sacro-Sanctam, quæ pertransiens intima illius de vulnere Sacro-Sanctissimi lateris ipsius progrediebatur & quasi Emplastrum, super idem vivificum vulnus se coaptavit. Unde Dominus ait ad eam: ecce hostia hæc conjunget te mihi eo modo, quòd ex una parte contegat cicatricem tuam, & ex alia parte vulnus meum utriusque nobis factum Emplastrum. Quod tu singulis diebus, quasi tergendo commutes, cum devotione revolvendo hymnum: *JESU nostra redemptio.* Pag: 190.

• *III. Capite 19.* Horâ quâdam orationis, dum Beatissimam Matrem DEI collaudaret, tandem dixit ad Dominum: quoniam ad hoc, Frater mi, factus es homo, ut omnes defectus humanos suppleas: nunc etiam pro me dignare Matri tuæ Beatissimæ supplere, si quid ego minùs dignè in laudibus ejus persolvi. Ad quæ verba reverentissimè Filius DEI assurgens, & procedens coram Matre sua genua flexit, & motu capitis eam decentissimè & amicabilissimè salutavit: quod sibi meritò gratum esse decet obsequium, cujus imperfectio per amantissimum Filium tam copiosè suppletur. *pag: 192.*

Capite 20. Moris erat sibi sicut amantium est, totum quod placet & sapit, retorquere in amatum, unde quodocunque aliquid audiebat legi vel cantari in Laudem sive salutationem Virginis aut aliorum sanctorum, quod suavius movere potuit affectum, per hoc semper magis intendebat ipsi Regi, Regum Domino sibi præ omnibus (ut justissimum erat) unicè dilecto, & electo, quàm ipsis sanctis, quorum festum vel memoria recolebatur. Unde & in festo Dominico Annunciationis dum Beata Virgo sæpius in prædicatione extolleretur, & nulla fieret mentio de opere saluberrimo Incarnationis Domini: illa hoc molestè ferens, & à prædicatione rediens, dum pertransiret coram altari generosæ Virginis; ipsamque salutando sentiret se non pleniter suavi affectu erga ipsam Matrem omnis gratiæ commoveri, sed potius in omni salutatione ipsius ac laude semper ad JESUM benedictum fructum ventris sui affectuosius intendere, formidare cœpit, se ex hoc indignationem, tam præpotentis Reginæ incursum. Cujus trepidationem benignus Consolator blandè removit, dicens: Nè timeas Charissima, quia talis salutatio vel laus dilectæ Genitricis meæ, quâ plus mihi intendis quàm optimè sapit sibi. Sed tamen quia conscientia tua te ex hoc gravat, studeas, de cætero, coram altari intemeratæ Matris meæ Imaginem salutare devo-

tius, meam insalutatam prætermittendo. Ad quod illa: hoc absit à me, inquit, ô unicum! totum bonum meum, Domine, quia in hoc Cor meum nunquam potest consentire, ut te à quo pendet tota salus, imò vita animæ meæ, deserto, possim ad aliquem affectum meum dirigere salutandum. Cui Dominus blandè respondit: Consenti mihi nunc Amica mea: & quotiescunque sic Matrem meam salutaveris me omisso, hoc ego acceptabo simul & remunerabo vice perfectionis illius, quâ quis verè fidelis me omnium centuplorum centuplum prompto animo relinquit, proter majorem mei exaltationem.

pag: 195.

IV. Cap: 21. Dominica prima post festum Trinitatis apparuit ei Dominus in horto quodam florifero amœnitate, viriditateque amœnoso, & quasi cubans in meridie, sedensque in folio Regali, quasi crapulatus à vino charitatis suaviter obdormisset: cujus pedibus illa se provolvens, cum ipsos more sibi solito sæpius deoscularetur, variòque modo blandiretur dilecto; per triduum tamen nullam omnino, prout consueverat, ipsius poterat obtinere fruitionem.

Hinc die quarto intra Missam ipsa non sufferens, ultra dilecti sui dormitationē surgens de pedibus in impetu fervoris, irruit super pectus ejus, cujus utique ardebat desiderio, nitebatur vi Amoris ipsius dilecti sui interrumpere somnum. Deinde tanquā excitatus Dominus utriusque brachijs blandè ipsam circumplectens, & fortiter sibi adstringens, ait: *Ecce quod concupi-vi, jam teneo.* Quia quemadmodum vulpes aves capere cupiens in terra jacet resupina, velut mortua, super quam aviculæ liberiùs volitantes, cum ipsam discerpere incipiunt, mox ab ipsa capiuntur; sic & ego amore tuo (ut humano more loquar) æstuans, hac similitudine usus sum, quo te ex toto, te mihi inferentem totam possiderem. pag: 195.

Capite 25. Quadam vice, dum studeret singulas notas & ver-

- Verba cum intentione proferre, & in hoc ex humana fragilitate sæpius impediretur, mæsta ex hoc dixit intrâ se: Et quis ex tali studio provenire poterit profectus, cui tanta inest instabilitas. Cujus mœsticiam Dominus non sufferens præsentavit illi quasi proprijs manibus cor suum Deificatum in similitudine lampadis ardentis dicens: Ecce cor meum dulcissimum semper venerandæ TRINITATIS organum, oculis mentis tuæ prætendo, cui omnia, quæ per te minùs supplere sufficis, fiducialiter pro te supplenda commendabis. Et sic omnia coram oculis meis apparebunt summè perfectæ. Quia sicut servus fidelis, qui Domino suo ad quæ beneplacita paratus assistit, sic cor meum deinceps semper aderit tibi ad hoc, ut omnes negligentias tuas quâlibet horâ pro te suppleat. Quam inauditam dignationem Domini ista expavescendo admirans, valde incongruum judicavit, ut Cor Domini sui dignissimum divinitatis Gazophylacium omnisque boni contentivum, sibi tantillæ tanquam servus Domino ad supplendas negligentias suas dignaretur astare; cujus pusillaminitati Dominus benignè obvians hac ipsam similitudine dignatus est animare. Quemadmodum, ait, si tu haberes vocem multum sonoram, & valde flexibilem, & insuper maximam haberes delectationem ad cantandum, si astares alicui malè cantanti, qui valde gravem & dissonam haberet vocem, in tantum, quòd vix cum magno labore aliquid posset proferre, certè indignareris, quòd tibi hoc optimè prævalenti & promptissimæ ad cantandum non committeret, quod ipse, tam difficulter proferret: sic procul dubio Divinum Cor meum humanam recognoscens fragilitatem similiter, & instabilitatem, cum inæstimabili semper desiderio expectando optat, quousque tu si non verbis saltèm aliquo nutu committas sibi supplendum pro te ac perficiendum quidquid per te minus perficere potes. Illud autem sicut ex omnipotenti virtute facillimè prævalet, & inscrutabili sapientia optimè scit, sic ex natu-

rali mihi insita benignitatis dulcedine, benevolentissima hilaritate persolvere summopere concupiscit. *pag: 199.*

V. *Capite 26.* Cum ego Amor DEUS elegerim te, desidero, ut perman eas mecum indissolubili unione, sicut homo invitus amittit spiritum suum, sine quo nec ad horam vivere posset. Inter hanc suavissimam delectationem illa sensit se inæstimabiliter mirabili modo per eandem sæpius dictam fistulam cordi Dominico intrahi, & sic invenit se feliciter in intimis Sponsi & Domini sui. *pag: 122.*

Capite 29. Recolens vice quâdam diversos casus instabilitatis, Conversa ad Dominum dixit: mihi adhærere tibi soli, Dilecte mi, bonum est; tunc Dominus acclinatus circumplectebatur eam dicens: & mihi adhærere tibi semper suave est, Dilecta mea. *201.*

Capite 39. Cum cantaretur Antiphona, *Benedicens*, ipsa quasi in persona Noe astitit Domino postulans benedictionem, quam cum esset consecuta, Dominus vice versâ videbatur benedictionem postulare; per quod intellexit, quod homo tunc benedicat Domino, quando in cogitatione dicit se pœnitere, quod unquam Creatorem suum offenderit, & ejus auxilium expostulat, ut de cætero peccata caveat. *pag: 214.*

Capite 33. Quadam vice majori erga Dominum æstuans desiderio dixit ad Dominum, Eja: Domine mi possum nunc orare? cui benignissimus Dominus respondit blandè: ita Domina Regina, tu optimè mihi potes imperare, quia voluptati tuæ ac desiderio in omnibus promptius obtemperabo, quàm unquam Minister aliquis Dominae suæ possit ministrare. *pag: 131.*

VI. *Capite 43.* Feriâ quâdam sextâ dum totam noctem meditationibus & desiderijs incensa duxisset infomnem, memor quod affectu clavos ferreos de quadam imagine Crucifixi, quam prope se semper habebat; extraxerit, & pro ipsis Cario-
phy-

• phyllos redolentes infixerit, dixit ad Dominum: O dulcissime Amator! qualiter acceptas quòd clavos ferreos dulcissimis vulneribus manuum, pedumq; tuorum extrahendo Cariophyllos bene olentes cum affectu imposui? Respondit Dominus: ego affectum illum in tantum acceptavi, quòd pro eo omnibus vulneribus peccatorum tuorum balsamum nobilissimum meæ Divinitatis infudi. Unde omnes sancti æternaliter miro modo delectabuntur, quia vulnera tua placebunt ex infusione pretiosi liquoris. Tunc ista: Nunquid Domine mi, similiter omnibus facturum es, qui idem faciunt? Respondit Dominus: non omnibus, sed illis, qui simili affectu hoc faciunt, ego similiter bene faciam. Qui verò tuo exemplo incitati, idem faciunt devotione, quâ possunt, eos secundo sufficienter remunerabo. Hinc ista imaginem Crucifixi accipiens ipsam suavis osculis, artibusque amplexibus demulcens, multimodè blandiebatur. Post moram verò dum sentiret defectum Cordis ex vigilantia, deponens crucem ait: Vale dilecte mi, & habe bonam noctem, & permitte me dormire ad recuperandas vires, quas in meditatione tecum penè totaliter expendi. His dictis avertit se ab imagine volens dormire. Cùmque sic repausaret, extendens Dominus dextram suam, quasi de cruce, super collum ejus, tanquam ad amplexandum eam osque suum roseum auri ejus applicans blando susurro ait illi: Audi me, dilecta mea, quia tibi nunc pro fescenninis, amatoria decantabo. Et inchoans dulcissimâ voce sub modulatione, quâ cantatur hymnus *Rex CHRISTE factor omnium*, hunc versiculum decantabat:

Amor meus continuus,
Tibi Langvor assiduus,
Amor Tuus suavissimus
Mihi Sapor gratissimus.

Quo finito ait: Adjunge tu nunc, dilecta mea, pro Kyrieleyson, quod per singulos versiculos hymni *Rex Christe* adjungitur,
peti-

petitionem quamcunq; desideras & dabitur tibi. Tunc ista devotè pro quibusdam causis exorans, benigniùs est à Domino exaudita. Post hæc Dominus iteratò versiculum decantans, ipsòque finito, iterum eam ad orandum incitans eundémq; versum alternatis vicibus sæpius decantando repetens, nullatenus eā corporali somno quiescere permittebat, donec omnibus penè viribus consumptis refici oporteret. Et hinc tandem ante ortum diei modicè obdormivit: & ecce Dominus JESUS qui nunquā deest, sed semper se diligentibus præsto est, apparuit illi per somnium, ipsámq; in sinu suo delicatè confovens, quasi in vulnere savifluo benedicti lateris sui, cœnaturam saporissimam ipsi confecit, & mirâ blanditate singulas offas manu suâ delicatâ ori ipsius ad reficiendum imposuit. Unde ipsa in somno saviviùs recreata, evigilavit, atque recuperâsse se vires sentiens, devotas Domino gratias referebat. *pag: 248.*

VII. *Capite 50.* Dixit ad eam Dominus: sicut tu certè affirmas, te in nulla creatura delectari posse extra me; sic & ego in Divina virtute mea confirmo, quod nunquam in ulla creatura delectari volo extra te. Et illa: & quid, ô Amator dignissime, invenire potes in me omnium creaturarum periplemate, in quo utcunque delecteris? Respondit Dominus: Visus Divinitatis meæ inæstimabili modo delectatur inspicere te, quam mihi tam acceptabilem per omnia in tam diversis & multis donis gratiarum creavi. Auditus etiam meus Divinus quasi quibusdam savivissimis musicis instrumentis afficitur, in omnibus & ex omnibus verbis oris tui, quibus mihi blandiris, si ve pro animabus purgandis orando, si ve aliquos corripiendo, aut instruendo, aut qualicunque modo ad laudem meam verbum aliquod proferendo. Ex quo licet etiam nulla utilitas in aliquo homine, vel causa sequatur, tamen hoc ex bona voluntate, & ad me directâ intentione tua, savivissimè insonat auribus meis, ac medullitus commovet intima Cordis mei Divini.

- **Mi.** Spes quoque tua, quâ jugiter ad me anheles, aspirat olfactui meo suavissimi Odoris delectamentum. Omnes quoque gemitus & desideria tua dulciter sapiunt mihi super omnia aromata: Amor quoq; tuus præstat mihi delectamentum suavissimi Amplexûs. *pag: 258.*

Capite 51. Cum videret cæteros ad sermonem properare, querulâ mente dixit ad Dominum: tu scis Amantissime, quòd nunc ex corde libenter audirem prædicationem, si infirmitate non detinerer. Cui Dominus: visne charissima ut ego tibi prædicem? ait illa libentissimè. Tunc reclinavit illam Dominus super Cor suum, ita quòd anima cordi suo applicabatur Divino. Cumque ibi anima per moram dulciter requievisset, sensit in Corde Domini duos mirabiles & valde svaves pulsus. *pag: 260.*

VIII. *Capite 57.* Nocte quâdam cum ex multimoda consolatione præsentiae Domini, & spiritualium intellectuum exercitatione nimis esset debilitata, accipiens uvas recreavit se tali intentione, quòd ipsum Dominum in semet ipsa reficeret. Quod Dominus magnificè acceptans ait: modò fateor recompensatam mihi amaritudinem illam, quam de spongia in cruce pro amore tuo bibi, quoniam pro ipsa jam de corde tuo indicibilem dulcedinem fugo. Et quantò tu purius ad laudem meam corpus tuum recreaveris, eò svavius ego me profiteor in anima tua refectum. Hinc cum ista, pelliculas & acinos uvarum in manu congregatas in medium domûs projiceret, affuit & Satan omnis boni persecutor, qui hoc, quod abjecerat, recolligere conabatur, quasi ad testificandum culpam infirmæ, quia ante matutinas contra religionem comedisset. Cumque unam de iisdem pelliculis velut duobus digitis vix attigisset, illicò intolerabilis cruciatûs ardore combustus terribiles emitendo latratus de domo concitus profiliit: diligentissimè observare studens, nè aliquam ultra pede contingeret, ex cujus tactu cruciatum persenserat tam intolerabilis poenæ. *pag: 269.*

Kkkk

Capit-

Capite 63. Dominus ei dixit. Quemadmodum Mater habens puerulum tenerrimè sibi dilectum, quem semper sibi adesse desiderans, cum puer ad contubernales gratiâ collusionis vult discurrere circa quælibet vicina larvas, vel aliqua apponit horrenda, unde puer territus, currat in sinum suum; sic ego desiderans te lateri meo nunquam deesse, permitto ut amici tui tibi in aliquo contrariantur, ut dum in nulla creatura plenam fidelitatem reperis, eò ardentius ad me recurras, quantò apud me omnium delectationum, fidelitatum abundantiam stabiliorum recognoscis. Hinc assumpsit eam Dominus in sinum suum, quasi tenellum infantulū & multis modis illi blandiebatur, apponensque os suum Deificum auri ejus & diversimodè ipsam demulcens ait: sicut Mater benigna tenello infantulo, per oscula lenire solet quæque sibi adversa: sic ego per blandissimum susurrium amatoriorum verborum tenere tibi desidero universa gravamina tua & contrarietates. Cumque sic per moram in sinu Domini infinitis Divinarum consolationum blanditijs multipliciter fuisset delectata, præbuit ipsi dominus Cor suum dicens: perspice nunc, Dilecta mea, omnia Cordis mei interiora, & perpende diligenter, quàm fideliter omnia, in quibus mihi unquam intendisti, disposui & ornavi, ad utilissimum & saluberrimum Animæ tuæ profectum: & considera si vel saltem unius verbi contra me causari potes infidelitatem. *pag: 275.*

Dominus quasi ingenti gaudio & amicissima blanditate se de patibulo Crucis demittens, in amplexus suavissimos eam suscepit, ineffabiliter exultans, eamq; blandè vulnere lateris sui sanctissimi applicans ait: bene venias mihi Charissima, vulnorum meorum Emplastrum lenissimum omniumque dolorum meorum Relevamen suavissimum. *pag: 277.*

CAPUT

CAPUT V.

Blanditiæ Cælestes ex Libro 4. Revelationum Sanctæ Gertrudis selectæ.

I.

Capite 3. Dixit Dominus ad S. Gertrudem: Quoniam tu à me Imperatore Imperatrix effecta es, omnes Principes Cœlestes ita obtemperant tuæ voluntati, quòd si tu aliqua eos facere jubes, statim ad verificandum verba tua summopere studerent ea, cum summa festinatione complere. pag: 345.

Capite 7. Et adjecit Dominus: In veram emendationem omnium delictorum tuorum suscipe à me hanc tibi injunctam satisfactionem, ut scilicet per circulum totius anni istius, diebus singulis semper perficias aliquod opus bonum in unione pietatis illius, quâ ego remisi tibi omnia tua peccata. Quod cum illa gratanter susceperet, hæsitans tamen aliquantulum ex humana fragilitate, dixit: Et quid faciam Domine, si hoc aliquomodo neglexero, cum occasio se præberet? Ad quod Dominus: Quare velles hoc negligere, quod tam leviter potes perficere? Nam benignitas mea acceptabit, si unum vestigium tali intentione calcaveris, seu calamus de terra levaveris, vel verbum unum locuta fueris, vel alicui gestum amicabilem exhibueris, vel etiam si requiem æternam pro defunctis, sive quodcunque verbum pro peccatoribus, vel etiam justis dixeris. Et in his illa nimium consolata, orare cæpit pro amicis suis specialibus, ut ipsi etiam à Divina Misericordia talem acciperent consolationem. Cujus precibus Dominus annuens, sic ait: Omnes qui volunt tecum persolvere satisfactionem tibi injunctam, simul tecum habeant remissionem omnium peccatorum suorum ex hac mea benedictione: & sic iterum longè

extensa venerabili manu, dedit benedictionem. Deinde subjunxit Dominus: O quàm uberrimæ benedictionis affectu suscipere vellem illum, qui post circulum anni reverteretur ad me reportans mihi talem fructum, quòd per totum annum sic studuisset operibus charitatis, quòd opera illa excederent numerum omnium peccatorum suorum, in quibus eodem anno deliquit! Ad quod cùm illa, quasi diffidens diceret: Quomodo hoc fieri potest, cùm sensus hominum sint proni ad malum, in tantum, quòd homo singulis horis multipliciter delinquat? Dominus respondit: Et quare videtur hoc tibi tam difficile, cùm ego DEUS tantùm delecter in ea re, ut si homo vellet aliquantum studij adhibere, ego DEUS omnipotens paratus sum illi cooperari adeò, ut mea divina Sapientia deberet prævalere. Et cùm illa diceret: quid tunc Domine proponis illi dare qui hoc ipsum tuo auxilio perfecerit? Dominus respondit: hoc tibi aptius non potest dici, quàm his verbis: quòd oculus non vidit, nec auris audivit, nec in cor hominis ascendit. O quàm felix esset, qui ante exitum suum vel unum perficeret annum in tali studio pietatis, vel ad minùs unum mensem! quia certè & ipse posset sperare se similia de manu Domini benignissimi accepturum.

Capite 9. Dixit Dominus: tota Divinitas mea salutat te, delectamentum Animæ meæ, mittens tibi obviam omnem fructum sanctissimæ Humanitatis meæ. *pag: 376.*

II. Capite 14. Dominus mirâ blanditatis ex hilaratione astantis coram Anima dixit: Eja Domina Regina, consolare me tunc, sicut ego sæpius te consolatus sum. Sicque in his verbis Dominus Omnipotens fidelis Animæ zelosus Amator ultra modum delicatè nimis se inclinabat tanquam osculum ab ea accepturus. Tunc Anima ad tam inauditæ dignationis Domini propositionem stupefacta, cum humillima devotione, respondit, quasi ex intimis cordis medullis proferens hæc verba:

Ua: Eja tu DEUS Creator & ego Creatura. In quibus verbis mox mira dispensatione Anima, Divina virtute DEI videbatur cum Domino suo feliciter jucundari. Tunc dixit ad Dominum: Dignare nunc Pater misericordissime, mihi ancillæ tuæ, saltē parvam somni quietem præstare post sumpta ob nimium Cordis defectum aromata, ut possim hodie tua vivifica percipere Sacramenta. Ad quod Dominus: ista unio, qua modò Anima tua mihi est unita, multò magis te reddit sobriam, quàm ul-
lus somnus corporalis efficere posset. Hinc sub Missa, quæ erat comunicatura, videbatur se adstare Domino querulans, quòd propter infirmitatem oppoteret eà Missâ carere. Cui Dominus ait: lege *Confiteor*; quod dum illa humili devotione compleisset adjunxit Dominus: *Misereatur tui Divinitas mea, & dimittat tibi omnia peccata tua*: extensâque venerabili dexterâ suâ dedit illi benedictionem suam. Ad quam dum anima inclinaretur, suscepit eam Dominus in sinum, sicque inter strictos amplexus suaviter illi blandiens decantavit: *Ad imaginem quippe DEI factus est homo*. Sicque oculos ipsius & aures, os quoque & cor, manus & pedes consignans, & ad singula dulciter decantando eadem verba repetens, per ipsa in anima divinam suam imaginem, similitudinem dignantissimè innovabat. Hinc feriâ quintâ, quâ mundani magis in crapula, & ebrietate solent sævire, dum manè post matutinas in coquina pulsaretur servis, laboraturis ad prælibandum, ista ingemiscens dixit ad Dominum: Heu me! mi Domine, quàm manè surgunt homines ad infestandum te cibo: Ad quod Dominus blandè quasi subridens dixit: Noli ingemiscere, charissima, quia hi, quibus modò pulsatur, non sunt de numero illorum, qui contra me crapulæ serviunt, quia per hanc prælibationem ipsi vocantur ad laborem. Unde & ego delector in eorum cibo: quemadmodum quis delectatur in refectioe sui jumenti, quod pabulo pascit ad ministrandum sibi. *pag: 400.*

III. *Capite 15.* Sabbato præcedente Dominica: *Ego mihi* (quæ est quinquagesimæ) dum se ab omnibus exterioribus abstractam in interioribus recollegisset, suscepta est in sinum Divinæ Benignitatis, ubi in tanta spiritus tranquillitate fruebatur in fluxionibus divinarum delectationum, quod videbatur cum Domino quasi disponere omnia Regna coeli & terræ. *pag: 402.*

Ad Missam Dominicæ Quinquagesimæ, dum per Introitum invocaret Dominum, Dominus hoc ipsum sibi usurpans (eo quod quasi propter instantis temporis exacerbationem, hoc sibi magis congruere videretur) dixit ad eam: sis mihi tu dilecta, in Protectricem, proponendo, quod si tu prævaleres, libenter me præmunire velles ab injurijs, quibus specialiter isto tempore infestor: quia tunc à cæteris fugatus pausare desiderans ad te confugi. *pag: 402.*

Capite 22. Dominicâ Judicâ, dum sub Missa legeretur in Evangelio: *Demonium habes*; ista medullitus super contumelia Domini sui commota, nec sustinens, ut dilectus Animæ suæ tam indebitè sibi objecta verba adverteret, ex intimo cordis affectu his verbis vice versâ ipsi blandiebatur dicens: *Ave vivificans gemma divina Nobilitatis. Ave immarcescibilis flos humana dignitatis* *JE SU* *amantissime: tu mea summa & unica salus.* Cui benignus amator more solito vicem dignantissimam recompensans, manu suâ benignâ mentum ejus apprehendens, seque ad ipsam blandè inclinans, auri Animæ ejus hæc verba suavissimo susurrio instillavit dicens: Ego Creator Redemptor & Amator tuus, per angustias mortis relictâ omni beatitudine meâ, acquisivi te.

Capite 25. In festo Cœnæ Domini, cum ad Laudes cantaretur Antiphona: *oblatus est.* ait Dominus: si credis me in Cruce oblatum Patri, eo quod ipse volui tali modo sibi offerri, crede etiam indubitanter, quod adhuc quotidie desiderem eodem

Idem amore pro quolibet peccatore DEO Patri offerri, quo me in cruce pro salute totius Mundi obtuli. Unde quicumque, (quamlibet gravi pondere peccatorum se senserit depressum) respirare poterit in spem veniæ afferendo DEO Patri meam innocentissimam Passionem & mortem. pag: 440.

IV. Octavo die Resurrectionis Dominicæ, dum in Evangelio legeretur, quòd Dominus Discipulis suis per insufflationem dedit Spiritum sanctum, istâ devotâ intentione Dominum orabat, ut etiam sibi suavissimum spiritum largiri dignaretur. Hinc insufflavit Dominus, & dedit illi etiam Spiritum Sanctum dicens: accipite Spiritum Sanctum in vobis, quorum remiseritis peccata remittentur eis; ad quod illa: Domine, quomodo potest hoc fieri; cum hæc potestas ligandi, & solvendi solis data sit sacerdotibus? respondit Dominus: cujuscunque causam tu per Spiritum meum discernendo judicaveris non esse culpabilem, ille certè innoxius apud me reputabitur; & cujus causam discernis esse culpam, reus coram me apparebit, quia ego loquar per os tuum. pag: 461.

Capite 35. Ante Festum celeberrimæ Ascensionis Domini, cum in psalmo: *Ad te Domine clamabo* in illo versu: *Salvum fac populum tuum Domine, & benedic hereditati tuae*, desideraret, ut Dominus largam benedictionis gratiam porrigeret super universam Ecclesiam; Dominus respondit: quid vis, dilecta mea, ut faciam, nam ego me tam dignanter modò in tuam dedi potestatem, sicut in patibulo Crucis Charitatis Imperio me Patri totaliter mancipavi! Unde sicut tunc contra placitum Patris nequivi descendere de Cruce, ita & nunc nihil aliud velle possum, quàm quod tuæ placuerit dilectioni; ergo quæcunque desideria ex Virtute Divinitatis meæ, tu cuilibet distribue largè. pag: 463.

Cum oraret: ut in die deliciosissimæ Ascensionis suæ sibi apud DEUM Patrem omnium negligentiarum ac defectuum su-

suorum obtineret emendationem. Dominus hoc benignus dedit responsum: Tu es illa amabilis Esthær, quæ incredibili pulchritudine oculis meis es gratiosa; pete ergo quod vis dabitur tibi. *pag: 469.*

Capite 49. In Festo Assumptionis sub Missa, dum Beatam Virginem oraret, ipsa ad invocationem sui exurgens, stetit in conspectu fulgidæ, semperque tranquillæ TRINITATIS, offerens pro ea merita placidissimarum dignationum earum, quibus ipsa in die Assumptionis supra omnem humanam, imò Angelicam dignitatem præparata Sanctissimæ TRINITATI summè complacuit. Sicque cum maxima blanditate, quasi cedens loco, innuit Animæ dicens: Veni electa, & sta in loco meo, cum omni perfectione virtutum, quibus ego aspectum semper Venerandæ TRINITATIS in mei placentiam inclinaui, ut & tu similiter, quantum est tibi possibile, complaceas ipsi Beatissimæ TRINITATI. *pag: 518.*

V. *Capite 62.* Dominicâ *Gaudete in Domino*, dum hæc Virgo esset communicatura & sub prima Missa quæ erat *Rorate* mœsta querulareretur Domino, quòd audire non posset Missam: pauperis suæ misertus omnipotens DEUS blandè ipsam consolabatur dicens: Visne, dilecta, ut ego ipse decantem tibi Missam? quæ statim rapta in spiritu respondit: etiam ô dulcor animæ meæ, hoc toto cordis affectu supplex oro. Et qualem Missam ait Dominus, delectat te audire? Respondit quamcunque tu cantare deliberas. Num inquit Dominus audire vis: *In medio Ecclesia?* respondit non. Cumque Dominus plures Missas sibi nominatim proposuisset, & illa nullam illarum desideraret, postremò requisivit ab ea Dominus: An Missam *Dominus dixit* delectaretur audire: quam cum similiter non postularet; dixit illi Dominus: Ego in singulis verbis Introitus bene possem te tali intellectu donare, ut exinde consolareris mirifice; illa verò intra se cogitante? qualiter hoc fieri posset, quòd

quod verba illius Introitus, solummodo DEI Patris Unigenito congruere viderentur. Dominus unà cum omnibus Sanctis inchoavit altà voce Introitum Dominicæ tunc instantis, dicens: *Gaudete in Domino semper*: in his verbis mirè eam incitans ad lætandum & delectandum in se, sedebatq; Dominus in Throno Regiæ Majestatis suæ & Anima procidens ad pedes ejus duleiter deosculabatur eos.

Reliquus totus & admirabilis processus totius Missæ legi potest loco citato. pag: 567.

Finito *Gloria in excelsis DEO* Dominus JESUS summus Sacerdos, & verus Pontifex exurgens, Animam dulciter salutando, decantabat, dicens: *Dominus vobiscum dilecta*; cui Anima vicem recompensans lætanter respondit: Et Spiritus meus tecum prædilecte. Ad quod Dominus cum maxima gratitudine, se inclinans, grates agebat Animæ pro eo, quod ipsa se ad hoc aptaverat, quod Spiritum suum cōnire potuit Divinitati suæ, cujus deliciæ sunt esse cum Filijs hominum.

Post dictum *Pater noster*, iterum innuit Dominus Animæ, ut oraret pro Ecclesia, cūque devotissimè oraret pro omnibus generaliter, & pro singulis specialiter, Dominus illam orationem in unione omnium orationum & operum sanctissimæ Humanitatis suæ Universalī Ecclesiæ communicavit cum tanto fructu, quantus unquam per aliquam orationem potest obtineri, dicens: oratio ista mihi modò per te oblata pro Ecclesia, erit ipsi incomparabiliter *salus salutum* superabundans pro sui sublimitate, sicut dicitur *Canticum Canticorum*. Tunc illa. Eja mi Domine, quæ jam debet esse Communio? cui Dominus blandè respondit; hoc non solum aures percipies cordis, sed etiam in omnibus medullis animæ suaviter persenties. Et advocans eam ad se, & in sinu suo delicatis eam stringens amplexibus, & osculis prædulcibus demulcens tantâ dignatione, ipsam suæ divinitatis virtute mirabiliter penetrando influxit,

eâmq̃ vice versâ retrahens, & in se transmutans, secûmq̃ unum efficiens beatificavit, quantum possibile creditur hominem fragili carne gravatum experiri posse. Et sic in tali unionē ipsam etiam sacramentaliter Sanctissimi Corporis & Sangvinis sui perceptione cōnivit. Dûmq̃ communicata esset, tunc Cantor Cantorum, imò Zelator ardentissimus suorum dilectorum penetrativâ sonoritate inchoavit: *Ecce quod concupi-vi jam video: quod speravi jam teneo; illi sum junctus in spiritu, quam in terra positus totâ sinceritate dilexi.* In illo verbo: *in terra positus* palam protestans, quòd omnes labores, tribulationes, & adversitates, quas pertulit in terris adeò singulariter pro salute hujus Animæ perfecit, quod si nullum alium totius suæ sanctissimæ conversationis, innocentissimæ Passionis, & amarissimæ mortis potuisset obtinuisse fructum satis sufficienter judicaret sibi satisfactum in tam præcellenti unionē, quam illâ horâ perfecerat in ista Anima. O inæstimabilis divinæ dignationis suavitas! quæ tam avidè desiderat delectari, in anima humana, quod omnem suæ dignissimæ Passionis & mortis dolorem judicat, recompensatam ex unionē unius, cui tam justissimè pro una gutta sui pretiosissimi Sangvinis jure obligatur totus Mundus. pag: 578.

CAPUT VI.

Ex Revelationibus Sanctæ Mechtildis.

I.

Libro 1. cap. 1. Cûm appropinquaret hora nobilissimi convivij, in quo anima B. Mechtildis JESUM dilectissimum per Communionem Sanctissimi Corporis, & Sangvinis suscipere debebat, audivit eum dicentem sibi: *Tu in me, & ego in te, & ego non deferam te in aeternum.* Illa autem nihil aliud

nd desiderabat, nisi laudem DEI. Tunc Dominus dedit illi Cor suum Deificum, in forma aurei calicis, mirum in modum exornati, ita eam alloquens: per divinum Cor meum semper me laudare debes. Et ulterius sic: vade & propina cunctis Beatis & Sanctis haustum vivum de corde meo, ut omnes ex hoc æternum inebrientur. Ivit demum hæc dilecta Domini, primò ad Angelos, tradens ei potum salutarem; illi verò non biberunt; nihilominus ex eo mirabiliter reficiebantur. Deinde venit ad Patriarchas & Prophetas, quos haurire jussit, dicens: accipite, quem tanto tempore desiderastis, & expectastis, & facite me etiam secundum vires omnes meas, ex intimo affectu eum desiderare, & diu noctuque eum solum suspirare. Postea venit ad Apostolos. Post hoc venit ad Sanctos Martyres: & dum ita circumisset universum Coeli Palatium redijt ad Dominum, qui mox ab illa recepit Calicem, & imposuit Cordi dilectæ suæ, & ita tota uniebatur DEO.

Capite 260. In festo S. Joannis Apostoli & Evangelistæ dato primo signo ad Matutinum videbatur sibi, quòd Infans JESUS instar decennis Juvenis sorores cum gaudio excitaret; simulque à se visus est sanctus Joannes in dormitorio stans ante lectum cujusdam personæ, quæ illum tenerrimè amabat. Præterea vidit magnam multitudinem Angelorum, qui omnes præsentés erant, ut candelis sorores ad chorum ducerent.

II. *Capite 261.* Cùm B. Mechtildis ægrotaret, vidit quædam, sanctæ itidem Vitæ in eodem Monasterio Monialis ejus Animam in conspectu Sanctissimæ TRINITATIS, quam DEUS Pater salutavit dicendo: *Ave dilecta mea*, quæ per exempla sanctæ conversationis verè dici poteris. *Lampas Ecclesiæ*, rivos fundens olei, id est orationum in totam latitudinem mundi. Tunc Filius DEI subjunxit, dicens: *Gaude Sponsa mea*, quæ justè diceris: *Medicina gratia*. quia diversis hominibus gratiâ privatis copiosior restituetur tuis precibus. Hinc Spiritus

rus Sanctus concinuit. *Ave immaculata mea*, quæ meritò *Nutrimētum Fidei* vocaberis: quia in omnium Cordibus, qui piè credunt divinæ operationi meæ, quæ in te non corporaliter, sed spiritualiter operor, fidei virtus nutrietur & stabilietur. Deinde DEUS Pater donavit illi de potentia sua, ut omnibus ex humana fragilitate paventibus, & non dum de divina bonitate plenè confidentibus tutelam præstaret securitatis. Spiritus quoque Paracletus contulit illi, ut ex fervore, suæ divinæ Charitatis tepidis calorem fervidum ministraret. Deinde Filius DEI concessit illi, ut in unione sanctissimæ Passionis & mortis suæ omnibus in peccato languidis conferret medelam. Tunc multitudo Angelorum & Sanctorum coram Domino ipsam honorificè elevantes, clara voce insimul resonabant. *Tu DEI saturitas, oliva fructifera, cujus lucet puritas, & resplendent opera.* In illo verbo *cujus lucet puritas* collaudabant suavissimam quietem quâ Dominus in ipsius anima dignanter quievit, & in illo verbo, *resplendent opera*, omnium ejus operum laudabilem, & puram intentionem. Hinc omnes Sancti altissimè intonabant, Antiphonam DEUS palàm omnibus. Sub Præfatione verò summæ Missæ iterato, velut novæ gloriæ indutus decore Floriger Sponsus JESUS, suavissimâ quadam blanditate, vultum sponsæ suæ, versus faciem suam tam directè convertit, quòd statum infirmæ recto tramite afflatu suo intrahere videbatur, oculosque suos Deificos ipsius opponens oculis ipsos mirificè perlustravit, sicque eam feliciter sanctificando futuræ beatitudinis gloriæ coaptavit.

Capite 12. Vidit sanctum Joannem quiescentem in sinu Domini & multitudinem Sanctorum circa Dominum, choreas ducentem, & CHRISTUM per sanctum Joannem laudantem.

Capite 15. Beata Mechtildis rogavit Dominum his verbis: Amantissime Domine & Frater mi.

Capi-

Capite 17. Orabat DEUM. O unice Amor, in quo maxime complacet tibi, ut ab hominibus agnoscaris! Cui Dominus in bonitate, quâ misericorditer hominem expecto, usque quoad poenitentiam convertatur. Insuper continuè cum ad me, meâ gratiâ traho. Cùm nullo modo voluerit converti, exigente justitiâ, oportet illum damnari.

III. Capite 33. Dominicâ Resurrectionis ostendit ei Dominus domum pulcherrimam, altam & valde latam, in aqua videbat alteram domunculam ex lignis cedrinis factam, intus argenteis & splendentibus laminis stratum; in cujus medio sedebat Dominus, & illa agnovit, quod domus hæc esset cor DEI, quod sæpius in tali specie videbat. Veterior verò domuncula significabat Animam. Sicut enim lignum cedrinum est incorruptibile, ita Anima est immortalis. Et Dominus dixit illi; ita in Corde meo clausa est Anima tua, & ego in Corde Animæ tuæ. Post hoc intravit Anima domum: cecidit ad pedes Domini, quam ille beneficentissimè elevavit, & in sinum suum reposuit, osculando eam ter dixit: hoc osculum datum est tibi ob meam Omnipotentiam, Sapientiam & inexplicabilem Bonitatem. Anima verò ob tantam bonitatem sibi à DEO exhibitam, obstupefacta, humili reverentiâ à Domino longiùs aliquantum stare volebat, quam Dominus sibi propinquiùs attraxit dicens: fave mihi, ut sim apud te, & fruere delicijs meis.

Feriâ 2. Paschæ, cùm legeretur in Evangelio: *Mane nobiscum Domine*; illa ait ad Dominum: ô dulcor unice, mane quæso mecum, quia dies vitæ meæ inclinata est usque ad vesperam. Respondit; ego tecum manebo, quâ Pater cum Filio, dividendo tecum Cœlestem hæreditatem, quam tibi meritus sum pretioso meo sanguine, cum omni bono, quod tibi operatus sum in terris 33. annis: hæc omnia tibi propriè dabo.

2. Tecum ero, qua amicus cum amico, & sicut homo, qui

fidelem amicum habet, ad illum in omni necessitate confugit, illi specialiter adhærens: ita & tu ad me, qui tibi sum amicus præ omnibus fidelissimus, specialiter in omnibus tutum habebis refugium, & invalidam te dimitte ad me, quia fideliter in omnibus juvabo te.

3. Ero tecum sicut sponsus cum sponsa, inter quos nulla potest esse divisio, nisi infirmitate disjungantur; sed si tu infirmaberis, ego sum Medicus peritissimus ab omni infirmitate te sanans, & inter nos nulla poterit esse divisio, sed æterna copula, & inseparabilis unio.

4. Tecum manebo, velut socius cum socio, quorum si unus grave portaverit Onus, statim alter onus ejus tollit, & cum eo supportat: sic ego omnia onera tua portabo tam fideliter, ut omnia tibi sint levissimè sustinenda. Tunc incidit menti ejus, quòd aliquando dixerit ei DEUS: ecce animam meam do tibi in sociam, & ducricem: illi omnia tua committe, & cum tristaris, illa te consolabitur, & in omnibus fideliter te juvabit. Et ait ad Dominum: Eja mi Domine, Vita animæ meæ, ignosce mihi, dux mitissime, quia tam nobilissimam sociam, heu tam rarò ad opera mea invitavi, nec ejus auxilium in omnibus; ut debui requisivi. Respondit: ego tibi indulgeo, & Anima mea tecum manebit, usque in finem vitæ tuæ: tunc suscipiet te in illa unione, quâ spiritum meum in manu Patris moriens in Cruce commendavi, & Patri meo Cœlesti te præsentabit.

IV. *Capite 35.* Cum B. Mechtildis procidens gratias ageret, CHRISTUS D. eam dignanter alloquens ait: *Surge Regina mea.* Ulterius rogabat DEUM, ut ad sui honorem & laudem communioni sanctorum faceret convivium; & mox vidit lautissimum paratum convivium, & Dominum viridi Nuptiali veste vestitum, quæ aureis Rosis ornata erat. Dum itaque convivium paratum esset, dixit Dominus: quis in hoc con-

vivio

Vivio musicum aget? quò dicto: accepit animam in manus suas, eamque totam quantam exhilaravit; ob quod omnes hospites novâ lætitiâ affecit, laudantes DEUM, quòd tam lætum se animæ demonstraret. Anima verò appressit sibi dilectum suum amplectendo & basiando intimo amore, duxit illum ad mensam ad hospites, & vidit inexplicabilem claritatem & admirabilem splendorem exeuntem à facie Domini qui illuminabat cœlestem aulam, & inexplicabili gaudio mensæ assidentes implebat.

Lib: 2. Cap: 5. Contristata vice quâdam B. Mechtildis solito more confugit ad Dominum, ipsi cor suum & voluntatem offerens; ità ut non solum hoc, sed etiam quæque pro ejus amore libenter sufferret adversa; ad quam Dominus dulciter se inclinans os suum roseum ei præbuit osculandum. Sentiens autem ipsum barbam non habere, cogitare coepit, si aliquod præmium à DEO Patre pro evulsione barbæ in Passione accepisset, cui Dominus: Ego Creator Universorum non indigens ullo præmio: sed tu es præmium meum, te Pater meus Cœlestis in sponsam mihi, & filiam donavit.

Lib: 3. Cap: 11. Cùm B. Mechtildis semel in Orationibus pro operibus nostræ Redemptionis gratias ageret, & pervenisset ad illum Articulum, ubi gratias egit, quòd pro nobis dignatus est baptisari, dixit illi Dominus: Ego te volo baptizare, statimque rivus magnus de Corde DEI cum impetu erumpens Animam ejus abundè perfudit. Et Dominus adjecit: Ecce & ego volo esse Matrina tua, & sicut Matrinæ instruunt filio-
las suas, ità ego te tria docebo. Primum est, quòd omnia quæ pateris adversa tam mentis, quàm corporis non tibi, sed mihi, ac si ego in te omnia sustinerem; patiaris. Secundum est ut omnia beneficia hominum, sive ministeria cum hilaritate & gratitudine suscipias, ac si non tibi sed mihi ab eis impendantur. Tertium est, ut totaliter mihi vivas, ità ut omnia opera tua non
tibi

tibi, sed mihi adscribas, ac si nihil aliud sis, quàm vestimentum, quò ego opertus omnia opera tua in te & agam & disponam.

CAPUT VII.

Exempla variarum cælestium blanditiarum diversis Sanctis exhibitarum.

I.

Postquam duarum Sanctarum Virginum Gertrudis & Mechtildis Cælestium ejusmodi favorum feraciores vitas speciminis causâ percurrimus, de reliquo carptim cælestium familiaritatum exempla colligemus aliqua.

Joannes Bollandus Tomo I. 7. Aprilis, paginâ 688. c. I. n. 4. narrat à sanctissima Virgine DElpara datam fuisse Beato Hermano Joseph, tunc etiamnum puero, licentiam cum puero JESU colludendi ipsa sedente, & ludos pueriles familiariter inspectante. Et paginâ sequente refert n. 6. Cùm die quâdam secundum consuetudinem suam, Ecclesiam B. Virginis Puer intrasset, & in asperitate brumali nudis incederet pedibus; eundem puerum Mater Misericordiæ in tanto frigore corporali à cordis fervidi devotione minimè timuisse videns, consuetâ sibi misericordiâ mota est, & ei statuto coram facie sua ait: quare in tanto frigore nudis incedis pedibus? Respondit puer: non habeo calceos. Sciens autem beata Mater, parentes pueri ejus familiari inopiâ laborare, dixit illi: vade ad lapidem istum (& lapidem digito demonstravit) & sub eo quatuor denarios invenies, quos tolles, & cum eis tibi calceos comparari facies. Credidit puer fidelis, & paruit jussis, & sicut fuerat demonstratum inveniens, ad altricem suam Beatam Matrem redijt cum denarijs lætabundus. At illa subjecit: quotiescunque aliquo indigueris, tabulis aut alijs necessarijs; ad locum

ac-

accedes eundem, & invenies denarios, quibus tua nécessitas sublevetur. Addit Author Coævus apud Bollandum citatus: quis hæc referre, scribere, credereve præsumeret, si non paucis diebus ante mortem suam, piâ calliditate inductus à nobis, hæc nobis confessione propriâ prodidisset?

Idem Author de eodem recenser: Cùm se ad nomen *MARIÆ* in terram prosterneret, odorem omnium florum & aromaticum solitum esse sentire. Quin & sub Cantico: *Benedictus. Fragrantiam incensi*, quod à duobus Angelis videbat ministrari. *Ibid.*

Et post pauca: Frequentius illi audivimus accidisse, quòd cùm in una abside Monasterij Orationibus esset ac Meditationibus occupatus, vocem Domine & amicæ charissimæ in opposita parte stantis audivit, & non dubius, à qua vocaretur (vocem enim vocantis ex consuetudine frequentata cognovit) transivit ad illam, & in aliquo secretiori loco pariter confidentes, ille Beatæ Matri de statu suo singula requirenti respondit, & ab ea vicissim, quæcunque voluit, requisivit.

Et rursus *pag. 694.* Phlebotomatus aliquando hic Juvenis speciosus incautè se ad dormiendum super lectulum reclinavit, ita ut super brachium vulneratum totò corpore periculosè jaceret, & si illum Procuratrix fidelissima non munivisset, salutem corporis, quam sanguinis minutione quæsierat, cum ipso forsitan sanguine minuisset. Sed non passâ, ut suus unanimis vitæ detrimentum casu tam miserabili pateretur (quod leviter potuerat dormiendo) festinanter advenit, & jam dormitantem, verbis hujuscemodi excitavit: Cautelam tibi adhibere curato, quia minùs cautè subtus te minutum brachium posuisti, & post hæc brachium vulneratum beatis manibus apprehendens, docuit dormiturum, quomodo & illud, & totum corpus, nè ali-quod pateretur periculum, collocaret.

Non possum hic mihi imperare, ut à plusculis lineis ab-

stineam calamum, quæ Author vitæ Beati hujus, narrationi suæ intexit; quoniam & ad propositum meum magnopere, serviunt, & ijs fortassis ex parte facient satis, qui, quidquid in Vitis Sanctorum inveniunt, quod nequeas imitari, confestim rejiciendum existimant. Sic igitur ille: Antequam cetera contexam, necessarium puto, commonere Lectorem, nè cuncta, quæ de Fratre nostro proponimus explicare, in consequentiam sibi trahat: magis autem sciat, quædam sic esse scripta, ut ea tantum miremur in eo, qui fecit, & qui ea per hominem facere voluit, Dominum collaudemus. Quædam verò scriptis noverit exarata, ut ea etiam imitemur. Si enim ea, quæ super Naturam sunt, Sanctorum exemplis incitati voluerimus imitari, non ædificationem, quam quærimus, sed ruinam potius inveniemus in illis. Item si in Sanctis omnia, quæ de eis scribuntur, tantum voluerimus admirari, in nostra tarditate manebimus, & sine fructu nostro Sanctorum scribentur & legentur exempla. Proinde Lectorem moneo, diligenter attendere, & discernere sapienter, quid admirandum, & quid imitandum sit: ut in admirandis, Deo mirabili in Sanctis suis digna gratiarum actio referatur; in imitandis verò per exempla virtutum vita legentium emendetur. Hæc ille. Sed nos redeamus in viam, & singulares favores, blanditiâsque Cælestes, cum Hermanno, tum alijs etiam Sanctis utriusque sexus exhibitas carptim prosequamur.

Igitur Hermannus, jam sæpe nobis nominatus, nocte quadam mediâ, cum in consuetis Orationibus vigilaret, stans in extremis sedibus juxta stallum Abbatis, respexit in medio Chori Virginem inenarrabilis pulchritudinis, regali schemate insignitam. Duo juxta illam Juvenes pulcherrimi dextrâ levâque videbantur assistere, quos esse Angelos intellexit. Unum porro Angelorum audivit ad alterum sic dicentem: Cui desponsabimus Virginem istam? Respondit alter: Cui desponsamus

semus eum, nisi Fratri præsentî? At ille: Veniat ergo, inquit. Vocatus processit cum pudore verecundiæ. - - Verùm ubi usque ad præsentiam Regina processit, unus illum Angelorum affatus est: Oportet, inquit, ut tibi hæc puella clarissima desponsetur. - - Cùmque cœpisset in obediendo morari manum ejus dexteram Angelus apprehendit, & manui sacratissimæ Virginis copulavit, & sub his verbis desponsationem perfecit: Ecce, inquit, hanc Virginem tibi trado in Sponsam, sicut fuit desponsata Joseph, ut nomen Sponsi pariter cum Sponsa accipias: & de cetero Joseph erit nomen tuum.

Idem, cùm semel Beatissimam Virginem sibi videretur videre, puerulum pulcherrimum inter brachia bajulantem: Charissima, da mihi filium tuum, inquit. Protrahens illa petentem aliquantulum (puto, ut magis accenderetur desiderium) tandem illi summè desideratum porrexit Infantem, & adjecit: Porta filium meum, sicut ab Sponso meo Joseph portatus est in Ægyptum, &c.

Ibidem refertur, quomodo ob modicum quendam torporem DEI para illi se exhibuerit in forma vetulæ, rugis habens faciem deformatam. Quam cùm vidisset, & ex voce agnitam stupens interrogasset: Tunc es, ô Rosa? sic enim ex nimia familiaritate eam vocitare consuevit. Respondit: Ego sum. Stupefactus ille: Quæ causa est, ait, quòd tam vetulæ vultum tibi assumere voluisti? Cui illa: Talis, ait, oculis tuis appareo, qualem me in corde tuo delegeris retinere. Ego enim jam tibi vetula facta sum. Ubi enim est repræsentatio gaudiorum meorum? ubi ille fervor devotionis, &c.

Cùm aliquando minùs cautè procedens pedibus offendisset, cadens in faciem, duobus dentibus orbus est. Quos cùm evulsos manu portaret, occurrens ei Mater Misericordiæ: Quid, inquit, habes? Cui ille, quantum potuit loquens: dentes, ait, meos perdidî, cruciòrque dolore. At illa subjecit:

Da mihi ipsos dentes evulsos. Quos cum de manu dilecti accepisset, in gingivas sangvinolentas illos reposuit locis suis, & omni dolore remotò, vulnerèq; sanatò dentes solidavit eodem, ut nullum omnino doloris, aut vulneris vestigium remaneret. Hæc omnia de Hermanno Author Vitæ apud Bollandum.

Dignæ sunt admiratione Cœlestes blanditiæ, quas idem Bollandus ad diem Januarij IV. in vita B. Angelæ de Fulginio memorat. Sed quia multæ in idem recidunt, sum parcus in delibandis. Do verba spiritûs Sancti ad Ipsam, in itinere, inter speluncam & viam versùs Assisium: Filia mea, dulcis mihi; filia mea, templum meum; filia mea, delectamentum meum; diligas me, quia tu es multum dilecta à me; multò plus, quàm tu diligas me. Et sæpius dicebat mihi, inquit illa: Filia & Sponsa dulcis mihi. Et subinferebat: Ego diligam te plus, quàm aliquam, quæ sit in valle Spoletana; ergo postquam ego collocavi, & pausavi me in te, modò collocante in me, & quiesce in me, &c. que ibi sequuntur.

Et infra: Dicebat mihi iterum: Filia mea, dulcis mihi, ama me, quia tu es multò plus amata, quàm tu ames me. Amata mea, ama me, &c. Iterum dicebat mihi: Amata mea, Sponsa mea, ama me; tota enim vita tua, comedere & bibere, & tuum dormire, & omne tuum vivere, totum placet mihi, si diligas me, &c.

Iterum anima mea dicebat: si tu, qui ab initio mihi locutus es, esses Spiritus Sanctus, tu non diceres mihi tam magna; & si tu esses in me, deberet esse tanta lætitia in me, quòd ego vivens non possem sustinere, & respondit mihi: Nunquid esse vel fieri potest, nisi sicut ego volo? Ideo non do tibi aliam lætitiā, neque plus, nisi sicut habes; Et ego jam minus istā dedi alij, & ille, cui dedi, jacuit non sentiens, nec videns, &c.

Et quomodo viderit Deum, describens: Si quæras, inquit, quid

quid vidi? Vidi veracem rem, plenam Majestate, immensam, quam nescio dicere, sed videbatur, quòd esset bonum. Multa autem verba dulcedinis dixit mihi. - - Filia mea, dulcis mihi, multò plus quàm ego tibi; templum dilectum meum, tu habes annulum mei amoris, & es arrhata à me, & de cetero non discedes à me, & benedictionem Patris & Filij & Spiritus Sancti habes tu, & consocia tua.

Et: Quodam tempore eram in Oratione, & elevata in Spiritu; loquebatur mihi DEUS verba multum placibilia, & plena; & respiciens vidi DEUM mihi loquentem. Si autem quæras, quid vidi? dico, quòd vidi ipsum, & aliud nescio dicere, nisi quòd videbam unam plenitudinem, unam charitatem, de qua sentiebam in me tantum implementum, quòd ego nescio dicere, nec scio dare aliquam omnino similitudinē, &c. Dixit autem mihi DEUS: Filia amantissima, dulcis mihi, omnes Sancti Paradisi habent ad te specialem amorem, & Mater mea similiter, &c.

B. Veronica de Binasco, uti ad diem XIII. Januarij refert Bollandus ab Angelo omnem psalmodiam, modumq; decantandi Officium didicit. Vidit CHRISTUM formâ pueri, albis indutum, medium inter geminos Angelos inambulantem super altariolo. Bis ei panis ab Angelo delatus est, & ultimò trienniò vitæ, singulis diebus jejuniorum, unicò pane candidissimò & recenti, mediocrisq; magnitudinis ab Angelo delato contenta, cibum omnem fastidiebat. Infusa est ei à DEO scientia legendi & intelligendi Psalterium Davidicum. Octo dierum spatiò Officium Romanum, seu Breviarium orare, ab Angelo est edocta; & plenè ab eo instructa, habuit cum nonnunquam in eodem recitando socium, alternando cum illo versus, Responsoria, & Antiphonas. Composuit librum dicente Angelo. Ægrotanti adfuit Angelus, Matutinasque horas unà persolvebant. Peractâ Divinarum laudum particu-

lâ aiebat Angelus Domini: Quiesce paululùm Filia, quoniam acerrimò dolore langvens summo opere affligeris. Mutuò quoque fabulabantur pro Angeli beneplacito. Mos itidem fuit Divino Nuntio subinferre: Eja Filia, Divinum Officium prosequamur!

Eidem die Nativitatis Dominicæ Anno 1495. CHRISTUS in raptu significavit, dicens: Hodie, Filia mea, præclarissimò munere te prosequi volo. Quod quale esset, evenus probavit. Virgo enim ad sensus regressa, quidquid in Romano Breviario legitur, ejus se memorem esse dignovit. Quamobrem opus nunquam illi fuit librò uti, aut in Officiorum mutationibus, aut in quovis discrimine ad Divina Officia spectante.

Festo Paschæ CHRISTUM gloriosum sibi conspicuum intuita, elevata est ad usque cellæ testudinem, & jussa, altiori voce Antiphonam: Regina Cœli lætare, Alleluja. Svavissimè concinuit. Alia vice horam Nonam Breviarij cum CHRISTO recitavit.

Eadem toto anni circulò à Nativitate B. Joannis Baptistæ per singula solennia præterlabentia, Cælestes Sanctorum eorum, qui tunc colebantur, colloctiones habere promeruit. Et ijs quidem diebus, qui Sanctis pluribus dicati sunt, unâ ipsi Mentes illæ apparebant, colloquebanturque dulcius. Quæ quidem apparitiones sub obtutibus corporeis Virgini Veronicæ evenerunt.

Nocte Sabbati infra Octavas Corporis CHRISTI, Hostiam è manu Angeli accepit. Et aliâ vice ab ipso CHRISTO, Hostiâ videl; ipsâ ad eam veniente. Et alias etiam sæpe ad eam particula Hostiæ à sacerdote divisæ ad eam delata est, fenestram Chori subintrans, & in os ejus volitans.

Vita Henrici Susonis est mera Cœlestium hujusmodi illecebrarum Historia. Accidit in Conversionis ejus initio, ut
ferijs

ferijs D. Agnetis V. & M. factò prandiò in chorum ingressus, solus illic maneret, stans in infimis dextri chori sedibus. Erat tum gravi quodam angore correptus, & acerba, quâ laborabat, Cruce & afflictione. Cum autem sic staret omni consolatione destitutus, nec quisquam illi adesset, rapta est anima illius, sive in corpore, sive extra corpus; viditque & audivit, quod nec omnes possint lingvæ eloqui. Erat id formæ ac modi expers, & tamen formarum ad modorum omnium jucundas in se continebat oblectationes. Cor illius & æstuabat desiderio, & tamen exsatiabatur: animus plane jucundus & amœnus erat: Optio & appetitus in ipso consopitæ erant. Tantummodo aciem mentis intendebat in lucidum, ac illustrem illum fulgorem, &c. &c.

Aliâ vice, dum calentissimis sapientiæ Divinæ desiderijs ex lectione in triclinio ad mensam audita conceptis accensus esset, ea tali schemate visendam se illi præbuit. Longè supra ipsum ferebatur in columna Nubis, residens in throno eburneo, micans instar Luciferi, & tanquam Sol lucens in virtute sua. Corona ejus erat Æternitas, amictus felicitas, sermo suavitas, complexus omnis boni satietas. Propè erat, & longè aberat; sublimis & humilis, præsens & occulta; familiarem se præbebat, nec tamen apprehendi poterat: excelsis Cœli fastigijs erat altior, & tamen abyssò profundior: attingebat à fine usque ad finem fortiter, & disponebat omnia suaviter. Dum elegantis puellæ specie teneri videbatur, mox pulcherri mi Juvenis præ se ferebat imaginem. Nonnunquam ceu artium omnium peritissimam se præbebat amicam, cunctis amabilem. Itaque dulcissimè ad eum se convertens, & coimter, non tamen sine quadam Divina Majestate, illi arridens, benignè his cum verbis affata est: Præbe, fili, cor tuum mihi. Dum verò vestigijs illius advolutus, medullitus ac humillimè gratias illi egit, &c.

Accidit aliâ vice, ut quieti se traderet, audirêtque in anima sua mirificum resonare clangorem. Hæc autem verba personabat: Stella MARIA Maris hodie processit ad ortum. Cantio isthæc supra naturam in illo percrebuit, ita ut totus animo exhilaresceret, unâq; ipse cantaret. Cùmque cantum hunc pariter absolvissent, ineffabili quodam modo circumplexus est, audivitq; vocem ejusmodi: Quantò me amabilius amplexaris, & purius sinè materiæ admixtione oscularis, tantò in æterna claritudine mea jucundius & amabilius circumplecteris, &c.

Manè quodam, Spiritus Angelici aliâ voce dulcissimum illud Responsorium: Surge, illuminare Jerusalem: Psallere, coeperunt, cantusque ille ineffabili suavitate in anima ejus resonabat, &c.

Sedens aliquando quietis captandæ causâ, in visione sibi in exteram Regionem transferri videbatur, & ecce Angelum suum à dextris sibi placidò ac serenò vultu assistere conspexit. Subitò exsiliens dulcissimum illum Angelicum Spiritum concludens circumplectebatur, animæq; suæ quàm potuit arctissimè & amicissimè adstringebat, ita ut nullum inter ipsos medium intercedere putaret, vocèq; lugubri, plenò cordis affectu ait ad Angelum: ô suavissime Spiritus, qui mihi Divinitus es assignatus Custos & Consolator, obsecro te per amorem illum, quò ferves erga DEUM, nè me deferas. Respondit ei Angelus: Non es ausus fidere DEO? Crede mihi, tantâ te benignitate & charitate ex omni Æternitate complexus est DEUS, ut te non velit unquam relinquere.

Aliâ vice cum Cœlicis Spiritibus in visione familiariter degens, ab uno ex illis splendidis Cœlestis Patriæ Principibus petijt indicari sibi, quâ ratione DEUS secretò in sua anima commoraretur. Et ait ad eum Angelus: Age jam hilariter in te ipsum respice, & vide, ut DEUS cum amante anima tua
suum

suum exerceat ludum. Nec mora: introrsus respiciens, vidit corpus suum eo locô, ubi est cordis sedes, velut crySTALLUM perspicuum fieri, atque in ipso cordis sui meditullio æternam sapientiam amicabili schemate quietissimè residere, & juxta eam assidere animam suam Cælesti beatitudine fretam, atque ejus lateri suaviter innixam, illiusque strictam amplexibus, & Divino cordi appressam, inibique in ecstasi & absorptione quadam inter amantissimi Salvatoris ulnas delitescentem & obdormientem.

Aliàs passus est mentis excessum, videbatúrque ipsi quidpiam luminis ex ejus corde emergere, respiciensq; vidit in corde suo Crucem auream multis gemmis intertextam, in quibus mirò decore nomen JESU luculenter apparebat.

Narratur ibidem, quomodo Angeli eum præsentia suâ recreaverint, unusque, qui dignitatem Archangeli præ se ferre videbatur afflicto dixerit: Missô cordis dolore notis socium te adjungas oportet, nobiscúmque Cælestes ducas choreas. Simul autem per manus eum trahentes sibi junxerunt. Mox Juvenis (id est Angelus) antè dictus, dulcissimam de puerulo JESU cantilenam exorsus est, istam videlicet: In dulci Jubilo &c. Cernebátq; Henricus magnâ animi voluptate beatos illos Spiritus, altissimos & elegantissimos dare saltus. Præcentor ille noverat cuncta optimè moderari, cujus præcinentis dulces moouolos cæteri prosequébantur, canentes ac saltantes cum cordis jubilo. Non erant autem choreæ istæ, quales sunt hujus vitæ: sed erant Cælestes quidam effluxus & refluxus in vastissimam Divinitatis abyssum. Hujus generis innumeræ illi Cælestes consolationes aliquot annis præstabantur.

Quidam amicus DEI in visione perspexit, cum Henricus accessisset ad altare, Missæ sacrificium facturus, clarissimæ charitatis ornamentô illustrari, Deique gratiam roris instar in illius animam delabi, atque unum illum fieri cum DEO. Simul

autem per plures à tergo illi adstare parvulos formâ venustâ & amabili, cereos ardentes manibus gestantes circa altare, alios post alios, eosq; singulos expansis brachiolis, quàm possent dulcissimè illum complecti, & suo pectore applicare. Cùmq; Sanctus ille homo, qui hæc in spiritu vidit, dixisset ad Angelos: Quid sibi vult, quòd Fratrem hunc tam suaviter estis amplexati? dixerunt illi: Frater iste nobis longè charissimus est, & multa nobis cū illo intercedit consuetudo & familiaritas, &c.

Delectabatur admodum pomis Henricus. In visione igitur quadam videbatur sibi pomum porrigi à quodam cum his verbis: Accipe, & frue; id est enim, in quo tu voluptatem aucuparis. Respondit ille: se non nisi in æterna sapientia delectari. Contra ille eum mendacij arguit, dicens immoderatiùs eum oblectari pomis. Quamobrem pudore suffusus totò bienniò poma nec attigit quidem. Quibus non sinè desiderio evolutis, cū sequenti anno poma malè crevissent, ità ut Fratribus non apponerentur, atque ipse quamvis non sinè acri ac multiplici concertatione id à seipso extorqueret, nè quid privatim in mensa de pomis expeteret, rogavit DEUM, si quidem ipsi placeret, ut pomis vesceretur, ut cunctis Fratribus subministrari faceret. Quod etiam ità evenit. Manè factò, homo quidam ignotus multos illi Cænobio numos recentes attulit, eà solâ conditione, ut poma illis mercarentur. Fecêrunt id Fratres, & longò temporis spatiò poma illa eis ad usum satis fuêre. Tum demum coepit Frater iste pomis gratò vesci animò, &c.

Ipsis Bacchanalibus ante Completorium in hypocaustum calidum sese receperat, quò se calefaceret; admodum enim frigore & fame laborabat: sed longè infestior illi sitis erat, quam tunc patiebatur. Cùmq; cerneret alios vesci carnibus, & potare vinum, se interim fame & siti confectò, intus se moneri sentiens foras mox abiit, miseransque seipsum ex alto corde tra-

xit

xit suspiria. Eâdem verò nocte in visione sibi esse videbatur in valetudinario quodam, audivîque foris Cœlestem concini cantilenam, tantâ vocis suavitate, ut nulla possit cithara eam æquiparare melodiam: eratque vox tanquam pueri Scholastici annorum duodecim. Igitur oblitus Henricus cibi ac potûs, melodiam hanc arrectis audiebat auribus, dicens magnô cordis æstu: Ecquis cantat foris? equidem in terris nunquam melos ejusmodi percepi. Respondit illi eximiâ formâ Adolescens, qui tum fortè aderat: Noveris melodem hunc puerum, tibi modulari, teque hoc cantandi officiô spectare. Ait Henricus: ô si mei meminerit DEUS! Oro te Cœlice adolescens, jube illum amplius canere. Rursus ergo cantare cœpit altissimô vocis sonô, absolvitque tres integras planè Cœlestes cantiones. Quibus finitis puer ille, ut ipsi videbatur, per aëra accessit ad domicilij illius, ubi erat Henricus, fenestras, porrexitque ei ramusculum rubentibus admodum confectum granis similitudine fragorum. Tulit autem adolescens antè dictus ramusculum è manibus pueri, lætusque eum obtulit Henrico cum his verbis: Age mi Frater & Consodalis, cape rubros hos fructus à tui amantissimo Domino, hoc ipso speciosissimo adolescentulo, Regis æterni Filio, quem hætenus cantantem audisti, tibi dono datos. O quantopere is te amat! His auditis, Frater ille præ gaudio, rubore vultûs infusus, excepit hilariter sportellam cum fructibus, aitq;: ô me felicem, cui tam optatum contingit munus à præclaro Divinôque hoc adolescentulo, quod me sanè non potest non perpetuâ animi exultatione afficere. Versusq; ad adolescentem, reliquosque beatos Spiritus illis præsentés: Amici, inquit, charissimi, æquûmne est, gratiosum hunc & Cœlestem juveniculum à me impensè amari? meritò profectò mihi diligendus est. - - Convertitque se ad memoratum adolescentem, & ait: Dic mihi charissime, rectène tibi sentire videor? Subridens ille suaviter: Planè, in-

quit, rectè sentis, ac jure illum amare debebis, qui te præ multis alijs benignius spectat & amat. Quamobrem ingenti illum fac amore prosequaris. - Ait ille: Faciam id libentissimè, precòrque ut mihi illius visendi copiam obtineas, quò gratias illi agam pro ipsius præclaro munere. Perge, inquit adolescens, ad fenestram, & prospice. Aperuit ille fenestram, & vidit illic puerum Scholasticum tantæ venustatis, ut non sit illi unquam quisquam visus similis: cùmque vellet per fenestram ad illum egredi, blandè illi se inclinans suaviter illi benedixit, & è vestigio ab ejus evanuit oculis. Sicque visio finita est. Redditus sibi ipsi, gratias egit DEO pro ejusmodi Divinis Bacchanalibus ipsi præstitis.

Cùm vice quadam siti admodùm cruciaretur, in visione contuitus est Virginem Matrem cum puerulo JESU, eà specie, quâ erat septennis, in terris ad se venire, eundemque infantulum habere in manibus poculum aquâ plenum, paulò majus, quàm erat scyphus Cœnobio usitatus. Porro idem poculum Beatissimam Virginem in manus sumere, atque ipsi offerre, ut biberet. Quod ille accipiens avidè bibit, & sitim omnem profligavit.

Aliàs potum ex ipso DEI paræ corde manantem accepit, eoque abunde recreatus cùm esset, mansit ei in ore quasi molle granum quoddam nivei coloris, cujusmodi manna fuit; idque in veritatis argumentum diu satis in ore retinuit.

Nocte quapiam Virgo cum puerulo suo ei per visum apparuit, habens in manu elegans poculum aquâ plenum. - Deinde Mater Filio obtulit poculum, rogans ut illi benediceret. Fecit ille ut Mater voluit, & confestim aqua transijt in vinum. Dicitque: Sufficit jam; nolo ut deinceps Minister meus hoc genus exercitij prosequatur, ut vinò abstineat. Utatur posthac vinò ob naturam suam exhaustam & confectam. Hac igitur illi potestate factâ à DEO, deinceps, ut antè solebat, vinò usus est.

Ad

Adhæc apparuit vice aliquâ Dominus JESUS cuidam amico suo, ferens pyxidem in manibus. Interrogatus ab eodem Sancto homine, quid sibi vellet illâ pyxide: Ex hac, inquit, mederi volo Ministro meo Henricum designans) ægre affecto. Et ecce ipsum adiit Henricum, apperuitque pyxidem, recenti plenam sanguine, eodem tinxit, sive linivit cor Henrici, ad eum ut prorsus cruentum redderetur: deinde manus, pedes, cunctaque ejus membra eodem sanguine perunxit. Tum Sanctus ille homo, qui hæc in visione conspiciebat: Quamobrem, ait, Domine, ita eum sanguine consignas? Visne illi quinque vulnerum tuorum similitudinem imprimere? Respondit Dominus: Ita nimirum: siquidem cor, totamque naturam ejus cruce & afflictione signabo, eumque adhibitis medicamentis curabo, faciamque eum hominem juxta omne cor meum, &c.

Aliquando contigit, ut peteret à DEO festa sibi Bacchanalia exhiberi, eò quòd nollet ea à quavis mortali creatura recipere. Itaque à sensibus subductus videre sibi visus est Dominus JESUS intrantem eam formam, quam erat, cum esset triginta annorum, ut ipsius expleret desiderium, & Cælestia ei Bacchanalia, efficeret. Accepit autem idem Dominus JESUS scyphum vinò plenum in manus, obtulitque eum tribus illis ad mensam, inibi assidentibus, alij post alium. Primus haustò vinò cecidit, viribus destitutus. Alter nonnihil debilis effectus est. Tertius nihil sensit incommodi. Quid verò hæc sibi vellent, Dominus Henrico exposuit, indicans illi, quid inter inchoantem, progredientem, & perfectum hominem inierit, & ut ei diversâ se ratione gerant in Divinæ suavitatis affluentia.

Vita B. Margaritæ de Cortona plena est hujusmodi favoribus ad XXI I. Februarij: Ibidem.

Nec solum illius, sed aliorum, aliarumque multarum, & Virginum præsertim DEO dicatarum, his delicijs ita pleni sunt fasti, ut pluribus abstinendum existimem, nè rerum mole ultra

modum hoc Caput excrescat. Ex una Divæ Catharinæ Senensis Vita, Authore Raimundo Capuano, Ordinis Prædicatorum Magistro Generali, in compendio nonnulla subjungo.

Sexennis circiter erat hæc Virgo, cum DEO ab ipsa infantia favoribus insolitis eam præveniente, vidit illa supra Caput Ecclesiæ Fratrum Prædicatorum, in aëre quendam pulcherrimum thalamum, in quo Salvator Mundi Dominus JESUS Christus in Throno Imperiali sedebat indutus Pontificalibus vestibus, habens, in capite tiaram, seu Monarchicam & Papalem mitram; erantq; cum eo Apostolorum Principes Petrus & Paulus, & beatissimus Evangelista Joannes. Ipse verò Majestatis suæ oculos defigens in eam, amorosissimè subsidens, extentâ dexterâ super eam, munus ei benedictionis suæ æternæ, factô signô salutiferæ Crucis, juxta Prælatorum consuetudinem, contulit gratiosè.

Cum autem adultior aliquantò fuit Catharina, & in Ordine Religioso jam constituta, ita cœperunt Visiones Cœli ac revelationes multiplicari, simulq; ipsa frequentari à Domino in tantum, ut vix duo possint homines inveniri (scribente sic & affirmante ejusdem Confessaria memoratô Raimundô) qui tam assiduam Conversationem haberent ad invicem, quam continuam habebat hæc sacra Virgo cum Sponso suo, Salvatoreque omnium Domino JESU Christo. Et cum vice quadam Raimundus ex ea audiret tam ingentia, & alijs insveta, dubitarétque proinde, & in quibusdam intra se cogitaret: Putásne sint omnia vera, quæ dicit? Sicque cogitans in faciem loquentis intenderet oculos, subitò facies ejus (Catharinæ nimirum) transformata est in faciem viri barbati, qui fixus oculis Raimundum intuendo, nimium terruit: eratq; facies oblonga ætatis mediæ, non prolixam habens barbam coloris triticei, Majestatemq; præferens in aspectu, ex qua se manifestè Dominum ostendebat: nec alia pro tunc ibi facies discerni poterat, præ-

ter

ter illam. Cùmq; pavefactus Raimundus exclamaret: O quis est, qui me respicit? Respondit Virgo: Ille, qui est. Quo dictò mox facies illa disparuit, & facies Virginis, quæ prius discerni non potuit, clarè apparuit.

Lectionem latinam Officij Canonici divinitus & absque hominis instructione Catharina didicerat, ut ibidem in Vita refertur. Veniebátq; ad eam frequenter Dominus, cum eaq; confabulabatur, sicut amicus cum domesticissimo amico: intantum, quòd ipse, & ipsa simul dicebant psalmos, ambulando per cameram, sicut solent duo Religiosi vel Clerici simul Officium dicere. O inaudita à sæculis nostris familiaritatis ostensio, exclamat Viræ Scriptor. Et tamen incredibile esse non debet, inquit idem, si abyssum Divinæ bonitatis attentè penses. Cuilibet enim Sanctorum suorum confert aliquod singulare, quòd præ alijs gaudeat se possidere, ut non tantum in omnibus, sed in singulis Sanctis appareat suæ supermaximæ magnificentiae altitudo, dicente Propheta: secundum altitudinem tuam multiplicasti filios hominum. Secundum altitudinem propriam. Filios hominum multiplicat Dominus: quia sicut ad sensum apparet, quòd quilibet homo ab omnibus alijs per aliquod singulare dissimilis est, sic quilibet Sanctorum ab omnibus alijs per aliquam singularem gratiam separatur. Quapropter mirandum non est, si aliquid de aliquo dicitur, quòd de alijs nequaquam inventum est. Ità ipse.

Cùm sanctò desiderio laboraret, habendi & attingendi perfectum fidei gradum cœpissetque idipsum à Domino petere. Dominus sic ei respondit: Desponsabo te mihi in fide. Cùmq; Virgo sæpe ac diu orationem eandem repeteret, & Dominus responsum semper idem reiteraret, accidit, ut tempore, quo Quadragesimalia jejunia appropinquabant, & homines vanum festum quodammodo ventri celebrant, Virgo sacra in suo reclusorio, vultum Sponsi æterni orationibus & jejnijs quæ-

queritans, præfatam Orationem instantissimè replicaret. Cui Dominus: Quia vanitates omnes propter me à te abjiciendo fugisti, & contumptis delectationibus carnis, in me solo tui cordis delectationem fixisti; hoc in tempore, quo ceteri de domo tua in suis gaudent convivijis, ego festum Desponsationis animæ tuæ solemniter celebrare tecum decrevi: & sic, ut promisi, mihi te sponsare volo in Fide. Adhuc eò loquente, apparuerunt Virgo gloriosissima Mater ejus beatissimus Joannes Evangelista, gloriosus Apostolus Paulus, sanctissimúsque Dominicus Pater suæ Religionis, ac cum his omnibus David Propheta, psalterium Musicum habens in manu sua. Quò supersavissimè, ac sonorè pulsante, Virgo Dei Genitrix, Virginis dexteram sacratissimâ suâ cepit manu, digitosque illius extendens ad Filium, postulabat, ut eam sibi desponsare dignaretur in fide. Quod DEI Unigenitus gratissimè annuens, anulum protulit aureum, habentem in circulo suo quatuor Margaritas, ac adamantinam gemmam superpulcherrimam, etiam suâ summitate inclusam. Quem digito annulari dexteræ Virginis, dexterâ suâ supersacrâ imponens: Ecce, inquit, desponso te mihi Creatori & Salvatori tuo in Fide, quæ usquequò in Coelis tuas mecum nuptias perpetuas celebratis, semper conservabitur illibata, &c. His dictis disparuit visio, sed semper remansit annulus ille in digito, non quidem secundum visionem aliorum, sed tantum secundum ipsius Virginis visionem.

Semel existente ipsâ in Ecclesia, venit quidam pauper ad eam, & petivit pro DEI amore suis necessitatibus subveniri. At illa nihil habens ibi, quod pauperi posset dare, quia non confverat aurum vel argentum deferre; movebat pauperem, ut præstolaretur, quousq; domum ipsa rediret, quia libenter ei, & copiosè de his, quæ ibidem essent, eleemosynam faceret. Sed pauper ille: si habes, inquit, aliquid, quod mihi des, hîc illud peto, quia tantum expectare non possum. Illa verò nolens

lens eum desolatum dimittere, cogitavit anxia, quid pauperi elargiri valeret, unde necessitati ejus subveniretur. Et cogitanti occurrit Crux quædam argentea parvæ quantitatis, quæ juxta consuetudinem solet inferi filo inter nodulos illos, qui Pater Noster vulgariter appellantur. Hoc igitur Sacra Virgo habens in manibus, & ibidem Crucem parvam argenteam, filum festina fregit, & eam pauperi cum lætitia est largita. Qui cruce habitâ totus jucundus abcessit, nec à quoquam alio eleemosynam petijt, ac si tantum pro illa Cruce habenda venisset. Nocte autem sequente, orante juxta suam consuetudinem Virgine Domini; apparuit ei Salvator Mundi, habens Crucem illam in manibus, ornatam multis lapidibus pretiosis, & dixit: Agnoscisne Crucem istam filia? Et illa: Optimè agnosco, sed non fuit apud me itâ pulchra. Et Dominus: Tu mihi hanc hesternâ die dedisti, cum charitatis, & largitatis amore, qui amor designatur per hos lapides pretiosos. Et ego promitto tibi, quod in die Judicij, coram Universo Angelorum & hominum conventu, tibi eam talem, ut vides, ad tui culmen gaudij præsentabo; nec occultabo, nec occultari permittam opus Misericordiæ mihi per te impensæ, in die, quâ Patri Misericordiam & Judicium decantabo. His dictis disparuit, mentem Virginis ad similia præstandum accensam relinquens.

Aliàs horâ Tertiaram jam in prædicta Ecclesia decantatâ, cum domum rediret, apparuit Dominus Sponsæ suæ in forma Juvenis denudati, & pauperis ac peregrini, & petivit, ut sibi pro DEO succurreret aliquo indumento. At illa, jam ad Misericordiæ opera solito plus accensa: Exspecta, inquit, charissime, paululum hic, donec de capella illa revertar, & statim tribuam indumentum. Retrogressâq; ad capellam, unde descenderat, tunicam, quam sine manicis sub exteriori tunica, propter frigus interius deferbat, per pedes sociâ juvante deposuit, cautè pariter & honestè, ac cum grandi lætitia pauperi

tribuit. Quâ receptâ, repetit plus ille pauper, & ait: Eja oro Domina, ex quo mihi de indumento laneo providistis, ut de lineis tegumentis etiâ mihi providere velitis. Quod illa libentissimè annuens: Veni post me, inquit, charissime: quia quod petis, integraliter tibi dabo. Præcedit igitur Sponsa, & Sponsus ignotus subsequitur. Illâque paternam domum subintrans, accedit ad locum, ubi panni linei patris & Germanorum erant reconditi: acceptâq; camisiâ unam, & femoralibus, lætanter pauperi tribuit. Sed ille his habitis, adhuc non destitit à petendo, sed obsecro, inquit, Domina, quid faciam de tunica, ista, quæ manicas ad brachia tegenda non habet? Date mihi aliquas manicas, ut recedam à vobis totus indutus. Quod illa percipiens, in nullo attediata, sed magis accensa, domum circumivit, & diligenter quærit, si possit aliquas manicas invenire. Casûq; reperit tunicam ancillæ domûs patenæ novam, quam necdum induerat, ad perticam pendentem, quam festinè depouens, & manicas indè velociter dissuendo auferens, gratiosè tribuit pauperi prælibato. Quo pactò adhuc instat ille, & ait illi: Ecce Domina, induistis me, de quo vobis gratias referat ille, pro cuius amore hæc fecistis: Sed ego habeo adhuc socium unum, qui degit in hospitali, qui etiam multum indiget vestibus, si velitis ei vestem aliquam mittere, deferam ei ex parte vestra libenter. Cui illa: Verè charissime, si liceret mihi absque hac tunica remanere, libentissimè traderem eam tibi: sed quia non licet, nec aliunde nunc possum vestem habere, rogo, ut non hoc grave feras: superlibenter enim tibi quæcunque petis tribuerem. At ille subridens: Bene, inquit, aspicio, libentissimè mihi dares, quæcunque posses. Bene vale! Nœcte autem sequenti Salvator Mundi ei oranti, manifestè in forma pauperis illius apparuit, habens tunicam illam sibi per Virginem datam in manu, ornatam Margaritis, & vernantibus, ac coruscantibus gemmis, & dixit: Agnoscisne, dilectissima Filia, tunicam istam? Quæcùm dixisset se ipsam agnoscere, sed non

tali-

taliter dedisse eam ornatam, subintulit Dominus: Tu mihi tunicam hanc heri cura tanta liberalitate dedisti, meque nudum tam magna cum charitate vestisti, ut frigoris ignominiae poenas a me fugares. Et ego nunc tibi vestem, invisibilem quidem hominibus, sed tibi etiam sensibilem de meo corpore sacro dabo; quâ uterque homo tuus ab omni nocivo frigore protegetur, quousque cum gloria & honore coram Sanctis & Angelis suo tempore vestietur. Moxque de vulnere & cicatrice proprii lateris, suis sacratissimis manibus, traxit quandam vestem coloris sanguinei, undique radios emittentem, ad mensuram Virginalis corpusculi, quâ Virginem eisdem Sacris manibus induit, dicens: Hanc vestem tibi trado dum es in terris, cum ejus effectibus, in signum & arrham vestimenti gloriae, quô tempore suô vestieris in Coelis. Sicque disparuit visio. Hujus autem muneris adeo fuit efficax gratia, non modò in anima, sed etiâ in corpore Virginis sacrae, quòd ex illa hora nunquam plures tunicas hiemali tempore deferret, quàm æstivò: sed unicâ super tunicellam interiorem tunicâ exteriori contenta semper fuit. Imò vestem illam semper sentiens super se, nullâ aliâ tunicâ se indigere, etiam ad sensum percipiebat.

Cum ægrotæ cujusdam Ministerio se addixisset, & vice quadam, graveolentissimam aquam, quâ abominabile infirmæ ulcus laverat, ad sui ipsius heroicam victoriam ebibisset; apparens ei Dominus cum S. vulneribus, & factum ipsius apprimè dilaudans: Ego inquit dabo tibi potum, qui omnem excedit humanam naturam & consuetudinem; applicansque dexteram ad collum Virgineum, & ipsam ad lateris proprii vulnus approximans: Bibe, inquit, filia, de latere meo potum, quo anima tua tantâ suavitate replebitur, quòd etiam in corpus, quod propter me contempsisti, mirabiliter redundabit. Quæ sacratissimo vulnere os applicans, ineffabilem inde potum hausit per moræ parvæ spatium, tam avidè, quàm abundè.

Alia adhuc supeditat hujus Virginis Vita mirabilis, quæ brevitatis, gratiâ diffusè se isthuc inferi non patiuntur. Quælia sunt, quòd Sponsus æternus ei vice quadam latus sinistrum aperuit, cor inde abstraxit, & Catharinam sinè corde reliquit; aliâ autem vice Cor, suum sanctissimum, in cordis ablati locum benignissimè es dignatus inserere. Quòd idem Christus Virginis dexteram clavò mira quadam ratione perfoderit: Aliàs eidem stigmata quinque impresserit, invisibilia quidem, sed tamen dolorem causantia: Aliàs etiam visibiliter Catharinæ conspicuus, ei Sacram Communionem sub Missæ sacrificio, flagrantissimè desideranti, particulam Hostiæ conspectu sacerdotis ablatam, ut ipsa sumeret, & communicaret, porrexerit. Et alia. Ex quibus omnibus & ante enumeratis illud clarè conficitur, non tam exoticas esse Marinæ nostræ de Escobar, Cœlestes illecebras, ut paria, aut etiam fortassis majora favorum; Divinorum exempla jam antè in Ecclesia DEI erga varias DEO dilectas animas haudquaquam exstiterint: DEO se his modis communicante cui vult, & quantum vult; & manum suam minimè abbreviatam, diversis temporibus erga varios homines extendente, ut alij habeant, quod admirentur, & laudent Magnalia ejus, qui facit Mirabilia magna solus; quod erat hoc tractatu demonstrandum.



